

近代中國史料叢刊第十三輯

沈雲龍主編

霆

軍

紀

略

陳

昌撰

文海出版社印行

雷廷軍紀略

國朝龍興以索倫滿洲兵威天下平準回平金川猶然其用鄉勇自平川陝教匪始至粵捻之亂而鄉勇戰蹟益著迄於今不衰川陝之役帥鄉勇立功名者推蜀人羅壯勇公粵捻之役湘淮兩軍踵起名將林立而其百戰百勝自成一隊者尤推蜀人鮑君春霆蜀固多將材哉然川陝之役賊蹤所至不過五省軍數不過十萬其用兵不過七年粵捻縱橫十六省僭竊十三年兩軍相搏所驅役動以數十萬計鮑君自廣西應募大小更數百戰洵爲胡文忠曾文正兩公所知言之於

朝卒平悍賊獻馘告成君遂筦軍符執穀璧爲

天子虎臣其勲名遭際蓋眎羅壯勇爲尤盛也余以同治乙丑仲冬參預機務越月而君有嘉應之捷於是東南肅清移其軍勦捻踰年而君謝病歸遂未得與君相見其後監修方略觀曾胡二公奏疏敘君臨戰號勇之狀意必喑噫叱咤力足裂犀兕之革而曳九牛之尾及余庚辰釋服再典樞密會有防海之役

特詔起君於家卽拜湖南提督君聞命亟赴乃得一執手於朝堂則固恂恂然儒將也君言官守備時胡公更其字春霆

以霆名軍不忘胡公也嘗欲推爵讓胡公以章其以人事君之美事雖不果然君之拳拳知己識地過人宜乎勲業爛然出

中興諸將之右矣余以時艱方亟謂君久厯兵事豈嘗有所述作如戚少保紀效諸書足以留貽後來者君唯唯謙不敢承而他日君之鄉人陳大令昌以霆軍紀略示余宋滕達道嘗爲孫威敏征南錄專表汚功藍鹿洲居藍廷珍幕中因作平臺紀略大令所紀上輯方略下采曾胡二公奏議年經事緯敘次頗不蕪雜亦君之達道鹿洲矣雖然余微惜大令之

成書過早而益堅君勇退之懷也方今時局艱危

聖人宵旰徵召老成勤思將帥殆無虛日昔馬伏波年六十猶據鞍顧盼以示可用陶桓公鎮廣州以西北未平輒朝夕運甓勵志勤力君之齒猶未也報

國之志宜眎前人而亟然則盱衡世事此豈吾輩銘鍾刻石時哉大令旣游余門其以余言致之鮑君安知時會所遭不如明馬端肅之有三記

國初固山貝子之有功蹟諸錄乎抑余聞當勦粵逆時軍中賊中咸稱多鮑寔軍有記而多忠勇殉節陝西其戰事自


國史外遂無有搜輯傳之者吁可慨也

光緒八年歲次壬午三月二十一日高陽李鴻藻

霆軍紀略者余同年陳世五儀部為今
湖南提督一等子奉節鮑公作也鮑公
於咸豐中以霆軍之名震宇內如古所
稱龍城飛將者雄威赫、婦孺咸知而
其乘機決勝略亦在、可為後世法即
古握奇陰符龍韜中鈐之祕何多讓焉
不有載言何以傳信世五同年爰取綱目
編年之體大書不注自公從戎以迄撤兵

凡若干年書成昇余讀之余雖江淮草
木亦若見之於勁風振槁時也他日者
鮑公勲業且將震古燁今世五珥筆紀
事以誅金管之采者亦復相須於多病
焉世有吾甫安可至張仲卦光緒辛
巳秋九月阮望

賜進士及第翰林院脩撰教習庶吉士
元和陸潤庠跋



霆軍紀略凡例

一西蜀山川雄秀智勇魁奇之士代產其閒故華陽國志
稱巴有將蜀有相 國朝奇才應運蜀中人士先後以
武略顯者如三等威信公岳襄勤鍾琪一等昭勇侯楊
忠武遇春尙已此外曾叨易名 盛典如順康閒之鎮
遠將軍李壯敏芳述韓勤毅良卿韓果壯勳岳敏肅昇
龍雍正閒之楊襄壯天縱乾隆閒之岳莊恪鍾璜本勤
毅進忠三等壯烈伯許昭毅世亨許壯勇文謨譚恭懋
行義嘉道閒之羅壯勇思舉桂壯勇涵何襄勤占鼇諸

君子亦其尤著者也迨粵匪倡亂如張武壯必祿向忠
武榮羅壯勇王斌虎忠壯坤元劉剛愍存厚謝忠愍子
澄馬武烈天貴張確愍萬祿周忠壯天受周武壯天培
周威毅天孚張忠壯王良蔣勇果王龍楊威肅旂楊忠
勤鼎勲江提軍長貴王勇毅萬釗黃廉訪鼎雷提軍正
綰馬提軍德昭志節勲名各具不朽而以前浙江提督
今湖南提督一等子奉節鮑公超爲最顯於時曾文正
公所謂苦戰功高一時名將無出其右者也嘗欲輯李
公以下至近世諸君子戰功事實倣曹能始蜀中人物

志之例都爲一集曰蜀將錄因事狀尙待搜採未敢率爾操觚近於曹署餘閒先將鮑公事蹟述爲一編曰霆軍紀略

一鮑公之軍起自湘楚其以主將名字名其營亦沿楚軍例也惟自成軍以後聲威浸盛人數遞增將弁勇丁蜀人不少故咸豐十年以後大帥督撫書牘中時曰鮑軍時曰霆軍蓋以別於湘楚各軍也迨同治五六等年大帥督撫奏疏及所奉疊次諭旨中俱將霆軍與湘軍淮軍並列言之是鮑公所部雖未立有川軍蜀軍之名

亦不得徑稱爲楚軍矣當時旗幟號衣俱署虎勇字樣
今名此書不曰楚軍恐混淆也不曰鮑軍嫌標榜也不
曰虎勇避習氣也惟震軍二字屢見於奏牘及諭旨
內因以震軍紀略名篇

一此篇用編年體大書以提要分注以紀言仍參用紀事
本末體使支幹分明血脈貫通

一鮑公乃生存之人尙待論定若由秉筆者口中加一推
美之詞縱極切當亦嫌標榜今將欽定剿平粵捻各
方略及胡文忠公遺集曾文正公奏議書牘中關涉震

軍者撮要探入凡 兩朝之 廟謨大帥之方略俱可
考見其屢蒙 天語褒嘉如曰忠勇性成曰忠勇堪嘉
曰謀勇兼優曰謀勇素裕曰驍勇善戰曰勇略出羣曰
深諳將略調度得宜曰勇略過人所向克捷曰勇敢異
常厥功甚偉曰勇敢善戰各軍倚以爲重曰謀勇兼著
屢立奇功爲江皖諸軍之冠曰破數萬賊衆如摧朽拉
枯曰所向大捷屢復名城曰賊衆聞風膽落膚公立奏
曰聲望素著曰素著聲威曰戰功卓著實爲國家干城
之選曰所向有功非尋常統兵將領可比曰朝廷畀以

干城腹心之寄與尋常將領相待不同等語閩臣得荷
一言已爲榮幸至大帥疆臣奏疏中稱許鮑公之詞尤
不一而足既分見於篇中各節何庸另加擬議

一曾文正公嘗言做部搭羅李鮑外間有文人敘其戰績
已與當時實事迥不相符因此竊疑古人之書多裝飾
成文而不可以盡信云云此編所據以 欽定方略爲
主間採胡曾兩公書牘兩公皆鮑公舊帥親歷行間其
言無不確實其書久已刊行海內眾論翕服今凡採入
處均照原文不敢竄易一字此外馳箋候賀者多頌禱

之詞未可據爲定論絕不攔入免涉浮夸當時盛稱霆軍威名者多謂同時將領中往往因賊情緊急輒權樹霆軍僞幟或詭爲鮑公告示沿途張貼以惑賊志而定軍心甚或賊於戰敗後訶知其實整隊復來奮力鏖鬪適值霆軍果到賊竟不支因此益畏霆軍霆軍非捲旗出隊賊必不與交鋒又據降將之言向在賊中常侍諸僞王飲僞王於席間接閱軍報知某起官兵至而豪飲歌呼如故若無事然或一閱軍報而手顫齒擊不能舉箸交頭附耳若有祕商而不可令帳外聞者則必鮑軍

將至也蓋僞王等恐搖奪衆心故以鮑軍之至爲諱而左右則已望色而知之又賊中相詬詈輒曰會見汝出遇鮑軍也又有謂杜文秀之退回大理老巢亦係誤傳鮑公先聲所致文秀曾密遣其黨至蜀擬向鮑公乞降未果此等傳聞無問確否總近虛誇故此篇絕不涉及至所傳賊中歌謠亦足證霆軍聲威然其辭多鄙俚未經概從屏絕以歸矜慎

一楊忠武公年譜載主帥文襄公福康安忠毅公額勒登保相待之不同魏默深嘗辨其誣鮑公自統陸師始隸

胡文忠公後歸隸曾文正公左公宗棠李公鴻章皆鮑公同時共事之人同治甲子以後左李兩公先後督師鮑公亦嘗受其節度其時已榮膺五等自成一軍此書於調度機宜悉遵方略等書採錄而一時大帥羣帥相得益彰之處不贊一辭免啟後人紛辨

一軍興以來各路兵勇譁潰變之事不一而足同治四年霆軍西征之營在湖北金口潰變曾文正公奏稱該軍積勞太久立功最多將卒以屢勝而驕又以無餉而怨又憚萬里遠征之苦又值主將回蜀之時其致變之

故與別軍迥不相同等語持論最爲平允此篇將金口
潰變及上杭索餉始末據事直書以免久後傳聞失實
一同治五六年冬春之間秦楚兩省俱迫待霆軍往援因
值督師大臣交替之際致調度如舉棊不定霆軍幾於
無所適從迹涉遷延屢奉 嚴旨訓飭鮑公此時得專
摺奏事顧但以進退不能自主動與賊左爲恨而於
廷旨及大帥督撫函咨未嘗訴辯一詞蓋其所處甚難
而用心亦良苦此篇於前後所奉 溫嚴各旨依次敬
錄以見功臣名將必經磨勵而成至鮑公永隆河大捷

後因傷病奏請離營 廷旨疑之及聞其病勢沈重乃
疊加 恩獎 賞假賜復 諭令慎重醫治並飭督師
大臣俟其病痊加意聯絡以副始終成全之至意既又
許其回籍調治仰見 聖天子明見萬里體恤功臣名
將絕不强以所難前後 諭旨亦敬錄於篇以著鮑公
千載一時之遇若置 嚴旨不錄則鄉野未窺 國史
不免傳聞異辭妄生論議鮑公心迹反爲不彰矣
一 霆軍勦辦髮捻未嘗敗衄惟同治元年秋閒鮑公離營
在蕪湖養病而古隆賢等股以數十萬之眾乘勢圖犯

甯國大營時軍士疫疾死亡過半曾文正公檄令霆軍將領宋國永等以三千病羸之卒禦賊於新河莊損折勇丁數百及再出隊亦不利然俱能如法收隊而回未致潰敗及鮑公病愈回營遂一戰而肅清甯郡此論旨所謂甯國雖偶爾小挫鮑超謀勇兼優必能支持者也篇中據事直書免蹈誇功諱敗陋習

一楊果勇侯芳自訂年譜於部曲及同事諸人皆附注其籍貫官閥用意甚爲公厚李公鴻章嘗奏稱鮑某營中驍將甚多沈文肅公奏稱霆軍中驍將著名者不可勝

計曾文正公奏稱鮑某所部各營官多係著名驍勇又曰霆軍諸將皆百戰餘生此書旣名霆軍紀略則鮑公部下將士皆得因事附見以存其人惟籍貫官閥驟難盡考止將姓名及苦戰事蹟襍見於敘戰各條中其臚列將領營官姓名如命某人某人攻某路之類皆同治三年五月以前有曾胡集中原疏可考者也其但舉一人而以等字該之者則三年五月以後無奏報原稿可憑而但照方略刪繁就簡之文敘錄者也戰狀或詳或略亦職是之故

一咸豐六年以前未有霆軍名目而鮑公實已苦戰數年同治七年全撤霆軍以後鮑公舊部如仁字營之勦捻匪備海防擢勝營之平台番霆慶霆匯等營之屯戍江南福建皆謹守霆軍家法甚著聲績此書自道光三十年鮑公隨征廣西起爲霆軍溯其源也宋唐孫諸人軍事皆分年互書爲霆軍衍其緒也其霆軍舊將開府建牙分鎮各省而未立有營名者不書

一霆軍戰事旣多先後保舉大小文武員弁約以萬計茲將每次捷聞後所奉諭旨敬錄於篇其隨摺保獎各

名卽因之以見至彙案保獎同治元二年以後人數較多蓋其時軍事方殷 朝廷甄錄無遺霆軍所部下至什長無不積保官階遇有苦戰不能不按名開敘其勢然也茲將同治六年永隆河一案遵照 諭旨全錄俾閱者知當日保案大概餘不臚列以省繁冗其陣亡傷故者前後數千人篇中隨事附見其無公牘可考者姑闕之

一霆軍或與別軍同辦一事則分注中必帶敘別軍以昭公允若將別軍徑從抹煞則嫌於伐善攘功但詳略之

閒不令喧賓奪主其提綱處當鮑公在水軍爲營哨時多以水師獲勝某處克復某處爲文及鮑公爲陸軍統領則概以鮑公克復某處會克某處爲文

一遷軍苦戰十數年立功八九省同時各路賊勢變遷軍情利鈍今隨時隨地牽連及之庶閱者了然於當日之時勢而羣帥之勲勞節概亦可互見其略卽遷軍之實迹益以相形而著

一篇內遇有遷軍部將雖位躋專閫亦直書其名以示別於主帥此外帶敘諸人或名或不名良由脫藁時旣多

信筆抄錄付梓時又倉卒失於校勘以至體例未能畫一並非有意抑揚輕重於其閒閱者諒之

一鮑公自同治三年冬籌備出關事宜奉 旨准其專摺奏報以後遇有摺奏皆係鮑公自出機杼其關係緊要機宜者每口授具疏頃刻數百千言此篇將其前後奏稿隨事載入但節其首尾例語而於正文不增減竄易一字以存其真

一故事武職大員單銜具疏自稱奴才與旗籍臣工一例而 欽定勦平粵捻各方略於滿漢文武臣工奏疏則

概以臣字爲文此篇所錄鮑公各奏稿謹遵方略一例
稱臣

一此篇所紀霆軍戰蹟皆據奏報公牘其一切臨機應變
料敵設奇以及軍中瑣事之可傳者應俟搜訪確實附
入續編至霆軍之戰守曾文正公目爲一家法門今將
其練陣練心練耳目練技擊紮營拔營行隊臨敵接戰
督陣選將馭將簡卒收降馭降將調度別軍各法及馬
步營制餉章略紀於第十四卷同治七年全撤霆營一
條分注之後

一曾文正公嘗奏稱鮑某平定東南無役不從實爲第一著名驍將又云名位勳勞以鮑某爲最著李公鴻章亦奏稱鮑某戰功實冠諸將之上然恩遇亦復逾恆計勦平髮捻諸武臣先鮑公而得子男爵者有李公臣典蕭公孚泗後鮑公而得男爵者有劉公銘傳鮑公則於爵封世職賞穿黃馬褂賞戴雙眼花翎外因奪情而蒙賞銀營葬者一次因病而蒙賞人蔭者一次因捷聞而蒙賞搬指荷包等物者二次年終蒙賞御書福字及銀錠食物各件者五次俱照公牘隨時載

入篇內謝摺亦錄一次以概其餘庶有志功名之士閱此益激發忠義焉

一曾文正公楊公岳斌皆鮑公主帥亦恩師也胡文忠公傾身結納聯爲昆弟之交而鮑公實師事之且締造靈軍者也篇中遇此三公陞遷除授之大者或附書或特書不敢從闕庶有當於鮑公感恩知己之心

一篇中有同此一事既見於奏疏中又兼錄大帥函咨者良以公牘私函言各有當皆足以證當日事實此篇之作欲使後之秉筆者據爲底本故甯詳毋略甯密毋疏

一此書既以備紀述者之採擇亦將使干城武夫之繼起者以是資其觀感得有所慕效以勵其材故純用公牘語取明淺易讀博雅君子毋以史例金石文字相苛也
一此書本截至光緒四年止凡十四卷正付剞劂間鮑公起任湖南提督奉 命募軍北上屯鎮海疆翊衛京圻時經一載雖無戰事而建威銷萌於時局不無關係爰將光緒六七兩年鮑公所奉迭次 諭旨及所上籌防撤防各奏疏以次編爲十五十六兩卷

霆軍紀略卷一

銅梁陳昌世五編輯

門人

吳樹棠

全校字

庚戌道光三十年鮑公隨征廣西

鮑公名超字春霆原字春亭官守備時湖北巡撫胡文忠公林翼稱其英鷲無匹特取如雷如霆之義爲改字春霆四川夔州府奉節縣人也嗣父昌元公爲夔州協標馬兵道光二十五年鮑公年十七歲考補協標守兵初鮑公因本生母劉太夫人食貧撫已成立嘗獨居深念冀博一材

武官職得升斗以養親於是專致力於營鎗技朝夕學之
每執鎗必以磚石懸前肘由一二斤重漸加至十餘斤久
遂百發百中補名糧時額缺一而同與考者六十人經將
官營并數次揀校而去留之鮑公厯試皆第一因得入伍
居久之竊自忖曰吾技雖精僅一夫之勇耳因取說部所
傳雲臺凌煙諸將相及郭汾陽岳忠武事蹟時時招文士
講說一入耳卽識其詞不忘並悟徹當日成敗得失之故
用是益慕古人忠盡之名豔羨將帥號令風雷之象毅然
欲折衝千里炳績旂常矣上年九月湖南新甯土匪李元

發滋事大府調兵剿捕久無功至是鮑公乃辭去名糧星夜馳往湖南冀得當以立功及抵湖南而元發已就擒適廣西賊匪洪秀全等起事於桂平縣之金田邨所謂長髮賊也固原提督向忠武公榮調任廣西率師會剿鮑公因入川勇營赴粵是爲鮑公隨征廣西之始

辛亥咸豐元年鮑公隨征轉戰至永安州

時大學士賽尙阿公督師而鮑公所隸營統將爲瞿威壯公騰龍官軍連擊賊於桂平之新墟雙髻山風門坳等處鮑公俱與焉是時諸路兵會剿粵西者惟鎮筸兵潮州勇

兩軍最號精悍鮑公每戰輒奮臂當先與鎮潮兩軍先鋒爭致果毅務出其前兩軍兵士皆服其勇敢敬禮有加已而賊由大黃墟竄陷永安州城官軍進逼之鮑公屢有斬獲

壬子咸豐二年鮑公回長沙養傷尋以功得獎

時長沙協營兵在粵剿賊忠武公搭齊布方爲弁備以鮑公奮勇敢戰於正月初一日拔補長沙協標守糧先是瞿威壯公於所部數千勇丁中獨記鮑公姓名而識其人每於屯營行隊時呼與語嘗指以謂諸將士此遠到材吾行

讓之出一頭地矣及隸長沙營搭齊布公尤器之二月十九日拔補戰糧時永安之賊潰圍東竄撲犯廣西省城官軍馳援三月十九日鮑公隨擊賊於文昌門外鏖戰縱火燒得元樓鮑公身受重傷驗列頭等六月十三日奉撤回長沙本營養傷八月賊圍長沙省城會鮑公傷初愈屢隨搭齊布公出城鵬勦斬獲獨多及長沙解圍經巡撫張公亮基獎給六品頂帶鮑公自粵而楚至是已大小數十戰矣

癸丑咸豐三年鮑公在長沙營操練

軍已各一咸豐二年三年

粵逆於正月十二日攻陷江甯省城踞之湘鄉曾文正公以丁憂侍郎幫辦湖南團練查匪事宜委搭齊布公兼領辰勇湘勇合同操練無虛日鮑公與其役勤奮備至

甲寅咸豐四年

三月鮑公入曾文正公行營

賊自踞金陵爲僞都後分股上竄江西湖北同時戒嚴湖
廣總督吳文節公文鎔正月在黃州陣亡於是賊氛益熾
竄陷岳州府遂由湘陰趨靖港陷甯鄉三月初二日曾文
正公率水師至岳州而所派陸軍王壯武公鑫敗於羊樓
砦賊乘勝上犯攻城甚急文正檄舟師登岸擊賊拔出城
中軍民退保長沙靖港之賊尋分股陷湘潭豎立木城以
阻援師二十八日搭齊布公率陸營至戰大捷先是文正

訪將才於搭齊布公以鮑公應至是文正調鮑公入營差遣嘗令其侍左右因益知其才甚器之

五月鮑公入水師營

曾文正公自率師東征軍情之利鈍不一至是回長沙重整水陸各營委鮑公爲水營哨官分帶長龍戰船一號隸右營楊公岳斌麾下是爲鮑公入水營之始時楊公名載福官千總

六月鮑公會擊賊於雷公湖勝之

自四月初二日水陸會克湘潭賊退出湖南境旋復上犯

陷華容並岳州踞之水師各營於上月十三日自省河進泊鹿角遏賊上竄之路二十七日進泊萬石湖二十九日夜分五隊進兵鮑公隨楊公岳斌埋伏雷公湖上游與各營合擊賊敗之燬其船百餘隻斃匪數百鮑公初入水營卽於船上樹鮑字旗一又於桅上標紅綾長丈餘以示異於別隊語人曰如此庶勝敗易識別勝則後繼者可乘勢接應敗則過無可諉且使賊尋戰誓不與俱生也每以單舸直擣數十百賊艘中堅縱橫出入賊艘皆辟易與各營哨會戰出隊必鼓棹在前收隊則停橈殿後楊公嘗於其

深入時以西洋遠鏡觀陣見紅綾船上礮火向官兵轟擊疑爲鮑公船又疑爲賊船比詢之乃鮑公憤後隊兵船退縮以礮向空回擊且擊且詈恫之使齊進乘賊也方其始立水戰功也收隊後營哨至曾文正公前稱賀者輒自詡云某某等俱怯獨我與鮑某奮力勝賊耳數十人先後入賀皆如此致詞文正知眾人皆詭附鮑公以自掩著益信鮑公功及召鮑公入避席握手勞之曰汝真善戰者汝不言功而眾人已代汝表著矣

七月水師克復岳州府城尋擊賊於城陵磯道陵磯等處連

破之

自有雷公湖之捷初一日五鼓各戰船駛至岳州城下而城賊已宵遁各營因分泊南津港君山一帶初三日復有下游賊駛至我師仍分五隊迎敵誘賊至城陵磯鮑公隨楊公由湖東沿岸斜擊彭公玉麟繞湖西抄其尾褚汝航往來策應賊三路皆敗我軍合隊進追由城陵磯螺山白螺磯等處直追七十餘里因天晚收隊時下游擂鼓台一帶尙有賊船數百號我軍於初六日卯刻迎風擊之鮑公隨楊公及彭公當前敵未刻抵道陵磯與賊鏖戰二時之

久勝負未分北風大作下游賊艘魚貫而上愈聚愈多我軍船僅六十餘號離南津老營已六十餘里勢甚危險楊公帶同鮑公駕三板艇穿入賊隊且戰且下約三四里許繞賊之背擲火礮火毬連燒其船十數隻下游續來之賊始退竄上游賊迴顧倉皇陣遂亂彭公等各營乘勢夾攻自未至戌鏖戰數時之久燒其船四百餘號斃賊二千生擒百餘奪船二十餘號十四日復隨楊公會搭齊布公陸軍同破伏賊於城陵磯夾洲等處賊雖屢敗尙盤踞於城陵磯下游一帶又將漢口賊舟數千傾巢上犯連檣數十

里十六日登州鎮總兵陳公輝龍督率所部戰船進剿褚
汝航夏鑾繼進彭公楊公酌撥長龍三板作聲援陳公至
城陵磯迎敵因風大舟膠爲逆船圍裏與褚汝航夏鑾同
時陣亡失去戰船多隻惟楊公與彭公完全無恙二十五
日湖北新添悍賊二萬人悉銳來岳經搭齊布公及羅公
澤南等連日會擊三戰三捷曾文正公以陸軍大戰賊勢
全注陸路飭水軍於二十九日乘隙進剿鮑公隨楊公爲
前鋒李公孟羣派船策應追賊至擂鼓台荆河腦等處大
破之捷聞奉

上諭楊岳斌著以守備用並賞戴花翎鮑超著以外委儘先拔補並賞戴藍翎

閏七月水師踏盡沿江賊營追賊至嘉魚縣境搜剿湖匪至金口復獲大勝

時搭齊布公及羅公澤南等陸軍掃平高橋賊壘尋會四川臬司胡文忠公林翼軍破賊於羊樓硎初二日曾文正公因陸軍追偪敗賊至江岸卽飭各營會擊鮑公隨楊公岳斌奮力追剿燒賊船百餘隻與各營會追將沿江二百里賊巢剿洗殆盡初十日以後連捷於黃蓋湖沅潭市六

溪口黃龍團等處乘勝直下金口扼據要隘捷聞奉

上諭楊岳斌著免補都司以游擊儘先補用鮑超著以千

總儘先拔補

八月水師獲勝於沌口尋克復武昌漢陽兩城

先是署湖北巡撫青麐守武昌省城數月糧盡援絕率飢
軍突圍而出城遂陷至是搭齊布公及羅公澤南等陸軍
克復崇陽初八日鮑公隨楊公岳斌往沌口巡哨與賊鏖
戰一時之久勝之曾文正公於十一日進駐金口規武漢
十二日親赴沌口相度形勢水師各營官皆率戰船隨往

鮑公隨楊公殿後賊分水陸抄撲擊敗之二十一日文正定三路齊下之策搭齊布公扼洪山羅公等率三千人及李光榮川勇三千攻東岸花園賊營魁玉楊昌泗四千三百人攻西岸蝦蟆磯賊營而水師從大江中路衝擊是日鮑公隨楊公將鹽關賊船二百餘號焚燬淨盡乘勝直下凡沿江木柵悉用火箭焚之攻破漢關賊營一座白沙洲金沙洲賊營二座遂進攻鮎魚套口縱火燒賊船又數十隻忽延燒其火藥大船斃賊甚眾我軍亦傷亡十七人收隊回泊沌口二十二日辰刻李公孟羣率戰船攻燒鮎魚

套未盡之船鮑公隨楊公與蕭捷三等衝過賊營直下塘
角時賊之被何越珽擊敗者揚帆下竄鮑公隨楊公等急
槳駛追翻出下竄賊船之前不片刻已近青山將輜重賊
船焚燒挂帆歸來又隨李公入漢焚其口內之船二十三
日水陸各營遂將武昌漢陽兩城克復捷聞奉

上諭曾國藩著賞給二品頂戴署理湖北巡撫楊岳斌著
以參將儘先補用並賞加副將銜鮑超著以守備儘先補
用時武漢二百里上下已無賊蹤惟襄河之賊船尙多由
夷后順流而下二十四日文正復飭水師會同荊州陸兵

迎鮑公隨楊公與各水營齊用火毯火彈每隔一船輒擲一火連焚二十餘里至羅家墩地方將賊船千餘號悉數燒盡四更始收隊回營

九月水師破賊於蘄州城下賊尋上犯復縱火盡焚之

武漢旣復總督楊公霈自德安入駐武昌曾文正公因統籌三路進兵分別水陸先後直擣下游自督水軍浮江而下鮑公隨楊公岳斌等領戰船先下分紮蘄州上游之蒜花壕道士洲漳源口一帶十九日楊公及彭公玉麟督同各營抵蘄州東岸賊出船百餘隻迎敵鮑公同各哨奮勇

轟擊賊船不支卽行下竄我軍以一半追赴下游趨至骨牌磯先後燒賊船三十餘隻斃匪無數以一半攻擊未開之船自午至酉酣戰數時將賊船六十餘隻燒盡轟斃逆黨甚多因北岸陸師未到州城未能卽復收隊回營時已五更計各營奪獲旗幟鎗礮共數百件而鮑公所獲視各哨獨多時各營分紮漳源口之兩岸與蘄州賊船相距二十餘里二十九日辰刻白人虎段瑩器等駕船往下游巡哨蘄城賊出船圍擊白人虎等卻退賊尾追十餘里直近老營楊公彭公會督秦國祿孫昌國等率船策應鮑公與

任星元李陞元傍南岸而行衝至蘄州以下之釣魚臺先
包賊尾然後逆擊而上將賊船裹入中段賊先乘順風上
犯倉卒不能退轉又見官軍上下圍抄遂紛紛棄船登岸
我軍自上而下者攢力以擊登岸之賊鮑公急商同任星
元等縱火焚釣魚臺賊船其上犯之船亦被我軍悉數焚
奪無得脫者

十月水師攻賊船於蘄州賊退至田家鎮尋攻斷橫江鐵鎖
至武穴焚賊舟蘄州賊棄城遁

時曾文正公以兵部侍郎銜辦理軍務水師自上月大捷

後賊船灣泊蘄州城下以岸上之鎗礮護之我軍屢次誘擊堅伏不出初八日彭公玉麟等鏖戰衝過賊營之下十五里鮑公隨楊公岳斌連日用小划誘賊出戰而以大隊圍擊初十夜賊乘大風挂帆遁去田家鎮者安徽門戶也賊用鐵鎖橫江護以小舟木簾密布鎗礮沿南北兩岸六七里賊壘礮臺環列以防我舟師之進逼十二日各營進紮見峰背去鎮僅九里楊公彭公與搭齊布公羅公澤南商定大舉破敵之策分戰船爲四隊十三日辰刻搭羅等陸軍六千人排列南岸助威水師各營依計出戰先擊退

救護鐵鎖之賊並以洪爐大斧且鎔且推須臾鎖斷官軍
衝過鐵鎖賊驚顧揚帆下竄各隊追及縱火焚之窮追三
十餘里至武穴復縱火將兩岸賊船延燒而上陸軍亦焚
其火藥大船鮑公復與李成謀等隨楊公率十餘舟鼓棹
窮追又三十里至龍坪時已三更至次日巳刻始行歸隊
通計各隊共燒賊船四千餘隻斃賊無算蘄州之賊失恃
遂於十四日棄城夜遁當水師迭獲大勝搭羅等陸軍亦
乘勢克復大冶興國攻踏富池口半壁山賊壘並渡江克
復廣濟黃梅自田鎮捷聞奉

上諭鮑超著賞加都司銜並賞換花翎

十一月鮑公在水營穿孝

楊公岳斌自上月追賊積勞致疾在武穴水營休養至是鮑公亦聞訃丁嗣父昌元公憂哀毀骨立堅請回籍終制而楊公與之相依爲命再三慰留鮑公不得已乃遵制在營穿孝二十七日念顯揚未遂父已見背痛不欲生從此臨敵殺賊益奮不顧身矣

十二月水營敗挫於湖口姑塘鮑公自武穴馳援力戰勝之初十日胡文忠公羅公澤南會同彭公玉麟等水軍攻湖

口賊營未克十二日水軍舢板等船百餘號駛入內湖焚賊舟數十號乘勝追逐至大姑塘以上賊復於湖口設卡築壘增柵以斷其後舢板船遂不得出其在外江者皆快蟹長龍諸大船運掉不靈賊以小艇乘夜來襲戰船被焚者四十餘號餘皆退回九江大營曾文正公飛調楊公岳斌率戰船赴援十七日楊公自武穴力疾往下游進剿行抵九江十五里之張家洲頭賊船已分兩路上犯楊公派哨官張榮貴等由新河下擊鮑公隨楊公由老河下擊澄海營何敦五亦隨剿鏖戰良久賊敗下竄追至老灣礮斃

數十名張榮貴亦獲勝追至湖口縣繞出老河兩路凡焚奪賊船三十餘號四更收隊楊公尋以病甚回籍鮑公仍泊武穴二十五日九江水軍被襲文正坐船陷於賊掉小舟馳入陸軍以免糧臺輜重各船駛至武穴以上戰艦亦多潰而上泝者於是水師有內湖外江之分在外江者李公孟羣彭公玉麟領之其入鄱湖者黃翼升蕭捷三等領之而鮑公所隸營屬外江

乙卯咸豐五年

正月外江水師上援武昌泊金口

時搭羅等陸軍挫於小池口楊公霈敗於廣濟退守德安
武漢戒嚴曾文正公派胡文忠公及王國才等回援武昌
而水師老營在九江城外者初四日遭風漂沈二十餘號
撞損數十號文正乃飭外江礮船全赴鄂省設厰修補而
自赴南昌修整內湖水師二十八日外江水師至武昌泊
舟城外連遇大風復多沈損乃上泊金口以扼賊上竄文
忠亦退駐金口

二月鮑公在金口水營

賊撲武昌省城於十七日陷之各軍馳援皆不及賴水陸竭力守禦上游得以稍安而鮑公是時以職在偏裨無緣躬率大隊痛挫賊鋒不勝憤恨

三月鮑公在金口助整水營尋會擊賊於漢陽勝之

時胡文忠公署理湖北巡撫大治水陸各軍商於曾文正公及統領水師湖北按察使李公孟羣會札委令鮑公管帶中營戰艦鮑公既擢營官益思竭力報效會湖南紳局添造新船駛到金口鮑公日與王明山等放舟巡哨駕駛

甚利往來如飛文忠甚喜之三十日王國才恆泰等自沌口移進漢陽朝關獲勝追至西門外三面受敵恆泰陣亡兵勇敗退賊追撲甚危急彭公玉麟卽督水師登岸與張建基等自鸚鵡洲截賊之尾鮑公與王明山等自洲前衝賊之中賊狡悍死拒會王國才回軍夾擊數路之賊同時敗潰水師登岸殺賊向未有也

四月鮑公擊賊於小河口乘勝追至青山力戰卻敵尋擊賊船於鮎魚套等處

胡文忠公於初二日自率各營循江隄分路進攻賊營小

勝水師攻至城邊賊伏不出未得手初五初六等日約期進戰水師亦以南風甚狂進易退難不能出隊初九日文忠督軍攻賊於八步街殺傷相當水師出隊以東南風太緊旋即收軍及十二日早間北風大作文忠飛飭水陸各軍合力出隊王國才出攻漢陽賊匿不出彭公玉麟率張榮貴直下塘角而鮑公與張啟基截小河口之賊船劉培元王明山截鮎魚套之賊船彭公攻至塘角燒賊船二百餘號斃匪數百名鮑公見有賊船逃往下游卽會同曾秉忠舢板三十餘隻乘勝追至青山日方及午南風陡轉急

收隊回營而水勇逆流搖槳精力漸疲急難上駛賊於小河口開出快礮數隻攔江橫截彭公與張榮貴悉力救援而武漢兩城之下賊礮齊發我軍舢板被賊擊壞十餘隻弁勇陣亡二十餘人受傷一百餘人鮑公與彭公及張榮貴等裹創力戰衝出重圍二十六日寅刻水師得風約會兩岸陸軍大隊齊發一攻鮎魚套賊舟一攻漢陽賊舟自辰至午排礮轟擊賊以戰艦橫截鮎魚套口及漢陽河口我師從江外攻之斃賊數十名以賊舟堅守不動未能乘隙深入是日王國才攻北岸不得手文忠督何紹彩等攻

南岸斃賊數百名二十七日以後水陸均逐日出隊四次
力攻誘之逼之賊終不出

五月鮑公會擊撲犯金口之賊連勝之

武昌城賊潛出大股上襲金口老營於初十日分五路來
撲胡文忠公督勇擊卻之是日有另股賊循江上竄鮑公
與彭公玉麟及張建基等分督戰船過江轟擊各用舢板
排礮疊攻之自午至申賊敗下走復排礮追擊斃賊匪甚
多十五日賊分六路撲犯金口老營水師先登岸埋伏及
賊經文忠督勇擊敗其循江下竄一股我軍伏兵四起撲

出截殺斃賊二百餘名乘勝追剿三十里二十六日復會
陸軍雕剿咸蒲竄匪擊散之

六月鮑公會擊賊於北岸勝之

先是湘撫駱文忠公秉章以李公孟羣統帶水師不能得
力奏請以常德協副將楊公岳斌代之楊公自上月十六
日由岳州率水勇抵金口從此外江水師兵力更强至是
北岸漢陽賊匪於十二日由內湖暗襲沌口及蔡家嶺營
盤王國才派兵迎敵彭公玉麟分派水勇登岸助戰勝之
七月鮑公會克蔡店連戰十日

咸豐五年

時漢陽賊匪屢次撲犯麥山各營胡文忠公親督勇隊渡江援之十一日軍次東山十二日賊由蔡店分五路直撲我營文忠亦分路應之乘勝衝殺至蔡店斃賊匪二千餘人敗匪沿河逃竄適鮑公與張啟基隨彭公玉麟各領舢板礮船由沌口遶入經過爛泥金牛等港行運頗難鮑公令各哨官及勇丁等跣足拖擡更替牽挽於是日午刻抵蔡店卽督水勇登岸追殺陸軍亦四面圍攻斬殺又數百人其襄河內駛出之賊船被張啟基等轟翻餘賊盡覆溺蔡店卽時克復十三日文忠督各營前進而鮑公與彭公

留蔡店搜捕襄河上游涓口一帶以防後路沿途轟斃散賊數十名十五日卯刻各營齊抵漢陽上之十里高廟紮定水陸分攻漢陽漢鎮鮑公帶舢板十餘隻前進攻北岸宗關賊城張啟基攻南岸慈渡菴賊城彭公督各營直衝中鋒轟擊一時之久宗關之賊敗退鮑公卽督水勇登岸追殺生擒老賊十餘名斬之並獲大礮三尊立破宗關石城彭公亦督營接應張啟基攻破慈渡菴石城彭公揮旗進至南岸五顯廟督隊攻賊卡陣亡哨官二人復派哨官黃開進等由北岸抄出五顯廟賊船之後迅奔南岸鮑公

帶舢板八隻自上游斜渡作欲渡急攻之計以牽賊勢黃
開進卽合衝賊船之尾縱火撲賊船南岸賊船悉數奪獲
賊投河死者無數彭公卽催大隊進撲賊牆燒燬賊卡轟
斃岸賊甚多漢鎮賊船仍橫河中流開礮上犯彭公派孫
昌凱等由南岸進鮑公與張啟基由北岸進讓出中流任
賊船上駛我軍已出賊船之下兩岸包轉將賊船圍住鮑
公奮力首先奪獲賊快蟹二隻擒斬甚多我軍乘勝直出
襄河口賊以鐵索貫廢船作浮橋攔截河道護船三百餘
隻鮑公帶鄭陽和成發翔等七哨官會同張啟基一鼓前

進用大斧鋼鑿斬斷鐵鎖燬其浮橋奪獲舢板七隻焚賊輜重船三百餘隻斃賊無算彭公卽督各營登岸燒其礮局火藥局獲礮二百餘尊隨卽打出襄河口破大石城二座時已酉刻各營收泊於襄河永甯巷搜漢口餘匪數百名斬之二更時南岸賊仍踞五顯廟五更時我軍乘機登岸縱火焚其巢穴餘匪竄入漢陽城內十六日辰刻鮑公帶舢板八隻會同各營進攻南岸晴川閣一帶撲去賊木城二座燒燬賊踞民房百餘家至未刻收隊十七日我軍登岸將永甯巷對岸之牆賊三擊三勝襄河稍爲肅清十

八日因下游竄匪延燒漢口民房我軍爲火氣所逼不能中立各營駛出外江會合楊公岳斌赴下游迎剿黃州來援之賊十九日進至葉家洲燒奪賊船數百號回泊陽邏二十一日仍泊沙口扼守二十二日楊公派鮑公及李濟清等搜查漢口後湖因河道淺狹戰船不能運動仍出紮河口先是楊公在外江率同李成謀等直擣塘角燒賊船二百餘號並攻小河口以引內河水師出江二十三日同泊沙口二十五日因風狂不能穩紮各營戰船上駛武漢城下賊礮齊施並以戰船橫截中流我師舳舻於狂風巨

浪之中左右迎敵斃賊無數我軍亦陣亡哨官黃開進等五人勇丁溺死二三百名高廟陸營自十二日以後屢次獲勝文忠以水師深入險地血戰十日先行請獎奏入奉上諭鮑超著以都司儘先補用並賞加游擊銜是月曾文正公檄彭公玉麟赴江西領內湖水師並致羅公澤南劉公蓉書云此間水陸如舊可與防守難與進取外江事勢如此雪琴恐不能遽來請於鮑超張榮貴二人之中飛調一人來南康以振積疲之氣天下滔滔何處英傑翩然來止以輔不逮而張孱窳乎鮑張二君不具公牘求閣下爲

我力致之必分一人前來而後有濟也雪琴彭公宇

八月漢陽陸營被圍鮑公駛援擊賊走之並擊退續至之賊
武漢之要以金口沌口蔡店爲最著自上月水師回泊沌
口賊卽以數千連撲高廟胡文忠公陸營均經何紹彩等
力戰卻之至是金口李公孟羣之師潰散黃州德安之賊
分股來援漢陽初二三等日賊以下游調來礮船轟文忠
營帳連傷斃左右數人勢甚危迫鮑公以礮船飛棹往援
擊賊退走而上游德安應城等處之賊復由涓口新溝蔡
店分股下駛鮑公又奮勇回擊焚賊舟十餘隻賊知不敵

卽自焚所餘之舟登岸下竄漢口是役也鮑公以單營拔
文忠於間不容髮之際擊退援賊高誼神勇聞者無不歎
服而文忠自是知鮑公益深彌加敬重不以行伍中人視
之亦不以部曲待之矣文忠於初四日由漢陽退扼蔡店
營於爹山初八日賊復圍撲其營勇丁潰散遂移駐軍山
而鮑公隨楊公岳斌力扼下游戰守不懈

九月十月鮑公在新隄協整水師

時胡文忠公因陸軍屢潰水師孤立沌口上游賊蹤已遶
出其後餉道將梗恐被抄襲因令暫屯嘉魚新隄等處以

待陸軍之再整又以水師十營五哨可戰者半亦有經年未開仗者月餉積欠過多不如及時汰去怯弱以節虛糜養精壯因商令楊公岳斌於新隄修船隻將各營嚴加揀選汰去十分之三楊公留鮑公協助鮑公兼任勞怨斯夕不遑楊公甚倚重之

十一月水師克復金口進屯沌口

金口自賊踞日久牆壁尤堅初八日胡文忠公派何紹彩等營會羅公澤南之軍由蒲咸驛路而進十一日克復咸甯十四日獲勝於山坡文忠先令水師循江岸搗金口以

通水陸之援楊公岳斌卽於初八日飭水師自六溪口拔營以鮑公及李濟清等五營循江南岸而下自率李成謀等五營循江北岸繼發十二日巳刻至金口賊以大礮橫排中流以快划梭織如飛鮑公謂各營官曰賊之戰艦頗多須先時布置分枝以清睂目而後責成可專又須合力以聯聲勢而後兵力可足各營悉遵其議鮑公遂由中路奮勇當先陳金鰲萬化林繼之李濟清抄其左王明山抄其右鏖戰逾時賊以千觔大礮排列施放四徧我軍以戰艦排列施礮六徧賊怯而不敢進我軍弁勇中礮受傷而

進步愈速每放一輪卽進十餘丈六徧之後軍船已逼賊舟遠不逾尺矣鮑公左肋中大礮子傷穿衣斜過皮肉均傷吐血升許而進戰益力眾軍乃益奮擊沈賊船數隻斃賊數百名乘勝衝入賊陣火箭火彈齊施賊乃開船下竄我軍且追且燒轉戰約三十里有全股被蹙入江者其船隻均被奪獲追至小軍山下始行收隊而金口岸上五賊壘因水賊敗走亦自驚潰卽時一並踏燬是夜水師分泊金口大軍山及文忠軍至金口楊公遂率王國才等陸師及全營水師進屯沌口是役也沈燬賊船數十隻奪大小

礮六十餘尊斃賊無算生擒賊渠十餘名而鮑公獨獲大快解船及舢板快划各二隻文忠奏稱鮑超屢立奇功膽識過人此次奮厲無前身受礮傷裹創追賊忠勇冠軍實爲克復金口之首功奉

上諭此次胡林翼等進剿咸甯山坡及金口沌口水陸獲勝大振軍威所有奮勇出力之都司鮑超著以游擊儘先補用並賞給壯勇巴圖魯名號

十二月鮑公在沌口營次養傷

胡文忠公以鮑公傷重慰令在老營休養而以哨官瞿定

國暫護正中營事

三

丙辰咸豐六年

二月水師擊賊於南岸嘴等處連勝之

是時賊新從九江安慶帶船上援鮑公傷病漸痊力疾起
任戰事初二日黎明隨楊公岳斌自沌口出隊至鸚鵡洲
喻吉三等三營循東岸鮑公及張榮貴等七營循西岸並
下是日北風大作距賊四五里我軍卽排列以待賊以拖
罟四隻從鮎魚套泝流來誘各營不動乃出烏船及大拖
罟二十餘號順風揚帆魚貫而進以衝我東岸之船東岸
船迎頭擊之鮑公急商同張榮貴等四營過江以抄賊尾

令周清元等留截南岸嘴之賊李濟清三營攻其前鮑公及孫昌凱等五營繞出以攻其後縱橫馳逐鏖戰逾時燒賊大鳥船大拖罟各一隻焚溺三百餘人賊遂敗走是時南岸嘴賊船爲周清元等所牽綴不能赴援我軍因得乘勝追逐盡力擊殺斃賊無算初六七八等日楊公令各營迭次出隊賊因大敗堅守不出初九日陸路各營會期進剿寅刻鮑公隨楊公率營出隊喻吉三等三營由東岸攻鮎魚套鮑公與張榮貴等七營由西岸攻南岸嘴賊不敢出戰惟穴牆施放鎗礮我軍亦以大礮對轟並縱火焚其

牆內之船斃賊甚眾是日南風大起我軍戰船搖蕩開礮無準楊公恐爲賊所乘遂令各營收隊仍紮沌口

四月五月水師焚漢陽賊船幾盡連破焚下游兩岸賊船鮑公扼沙口斷賊往來水師轉戰至九江城下江面肅清

賊船分布武漢者約數百號每船密排礮位船外各以大鐵練繫大木簰依附之以梗我船不得相近胡文忠公自二月以來與楊公岳斌密籌火船之策專待東南風起期一炬焚之四月二十五日楊公令鮑公率營下勦與李成謀等夾攻燒燬賊小船數十隻擊斃溺斃無算其棄船登

岸者爲都興阿公馬隊悉數殲斃二十七日南風漸起鮑公隨楊公帶同奮勇哨弁周視賊船形勢試驗水勢淺深指示下手之處二十八日南風大起楊公令張啟基等四營之留守上游者出隊作接應之兵卽於寅時親督各營率火船五十餘號順風揚帆直抵漢陽東門南門上下圍裏斫斷木簰鐵練逼近賊船如法縱火光燄燭天鎗礮齊發將賊船三百餘號燒燬淨盡僅逃走小船七隻並延燒漢陽江岸陸賊營壘火光中更有數十賊被火藥衝入空際而復墮於江岸者時李公續賓等以大隊五千人循江

岸以護水師午刻收隊鮑公隨楊公下紮沙口爲老營二十九日四更自沙口開船三十日辰刻至鷺公涇探詢團風以下盡皆賊船楊公令李成謀等三營由新河下剿而自帶鮑公及王明山等三營由老河下剿值賊船上駛我軍兩路夾擊且焚且追直至黃州府城燬沈賊船數百號斃賊無算燒其火藥大船而對岸樊口港內之賊以拖罟快蟹等船橫截於外我軍合六營環攻以無陸師相助不得手楊公因督五營在港外對賊轟擊而令鮑公一營乘間衝入港內焚燒賊船火起奪其長龍舢板各一隻惟兩

岸之賊礮子如雨又於西山高處以噴筒火箭極力抗拒楊公岳斌恐鮑公深入飭令退出港外而賊之輜重船亦下竄出港鮑公及各營併力回擊賊船順風乘流遂已下駛王明山等兩營追之鮑公仍與李成謀等四營力撲港口三次衝入我軍頗有傷亡是夜卽駐得勝洲五月初一日出隊攻樊口岸賊因無陸師協剿不能破壘楊公遂令鮑公及李濟清二營回駐沙口力扼樊口之水賊無使上竄而自率李成謀陳金鼇下駛未刻與王明山周清元會於黃州下十里之巴河卽率四營由蘭溪進發擊燒黃石

港賊船數十號初二初三兩日乘風利不泊將下游蘄州武穴龍坪等處賊船盡焚之直抵九江始回舟仍泊沙口老營於是江面一律肅清直達九江毫無梗塞是時賊陷江西府城八州縣五十有奇曾文正公以兵部右侍郎督辦軍務及聞鄂省水軍江面之捷函告楚軍各營士氣爲之一振捷入奉

上諭鮑超著以參將儘先補用並賞加副將銜

六月水師會陸軍大破賊於樊口克復武昌縣城

僞檢點古隆賢自九江分道上援將約省城之賊夾擊洪

山五里墩陸營因被水師下剿繞道愆期上月十二日胡文忠公派營迎剿連敗之古逆遁匿樊口與內港戰艦相依爲壘復分黨進踞葛店其地距省城九十里內湖外江至是胡文忠公派陸營往剿初二日抵葛店擊賊敗之初四日陸勇追賊至樊口鮑公隨楊公岳斌率水師夾擊內港之賊棄船先潰我軍焚船踏壘殺斃溺斃約二千餘人水師復登岸會同陸勇分攻武昌縣城克之是役奪獲賊船百餘隻軍械無數水師之入搜梁子湖者八日而始出江

七月水師燒樊口浮橋並燬賊壘

十一日陸軍蔣益澧等禦援賊僞翼王石達開於葛店鏖戰竟日鮑公以樊口壘賊分黨上犯守備必虛遂於十二日商同周清元喻吉三各率戰船由沙口下駛乘勝將樊口浮橋燒斷又登岸燬其陸賊之壘喻吉三又於黃州城下燒賊船數隻旋同回泊沙口十七日古隆賢率賊千餘循青山油坊嶺江岸修築土壘鮑公隨楊公岳斌自沙口出隊會合李濟清入港轟擊賊於渡口排鎗抗拒鮑公與李濟清以大礮轟之賊卽退走嶺上鮑公登岸奮擊李濟

清繼之楊公預派周清元由上青山登岸抄出賊後來擊嶺上之賊賊敗退將油坊嶺賊巢盡行燒燬仍泊外江自此胡文忠公督同楊公及李公續賓舒保公等水陸分攻馬步合剿旬日之內大小二十八戰武漢賊勢窮蹙兩城計日可克而鮑公已改陸軍統領矣

八月鮑公赴湖南募勇創立霆字一軍

胡文忠公自參山挫後加飭戎政留意步伍見鮑公軍容甚整進退有方大異之深相器重約爲昆弟之交又見其屢次登岸擊賊知其才兼水陸於陳報參山軍情奏言臣

軍潰散卽派水師現保都司鮑超設法令募陸勇或可漸次整理又奏言鮑超勇敢知兵臣已遣往湖南分途另募新兵三千人期以百日堅明約束以圖迅速來鄂剿辦旣得旨報可而楊公岳斌以鮑公爲水師中第一人堅請留之文忠不得已暫止其行尋於預籌水師將才疏內稱水師十營將官如游擊李成謀都司鮑超張榮貴均勇敢冠軍惟未經特將尙待悉心審察觀其戰陣之方略別其才識之利鈍再行詳悉奏聞及本年正月遵保堪勝水陸總兵人員奏言游擊鮑超勇敢冠軍曉暢兵略紀律最爲

嚴明堪勝水陸方鎮之任三月文忠因羅忠節公澤南傷亡致書莊公受祺云羅山其類水師營中人才頗盛有鮑某者嚴明曉暢勇敢尤其餘事弟已言諸楊軍門乞渠往楚另招三千人爲陸路如武漢可得林翼誓以此身此心堅守二城如竟不可卽得迪菴豈能久留鮑公亦後起之傑也等語羅山忠節字迪菴李忠武續賓字是時東南將帥以羅李爲最著而下游賊情緊急李公將赴援江皖故文忠云然顧文忠此時所期於鮑公者募成一軍提之挈之庶保武漢重鎮使不再失耳厥後此軍規模漸擴戰勝

攻取其制敵方略自成一家法門底定東南用兵常二三
十萬而霆軍以數千人萬餘人之偏師所向輒推功首同
治三年 諭旨稱霆軍爲江皖諸軍之冠同治六年曾文
正奏稱鮑超苦戰功高一時名將無出其右此又文忠始
願所未及者也是月因江面已無賊蹤武漢指日可克援
前旨檄鮑公赴長沙招募陸勇並致書曰吾弟可先選將
官三員每人可將五百人者先擇其勇次擇其才尤須深
擇其品預先到營面議異日卽以爲營官勇由彼招必能
得力募勇之法兄處卽備札及咨與銀先行遣回湖南之

道州甯遠江華新田招集勇士到省約計一月之後弟卽兼程前往長沙逐一挑選編定隊伍九十月可以到鄂再訓練一二月乃可大戰也弟除三營外另招三二百人作親兵而弟實統三營之事約計精兵一千七八百人兄再以強壯敢戰之仁營副仁營寶營鳳營共二千七百人隸於弟標下已約四五千入矣則所向克捷必成大勛一宋國永瞿定國俱已改營官此次可選勇敢特著兼有才品之營官三人一哨官爲最要之事必須十分可信十長管十人十長得人則全營皆可恃兄思陸師難於水師水師

一哨十餘人多則四五十人哨官有膽則全船之人皆無可退逃舵工頭工皆有膽而一船之人萬無逃路亦無退法陸師之稽查約束難於水師然亦有簡捷之法營官哨官不逃不退已得十分之三假如五百人六百人之營放哨官五人副哨官五人既已精選哨官矣哨官又各選十長可信者十人十長管十人只要同隊有可信者三人則其餘七八人均不能跑何也出隊不過六七成爲定一隊不過六七人有三人膽大其餘四人不能不同行卽有退縮一查而知打三五仗之後膽小者亦變爲膽大矣總之

治兵在提綱領三字而已擇營官擇哨官又擇十長則萬無不勝之理一口糧章程本營與滌帥舊章大致相同可飭營官來抄領一分一軍械帳房均一一自製然糧臺近日已造有湖南精緻之軍械帳房儘可領用惟斧鋏須自行打造須學農人之樣毋學做官人所造之樣乃可適用一經費先可每人日給百文到成隊之時卽速來鄂操演到鄂之日按章支付一經費可先帶一二千金到楚之後兄再付萬串一每營兵額之多寡至多不得過七百至少亦必須五百人乃可出隊太多則稽查不周照應不到又

不能多分枝以營官不能分爲二路也太少則力單五百人出六七成隊有三百人儘可打仗若三百人一營卽太單矣一幫辦以人品爲先而經手帳目銀錢者尤爲緊要每營須二三人乃可照料此事最難營中有壞種萬事皆廢而奸猾生監花言巧語媚骨逢迎尤爲萬分可惡一勇丁以山鄉爲上近城市者最難用性多巧猾也一百工技藝皆可爲勇惟書辦差役斷不可爲勇亦斷不可招入營中營中不能無裁縫剃頭之人另給工食不必冒勇名入勇冊一古人募兵琵琶腿車軸身之式取其多力也又陶

魯於六七萬人中定爲標式挑入格者不足五百人已橫
行一省建立奇功專挑多力之人亦是一法然終以膽量
爲先隊伍爲上多力者亦可備一格耳一擡鎗大礮易學
鳥鎗非一月不能學打獵之人較易一招勇以道州甯遠
爲上湘鄉亦可江華新田東安等處又次之如他處有勇
士亦可十取二三而總以一方一縣之人在一營爲宜取
其性情孚而言語通則心力易齊也一川楚不和久矣將
是蜀而勇是楚川人不過五人六人至多十人恐其終必
不和也一營制如每營用七百人則作爲二營用五百八

則作爲三營隨時酌之可也以上各條大概如此其精微處緊要處全在擇頭目選營官哨官與隊長耳他皆枝葉事也鮑公接文忠書刻日親往長沙一遵文忠指畫選募部署立爲五營卽以己字之下一字名其軍是爲霆軍之始是時文忠復札鮑公云本營擡鎗烏鎗與刀矛分隊相間而行第一隊擡鎗第二隊刀矛第三隊烏鎗第四隊刀矛第五隊擡鎗第六隊刀矛第七隊烏鎗第八隊刀矛第九隊十隊均刀矛是長短相兼奇正互應之法至李道湘營陣法則第一隊至十六隊均是鎗礮與刀矛相間相兼

雖悍賊四面攻襲而我軍可以常勝本部院心以爲然改而師之該游擊以擡鎗百人爲一隊鳥鎗百人爲一隊反復思之仍不如師法李道章程分哨分隊刀矛夾護爲穩假如臨陣之時或賊分五路而來則我分五哨以應之哨中各有擡鎗鳥鎗刀矛或追賊之時零星四散亦不能不分哨以追之則各哨皆有擡鎗鳥鎗刀矛相護乃合長短兼用之法又如一營深入賊中賊眾三面抄襲則各哨分三面抵禦各有鎗礮刀矛較爲得力札到該將刻卽稟商兵部正郎左將此義細心講求並商請南紳卽補道王將

營政兵法求才方略精微義理日夜虛心請教詳悉而另記之毋得見小自是勉之望之

十二月鮑公率新軍赴小池口會剿

鮑公自赴長沙後逐日募練新勇冀急成軍回鄂助攻武漢而兩城尋於十一月二十二日克復當未克之前十日胡文忠公以城賊援絕糧盡毋庸鮑公助攻適隨州土匪趙邦璧滋事竄擾襄樊一帶因檄鮑公迅往與貞恪公舒保等會剿逆匪尋陷安陸府城文忠又催鮑公由荊州迎擊及是鮑公率軍抵鄂境適鄂西官軍得手匪勢稍衰而

將軍都興阿公與臬司李公續賓總兵楊公岳斌水陸各軍正進攻九江及小池口僞城文忠因改檄鮑公前往小池會剿聽節度於都興阿公鮑公遂於十二月二十八日進紮小池口是時鮑公所統新勇分中前後左右五營每營六百人五正營外親兵三百人

霆軍紀略卷一終

霆軍紀略卷二

銅梁陳 昌世五編輯

門人吳樹棠全校字

丁巳咸豐七年

正月鮑公會攻小池口僞城大勝連破其壘卡

小池口與南岸九江對峙賊於二年前建僞城於此城外
築壘濬濠密排礮位堅踞之以爲皖賊聲援資九江犄角
前月初九日至三十日楊公岳斌李公續賓水陸會攻九
江力戰數次不克至是都興阿公督馬步於初五日合剿

小池口鮑公以後營右營會同巴依爾呼蘭馬隊攻南門以左營前營會同忠勇公多隆阿馬隊攻東門孔廣順及巴克坦等馬步攻西門鮑公獨率親兵及中營攻北門而以石清吉米雅明阿馬步爲後繼都興阿公親率兩營四路策應楊公水師由江中轟擊以助聲勢鮑公於三塘口先備茅柴派長矛手六百負柴鎮濠四面攻撲同聲並進直造賊營踏破南路北路土壘各一座關卡一座小壘無數殺賊三千餘名淹斃者無算生擒蕭陳二逆首並老賊百餘名斬之奪獲礮械甚多都興阿公見鮑公軍大勝因

揮馬步乘勢直搗賊城賊負隅死守礮石雨下仰攻逾時
日暮收隊鮑公及營官陶忠泰陳德懋黃慶俱帶傷哨官
勇目傷者亡者五十餘名胡文忠公奏稱是役也都興阿
督飭攻剿士均用命賊壘悉破賊膽已寒其鮑超一軍尤
稱勇敢將士裹創血戰不退一步奏入奉

上諭剿辦尙屬奮勇著胡林翼等先破小池口賊匪石城
再圖克復九江毋稍延緩

二月鮑公補授宜君營參將會擊賊於黃梅大破之

僞英王陳玉成時爲僞豫天侯糾集太湖逆黨四萬餘將

踞黃梅而竄蘄州初二日由宿松分三路上竄一由亭前驛南一由亭前驛北一由獨山鎮竄及魏家涼亭各距黃梅縣城數十里都興阿公計以空城誘賊入內而於要隘設伏擊之初四日多隆阿公等由城南北進擊鮑公率營與王國才方映川由城西一帶分路進兵老賊數千驍勇異常死力拒敵復有獨山鎮股賊五六千抄出我軍步隊之後適巴依爾呼蘭馬隊趕到縱橫衝擊立斬悍賊數百名餘逆棄城逃竄鮑公會各軍分投截擊越嶺追剿共斃賊四千餘奪獲羸馬數百

三月鮑公擊敗小池口城賊尋破賊於孔壠乘勝攻城

都興阿公派多隆阿公等往剿小池口下游段審之賊令鮑公扼小池之西以牽賊勢初九日寅刻城賊三路來撲均經鮑公分勇擊退賊又分爲三股一迎拒鮑公一往援段審鮑公奮力鏖戰石清吉雙福等因得夾擊東路之賊勝之多隆阿公遂乘勢踏燬段審賊壘小池城賊復造橋嚴家壩將襲我孔壠營都興阿公令鮑公先出隊擊之十六日行至小池口西路城賊乘夜大出馬隊伏隄下突起衝之鮑公率隊由江岸橫擊月明之下馬蹏踐踏刀矛撥

刺有聲賊尸枕藉鮑公因乘勝攻城被滾木打傷左手右
腰亦受鎗傷猶立馬大呼指揮士卒拔椿越濠士卒多傷
者鮑公復被鉛子打中腦門漿水迸流而鮑公忘其痛楚
攻城愈力及天明收隊賊見鮑公軍無後繼蜂擁而出緊
躡我軍之後鮑公自爲殿緩轡徐行賊不敢追遂得全軍
而還楊公岳斌聞其傷重迎至舟見中要害不禁哭失聲
鮑公曰爲國捐軀死復何憾所憾未能蕩滅此賊死不
瞑目耳語畢紫血奔注暈去三日一息僅存眾以爲萬無
生理適有善醫者爲取出腦門鉛子竟生至今腦後低陷

一窩深可容指卽此傷也是時鮑公迭次攻堅士卒中傷者前後六百餘人胡文忠公奏給假期在營調養委喻吉三代管營務其致鮑公書云此番受傷甚重士卒帶傷亦多殊可念也屢戒吾弟不可攻堅以身涉險何大敵當前頓忘兄言耶雖由吾弟忠勇性成志在滅敵然逆勢方張畏公如虎足下縱不自愛其身其如國事何如太夫人何此後臨敵務祈堅忍持重不可仍前大意須知衝鋒陷陣乃裨將之事非大將所宜也附呈大棧一枝查收諸冀珍攝爲幸

壘

四月鮑公在營養傷派營會勦渡河橋之賊大破之連燬其
時桐城兵潰皖賊勢熾安徽藩司李公孟羣赴援廬州而
賊由桐城并力上犯分道竄入黃梅廣濟蘄州蘄水羅田
五州縣邊界武漢戒嚴官文恭公胡文忠公急令李公續
賓由九江分兵渡江馳赴小池口令鮑公由黃梅分兵二
營移孔壠而黃梅縣屬之亭前驛渡河橋一帶賊壘共六
十餘座二十四日都興阿公督馬步攻渡河橋鮑公傷病
未痊授營官宋國永等方畧令會同多隆阿公馬隊分路

齊進賊麇聚數萬隔河對放鎗礮我軍數路同時渡河立破賊營數座賊卽反奔麥田之伏兵見大隊得手卽向各營壘拋擲火彈賊益驚潰乘勢併力連破賊壘二十一座斃賊二千數百名胡文忠公奏言陳玉成率數萬眾併力上竄得此一戰賊氛已挫人心稍定

五月鮑公援黃梅獲勝復破大河鋪賊壘尋援十里鋪大勝賊自渡河橋大挫後移營就險意在堅守伺隙十二日攻撲孔廣順王國才等營並攻黃梅縣城都與阿公檄鮑公取道濯港赴援獲勝是時黃梅之賊踞大河鋪爲巢穴連

營二三十里鮑公以五營及孔廣順王國才各營隨都興
阿公悉力禦之十四日賊由大河鋪分竄十里鋪雙城驛
鄭公塔官橋等處連犯廣濟窺武穴冀截我軍後路絕我
糧道二十日都興阿公督軍攻大河鋪多隆阿公馬隊及
黔勇由西路攻之毀賊四壘及賊回顧西路而鮑公已率
營乘勢直入破其三壘兩路共斃賊千餘名擒獲無算二
十六日賊再攻十里鋪都興阿公親督馬隊鮑公會同多
隆阿公馳援內外夾攻賊大敗傷斃賊目多名二十八日
復出隊戰於十里鋪自辰至午往來奔突斃賊無數是夜

賊撤去東北十餘營退紮五祖山麓捷聞鮑公將士隨摺保獎者鄭陽和擢游擊陳德懋陶忠泰黃慶均擢守備並換花翎李德勝陳由立梁美材俱擢千總

六月鮑公擊賊於十里鋪連破之毀億生寺賊壘

先是宿太賊匪傾巢上犯南勇敗退黃州胡文忠公親赴黃州扼守賊疑我黃梅官軍分兵上援因圖乘虛偷襲於初一日由蘄廣分股萬餘人直撲黃梅十里鋪王國才等營鮑公隨都興阿公率馬步兵勇分路迎擊擒斬黃梅賊千餘名賊始敗退復糾集大股於廣濟內湖童司牌一帶

據險築壘伺我黃梅官軍後路二十四日都興阿公將五里涼亭孔廣順王國才各營移紮武穴龍坪濯港等處以資守禦卽以十里鋪億生寺各營爲前敵二十五日卯刻黃梅北山及大河鋪迤南一帶賊匪全數擁出直撲十里鋪官營多隆阿公以馬隊迎擊鮑公率營乘勝攻毀賊壘一座殺賊三百餘名二十六日賊又各路擁出漫山遍野鮑公與多隆阿公會商以一路兵勇大張旗鼓戰賊於十里鋪之北自率步軍同多隆阿公馬隊偃旗息鼓出其不意突攻億生寺西路賊壘賊知我軍注意於北而不虞西

路之猝至也相顧駭奔我軍拔椿越濠焚燬賊壘三座同時十里鋪賊亦被我軍衝突奔逃兩路計斃賊千餘生擒數十因暑熱收隊

七月鮑公擊勦黃蠟山等處賊巢大獲全勝踏賊壘四十八座

都興阿公之以十里鋪億生寺各營爲前敵也鮑公壁於億生寺西北正當賊衝維時王剛介國才由黃梅移營濯港爲賊所乘潰敗死之其餘諸軍亦多敗挫於是都興阿公多隆阿公商定撤回各軍與水師相依扼守恐鮑公梗

其議先撤各軍而後告鮑公同撤鮑公不從多隆阿公力
勸之謂賊勢浩大各軍俱退而霆軍以五營孤立賊衝非
計也鮑公力持不可謂行兵有進無退武漢三陷 國家
費無限帑金竭兩年之力始能恢復今賊挾忿而來我扼
要駐此一搖足賊將長驅直進武漢守備空虛立見土崩
瓦解一不可也武漢不守賊必以一支擾湖南以搖楚師
根本而通兩粵之氣以一支擾四川完善之區而爭上游
之勢四川兵竄民囂賊苟竄入將成不了之局二不可也
湘軍之圖九江頓兵堅城久患情見勢絀皖賊上犯武漢

必分支以援九江援賊外逼城賊內突不特圍師功敗垂成卽求保全軍旅而不可得三不可也水師之所以能力扼上游與九江圍師互爲聲援者恃我陸軍扼定前敵耳我若退軍水師必聞風驚潰又何能與之相依扼守四不可也楚境田禾青黃彌望若委之於敵賊得挾飽騰之勢以與上游官軍相持楚禍益無了日五不可也今賊勢蔓延數十里不如乘其聚此而破之使不敢再伺楚疆保全大局不少我軍雖僅五營頗爲賊所畏憚願爲公一戰破之公軍雖小挫而收合馬隊尙可得二百餘騎將來決戰

請公以馬隊布列陣後見我霆字營士卒有退後者卽飛騎斬之前敵交鋒事公可不問也多隆阿公壯之因從其計時賊見鮑公壁不敢進悉就黃梅境上屯聚自億生寺連營至黃蠟山迤南深溝高壘意將持久以我老師初一日多隆阿公督馬隊鮑公率步隊並開化勇分五路進攻黃蠟山等處賊巢賊見我軍遽至漫山徧野齊出抗拒鏖戰數時之久我軍鎗箭齊施殪其悍賊數十名賊敗歸各壘鮑公卽率勇追殺分攻賊壘縱火延燒賊營賊狂奔我軍會合痛斃賊屍徧野鮑公令各軍立營造飯以息其力

仍傳令夤夜追勦士氣倍振賊勢披靡直至初一日未刻收隊先後踏毀黃蠟山甘家畝楓樹嶺張家塢蔡家城陳穀樓袁祚驛王家河等處賊壘四十八座斬賊五千餘溪水爲赤撲港淹斃者無算生擒長髮老賊七百餘及大小僞職百餘並斬之奪獲大小鎗礮六百餘旗幟器械山積救出裹脅難民數萬餘匪竄入山谷官文恭公胡文忠公奏言黃梅馬步各軍前次童司牌之戰及現在黃蠟山等處大獲全勝爲楚軍罕見之奇捷固由都興阿等調度得宜亦由將領奮勇圖功鮑超一員連日血戰率同親兵累

屍登壘身股受傷仍不少卻尤爲忠勇罕匹奏入奉

上諭此次黃梅官軍以少擊眾連獲大捷在事將弁兵勇均屬奮勇可嘉副將銜陝西參將鮑超連日血戰尤爲出力著以副將歸部儘先擬補並賞加總兵銜以示鼓勵其餘出力員弁兵勇仍著官文等酌量保奏候朕施恩先是鮑公自顧兵力太單勝負之機尙無把握將戰之前一日大饗將士令於眾曰我自統兵以來生死久已置之度外蓋旣以身許國此身卽非我有今大敵當前眾寡懸殊婦孺皆知其不敵何肯令諸君以身嘗試顧楚省乃南北

關鍵雄據上游爲將來收復金陵之根本此地鄂之門戶
若不力圖捍衛是我縱賊入室也身受國恩每憾無可
報稱明日決往破賊幸而克捷顧全大局不少否則身徇
是役誓不與之俱生諸將士有願以死報國者與吾共
功名幸甚如不願者亦自任也請以卮酒誌別以表一時
共事之雅諸將士皆慷慨激昂伏地叩頭誓以死自効雖
下逮夫役無不踴躍用命者鮑公知士氣可用乃分飭五
營將官俾各自指攻一壘鮑公指當中一最大堅壘自率
親兵營任之申明軍法期在必克及戰與諸將同時並舉

諸將與各壘之賊十盪十決驟不得手軍士傷亡漸眾幾不能支親兵哨官余大勝請由賊牆礮穴梯扃而入鮑公壯之於是余大勝鼓勇先登鮑公率十餘壯士繼之立斬守壘悍賊數十名餘賊不敢格鬪悉奔聚壘心擁護賊酋鮑公令軍士暫勿撼壘心急將鮑字黑旗數十桿環而樹之時壘心賊尙數百人皆瞠視不敢動也俄而鮑公親兵畢登賊始拚死由壘後衝出鮑公揮隊乘之殲斃殆盡各營官正酣戰時瞥見中壘已樹我軍旗幟知主將已破堅壘而入一時愧憤所激各殊死戰亦先後攻破其壘軍聲

大振士氣倍增且戰且攻勢如破竹是役也以馬步四千餘人當十數萬之賊當時莫不爲鮑公危而竟以一戰勝之陳玉成隻身逃去於是上游斬黃之賊聞風氣阻文忠急督李公續賓舒保公等攻剿黃州馬家河等處踞賊連勝之黃岡境內肅清自鮑公改陸軍統將每率隊攻堅胡文忠公嘗規戒之鮑公謂人曰胡公屢次戒我攻堅固知愛我出於真誠且不欲多傷士卒可謂仁人之用心矣顧兵機臨敵制勝千變萬化豈能遇堅一概不攻卽如此番賊眾百倍於我堅壁不出以老我師是豈不攻所能使之

破敗耶第多傷士卒實堪痛惜所不愧於此心者當鎗礮
交攻之際從未令諸君獨在前敵耳鮑公每戰必身先士
卒鱗傷徧體屢瀕於危愛公者嘗從容勸止鮑公曰爲將
之道首重刑賞而事非目覩終難信心若不親臨前敵督
戰第憑文報之粉飾鋪張以爲功罪而行賞罰何以服人
心而勵士氣捷聞後陣亡營官守備陶忠泰陳德懋哨官
千總何有貴外委易榮貴俱如例優卹厥後咸豐九年十
一月楚軍大舉規皖文忠致書曾文正公曰狗賊之善圍
官軍是其長技鮑春霆七年血戰億生寺六營一統將僅

餘一二人尙在其餘非捐軀卽成廢世間忠勇固推第一
然待其壘成以圖之實大喫虧之事又曰春霆之英鷲何
滅迪菴迪菴失地勢五千人皆廢至億生寺之役一戰而
去二營官亦可一而不可再之事凡軍事顧一面則弱者
可守顧二面強者可戰顧三面強者僅可守顧四面則強
者亦難守春霆所處地勢可以四面受敵云云自上年文
忠保舉鮑公堪勝水陸總兵奉

上諭著交軍機處記名俟軍務完竣送部引見至是文忠
又奏言鮑超忠勇冠軍嚴申紀律自入戎行以來水陸數

百戰自本年正月迄今又大小數十戰先後踏毀賊壘約八十餘座無不衝鋒陷陣身先士卒不避矢石以致迭受重傷不便騎射其奮勇敢戰實爲東南數省不可多得之將應懇

天恩將來免其考驗弓馬以示體恤而勵忠勇奏入得旨如所請行

八月鮑公踏平黃梅後山等處賊壘

自胡文忠公督所部並李公續賓湘勇由上游蘄水蘄州而達廣濟黃梅節節搜剿而敗賊麇聚於黃梅後山繞至

五里涼亭迤北一帶復新築三大壘以阻我師初四日更
餘鮑公會同多隆阿公各挑馬步隊伍分三路潛進先襲
燒其後山賊壘羣賊駭奔餘壘亦潰鮑公督營四路勦殺
礮斃燒斃及圍逼溪河淹斃者無算復會馬軍連夜追勦
沿途殺賊三千餘生擒百餘奪軍械無數天明追至桂家
畝渡河橋復毀賊壘十餘座黃梅境內漸就肅清僅餘小
池口僞城孤立無援文忠遂令楊公岳斌李公續賓移營
進逼晝夜環攻於十五日克復於是全楚底定官文恭公
等以捷聞得

旨出力員弁兵勇准其擇尤保奏

九月鮑公進軍安徽宿松太湖境內剿賊破之

李公孟羣援皖之師萬人至六安蘇家埠被捻匪圍營敗
挫退守河西都興阿公因楚北肅清卽令鮑公率兵進攻
太湖宿松以爲李軍聲援鮑公進兵紮營宿太境內二郎
河時安慶桐城潛山來賊萬餘盤踞太湖分股竄至楓香
驛涼亭河一帶距二郎河僅二十餘里十九日多隆阿公
由宿松率馬隊會同鮑公軍至祝家塆一帶值賊匪緣山
繞谷分路出撲我兵亦四路迎敵薩林祿昌率馬隊左右

抄截殲斃騎馬賊多名鮑公揮軍繞谷追殺斃賊千餘生擒長髮老賊數十將涼亭河一帶賊壘十餘座全行平毀三更始收隊回營

十月鮑公駐軍二郎河

時李公孟羣之師退駐麻埠勝保及袁公甲三奏請湖北撥兵越境堵剿

廷旨飭湖北急撥兵勇越境迅赴麻埠援應合力進攻六安官文恭公胡文忠公奏言都興阿督率多隆阿鮑超馬步各營進剿宿太當皖省未經咨調以前深入皖境已兩

月矣兵勇較少於李孟羣所帶之數而桐舒望潛及安慶省城之賊又較強於六安一路之捻匪設將多隆阿鮑超調赴六安則安慶等處逆匪必乘間奪取宿太繞出六安之後皖省賊勢更熾貽誤非淺等語於是文忠等仍令鮑公節節進逼步步穩固力圖宿太等股

十一月鮑公進攻楓香驛界水河連破賊壘

太湖之賊麇聚於楓香驛等處築壘鮑公會同多隆阿公於十五日分隊迎剿賊勢披靡鮑公督營乘勝縱火焚燒賊壘十三座斃賊三千餘沿途追殺千餘名內有黃衣騎

馬賊五十六名奪獲馬匹礮械無數出力人員經官文恭
公等奏請獎勵有差

戊午咸豐八年

正月鮑公扼守二郎河

是時江南帥和春公張公國樑等圍逼金陵安慶蕪湖等處賊黨時往援應楊公岳斌李公續賓彭公玉麟自迭克湖口彭澤後合圍九江功在垂成北岸宿太馬步各軍且勦且守雖楚境幸臻安堵而皖逆出沒無常屢圖上犯都興阿公奉

廷旨催令迅殲宿太賊股以便水陸東下夾攻金陵而太湖賊於初一初二初七等日竄近蘄州邊界宿松賊竄近

荆橋好漢坡等處築壘抗拒鮑公急欲率師進剿而都興
阿公以二郎河地當衝要令鮑公按兵靜守尋經唐公訓
方等擊退太湖竄賊多隆阿公亦獲勝於風火山桃花鋪
等處賊鋒稍斂陳玉成尋竄紮宅龍山都興阿公仍令鮑
公穩守二郎河

二月鮑公移軍由西北迎剿

時皖賊僞城天豫陳玉成等大股上竄欲擾武漢以援九
江楚省北岸邊界安仁河南陽河等處雖經唐公訓方等
連報勝仗而蘄水蘄州警報疊至其打虎廠楊樹坳牛頭

衝等處在二郎河之西北數十百里爲蘄境門戶都興阿公先後派富森保石清吉等馬步應援胡文忠公又添檄鮑公星飛馳往會同唐公相機迎剿

三月鮑公上援麻城以數騎禦賊於黃土岡都司胡達死之賊於皖省邊界經官軍力遏兇鋒陳玉成因句結捻首張落刑龔瞎子等號稱十萬變計由豫省間道內犯十一日竄陷麻城武漢戒嚴胡文忠公檄舒保公李公續宜等分投剿守並檄鮑公率五營兼程上援二十七日軍至麻城所屬之黃土岡鮑公親率數騎離大營十數里相度地勢

忽遇賊股二千餘人鮑公不爲動賊全隊來乘鮑公卽揮隨騎布小陣禦之哨官都司胡達單騎直前撿鋒落馬鮑公憤失愛將怒馬策應苔滑馬躓賊矛環擬鮑公勢危甚守備張聯升急揮佩刀連斫賊矛如斷蔗都司劉車龍亦勒馬衝賊賊辟易仍作四面包圍之勢而來鮑公詭作揮伏狀賊素憚鮑公疑中計相顧驚愕鋒稍斂鮑公乘勢與原部數騎揚鞭回營賊但呼活妖可惜不敢追也胡達尋優卹如例鮑公跌馬時兩股受矛傷頗重

五月克復黃安麻城二縣鮑公會軍追剿連殲賊於黃土岡

玉屏港等處

賊自陷麻城後尋有另股竄陷黃安先是李公續賓楊公岳斌等水陸各軍於上月初六日克復九江及是李公率師渡江上援黃安會同舒保公馬隊於初二日克其城麻城之賊因於初四日夜遁鮑公卽親率馬步同李公續宜日夜窮追沿途斃賊千餘又六十里至黃土岡賊飢困不能行顛仆於道者馬隊踏屍而過步兵就而戮之又四十里至玉屏港殺賊千餘尋追至豫省之兩路口草鞋店沿途勦斃計賊三千餘捷聞奉

上諭浙江布政使李續賓道員李續宜副將鮑超勦辦甚屬妥速著李續賓等乘勝追勦節節掃蕩以期肅清皖豫所有此次克復縣城及追勦出力員弁兵勇著官文等擇尤保奏

六月鮑公會師進規太湖

安麻旣克楚疆邊患稍舒胡文忠公等因籌乘勝進勦皖豫先清江北爲直搗金陵之計奏令李公孟羣赴廬州楊公岳斌水師由九江直下安慶李公續賓由英霍進而鮑公與多隆阿公隨都興阿公率營東下進規太湖

八月鮑公補授湖南綏靖鎮總兵會克太湖縣城尋破平石牌雷公埠等處賊壘

皖賊麇聚太湖嬰城固守加增城牆城外濬濠築壘壘外築卡又於去城數十里之楓香鋪小池驛黃泥港各處修築大壘鑄礮聚糧布置嚴密上月二十八日都興阿公派多隆阿公牽制城賊李公續寶飭趙克彰分路攻東岸卡壘都興阿公督親兵及湘中湘右等營分路攻城未得手初一二等日飭石清吉等營進紮城南李公率各營偪城之東西北三面駐紮初六初九等日李續燾等先後攻毀

楓香鋪小池驛賊壘初十日石清吉黃勝日等平毀東山頭南首新壘十二十三等日各營迭次出隊誘賊出戰賊匿不出十六日鮑公與多隆阿公將大礮密運山頭先轟東山迤南賊壘賊專防前面不料大隊由山後抄襲紛紛墜濠官軍前後兜殺殆盡乘勝分攻東岸浮橋河西賊壘馬步夾攻賊潰敗東山門城賊出援經石清吉截擊殺賊甚多鮑公復率營攻東山頭第一大壘賊四面固守鮑公令軍士搬運柴薪木板堆積壘邊諸勇奮力肩累而上盡殫壘賊無一得脫中有黃袍賊目十餘人僞印纍纍奪獲

鎗礮等件無算時李公續賓致鮑公書云今日之仗賴麾下雄略制勝彌深欽佩現計賊勢已孤賊膽已寒恐其夜間遁走弟已令各營暫時收隊仍各派三成隊伍於夜間往潛山及黃泥港兩路巡哨埋伏俟其遁時截擊如城賊不遁十七早仍出隊攻之鮑公以賊既勢孤膽寒利在速攻卽刻復率隊進攻第二壘商令周寬世等進攻第三壘都興阿公親督石清吉等分段攻城二更時火箭射入城中燃燒藥局煙燄噴烈西北二面各勇奮呼登城賊由東南兩門突圍逃竄二壘之賊亦拌命衝出各營弁勇與多

隆阿公馬隊分途追殺五十餘里計共斃賊五六千名遂將太湖縣城收復都興阿公以捷聞奉

上諭仍著該將軍等督率諸軍將竄屯石牌及潛山縣賊節節掃蕩並分兵下趨舒桐赴援廬州所有尤爲出力之副都統多隆阿新授湖南綏靖鎮總兵鮑超均著交部從優議敘是役也自鮑公與多隆阿公外復隨摺保獎湘楚及馬隊各營哨都司吳明亮等八員有差陣亡五品花翎馬甲德貴等四十一人俱優卹如例其餘出力文武員弁及陣亡兵勇俱奉

旨查明分別獎卹太湖旣克李公續賓於十八日飭趙克彰李續燾分紮小池驛黃泥港二十一日進攻潛山縣城毀賊壘七座逼城緣登爲礮石所阻是夜賊遁走馬步追擊斃四五千名都興阿公令多隆阿公進駐蠟樹柯令鮑公進駐李家店自率各營進茶鋪嶺以圖石牌二十三、四等日我軍營盤未定賊屢次來撲均經擊退二十五日鮑公進攻下石牌雷公埠等處賊壘多隆阿公進攻上石牌西北岸賊壘都興阿公率親兵馬隊出中路策應賊見大兵分至力圖抵禦鮑公力攻雷公埠賊壘拔椿越濠拋擲

火鑽壘中火起鮑公指揮各勇奮躍入圍殲賊淨盡時多隆阿公亦攻破上石牌西北賊壘於是餘壘之賊皆驚竄覓渡各勇分途截殺並梟水奪獲礮船截斷浮橋賊溺斃者無算其鎮中屋內之賊先逃過東岸者又經馬隊繞渡抄擊步隊各營遂乘勝過河分攻東岸各壘賊紛紛奔竄馬隊追殺四十餘里屍骸徧地生擒四百餘名石牌上下兩鎮賊壘一律踏平捷聞奉

上諭著都興阿卽聯絡水師進攻安慶並力擣桐城迅殄賊氛此次出力文武員弁著官文等覈實保奏陣亡外委

張得金劉寶賢把總熊士正著各照本職從優議卹鮑公
自改陸軍曾文正公從未專函通問至是始由江西行營
致書云足下數年以來水陸數百戰開府作鎮國家酬
獎之典亦可謂至優極渥指日榮晉提軍勲位並隆務宜
敬以持躬恕以待人敬則小心翼翼事無巨細皆不敢忽
恕則凡事留餘地以處人功不獨居過不獨諉常常記此
二字則長履大任福祚無量矣

九月鮑公隨都興阿公進規安慶省城獨攻集賢關破之會
師力戰平毀附城賊壘

都興阿公督軍由石牌東剿安慶派鮑公與多隆阿公爲前隊由清河三橋鎮進兵齊會大橋頭是處踞賊築壘山旁及橋南一帶以拒官軍進剿之路乘我軍初至蜂擁出敵經我軍馬步擊敗之前去二十五里有集賢關賊踞關守險多隆阿公帶隊由總鋪繞攻關內賊壘鮑公率各營由團山徑趨集賢關參將石清吉率三營暨各馬隊兩路援應鮑公至集賢關守關賊匪奮力抵禦鮑公見關內賊壘經多隆阿公攻破卽督飭各營乘勝猛攻遂破其關潰賊沿山繞谷復被鮑公剿殺千餘名擒斬逆首陳飛熊鮑

公遂率營進紮集賢關分紮十里鋪一帶初七日安慶城賊乘鮑公築營未竣由北門數路來撲正值多隆阿公帶馬隊前往因分途衝擊射斃騎賊數名餘始挫退初八日都興阿公與楊公岳斌商派礮船分路入湖三面轟擊牽制城賊初九日鮑公與多隆阿公率勇分攻城邊賊壘先令張萬祿石清吉等馬步隊列陣分防東西兩門援賊巴依爾呼蘭馬隊中路策應而城邊賊壘極高堅火器難施壘外濠深兩丈密布椿籤濠外復有溪池護繞鮑公與多隆阿公各督勁旅鳧溪越籤拔椿入濠鑿級而上賊抵死

抗拒我軍奮勇爭先各壘賊皆驚懼鮑公揮令各勇分路齊登直突橫衝巷戰良久賊屍枕藉其竄踞屋中者鮑公令軍士揭椽掀瓦搜斬無遺北門城邊大壘四座同時平毀復乘勝攻破東西山灣小壘五座其城賊由東西兩門出援數次均經張萬祿等馬步隊擊退是役共殺賊五千有奇奪獲大礮七十三尊大小擡鎗九百餘件生擒長髮賊五百二名官文恭公都興阿公楊公同奏言該逆憑踞堅城又多積聚其麇集城中者率皆強悍兇逆而下游外來援賊復逼近樅陽一帶官兵內攻堅城外勦強援此次

逼城一戰卽平九壘皆由多隆阿鮑超督飭有方官兵十分奮勇臣都興阿當飭多隆阿鮑超等卽於近城處修營開濠力圖逼攻奏入奉

上諭著官文等卽飭在事文武認真攻剿迅復堅城所有出力員弁著官文等查明保奏及十二日楊公督水師攻毀樅陽賊壘復奉

上諭著都興阿等嚴督水陸各軍乘勝進逼迅拔堅城合兵東下毋稍延緩

十月鮑公以地道轟安慶城不果回軍扼駐二郎河迎擊上

犯之賊勝之

鮑公與多隆阿公逼攻安慶不克因開挖地道潛運火藥其中定期五日內轟城而三河之警報倏至先是巡撫銜浙江布政使李公續賓於上月連克舒城桐城值廬州復陷李公率師至三河鎮聲威甚壯而逆首陳玉成率大股逆眾由和州江浦上竄抄繞官軍後路迎拒李公之師卽以解安慶城圍十一日連營圍李公於三河官軍萬餘人俱覆李公死之舒桐守兵亦相繼潰挫都興阿公奏言臣分軍力攻安慶城悍賊甚多晝夜撲出官軍時時接仗現

在多隆阿鮑超各營與賊相持晝夜血戰不能稍鬆等語
尋奉二十四日

寄諭都興阿現在圍逼安慶官軍腹背受敵亟宜飭令多
隆阿鮑超力籌攻剿以遏賊衝都興阿公又奏言自克復
太湖石牌以來幸得連次血戰圍攻安慶現在舒桐頓挫
安慶腹背受敵勢甚危急各營糧路難通本應靜鎮待援
惟李續賓所部南勇全數潰退楚省兵勇無多因會商多
隆阿鮑超等設法撤圍趕緊繞至太潛一帶迎頭截剿尙
可望有轉機官文恭公亦以安慶圍攻之師宜暫撤以保

銳氣飛咨都興阿公飭令鮑公與多隆阿公由石牌宿松
撤退以牽賊勢而固楚疆鮑公自聞三河之警卽謂眾曰
李公軍覆賊勢方張豈惟斷我糧道必且上竄武漢我軍
縱得此城焉能爲守曷且旋軍鄂境再圖後舉眾因地道
已成猶豫未決都興阿公獨聽其言遂奏請撤圍議旣定
鮑公乘夜拔營倍道前馳多隆阿公以馬隊殿後時潛山
各營已退多隆阿公迎擊賊於黃泥港敗之二十五日鮑
公至二郎河駐紮營壘未立而賊已由舒桐潛太接踵來
逼鮑公奮勇迎擊大敗之賊乃退就花涼亭荆橋一帶聯

營數十里

十一月鮑公擊賊於花涼亭等處大破之

花涼亭荆橋之賊號稱五十萬實亦近二十萬鮑公二郎河之營與多隆阿公宿松之營相隔三十餘里中間以馬隊往來梭巡聯絡鮑公念賊壘偏近各路官營不戰必致坐困適多隆阿公探知荆橋賊勢稍緩於初六日晚間率營銜枚疾進馳至二郎河會合鮑公營分道進剿花涼亭一路部署甫定賊已抽派悍黨列陣前敵賊壘之外分布數十層縣互二十餘里蜂擁來撲而各壘中之賊仍堅守

不動賊計勝則直吞我二郎河營敗則循各壘夾縫退回戰守相護以老我師鮑公於陣賊猛撲時令各營堅持勿動既見賊氣漸疲揮軍迎前直突多隆阿公馬隊亦分途鏖擊賊勢不支敗回各壘夾縫鮑公督軍緊躡其後直貫而入四面鎗礮如雨我軍決不返顧衝過羣壘之後敗賊不及歸壘壘賊不敢出救鮑公急令縱火燒燬後路賊壘及賊踞村莊數十處殲斃賊匪甚夥初鮑公恐鏖戰過久衝過賊壘太遠營中送食役夫不免迷於所向且恐賊見我軍無後繼傾壘齊出圍裹我師因預畱勇丁一哨逼前

敵賊壘而陣待送食役夫至指示官軍去向卽以備犄角之勢及我軍焚燒後路賊壘賊館前敵壘賊回顧火光燭天正驚悸間適送食役夫至哨勇因搖旗吶喊壘賊駭爲奇兵來也遂盡棄其壘四散奔逃鮑公揮令各營乘勝剿殺各役夫亦持擔杖撻賊馬步逐北數十里將花涼亭一帶賊壘全行踏平擒斬僞成天侯韋廣新以下大小頭目三百餘名餘賊數千解散脅從數萬捷聞奉

旨交部從優議敘時都興阿公奏言安慶各營撤至宿松賊卽隨後大至其勢甚衆前敵官軍兩路分紮實形單薄

前自李續賓三河失利卽經催調援兵舒保馬隊由武昌起程至今半月有餘尙未趕到臣所部僅霆字等十餘營步隊實屬不敷堵剿

十二月鮑公扼駐二郎河

都興阿公飭湖北調來之劉連陞等八營扼紮宿松而移石清吉飛虎三營楊朝林精選前營紮二十五里墩宿松兵力較厚而二郎河要隘只鮑公五營扼守賊懾於前次之戰不敢來逼時曾文正公致官文恭公書云旬日累接潯湖來信知都鮑疊獲大捷陳逆不敢上犯大局危而復

安尋覆胡文忠公書云聞都鮑近有三路進剿之說此時
祇可自守難期進取尙祈嚴緘止之

己未咸豐九年

正月鮑公進圍太湖

時分茅嶺之賊退至石牌蓮花塘楓香驛餘賊退至太湖等處增壘抗拒都興阿公以腰疾請假調理並奏請將所帶兵勇悉交多隆阿公統帶移營前進鮑公亦率所部逼太湖而壘自三河軍覆胡文忠公卽馳抵黃州整理傷敗各營至是

廷旨以太湖軍務重大調度須人飭令將進止機宜就近妥爲籌畫文忠乃將黃州各營之精實者二千餘人調赴

太湖於是太湖之師多隆阿公馬步五千餘人唐公訓方
蔣公凝學各數千人鮑公所部仍五營三千餘人而已都
興阿公之引疾也論者疑爲因多隆阿公驕縱不受約束
鬱鬱而爲此故奏請將現派各軍概歸統帶而文忠復奏
令鮑公之軍及多唐蔣三軍均仍歸都興阿公調遣又以
太湖石牌之賊閉匿城中堅不出戰賊之狡計欲以堅城
挫傷士卒而轉於空虛不備之處乘間投隙狡焉思逞賊
已憑城設守必非近月所能奏功英山羅田現有警報應
俟邊防穩固上游無虞始可遣將抽兵分途進剿又聞陳

玉成將以大股來援太湖因致鮑公書云此時大計應斂
兵自固靜以待動不必攻城攻壘聯絡軍營以待援賊之
自至審機審勢以求大戰若孟浪輕率恐必誤事也乞戒
諭各營勉力自愛莫直逼城下致使不得施展莫立意攻
堅損士卒銳氣賊計在包抄我軍須防其後又致唐蔣兩
公書畧云古今兵事有戰法無攻法惟近年之官軍異是
幸乞以此戒約如有強兄攻堅者卽錄此以憑稟報以憑
奏報自經文忠力戒攻堅故鮑公雖奮勇圖功只成守局
然自此以後數月只鮑公與多隆阿公兩軍逼太湖而壘

唐蔣之軍俱駐太湖迤南之荆橋爲後路援應

四月鮑公圍攻太湖

時勝保奏請飭楚師力攻舒桐安慶使撤回逆援奉

寄諭上年李續賓一軍以深入無援坐失名將今議會勦

勝保當先與官文胡林翼審酌機宜固不可畫疆自守亦

不可輕進貪功胡文忠公奏言太湖馬步各軍仰攻未能

城池未復征皖之師孤軍未可深入等語文忠又以勝保

之請楚軍會勦意在楚軍統帥從此均歸其調遣因會同

官文恭公奏言都興阿義烈本於天性楊岳斌智勇兼備

秉性亦甚剛嚴該將軍提督之威望已隆忠勇素著非他人所能指揮亦不煩他人之督責多隆阿鮑超之驍勇冠軍李續宜唐訓方之質實不欺臣等共事最久誠信相孚必可得其心力設異日出省遠勦驟歸他人節制恐心志不能齊一性情未必相投且皖軍鄉土不同人心各異若與楚師合併軍情必多疑忌於事未必有益不若各勦各路以專責成奏入報

聞於是文忠專意布置楚皖之交又因偽翼王石達開竄湖南議分湖北馬步數千交舒保公及李公續宜往援永

寶以固上游根本湖北兵力頓薄不宜併力太湖一隅致
兵勢偏注於下遂令鮑公與多隆阿公仍扼守太湖以待
賊情之動定不必急於奏功其時文忠致鮑公書有云近
日湖南軍情尙緊下游未能尅期並進應以操練盡善訪
舉勇敢爲異日進剿之計茲從京中帶來高麗複半斤專
弁奉上以資調理

八月鮑公嚴守太湖營壘官軍攻石牌鎮僞城克之

都興阿公引疾後遂回荊州將軍本任多隆阿公時官記
名副都統曾經奏派總統前敵鮑公雖別將而戰守機宜

因以不能自主故數月以來一無戰事如二月十八日蠟樹柯茶婆嶺三月二十五日龍山宮迭次小戰鮑公皆不與而石牌鎮僞城者乃賊所恃以阻我軍入皖之路與太湖城內之賊互相援應兼通賊糧火藥是以我軍屢攻太湖未能得手至是多隆阿公於二十六日率所部參將雷正綰楊朝林等數千人馳抵石牌於二十八日攻克之多隆阿公之出隊並未告知鮑公而鮑公以三千人之軍孤立太湖城外城賊亦怯於積威不敢出犯

九月楚軍分路規皖鮑公仍由潛太進軍

先是官文恭公胡文忠公以湖南之賊將竄入蜀奏請曾文正公帶兵赴夔州扼守已而江西肅清官軍大捷於寶慶石達開竄廣西文正奉

旨暫駐湖北調回湖南援軍分路進剿皖省其覆劉公蓉書有云俟與官帥商仍當從胡李多鮑諸公之後共圖皖中更事日多斯不敢爲天下先耳於是會籌四路進兵之策第一路由宿松石牌以規安慶文正自任之第二路由太湖潛山以取桐城鮑公與多隆阿公任之第三路由英山以攻舒城文忠任之第四路由商城固始以規廬州李

公續宜任之然文忠奉於吏事餉事李公自湖南凱旋後
又因母病暫畱故所籌四路卒未能同時並舉而鮑公所
當潛太一路則深入皖境頓兵堅城已十閱月矣鮑公自
守圍太湖以來嘗於營外擇地逐日抽練戰陣技擊之法
并暗度太湖城壕丈尺纍土石肖之令軍士操習踰溝攀
堞及聲擊進退節度又時派隊驚城使賊不得安息以爲
疲敵之計至是文忠覆鮑公書謂再誘之出戰大挫其鋒
則將不攻自破時鮑公見太城賊勢漸蹙克復後宜分軍
乘勝急圖安慶預請於文忠願以自任以伸從前未竟之

志文忠覆書云由石牌攻安慶一路滌帥之軍可任之而克復之功仍當歸老弟與多都護兩軍前此血戰事業垂成滌帥與兄斷不欲居良將之功以爲己力此次成師而出必須一氣呵成必待布置周密步驟井然方可鼓行而前幸毋過於急性也

十月鮑公移營合太湖之圍

先是太湖圍師只頓兵一面至是鮑公營移東湘營移北乃成合圍之勢

十一月鮑公赴宿松曾文正公營尋回太湖

初一日以後鮑公商同唐公訓方乘夜環攻數四不息胡文忠公恐久攻無益因函令毋爭克復之遲速但防城賊乘夜竄出時鮑公母鄧太夫人患病甚重召之歸省鮑公乞假於文忠及曾文正公情詞迫切文正令其至宿松營次勸慰再三忽報援賊將至鮑公不得已遂於十七日馳回太湖

十二月鮑公移紮小池驛擊退撲營之賊尋出隊會攻地靈港賊壘破之賊遂環圍鮑公營壘

石牌旣克我軍卽設計力攻太湖而賊恃其城堅糧足死

守待援逆首陳玉成嘯聚廬州定遠舒城桐城潛山廬江
三河浦口六合各路髮捻眾號數十萬來援上月分股撲
距太湖數十里之天堂及槎水畝等處經防軍余際昌等
先後擊退至是以大股分三路齊逼太湖先是胡文忠公
從多隆阿公之議抽撥太湖圍師迎擊援賊然原議以多
隆阿公與蔣公凝學備剿援賊以鮑公與唐公訓方專制
城賊而固楚疆及是月十五日援賊已近多隆阿公忽與
蔣公商定移鮑公之營於潛山小馳驛以當前敵鮑公顧
念大局卽從之十六日移營多隆阿公自以其軍駐新倉

以蔣公駐龍家涼亭時賊已漫山徧野循潛山城西太湖城東傍山爲營均逼小池驛袤斜三十餘里作壘百餘座二十一日以大股圍撲鮑公之營日夜不息多隆阿公按兵不動鮑公督將士獨力擊卻之二十二日鮑公復與多隆阿公商議分路進兵攻剿地靈港東西兩岸賊壘辰刻我軍布置甫定賊眾排列隊伍直前迎拒多隆阿公以東中兩路馬步直趨地靈港而以西路一軍分繞賊壘之後夾擊之賊悉眾抗拒協領西林布中鎗陣亡鮑公急揮兵勇奮力衝擊將東岸賊壘十一座全數踏平斬悍賊無算

其西岸賊壘亦經鮑公步營會同協領喀爾庫馬隊連踏
數座斃賊甚夥逆眾往山潰逃我軍且追且殺喀爾庫遇
伏陣亡是日鏖戰五時之久斃賊六七千生擒數十官軍
焚賊壘而不忍延燒民房不知伏賊預藏村落之中我軍
深入爲賊所包抄自己至酉血戰縱橫再接再厲賊始敗
退我軍整隊回營多隆阿公軍馬步陣亡數百人鮑公軍
士亦有傷亡官文恭公等奏言陳玉成踞潛太狡悍異常
我軍以少克眾實由將士齊心用命得以奮力擊退關係
東征大局良非淺鮮奏入奉

上諭此次粵匪陳玉成句串捻逆由江浦廬州等處上犯太湖經鮑超多隆阿蔣凝學各軍分路迎擊踏平賊壘大獲勝仗所有各營出力將士著准其彙案擇尤保奏自有二十二日之戰玉成益憤力圖報復專趨注於小池驛聯營百餘里步步逼近壓鮑公之營而壘其近者至於聲咳相聞而鮑公不爲動左營參將蘇文彪後營參將段福尤當賊壘之衝二十四至二十八九等日賊以悍黨日夜環攻士卒多有傷痍者鮑公惟撫以忠義志氣彌厲自誓不退一步不棄一壘文忠致鮑公書有云弟以三千餘人當

援賊五六萬之衝尙能穩紮穩打想見忠肝義膽辟易萬
人士卒亦皆用命可敬可愛堅守十日山內各軍約會夾
攻弟勸其前兄拊其背可破滅此賊得鼠輩而甘心刻下
總須堅忍以待切勿輕於出隊

霍軍紀略卷二終

霆軍紀略卷三

銅梁陳昌世五編輯

門人

吳樹棠
王澤

全校字

庚申咸豐十年

正月鮑公會攻援賊大破之於小池驛克復太湖縣城遂復
潛山縣城

曾文正公自奏定四路規皖後於上年十一月帶步隊二
十營馬隊一營進駐宿松及見鮑公之軍調赴小池驛恐
太湖兵軍圍解大局可虞而迎擊之師尤慮腹背受敵因

於十二月二十日抽派宿松十營交副將朱品隆主事李榕馳赴太湖與唐公訓方合軍駐於城之西北南三面尋因鮑公營壘危急加撥護軍三千人並馬隊一營馳赴太湖而抽唐公一軍赴援小池驛又調喻吉三凌蔭庭各營赴羅溪河至是見鮑公餉道不通又抽調太湖七營派品隆馳赴新倉以資援剿胡文忠公於上年十二月二十四日以後飛調麻羅防兵赴新倉會靖毅貞幹及趙克彰等營赴太湖多隆阿公於二十九日督隊爲鮑公護運三十日派參將楊朝林駐鮑公左營之壘移左營於中營養傷

至是月初六日唐公移營於鮑公及蔣公凝學兩軍之中以資聯絡而通餉道多隆阿公亦派參將王可陞駐鮑公左營之旁而令左營仍駐原壘馬步各軍忿與賊戰王可陞之壘卽日而成唐公之壘未成而賊已進逼遂挫退三營全陷於是合紮新倉鮑公之營復被賊圍裏鮑公督令各營堅守不動於初十夜三更出隊擊退唐營舊壘之賊多隆阿公於十二日復抽派所部兩營駐小池驛之南維時文忠所調金國琛余際昌等軍共二十五營已陸續由後山繞至水吼嶺仰天菴高橫嶺乘高拊賊之背而連次

接仗均未能大挫賊鋒以故陳玉成仍得專注小池驛十二日以後鮑公遂與各軍訂期夾擊密約小池驛三次排鎗爲號山內諸軍亦三次應之而皆爲風雨所阻賊亦乘陰霧四塞潛移其壘於羅山衝白沙畈一帶冀與太湖城賊勾通分股繞犯率綴我軍我軍因卽雨雪之中得從容會商分撥各路以大圍包裹援賊復以伏兵橫截城賊二十五日黎明會齊鮑公親率五營空壁而出直薄賊營各壘之賊皆出救圍我軍數匝鮑公爲方陣施放連環鎗賊不敢逼多隆阿公令蔣軍橫截之唐軍尾抄之朱軍扼之

於右而自率馬步從中路殺入賊遂大敗擒斬數千是夜
鮑公與多隆阿公籌分東西中三路乘勝急攻之策二十
六日仍黎明出隊東路小池驛之賊分作四路抗拒約數
萬人而田壠中大股尤多鮑公親督鄭陽和蘇文彪余大
勝易昌煥黃慶段福陳由立朱國永劉車龍等由東路左
面擊田壠之賊朱希廣趙克彰繼之正鏖戰間唐公訓方
在東路之右見左面賊眾且悍而鮑公獨當其衝又撥四
營來助我軍勇氣益奮聲震山谷賊遂回奔時西路之軍
進攻羅山衝外賊壘而山賊齊出勢甚悍多隆阿公因督

中西兩路兵併力攻山衝外衝內兩面夾擊賊屍盈澗谷
唐公見鮑公之軍旣勝亦親率各營由東路右面斜刺而
來鮑公揮軍左衝右突賊益狂竄於是我軍合東西中三
路一齊追殺乘勝合攻賊壘值東南風緊火箭火彈觸處
卽燃頃刻賊棚賊館延燒七八里燎及山腰煙燄蔽天樹
焦山赤大小賊壘一百數十座頃刻胥平棚館數百無一
存者斃賊約七八千生擒數百奪獲軍械無數解散脅從
數萬人鮑公所部獨獲大礮二十四尊二千五百觔夷礮
一尊擡鎗小鎗千餘桿山內之軍金國琛余際昌等是日

依約由甌皮尖廣福寨高橫嶺三路齊進至銀硃塔王家
牌樓等處其時山外各軍正在得手賊沿山內竄而不虞
我軍又由山內突出奮力夾攻賊前後受敵亦遂敗竄殲
斃三千餘名太湖城內之賊因援賊大敗卽日宵遁小池
太湖餘賊竄入潛山城者萬數千人多隆阿公商令鮑公
及唐公等營搜捕各山匿賊而自率馬步同蔣公等乘賊
驚魂未定往攻潛山立克其城鮑公逐北至羅山衝又獲
大勝擒斬甚多官文恭公胡文忠公曾文正公同奏言是
役也斃賊二萬餘人爲軍興以來僅見之大戰非鮑超以

三千餘人獨禦前敵傷亡千餘猶復血戰兼旬不卻一步不失一壘則應援各師必有緩不濟急之勢鮑超勇摯堅強力遏兇鋒惟係二品大員未敢擅擬請獎等語并隨摺保獎霆軍營官四人奉

上諭逆首陳玉成率黨力援太湖副都統多隆阿總兵鮑超等親督各軍分路鏖戰殺賊約二萬餘名平賊壘百數十座焚賊棚館數百處克復太湖縣城實足以寒賊膽而快人心官文胡林翼曾國藩督軍進剿調度有方著先行交部從優議敘總兵鮑超著賞加提督銜宋國永著俟補

副將後以總兵簡用蘇文彪著以副將儘先補用並賞給
確勇巴圖魯名號鄭陽和著以副將儘先補用並賞加總
兵銜段福著以副將儘先補用並賞給勳勇巴圖魯名號
陣亡員弁俱優卹如例其餘出力人員擇尤保獎當賊之
斷鮑公糧道也攻營益力鎗礮子密於雨點洞穿左軍棚
帳如蜂房時或傷鮑公左右鮑公神色自如鎮之以靜入
夜則兵營賊營俱停刁斗燈火無光狗逆之營去我軍最
近一日賊乘夜運米以濟狗逆誤送至鮑公前營隔壕悄
問此英王營盤乎適鮑公正巡營命門者佯應之並授軍

士祕計而親出審視昏黑中數百囊擔充塞壕外如法抽驗果皆米也命運入營中係累其負米役夫而將護運之真賊隨入隨殺之甫及半壕外賊疑懼不敢入將餘米轉送至鮑公左營已而又送至右營俱悄問如前軍士亦如前處之運米賊數百人無得脫者共得米三百二十餘石鮑公正苦糧道不通圍困饑迫之中忽得此意外接濟眾以爲天授而士心益固矣方送米賊之隔壕悄問也適後營守者報賊酋乞降請鮑公親往開示鮑公命營官某詭稱主將代往而自赴前營應付收米事及某與降賊語甫

數言賊曰若非鮑公也氣魄不類必鮑公親來始輸情收米計定鮑公乃親至後營立壘上呼降賊與語降賊伏鹿角外一聞其聲卽驚曰此眞鮑公矣鮑公曰汝何降爲曰久服公威信欲降無緣今賊且就殲不降何待鮑公曰賊數共若干曰五十萬鮑公曰以吾觀之不過二十萬耳汝知吾兵若干曰五營三千餘人耳鮑公曰眾寡懸殊謂賊必滅何也曰昨者除夕賊聞公營爆竹聲疑公出隊來劫各賊營竟夕驚惶天明始定賊雖多畏公如虎破滅可立而待又曰我有眾三千欲盡降則恐以聲勢貽誤鮑公曰

降否聽汝人數多寡亦聽汝越日果以三百餘人來降正
月初十日文忠致密函於鮑公曰如力實不能支尙欲全
軍以待大舉救得人才不怕賊子不死於老弟之手此事
暫不可宣萬一到緊急無可如何之時則新倉荆橋均是
退步有過兄一人任之兄爲管理軍事之人以保全軍旅
爲主斷不忍諉過於人也鮑公覆書云狗逆雖悍技只此
耳因大雨兼旬未能出戰遂使賊得暫延殘喘三五日內
天色晴霽保爲公破之何事先自倉皇預籌退步耶文忠
壯其言援賊未至以前文忠致書曾文正公有云此間不

憂唐蔣之軍而深慮春霆愛春霆也春霆似孟施舍詢以
軍事斷不告饒加以激厲轉成憤氣宜委曲而暗中保全
之若援賊眞從太湖一路而來則必先全春霆一軍乃能
得手是時多隆阿公尙未移鮑公之營於小池驛而文忠
已慮之如此及移營被圍致多隆阿公書云霆營當延山
逼壘日夜攻擊之衝其苦況可危其愚忠可念左營營官
鄭陽和敢戰之將受傷至於再至於三機智則未樸勇則
眞又致鮑公書云老弟孤忠貫日月義氣薄雲霄可感可
敬老弟與鄭陽和應特疏薦舉卽各營將士應均加獎也

兄已函託義渠幫助老弟此次援賊必須盡殺多殺殺退
之後當使老弟獨領一軍獨當一面也又云左營受七晝
夜鎗礮之衝其堅苦屹立勢如撼山尤可想見其營帳軍
裝已飭武穴轉運局趕緊解送即可專勇迎提又函云唐
軍挫退無刻不懷念弟營每得弟一函展視再三而私心
稍慰如懸旌在空風過略定鎗礮對擊山坳賊不敢近深
以爲慰此後約會出隊切勿專顧賊壘酣戰而前須防村
館悍賊沿山四出我能以抄後見功則賊無所施其技矣
及聞鮑公餉道有失連與別將書云霆營餉道梗塞心以

爲危或山內各軍速出高橫嶺并力破賊尙可救也又云連日以鮑軍孤懸爲慮幾乎寢食均廢又云鮑營甚苦羅溪河等處暫不必分心急謀大捷以救春霆又云救鮑打狗進兵宜速宜併力後致曾文正公書云昨日尙深以鮑軍爲慮夜間得唐鮑來信餉道尙通卽夜躍起致鮑公書云十三夜三更出隊擊退唐營舊壘之賊想見調度有方撫循得法士卒忠義感憤之氣愈苦愈堅鄙人何德不知所報願弟代致私忱爲幸兄已備米一千石錢二千串作賞交武穴吉水溝局員矣又致浙撫羅公遵殿書云小池

蹇營被賊三面圍攻兩旬有餘多唐蔣各軍皆氣沮志怯形隔勢阻不能救等語想見文忠顧全大局救護良將一腔熱血流溢於楮墨間其調處鮑公與多隆阿公尤爲苦心善術委曲求全文忠嘗謂多隆阿公是功名之士驍果之人總不脫一矜字又謂其意忌情深伎心尤甚又謂其勇而伎是戰將之才非統將之才自圍攻太湖旣久多隆阿公屢以權分勢均調度不靈爲言已而稱傷病舉發又值鮑公請假省親文忠恐將帥不和事權不一致蹈唐代九節度覆轍而多隆阿公臨陣機智過人且自都興阿公

引疾後曾奏派總統前敵於是文忠商之文恭文正專牘
委任將鮑唐蔣三軍並李公續宜均歸其節制調遣文正
覆書力爭之謂近年鮑之戰功比多更偉其高亢亦自有
挾而然卽令出迪菴下尙非所願况多乎強之使歸愈激
之攜貳也多公善戰而頗難相處其才似宜將少不宜過
多且二公正以彼此爭勝爭強故各自力戰不肯落人後
若鮑歸多統則多之意滿而鮑之興沮彼此皆無爭勝之
心甚非利也只如昨日尊處婉勸之函便到恰好地位不
必再發公牘國藩今日覆鮑唐各一函亦勸其凡事推多

都護主持委蛇聽從同進同退尙祈鴻裁酌奪毋遽生波折爲荷文忠復致文正書云一事權之意虛且暫局也專責成之意實否則馬隊不救步兵畢竟是步兵喫虧耳丈肯林翼萬不敢違然此事竟未能恪遵不失中有苦心也鮑唐於打援賊後均可獨當一面文正覆書云步兵不可無馬隊此多公所挾以傲迪菴者若春霖億生寺之戰多之馬隊並未在場事固難以一概論也文忠亦恐未當連致書各帥云臨陣機宜禮堂兄所能獨斷各營將士恪遵調遣斷無貽誤又云太湖機宜惟靠禮堂兄商同諸位一

力肩承相度布置禮堂多隆阿公字也其與鮑公函論兵
事不曰候滌帥酌示卽曰有兄主持蓋恐歸多節制之說
鮑公尤難於遵從故爲此調停之計而鮑公體諒文忠苦
心一意顧全大局進止一聽多隆阿公文忠慰甚致書有
云吾弟忠心義膽兄所素知乃戎行閱歷馴至於優容大
度慎密小心學問進境亦如是之速喜可知也而文忠終
有慮於多隆阿公復致書云爲大將之道以肯救人顧大
局爲主不宜炫己之長摘人之短鮑鎮唐道蔣道均非張
皇人仁兄來書詞義微嫌輕薄諒是記室措詞之失鮑唐

蔣卽有力弱兵單之處惟望一力一心大家維持後又迭次致書有云兄與春霆弟謀定而後動師克在和取彼凶殘吾無慮矣弟意尙嫌霆軍單薄能續調蔣軍四營會紮小池驛乃更妙又云大將須有嘉善而矜不能之氣度乃可包容一切春霆弟一營孤懸望隨時救應又云前敵之危仁兄之所目擊仁兄全行換營之說知爲愧厲霆營之語無此不近人情之事前後書詞溫肅互用而多隆阿公卒亦能爲鮑公護運換勇養傷自臘尾至正月幾無日不親至鮑公營中撫循慰藉馬步相依合破大敵至曾文正

公之知鮑公自初入水營始其愛鮑公重鮑公尤於此役見之當鮑公請假省親文正致文忠書云鮑公之母患病甚重渠請假歸省聞此軍近極精勁規矩遠勝在麻城時斷不可准假也求以美言撫慰之後因圍師移營事又致書云鮑軍紮東門聞多將寶塔下數營撤去鮑之糧路倏爾隔斷多不告鮑而徑撤去鮑心亦不甚怡又云鮑公苦戰一時諸將所不易及久邀洞鑒渠所怏怏若有未足於懷者總以人數太少不能獨當一路援賊將至侍與少荃商囑其竭力以打援賊准其添立一營五百人以足四千

人之數由敝處糧臺先發五箇月再商之宮保侍因其雄心鬱鬱欲有以悅其志少荃李公鴻章字文正後致鮑公書云貴軍糧路尙通否如果不通則目前卽屬可虞將來援賊大至更爲可慮不得不早爲設法移紮西路霆字舊營以就糧道以固軍心又致文忠書云以鮑固楚疆多擊援賊鮑公以能戰自命恐未必甘居守兵之列此間諸將亦頗以爲人所輕侮爲恥鮑之恥更當甚於諸將祈酌之後又致書云接鮑春霆來信知渠移紮小池驛殊爲駭異當此援賊大至泥深數尺鮑營獨當前敵營壘安能堅固

且鮑在小池爲前敵蔣已爲第二敵多已爲第三敵矣且鮑前紮東門固險今紮小池亦險著也前議多蔣迎勦援賊鮑唐圍攻太湖不知何以忽有此一變待未聞臨敵忽移新營之說焦急之至又致李公續宜書云鮑軍進紮小池前有潛山之援賊後有太湖之城賊營壘新移濠牆難修多公隔二十里外難遽救應可慮也又致文忠書云陳玉成龔瞎子皆著名兩悍賊多鮑之善戰閣下之威名皆所以怠我而怒寇敝處擬再派二千人紮於小池驛之東南以保後路打仗之時賊不得抄鮑之尾又致唐公訓方

書云此時以救全鮑軍爲第一要著又致湘撫駱文忠公書云賊圍鮑之左營後又用大圍包裹文報不通已三日矣危急之至求閣下於浚川凱章二軍催一來鄂但能抵漢黃爲救敗之著則兩湖之幸也浚川蕭壯果公啟江字凱章張忠毅公運蘭字又致胡文忠公書云蔣營出隊賊略弛鮑軍之圍鮑之左營得趁此機以運進水米子藥可云至幸然已被圍四日矣霆左營營官爲誰援賊果卻必求我公以生龍活虎之筆超保之鮑鎮亦須特保又致鮑公書云聞四眼狗性情輕躁不能耐久我軍宜以堅忍勝

之擒匪向來不服長毛其交可暫而不可久此時貴軍當求穩固不求奇功如能堅持半月二旬外必破賊矣又於破賊後致胡文忠公書云皖事可圖鮑軍傷者較多不審能猛進否又不知其歸蜀之志堅欲必遂否應俟渠私計定後而後大局公計乃可決也又致官文恭公書云月餘以來多鮑二公功最偉勞最多可稱雙絕又致文忠書云春霆添營一節亦懇允准以風壯士文忠致多隆阿公書有云鮑春霆一軍如兄不取則可交滌帥差委滌帥欲之而未明言也又致莊公受祺書云多都護恨鮑春霆而滌

帥甚愛之不能不曲從等語至文正撥營會剿小池以救鮑公之危尤爲心力交至故當援賊將破時文忠覆翁公同書之函有云惟春霆之義氣孤忠堅忍耐久與我以破賊之機惟滌帥之婆心救人分防助剿堅我以破賊之力壯猷遠略弟何有焉

二月鮑公請假省親兼養傷病

胡文忠公以此次賊皆精銳非盡以脅從湊數血戰兩月賊氣傷十分之七兵氣亦傷十分之三應稍稍休息鮑公亦苦傷病引發因援前請乞假三箇月回籍省親就便調

治文忠商之官文恭公謂功勞以多鮑爲大請由糧臺餽銀千兩以慰其將母之心其營官之奮勇帶傷裹創力戰者酌送百金六十金不等時曾文正公覆文忠書云春霆請假公與侍皆先許之矣似不宜食言惟囑其不可久畱川中迎其老母眷口出峽或住荊州或住漢黃准其團聚兩月有奇往返符百二十日之約但不在川境以免奏畱耳訓勇七營中聞多精壯之士或謂宜全數撥歸鮑部鄙意勇以親手招募者爲佳似可一面令訓營撤散一面令霆營招選仍令春霆酌用訓營之豪強者爲營哨官移花

接果當可兩得其宜進兵能三路並進乃得勢鮑公添至六千人又操練馬隊實足獨當一面與多公分道揚鑣今多鮑請假休養斷不能三路矣只好待沅甫還營多鮑假滿再議所向等語訓營唐公訓方之軍也沅甫曾公國荃字又覆書云春霆來此小住一日遂回本營已與之商定請閣下准其告假三月由皖還夔程途一月在家停住二十日奉母攜眷而出或住漢口或住華陽鎮舟次按限卽還陸營閣下慮其爲四川所畱鮑意待渠起程一月之後此間再行入奏在夔僅二十日必不至爲蜀所畱但求閣

下奏明回籍省親字樣以爲光寵云云想仁人亦必允許
渠又欲往英山稟辭侍力阻其不必再往旣已准假卽須
快去快來霆字五營渠意欲紮二郎河公意欲令其紮天
堂或至英山護衛鄙意擬令紮潛山縣爲桐城安慶後路
之聲援公旣不久住英山則霆營可不必紮入山中矣請
裁定速示春霆以便料理起行多公統萬人鮑公統八千
均可勝任霆營再添二千人尙未接奉公牘令其招募常
勇乎抑令至長沙另招乎如令招常勇卽須趕緊札行多
公雖有統萬人之才但得七八千人儘足自當一面若必

取盈恐不敷調撥鮑公則得六千二百人已隱然巨鎮矣
又覆書云霆營不宜撥隸敝處宜爲尊處護衛或駐天堂
或駐他處宜守而不宜戰眾論皆然霆軍之營哨弁勇長
沙省城人居多樸者頗少而能屢拒大敵兵事誠不可以
一律相繩乎流破礮一帶本不可以無兵然鮑公未還營
之先霆軍總以在閣下身邊爲妥北路如果喫重似仍須
多公馳援等語先是援賊未破文忠已許爲鮑公添足五
千人之數鮑公之乞假也以四月請文忠只准三月時蜀
中滇匪正熾又須防石逆文忠致文恭書有春霆錚錚恐

爲蜀中所羈絆云云鮑公得假後以宋國永代統其軍文忠致書云昨調貴營移駐霍山黑石渡或分起入城中爲守等因諒已察看該處地勢情形應請足下審察酌度妥速辦理以重北路之防而備東征後勁之師春霆未到以前總是守而不戰之局須四月後乃可進六霍之青山堡也

三月鮑公離營回籍

先是僞英王陳玉成僞忠王李秀成糾黨上援江南帥張公國樑因乘勢攻克金陵上下關賊壘秀成自太湖敗後

由皖南竄入浙江至是曾文正公胡文忠公正議三路規
皖又議奏派鮑公督軍援浙使之獨當一路鮑公甫離營
而文忠卽致書曰弟台假歸以久役行間不遑將母亦屬
人情之至而省中不免以大義相繩中堂詞意尙不以爲
然此中委曲殊難言罄昨以傷病請假入告祇謂離營養
息弟台到家後三五日內當奉母挈眷迅速赴鄂萬不可
稍事稽遲人之多言亦可畏也前聞浙事危急李秀成離
杭城不過數十里經旬未有近耗心憂萬分已以蕭守翰
慶應援亦慮緩不濟急仍擬另撥勁軍隨後再進若非弟

台啟行不至焦思無策也三月之期斷不可拘定前議總以速來爲妙跂予望之文正覆文忠書云霆營究以護公左右爲妥公在英山霆亦英山公居天堂霆亦天堂若非春霆在營恐不足當大敵侍公之側壯藜藿不採之威干妥萬妥多公尙請病假不知多公所不滿意者安在以鮑公不應回籍耶不應於奏中贊鮑堅守之功耶抑敝處禮節有未謹耶若狗逆來犯諒未必肯當前敵似當謀所以禦賊之法又書云昨夕熟商以敝部圍懷甯多公圍桐城希菴駐青草壩爲懷桐援應余際昌調守霍山爲第三路

防兵霆營調兩路口等處爲第四路防兵是否有當第四路當以何處爲最近何處爲扼要乞酌裁等語希菴李公續宜字又覆書云公脈象尙不甚好總由平日心血用得太過霆營新募之勇鄙意不可停招渠求之甚切公應之甚堅萬無停理無論有餉無餉公且一概莫問一意靜養侍當與揆帥莊嚴諸公徐徐圖之保無他變等語莊謂莊公受祺嚴謂嚴公樹森

五月鮑公至夔州復奉調東征宋國永等率霆軍南渡

先是曾文正公方籌兵圍攻安慶而李秀成等逆自竄陷

浙江省城經張公玉良克復尋竄陷建平東壩溧陽糾大股萃於金陵於閏三月攻陷大營官軍潰走丹陽張忠武公國樑忠壯公和春相繼陣亡時擒匪竄擾河南上蔡新密圍撲項城楚邊戒嚴胡文忠公札調霆字五營移紮上巴河一帶以資抽派援剿兼防黃陂孝感等處尋與楊公岳斌議俟擒匪果定以鮑軍六千人由水路出黃石磯以圖樅陽已而秀成等連陷常州府城蘇州省城援浙之蕭壯節公翰慶亦軍覆陣亡文正奉

旨署理兩江總督咨調霆字全軍渡江霆軍之改隸曾部

自此始時都興阿公奉

旨赴揚州亦欲帶霆營同去文忠覆文正書云霆營六千人萬不敢有吝嗇之情應遵示撥調惟是都公在此日夜坐索霆營今咨覆霆營南渡都公之索昌營必堅矣文正尋奉

寄諭曾國藩現已抽調兵勇萬人由宿松進駐祁門俟鮑超張運蘭李元度到後卽由徽甯蕪湖廣信分路進兵具見胸有成竹謀定後戰惟蘇省待援迫切該署督惟當催令鮑超等迅速來營會籌進剿但能援師早到一日卽早

一日救民水火實深殷盼該署督現統兵勇較單未可輕率前進宜加持重爲要文正覆張公芾書云侍現帶霆營渡江尙無領將須在安慶略爲等候鮑公到後乃可分兵進剿浙江陷危棉力不能速救憂心如焚文正尋於是月二十七日行至東流復致張公書云所調鮑鎮之霆字營自湖口南渡者一半餘二千人竟阻風不能渡江鮑鎮亦無回鄂消息前本飭霆軍先赴祁門以保江西之門戶而聯徽浙之聲援今既不盡南渡則侍當先行所挈僅諸偏裨殊深焦灼是時文正迭次飛檄促鮑公胡文忠公亦致

書云吾弟爲國馳驅不遑將母者十年今甫天倫暢聚何敢遽作不情之懇速弟來營第皖事甚棘非弟莫辦請速迎養太夫人南來庶忠孝可以兩盡鮑公因其言詞肫切卽日嚴裝東下

六月鮑公由夔州起行宋國永等率霆軍到祁門

鮑公於十六日起程二十四日曾文正公奉

旨補授兩江總督並授爲欽差大臣督辦江南軍務尋奉寄諭著卽飛催左宗棠李元度鮑超張運蘭等到齊由池州廣德分路進兵規復蘇常先是文正於上月十七日奏

稱鮑超因傷疾舉發於二月間給假回蜀計須六月乃可
趕到倘鮑超等到營稍速臣當隨時策應不敢稍涉拘泥
至是覆胡文忠公書云鄭陽和率五老營於十六日到祁
門宋國永率四新營於十七日到祁門鮑鎮久無來信敬
求尊處爲我飛催此間又隔一層也又覆張公弔書云目
下所帶霆營六千人內三千四百係多年老勇其二千六
百則係今夏新招未曾見仗鮑鎮未來萬不可以言戰實
屬自知甚明自度甚審又覆文忠書云甯國之存亡關係
侍之全局斷無不思救援之理惟鮑張未到何可言戰卽

鮑至而張不至猶慮其孤也

七月鮑公至湖北宋國永等率霆軍進攻涇縣以援甯國

曾文正公奉初一日

寄諭曾國藩已抵祁門著卽調派勁旅前往甯國與周天受內外夾擊其蘇常等屬應如何速籌進剿一俟鮑超等到營并著卽行籌辦又奉初三日

寄諭逆匪竄入於潛勢將內犯省城如曾國藩尙未能督兵前往卽催調張運蘭鮑超等迅速到齊兼程前進以顧全局文正奏言甯國被圍緊急臣所部萬餘人皆係新募

之卒未經見仗不敢輕於一試鮑超爲水所阻尙未旋鄂臣不援則甯國有坐困之勢赴援則統將無可派之人萬分焦灼又奏言目下軍情自以規復蘇常爲要而皖南進兵必須能保甯國能復廣德乃有進兵東下之路則必以急援甯國急攻廣德爲要二者力不能兼則又以專救甯國爲要臣自聞甯國被圍之信催調各軍急切難來日夜旁皇莫知所措茲幸接據鮑超稟稱已於七月初五日行抵宜昌府月底可趕到祁門臣擬俟該鎮到後派率霆營六千人由黟縣以攻石埭派張運蘭攻涇縣李元度由徽

縣旌德前進必俟三路肅清直抵甯國然後臣軍之立腳
始定皖南之局勢始安又覆李公續宜書云此間事機多
不適意春霆到營尙早宋國永亦患瘡疾鄭陽和病大發
霆營六千人竟無主持之人又覆文忠書云張鮑未來宋
鄭皆病實無帶兵往救甯國之人亦猶八年冬之不赴閩
實由營中多病外間不諒而咎之也尋札宋國永云昨飭
貴軍霆字全營由太平進攻涇縣張道老湘營由徽州進
旌德皆所以救甯國之急張道定於二十八日自祁門拔
營二十九日可至黟縣應請霆軍營務處宋副將卽至黟

縣與張觀察會晤熟商一切由徽州至甯國府有兩路東路由甯國縣西路由旌德縣由旌德至甯國府亦有兩路東可走甯國縣西可走涇縣候老湘營到旌德紮定二日貴霆營再進涇縣蓋旌德乃涇縣之後路也候貴霆營到涇縣紮定二日老湘營再進甯國府蓋涇縣乃府城之後路也用捲塘進法以互保後路此其大略耳至曲折細微則請足下與張觀察面商再行飛稟請示付去地圖一張查收鮑春霆十八日自武昌啟行想日內可到

八月霆軍部將宋國永出隊擊賊獲勝鮑公抵祁門駐軍漁

亭

張公玉良師潰嘉興杭城圍急曾文正公奏稱現派鮑超
張運蘭由涇縣兩路赴援甫經拔隊成行斷不能失信於
甯國而改援浙江等語宋國永於初六日行抵長園探聞
石埭大股賊竄入鐵家嶺三叉嶺徽軍原防太平甘棠之
參將袁國祥等營盤被陷國永卽派五營紮山口兩營紮
烏泥關三營當前敵初七日辰刻逆眾繞太邑約三四千
人直撲我營當卽派隊迎戰賊紛紛潰退初八九日國永
督隊追賊至太平山口一帶旋即進紮甘棠分布各嶺時

文正覆胡文忠公書云王心牧自東流建德來途次並未聞春霆消息尤爲可怪宋國永連出隊三日遇雨皆收不得開仗賊亦頗畏鮑軍也又致甯國守將周百祿書云敝處因鮑鎮未到宋將向未帶此大隊遂爾遲遲未進今已札催張宋兩軍飛速進涇援甯矣十二日甯國府城失守周忠壯公天受死之百祿忠壯字也先是鮑公自抵鄂後文忠爲買巨舟令奉母居之俾得往來上下就便省親至是二十日抵祁門文正大喜而又怪其不早至也以甯國之失具疏自請議處并劾鮑公略曰使該鎮如期抵營督

率進攻卽未必速解甯圍尙可牽制悍賊遷延貽誤咎實難辭姑念其苦戰六年驍勇罕匹請革去勇號以示薄懲并責令督軍進勦力圖克復奉

上諭甯國府城被陷張運蘭宋國永馳抵旌德太平等處卽遇悍賊窺伺兵力過單未能前進尙非救援不力均著免其置議鮑超請假逾期遷延貽誤咎實難辭姑念其驍勇素著著革去巴圖魯名號以示薄懲仍責令督兵進勦力圖克復文正先於七月十二日疏稱鮑超因江水封峽不能行舟到徽當在七八月間鮑超不能於六月趕到皖

境與原奏不符等語是鮑公之遲誤有因文正早已聲明於其初隸軍麾以公義劾懲非得已也甯郡旣失嶺外各股悍逆乘勝內撲徽績祁黠處處交警文正駐祁門城北李公元度守徽城於二十五日城陷賊復盤踞休甯及嶺外旌涇石太各縣勢趨祁門老營先是文正致鮑公書云禮字河溪四營大敗徽州被圍危急之至請閣下全軍卽日入嶺由休甯救援徽州張凱章卽紮太平顧貴軍之後路至切至切乃書未到而徽州已陷及祁門戒嚴文正飛調鮑公由太平回軍漁亭張公回駐黠縣以遏狂寇定人

心其致李公續宜書有云鮑軍今日可入嶺內張軍明日亦可入嶺此間當占得住所慮者賊由婺源竄入江西腹地耳

九月鮑公奉

旨入衛京師不果行督軍蕩平休甯賊壘逼其城而軍

鮑公自小池驛大捷後聲威益著勝保督師河朔急欲致之麾下倚以立功上月十一日僧忠王軍敗於天津外國兵逼近京師

聖駕出狩熱河勝保奏請飛召外援並指調鮑公奉

上諭著曾國藩選精兵二三千名卽令鮑超管帶兼程前進刻日起京交勝保調遣至是曾文正公於初七日具疏自請北上並言鮑超雖號雄勇之將然率師北上途次無主持之人鄰餉必難應手恐致展轉濡滯緩不濟急胡文忠公亦請入衛致書文正有戰將無人軍聲不振鮑軍必應同行等語因議鮑公帶五千人前行由間道北上文忠率余際昌一軍繼發尋因和議就緒

詔止其師時文正覆左公宗棠書云來示謂弟有討賊之責兵不可太少極是惟凱章薊泉皆非將多之才二人只

能各統五千春憲除自帶六千外已撥二千益之等語薊泉蔣公益澧字二十九日鮑公督軍與張公運蘭會攻休甯鮑公於卯時出隊行抵碕庭橋飭部將余大勝唐仁廉張玉田鄭陽和婁雲慶熊鐵生分路抄擊踏毀賊卡三座斃賊四五百人乘勝追至城下賊分股出東門迎戰復出一大股接應婁雲慶抄其歸路將賊截作兩段余大勝督隊圍殺又斃賊七八百人鮑公派兩營憑高堡對城開礮賊由南門衝出鄭陽和等左右抄殺又斃賊多名賊遂堅伏不出張公亦攻破馮家嶺龍源等處賊卡鮑公因與張

公逼城緊攻兼防後路並蓄銳以擊池州青陽兩路來援之賊文正致書文忠云鮑公攻城賊堅閉不出聞嚴州之賊盡撤回與鮑張大戰果如是則浙患稍紓亦大局之幸也

十月賊入羊棧嶺陷黟縣鮑公督軍破賊復其城

徽州踞賊遣大股來援休甯初二日鮑公移營西館張公運蘭移營迪祥湖距休城皆十餘里鮑公探知援賊麇聚休東萬安街與城賊相犄角因會商張公於十五日出其不意夾擊大破之追十餘里殺賊二千有奇僞侍王李世

賢因休甯圍攻甚緊由嚴州退徽州十六日解子藥大礮
進城十七日霆湘各營乘勝攻之北門出賊數千張公揮
兵直前鮑公督馬步左右包抄殺賊千餘復圍攻東門賊
營賊棄壘逃竄斬馘殆盡立毀賊壘二座將弁兵勇受傷
一百三十三名陣亡八名時僞忠王李秀成帶三萬餘人
由蘇州蕪湖而來十九日突由羊棧嶺竄入圍解休甯之
圍斷霆湘各軍之糧路夥嶺各防皆潰賊遂由盧村攔入
夥縣二十日張軍分老湘營迎勦敗挫午後鮑公派宋國
永帶數營趕至迎頭痛勦斃賊千餘會同老湘營追入夥

縣立將城池克復賊仍退踞廬村一帶二十一日鮑公添
營進剿大戰於柏庄嶺十盪十決賊大潰狂奔出嶺積屍
徧山生擒三百十八名斃賊四千餘陣斃僞檢點艾逆僞
丞相吳逆秀成亦受傷而遁是時世賢由嚴州回徽僞輔
王楊雄清等穩據旌德環徽郡二百里羣賊極多而秀成
直犯祁門窺伺江西計殊狡毒文正手書遺囑帳懸佩刀
擬以身徇幸鮑公督軍急馳百餘里兩日之間連獲大勝
驅賊出嶺文正致書胡文忠公云侍長顧卻慮因謹慎而
拙滯幸鮑張未接待信先已發兵大獲勝仗立克縣城追

賊出嶺此神速賢於拙滯之明效也厥後同治壬申文正
卒於兩江節署蘇撫何公璟奏稱以十餘年稽誅之狂寇
曾國藩授鉞四年次第蕩平良由霆軍一戰驅賊出嶺祁
門初基不挫有以寒賊膽而作士氣等語論者謂鮑公於
五年以營弁救文忠於漢陽是役以統將救文正於祁門
關係大局尤非淺鮮文正奏捷稱其調度神速奉

上諭官軍進攻休甯迭獲勝仗遂克復黟縣城池勦辦甚
屬得手提督銜湖南綏靖鎮總兵鮑超著賞給蘇薄通額
巴圖魯名號已革花翎參將湖南鎮筵鎮右營游擊楊鎮

魁著開復參將副將銜儘先參將婁雲慶著以副將遇缺儘先卽補副將張玉田余大勝均著賞加總兵銜其餘出力員弁著擇尤保獎文正又奏言鮑超所帶霆字各營在鄂皖苦戰多年此次調撥過江攻剿休甯連獲大勝又剿敗黟縣大股援賊立復城池各營官多係著名驍勇其已保升儘先班次者日久未經選補臣處亦無遺缺可以請補殊不足以示激勵查有儘先副將侯補缺後以總兵簡用之宋國永此次擊退羊棧嶺大股卽以該副將爲首功總兵銜儘先副將黃慶陳由立亦屬尤爲出力仰懇

聖恩飭部將該員先行拔補副將實缺俾勵戎行奉

旨宋國永黃慶陳由立俱著遇有副將缺出先行拔補先是文正奏請入衛後胡文忠公與之函商北援事宜有歸期只可密存於心恐有挾君命以謀奪楚軍者等語蓋指勝保也乃鮑公自北援未果意常抑鬱文忠聞之卽致書鮑公曰勝保之爲人滌帥與兄深知之忤忌貪詐專意磨折好人收拾良將弟若北援無論南北風氣異宜長途餉項軍火主持無人且必爲人磨死而又不能得功得名也惟北援是君父之急難萬不可以他詞推諉其時滌

帥籌思無策只得應允自行北援或兄北援以兄與滌帥若能北行則所帶將士或不致十分飢困亦不致受人磨折也弟若知滌帥此次苦心婆心救全弟命之恩且感激涕零之不暇滌帥待弟之恩是天地父母之恩也昨言欲克復休甯徽州仍求回北岸打四眼狗此必不可行吾弟以一協標兵受滌帥之知遇一年拔至守備加都司此次以舊率歸舊部當一心敬事如北岸狗來力自能支卽不能支滌帥自知派援不待弟之自請也鮑公得書遂釋然一聞賊犯嶺內卽奮力驅擊以衛文正老營

十一月祁門北路之賊踰嶺南犯鮑公同軍黟縣會擊賊於盧村大破之部將婁雲慶迎勦竄撲小溪漁亭之賊亦獲勝初四日賊陷建德縣普成堯一軍敗潰又陷東流縣鮑公因請於曾文正公分勦建德文正批覆云閱此函知貴鎮之意欲向建德截勦賊匪吾昨誤疑休甯另有援賊也如得貴鎮親統勁旅出嶺以勦建德豈不大妙無如休歙太石等處地方太闊賊勢太眾非得大枝勁旅不足以資防禦貴鎮本營六七千人又兼統張趙楊蔣蕭唐等四千餘人聲威較大本部堂欲以攻休守黟防禦太石等事責成

貴鎮一人遂不復派貴部下分勦建德矣惟聞左京堂留
守婺源之兵已調回景鎮休南一路太嫌空虛本部堂前
欲調張道老湘營移紮龍灣五城及婺源等處正所以防
休賊由婺源竄江西也前聞江軍門已至江灣若令其酌
帶二千人專守婺城則老湘營仍可不必移動本部堂再
四熟商老湘營若移紮休南則藍田湯口處處空虛不特
屯溪之米糧不斷休邑永無克復之期且恐休歛之賊由
婺源竄江日夜焦思不得善策仰貴鎮就近會商張觀察宋
侍講籌一妥法迅速稟覆等語江軍門名長貴宋侍講名

夢蘭文正復致侍講書云休北迪祥等處不移動以副閣下及紳民之望亦從鮑張二公之雅意也尊意欲鮑張二軍急攻休城兩公皆熟於戰守事宜除大調度弟處作主外凡打仗出隊進退緩急均由渠自爲主弟俱不遙制等語是時皖南賊黨圖解安慶之圍分三大股環繞祁門作大圍包抄之勢一出祁門之西至景德鎮一出祁門之東陷婺源縣復南竄玉山其古隆賢賴裕新大股由祁門之北分路突犯羊棧桐林二嶺乘霧入卡遠抄盧村諸營之後楊鎮魁等閉壁堅守經老湘營馳援鎮魁等開壁齊出

併力猛攻斃賊數百賊由新嶺山中遁去十九日復於盧村左側築造二壘爲久踞以犯祁門之計老營危險文報不通文正先因景德鎮危急調鮑公全軍赴援與左公宗棠會合堵剿以保祁門大營之糧路救江西之北邊因雨阻未能拔行賊不知鮑公尙在祁門也故乘間入嶺鮑公密派宋國永率數營並黑龍江馬隊馳赴黟縣因風雨交作不能開仗二十日辰刻與老湘營劉松山等會師於盧村抄擊大破之賊屍徧野餘匪狂奔拋棄軍械殆盡歸路旣斷皆援岩而遁我軍追者反出其前墜岩冒樹渙散哀

號逃出嶺外自是嶺外之賊不敢入犯文正以霆軍赴景鎮以後惟漁亭爲中權扼要之區因留婁雲慶所帶霆字四副營老湘營之右翼二旗宋侍講之安勇合紮漁亭時文正批張公運蘭稟云宋副將之留此間官紳及各委員均以爲請言之甚力謂霆營不能不赴景鎮老湘營之力只能自守不能破賊須留宋副將統四營駐紮漁亭爲各嶺之援眾口一詞牢不可拔本部堂商之鮑鎮景鎮之行宋副將萬不可不去因改派婁副將統率漁亭四營已由鮑鎮札飭矣吾觀婁副將沈慎有謀似不亞於宋副將該

道試與會晤一二次熟商戰守事宜察看何如又批鮑公稟云派來營官四員已頒給關防并札發各件矣前與貴鎮面言凡作人當如花未全開月未圓滿之時花盛則易落月滿則必缺水滿則易傾人滿則招損貴鎮統師日多聲名太盛宜常存一不自滿之心庶幾以謹厚載福嚴戒弁勇無令騷擾百姓此古來名將第一要務謙以自持嚴以馭下則名位悠久矣二十六日賊偵鮑公已赴景鎮糾眾二萬餘徑犯漁亭雲慶會同各營分路抄擊敗之追至岩腳殺斃偽丞相黃世瑚等四名老賊千餘正追殺間上

溪口之賊糾眾萬餘衝至漁亭街口雲慶及余大勝劉順隆熊鐵生會同一二旗分路掩殺追至牌嶺日已向暮副後營衝過牌嶺追至當金山山路險窄不能排隊衝擊哨官都司陳青雲守備胡克勝衝入街內遇伏陣亡雲慶鐵生各督本隊截殺伏賊數百名更初收隊回營其休甯城中之賊亦因鮑公回勦景德鎮遂由藍田擾及小溪一帶二十四日經老湘營擊退文正疏稱黟縣官軍十日之內凡四大戰其抽隊助打行仗遺者至八九十里近亦四五十里風雨嚴寒往返馳逐實因賊股眾多不能不東奔西

救爲變化莫測之象幸而有戰皆捷盧村一役該逆精銳殆盡尤足以寒賊膽而快人心陣亡將弁另單請卹文正之檄宋侍講合紫漁亭也并致書云霆營之精悍老湘之謹嚴求閣下參仿行之略變化徽防氣習又致左公書云鮑軍未到之先貴軍未可輕出迎剿必須固住老營自全其軍千萬千萬等語普軍旣潰以後文正令鮑公收集另編新營共二千四百人

遼軍紀略卷三終

建軍紀略卷四

銅梁陳昌世五編輯

門人

吳樹棠全校字

辛酉咸豐十一年

正月鮑公督軍擊賊於洋塘大破之復破賊於黃麥鋪等處克復建德縣城江西饒九等屬肅清

偽孝王黃文金等大股逼景德鎮鮑公於上年十一月間婁雲慶所部圍攻休甯親督馬步由祁門回援景鎮二十七日前隊初到是夜四鼓賊遂遁歸規田街曹家渡等處

尋遁往石門洋塘泥灣一帶我軍因雨雪連縣不能開仗嗣左公宗棠進扼梅源鮑公進扼洋塘賊復從下游添集悍黨麇聚於洋塘對岸之雞公坡謝家灘泥灣街一帶層層築壘聯絡二十餘里至是鮑公於初九日率軍由洋塘山左前進賊適分三路明抄暗襲復於山尖吶喊助勢鮑公派馬步各隊分三路進攻正分撥間雞公坡之賊過河徑襲老營經鮑公所派之陳德勝張玉田會合左公所派之羅近秋各隊擊退我三路之兵遂奮力并進而賊亦三路迎拒鏖戰二時之久賊勢不支鮑公督飭各營乘勢猛

擊直抵賊所搭浮橋殺斃悍賊二千餘名賊奪橋而去我軍追殺甚眾賊之前隊因將浮橋斫斷鮑公飭陳由立唐仁廉等由淺灘分途過河圍殺一時之久賊屍山積乘勢將謝家灘一帶賊壘全行踏平後隊山岡之賊來援亦經我軍擊散日暮收隊是日計斃賊四千餘溺斃逃散者無數逆首林世發許茂才死於亂軍黃文金受重傷遁初十日黎明鮑公率隊過河雞公坡之賊已宵遁我軍追至鐵爐港賊分兩路一由建德回竄青陽一歸併彭澤另股鮑公跟蹤追剿以清西路左公仍駐景鎮以防東路曾文正

公奏言黃文金爲著名梟悍之賊自去年十一月撲陷建德蔓延鄱陽浮梁等縣其時臣在祁門三面皆賊僅畱景德鎮一綫之路以通接濟該逆盡銳攻撲欲得甘心賴左宗棠之謀鮑超之勇以守則固以戰則勝用能大挫兇鋒化險爲夷洵足以寒賊膽而快人心奏入奉

上諭此次逆匪率黨攻撲景德鎮經左宗棠鮑超督兵奮擊大挫兇鋒勦辦尙爲得手出力員弁著曾國藩彙案保奏候朕施恩陣亡游擊周芸亭等三十員名俱著交部從優議卹文正致書李公鴻章云此間月內風波大作危險

迭見幾無可以自全之理幸鮑鎮馳抵景鎮餉道始通人心始定又致書左公云此時鮑軍只宜將鄱都等處之賊逐出建德一氣掃清斷無分營回顧漁亭之理但求鮑公速了鄱建一路貴軍穩紮景鎮敝處當堅守以待事機之轉先是文正以鮑公之言令江公長貴管各嶺防務石埭之賊以霆軍回勦景鎮一帶祁門老營空虛於是月初六日分犯大赤大洪二嶺經江公及朱品隆等擊退鮑公自洋塘獲勝後追賊至彭澤之下隅坂左公亦派隊由右路馳進二十六日鮑公商令皖南鎮總兵陳大富列隊建德

牽制城中之賊自率大隊馳至黃麥鋪賊見我軍突至層層密排山谷皆滿不見其後鮑公派鄭陽和陳由立陳德勝及楚營羅近秋黃少春由左路進又派黃慶張玉田蘇文彪及前旗黃有功後旗李世顏由右路攻擊而以伍華瀚明興馬隊分繼之自率宋國永唐仁廉蕭以德從中路進賊見我軍尙未成列遽來撲犯漫山徧野聲振萬壑鮑公督飭各營三路齊進鏖戰三時之久賊陣稍動我軍乘勢壓之如牆而進追奔四十餘里賊屍徧野血濺林谷復令各營搜山蹋伏追至建德適陳大富與水師萬化林會

攻城賊克復縣城約共斃賊六千有餘淹斃跌斃逃散者
萬餘生擒僞琳天福及僞將軍丞相等二十餘名長髮老
賊三百餘名皆斬之於是饒九等屬一律肅清文正奏稱
鮑超勇冠三軍每戰必克轉危爲安實屬有裨全局奉

上諭官軍攻破黃麥鋪賊匪克復建德縣城饒九境內全
數肅清勦辦甚爲得手提督銜湖南綏靖鎮總兵鮑超著
遇有提督缺出交軍機處題奏陣亡守備曹有餘著交部
從優議卹文正於建德未復之先致鮑公書云如彭澤建
德一律肅清請閣下全軍駐張家灘另有照會送閱須將

各嶺外之賊搜剿淨盡俟霆字新四營募練成軍再行進
圍池州若彭建二邑尙未肅清則請閣下相機進止不必
遵照會行事也閣下嚴戒貴部下不可驕矜常守花未全
開月未圓滿之意於洋塘未戰之先致書云聞左季高先
生撥四營隨貴軍駐紮亦足少厚兵力左公謀畫精密遠
出國藩與胡宮保之上望閣下事事與左公熟商請教則
左公之謀閣下之勇可成兩美等語季高左公宗棠字及
鮑公牒謝保舉文正批云貴軍門水陸數百戰積勞最久
勲績尤多 聖恩以記名提督酬庸允愜人望功名稍遲

則福澤愈長也本部堂以四字叮囑曰小心大度願貴軍門常常謹守小心者戒驕矜戒怠忽卽前此所謂花未全開月未圓滿也大度者不與人爭名利雖辦得掀天揭地事業而自視常若平淡無奇則成大器矣願牢記此四字庶名位日隆不可限量

二月曾文正公奏派霆軍爲游擊之師以應援江皖各路雲慶會復休甯

文正奏言李秀成圍攻建昌府城撫州喫緊江西省城亦震動臣已飛調鮑超一軍由九江馳赴江西省城先固根

本次援撫建惟鮑超之軍一動祁門西路建德一帶又將
爲賊所踞左宗棠之軍挫於甲路祁門南路浮梁一帶亦
恐爲賊所阻尋又奏言李秀成大股旣入江西腹地必須
有大枝勁旅馳往援勦庶完善之區不至糜爛皖北四眼
狗大股勾捻匪四竄亦須有大枝勁旅渡江援勦庶安慶
垂成之功不至中棄臣當移駐東流建德防堵下游池州
蕪湖各股而抽出鮑超一軍作爲游擊之師或馳援江西
腹地或馳援皖北各路視其尤急者而應援之或可少遏
兇鋒奏入奉

寄諭江西軍務喫緊該大臣前奏飛調鮑超一軍由九江一帶馳赴現在逆匪上竄湖北駱秉章能否分兵馳援江西尙未可定所有鮑超一軍卽作爲游擊之師該大臣體察江西皖北情形何路緊急卽爲何路援應鮑公馳逐大江南北之局自此始厥後各路圍師將帥每擅克復城池之功而霆軍多不與其實應援各路力勦竄賊勞苦勲績遠過圍師光緒四年江督沈文肅公葆楨爲霆軍部將宋國永請宣史館疏稱鮑超一軍在咸豐八九年間已名聞天下及金陵大功告成非鮑超掃除四竄之賊金陵老巢

未易克也云云噫豈獨金陵一城爲然哉自鮑公回勦景德鎮一帶文正畱張公運蘭老湘營及婁雲慶靈字四營駐紮漁亭等處防堵徽州休甯之賊至是文正於初七日派總兵朱品隆等由祁門赴漁亭會同老湘營進攻上溪口令漁亭靈字四營約期列隊牽制休甯城內之賊初九日攻破上溪口賊壘雲慶亦出隊將藍渡一帶賊卡燒燬十一日各營會攻休甯城賊不支宵遁遂復其城時文正致鮑公書云戈什哈自京中回言京城及沿途道閣下威名甚好至爲欣慰仍望閣下常守花未全開月未圓滿之

戒不稍涉驕矜之氣則名位日隆矣胡宮保聞撫建有警
函止閣下不必往援北岸甚好請閣下防守江邊東流建
德一路陳餘菴畱二千人在東建請閣下代爲照料尋又
復鮑公書云貴軍爲賊所憚目下望援者三處一太湖胡
宮保處有急須援一景鎮左帥處有急須援一安慶舍弟
處有急須援而鄙意總不欲貴軍輕動專畱待援九江瑞
臨之用三日內再有確音請暫勿拔動又覆胡文忠公書
云來示以賊匪上犯引爲已罪去年定計上巴河本有鮑
軍以固內防而侍調赴南岸是侍之咎也此間左軍新挫

人心震動鮑公一軍卽日須由湖口渡江由九江進保江西省城竟不能作他用及文正函令鮑公督軍赴南昌尋又致書云鄙人亦明知閣下啟行之後建德必失彭澤必失卽湖口亦極可危無如江西省城人心渙散萬一撫建之賊直犯省垣則倉卒之間深慮有意外之變不得已調貴軍赴省亦可想見僕之苦衷矣閣下過湖口時請細心察看守城之具已辦理齊整否士卒尙精壯可用否湖口爲數省咽喉斷不可不認真防守如不甚可靠則請閣下在湖口停住兩日將防務細心講求交付清楚然後可放

心也是時文正調鮑公赴援南昌先後二牘三函催促甚急至限以十三日趕到尋因撫建解圍經江撫毓科公咨止適李世賢大股蔓延於樂平鄱陽等處祁門景鎮糧路又斷復調鮑公與左公夾擊鄱陽已而又令鮑公由鄱陽進攻景鎮其覆鮑公書有云陳餘菴敗挫景德鎮失守左軍退駐樂平矣景鎮係僞侍主股匪賊數比黃文金更多而不如黃文金之悍懇貴軍由鄱陽進攻閣下進兵至景鎮紮營之地務須算明米糧接濟之路距水師不可太遠三月曾文正公親率祁門之師攻徽州婁雲慶隨之官軍不

利鮑公南渡尋回援安慶

時祁門老營有坐困之勢曾文正公於初五日親督祁門九千人進攻徽州冀通糧路分南北兩路進攻南路唐義訓等營挫敗傷亡甚多婁雲慶率霆字四營隊伍同張公運蘭在北路因天雨收隊賊以馬隊包抄雲慶回鞭衝擊轉塘收回全師而反十二日官軍再攻徽城列隊槐塘大里等處賊乘夜焚村劫營各營多挫獨雲慶與張公及劉松山三人得保營隊官軍敗退夜還休甯賊跟蹤來犯文正憤甚誓不欲生諸將力勸乃於十八日回駐祁門先是

文正覆鮑公書云昨日函請閣下回勦鄱陽進攻景鎮不知已接到否此股若不擊退不特鄙人與三萬軍士同在圍困之中且恐其由都昌渡湖以至吳城則九江瑞臨省城等處糜爛爲禍尤烈貴軍至鄱陽則下可以保都昌上可以攻景鎮外可以解祁門三縣之危內可以紓江西北路之患特具公牘達之左右祁門三萬餘人二月全無餉來聞有銀四萬在轉運糧臺張守秉鈞處請閣下設法解至桃樹店等處祁門派隊迎接尋覆胡文忠公書云德黃雖失尙非膏肓之症此間四面梗阻幸建德有一綫之路

可通文報若鮑公不速進兵力攻則建德並梗請閣下代
催鮑公專攻景鎮無二三游移也文忠於初八日覆文正
書云春霆於前月杪忽至太湖省林翼之病林翼催令速
行馳援景鎮並允代爲設法挪移餉錢一二萬串鮑軍初
四五日啟行馳援計十日內外可抵景鎮此間並無二三
游移也尋又致書云鮑之新募三營官帥畱攻黃州不知
鮑力甚單薄可慮攻徽州不得手愚意欲請再撥三千人
以助左鮑之力將樂平景鎮肅清再謀臨吉等語及鮑公
將抵景鎮而賊卽竄逃左公亦因有范家村之捷於是樂

平一帶肅清皖南軍氣稍伸適陳玉成由鄂竄皖撲陷黃梅宿松以爲安慶城賊之援夾攻曾公國荃營盤十分危急文正復調選軍由景鎮馳援二十八日文正自祁門啟行覆鮑公書云閣下督率全軍今夜可宿羊子港神速之至極慰極欣敝處接舍弟信知安慶極爲穩妥楊軍門擡船入菱湖奪賊船四十號多都護在桐城獲大勝仗殺賊近萬北岸之事大有起色而僞忠王連陷吉安臨江瑞州三府有竄九江之信南岸又十分緊急且恐其由興國以犯武漢應請貴軍暫不渡江且在下隅畝歇息二三日與

國藩面商一切如北岸果鬆卽請閣下先援九江也貴部五正營三副一新合之河溪仁字馬隊約七千餘人其三新營截畱黃州須趕緊調回待會晤後卽咨官帥調之二十九日文正復專人照會鮑公率軍回援安慶並令九江辦船懷望辦夫伺應及三十日辰刻又致書鮑公云昨夜接劉養素及首府稟信知二十一日賊股尙在樟樹若貴軍遽動恐賊回犯省城所關甚大茲特飛函如清江豐城及南新四縣境內有賊貴軍不可移動候接省城確信再行照會文正旋於是日行抵建德縣鮑公迎見之越日文

正按視鮑公軍營仍催令渡江援剿時又致李公翰章書云郭守之敗省城大震亟催鮑軍入援論餉項則宜清腹地論大局則宜圖安慶安慶不穩鮑軍不能遽援瑞郡也鮑軍南北援應日夜勞苦不得少休餉項久虧務祈閣下從上游設法以大批解濟千萬之懇

四月鮑公督軍渡江攻破集賢關賊壘盡殲其眾生擒逆首劉瑯琳磔之妻雲慶會克黟縣大破賊於盧村收復徽州胡文忠公於上月二十九日致鮑公書云此番狗逆挑選精銳約不過二萬人吾弟須深溝高壘待其求戰而後應

之不可急也性急則必中埋伏包抄之計弟軍久饑前此宿松僅解八千餘串兄心日日念之此次由何路進兵兄應速卽籌備銀錢米糧以供軍需兄處太湖城守平安之至可請放心但吾弟遠來兄應到營一看祈示以老營住所爲要吾弟此番來援總要會合以厚兵力持重以審賊機不可孟浪速進賊在關內關外本無多糧利在速戰官軍應四面包裹不放此狗外竄只憑壘固守持重不戰賊必自來求戰迨其氣竭力疲而後起而破之狗可屠也開仗之期約在四月中旬此時斷不可太急急則狗賊必遁

走將來又費力切囑切囑請吾弟每日專人函報一次以便查探行營酌量協濟及本月初六日致曾公國荃書云昨夜今朝六函催鮑計程當於初五日抵石牌林翼前屬春霆勿性急恐其見賊卽戰隊伍不齊氣力不定蓄養不足節宣失宜非欲其遲進也窺看賊情狗已退去寬博有餘之地以爲戰敗卽遁之計曾文正公致鮑公書云胡宮保欲閣下緩於求戰舍弟欲閣下急於進兵閣下相度天時斟酌行之又致多隆阿公書云弟撥春霆一軍來北岸助勦已至華陽鎮應由何路進兵何路會合請閣下酌核

知會春霆爲荷困獸猶鬪狗逆必挾全力決一死戰應請閣下統籌全局調度一切庶收同心同德之效又致鮑公書云聞渡江已畢至以爲慰今日天氣晴霽請閣下卽督隊迅速前進胡宮保派胡達軒三營守石牌陳武臣七營隨閣下進集賢關兵力已厚一切調度布置仍請多都護作主閣下謙以受益同心同德勳福更隆等語劉瑯琳者廣西老賊也歷年與官兵接仗每次首先衝鋒九年踞守太湖數月不下十年二月自安徽渡江破金陵官軍營壘數十座此次隨陳玉成以全力援安慶及鮑公於初七日

抵石牌初八日進大橋頭玉成遂於初十日潛遁而畱四
大壘於集賢關外之赤岡嶺令瑯琳踞之以梗我師十一
日鮑公親率陳由立顏紹榮攻其頭壘以王衍慶劉順隆
張玉田攻其二壘陳德勝余大勝唐仁廉攻其三壘黃慶
劉玉堂攻其四壘成大吉率各營列隊於集賢關中路以
防關內之賊並分隊搜勦關東西伏賊而壘內皆係多年
悍黨官軍窺探闐若無人一近壘邊則鎗礮如雨我軍奮
怒拔籤填濠四面猛撲迄不得前鮑公因令環濠修築礮
臺數十座晝夜環攻二十九日將第四壘轟倒數丈賊猶

踞壘不出五月初一日鮑公派各營列隊四面圍定又命吳亮才入壘傳呼飭令脅從棄械出降於是壘賊因皆乞降鮑公傳令各兵勇以次入壘悉數生擒將長髮老賊二千八百餘名盡殺之惟先降之短髮三百餘名釋放劉瑄琳仍踞第一壘抗拒初二日成大吉奉調回鄂鮑公仍圍攻瑄琳之壘是晚三更後瑄琳驀衝出壘鮑公率馬步追殺至馬踏石溪河將全股六百餘人悉數生擒其分股沿河下竄者亦被彭楚漢等水師剿擒鮑公解提瑄琳至楊公岳斌大營訊明支解並函首送臬安慶城外呼城賊壘

賊而告之以寒逆膽文正奏捷稱壘中係陳逆平日第一枝悍黨戰守可恃者希冀憑堅久抗以便糾合餘黨復來解安慶之圍鮑超等晝夜環攻殲除老賊至四千餘名之多實爲從來所未有厥功甚偉奉

上諭此次總兵鮑超等環攻賊壘殲斃長髮老賊四千餘名洵足寒賊膽而快人心所有在事尤爲出力之守備吳亮才著免補都司以游擊儘先補用並賞換花翎總兵銜副將余大勝著以總兵記名簡放顏紹榮著賞加總兵銜並賞給健勇巴圖魯名號參將王衍慶著以副將儘先補

用並賞給強勇巴圖魯名號參將李文益著以副將儘先
卽補協領委營總明興著賞加副都統銜知縣伍華瀚著
以直隸州知州不論單雙月遇缺卽選其餘出力員弁著
曾國藩擇尤保奏陣亡員弁俱著交部從優議卹文正之
移駐東流也南岸之賊疑嶺內空虛於初五日分五路犯
嶺襲陷黟縣鮑公部將婁雲慶率駐防漁亭之霆營會同
江公長貴及張公運蘭等軍攻勦賊卡賊壘克復黟縣尋
大破賊於盧村肅清諸嶺徽州之賊遁去遂將府城收復
雲慶擢總兵先是陳玉成預遁桐城意以集賢關外堅壘

牽綴鮑公之軍而伺隙以援安慶及至挂車河爲多隆阿公所敗又畏鮑公軍威遲疑不敢進而赤岡嶺之壘已破矣將進攻時文正致書鮑公云貴部精悍屢立奇功老五營中弁勇傷亡甚多暗暗喫虧請閣下加意檢點雖人數多於八九兩年而其小心謹慎應比往年更加嚴整營盤須距水師甚近庶糧路可保無虞至囑至囑及大捷後復書云貴部百勝之師因副左營不甚得力畱湖北之新三營在黃州小挫深以爲慮幸集賢關四壘攻破軍威大震士氣全伸再加保養兼旬元氣自可全復前所慮者當無

虞矣江西官紳士民望貴軍有如望歲祈卽日料理南渡以慰萬眾之心又覆劉公長佑書云逆黨救援安慶取勢在千里以外多鮑諸軍嚴整精勁蒸蒸日上文忠致文正書云劉瑋琳就擒老賊誅戮殆盡功抵搭忠武岳州李忠武九江矣文正旣檄霆軍南渡尋復江撫毓科公書云鮑軍自安慶拔營沿途阻雨隔水遲滯殊甚又徇紳民之請攻勦宿松黃梅之賊多都護亦思少畱鮑軍遙爲聲援鮑公亦思少畱旬日成克復之大功濡滯不進使弟不特失信於江省並失信於鄂省蓋鄂中亦深望鮑軍南渡勦辦

興國一帶也然果能克復安慶鮑軍雖少遲旬日再渡南岸亦尙有裨於大局等語當鮑公未抵赤岡嶺時文正覆文忠書云搜獲僞文狗酋之逃專避鮑軍之鋒待鮑軍回南岸狗與璋黃等仍回懷甯尋戰侍前擬端節後調鮑援瑞今且緩調等語是急調鮑軍南渡非文正初意也鮑公於十五日由集賢關拔營後行抵宿松圍攻五日城堅未能得手時鮑公因營官副將鄭陽和任性妄爲縱勇索鬧口糧騷擾地方哨官副將鄧雲貴守備蔣揖讓管束不嚴私放犯罪之勇張貼匿名揭帖都司鄭元超因裁去營官

委以幫辦營務輒敢違抗不遵又復浮開勇數均屬有干軍紀請將鄭陽和降爲藍翎守備鄧雲貴蔣揖讓革職均畱營効力以觀後效鄭元超革職不准畱營文正奏入得旨俞允

六月鮑公由北岸渡江

時北岸官紳士民爭畱鮑公備勦援賊暫不南渡自初一日以後曾公國荃攻平安慶城外賊壘曾文正公奏稱安慶居皖鄂之交爲該逆所必爭數月來逆首陳玉成節次糾黨回援經多隆阿於挂車河等處擊退殲賊甚多鮑超

復斬悍賊數千於赤岡嶺我軍聲威倍振遂復攻克菱湖
兩岸賊壘斬馘九千有奇該逆外勢既失城賊心膽已寒
等語胡文忠公亦力疾回救鄂省次第收復南岸各邑羣
賊竄併江西於是江西之賊凡五大股蔓延甚廣李秀成
一股深入腹地占踞瑞州逼近省垣九江南康警報紛至
迫望援師文正因於十三日仍檄催鮑公南渡由九江進
剿先是鮑公赴援安慶文正卽致文忠書云今春以來倣
處屢次調鮑公援省援撫援潯厥後皆中途改議失信於
江西官紳多矣四月瑞州郭守敗後毓中丞迭次函咨調

鮑援瑞侍皆咨復應允斷不可再行失信霆軍至南岸後
視僞忠王所在而勦之或在江境或在鄂境決不可稍分
畛域但須從瑞州武義入手庶有以對江西官紳而霆營
亦易於領餉耳因文忠來書有鮑軍畱斬黃暫不南渡之
說故文正云然至是鮑公由宿松拔行因連日未遇順風
羈滯於徐家橋一帶文正以江省望霆軍回援急於星火
復三次檄催

七月鮑公至九江瑞州等處踞匪遁竄豐城引軍追擊大破
之復敗賊於白馬寨等處

鮑公於初三日行抵九江拔營前進而瑞州奉新安義靖安一帶踞匪已聞風先遁由臨江過河盤踞樟樹沙湖一帶縣互百餘里鮑公於十九日由瑞州拔營追剿二十一日行抵豐城就北岸立營賊已在樟樹搭造浮橋於二十二日潛渡以抄我軍之後未刻離鮑公營二十餘里一帶放火鮑公以軍士修築營壘人馬疲乏天色傍晚未便出隊二十四日辰刻賊出大股排列山岡鮑公卽飭陳由立顏紹榮李文益三營由中路進黃慶王衍慶劉玉堂伍華瀚馬步四營由左路進以羅運昌翦炳南輔之易昌煥吳

騰芳熊鐵生明興馬步四營由右路進以馮標段大貴輔之又飭宋國永婁雲慶唐仁廉張玉田劉順隆等由山後進賊排列大隊搖旗吶喊前來交鋒鏖戰移時鮑公督各營分途齊進大敗之火其浮橋追殺五十餘里傍晚始收隊生擒僞將軍歐萬金等二十餘名擒斬餘賊逾萬溺斃港河者無算南岸及豐城之賊皆連夜遁去復糾大股踞白馬寨小塘墟西竹墟等處分股竄小江口大江口一帶另股圍攻撫州二十七日鮑公引軍渡河追剿擊破白馬寨小塘墟等處之賊沿山抄殺分途齊進各賊紛紛敗竄

曾文正公奏言李秀成擁眾十萬竄擾江西湖北連陷二十餘城盤踞瑞州附近各州縣數月於茲意在斷我餉源以急解安慶之圍鮑超督師進援該逆聞聲先遁至豐城復被痛勦洵足寒賊膽而快人心鮑超盛暑塵兵所向克捷積勞最久立功最偉奏入奉

上諭李秀成經鮑超痛加勦洗大挫兇鋒實屬奮勇可嘉著發去白玉搬指一個白玉喜字翎管一支大荷包一對小荷包四個交鮑超祇領以示優獎總兵宋國永陳由立黃慶驍勇血戰奮不顧身均著賞加提督銜馮標張玉田

均著以總兵記名簡放額外協領明興著先行拔補協領
實缺副將顏紹榮李文益易昌煥吳騰芳羅運昌劉順隆
劉玉堂段大貴均著遇有副將缺出儘先拔補熊鐵生著
以副將儘先補用參將鮑繼學陳永康均著遇有四川參
將游擊缺出先行拔補唐仁廉著以參將儘先補用並賞
加副將銜直隸州知州伍華瀚著以本班畱於四川儘先
遇缺卽補並賞加知府銜其餘出力文武員弁著曾國藩
擇尤保奏陣亡運同銜安徽候補直隸州知州袁觀豐都
司殷雄亮均著交部從優議卹所保之婁雲慶一員前因

克復徽州府城出力業以總兵記名遇缺簡放著該大臣
另覈請獎同時江撫毓科公奏言鮑超自入江以來威望
所加賊已望風而遁茲由瑞州跟蹤追剿一經指揮卽獲
大捷實足以褫賊魄該鎮智勇過人忠誠夙著轉戰江皖
所向無前洵不愧爲名將惟係提鎮大員應如何優加獎
敘恭候

聖裁奏入奉

上諭鮑超著交部從優議敘鮑公之抵九江也文正致毓
科公書云霆軍馳驅太久欠餉太多士卒太勞疲乏之餘

酷暑進兵弟極不放心務祈閣下加意體恤飭局台再解銀二萬兩以濟急需行軍之道或遲或速聽渠自主不必過於催促尋覆左公宗棠書云章門人心大震賊蹤去省二三十里不等聞鮑軍折回爲之一定賊亦竄回瑞州一帶春霆聲威極好又致湘省東征局黃公冕書云目下左軍有婺源景鎮兩卡凱章有街口一卡舍弟有大通一卡縱無銀錢米糧必不至缺乏惟鮑軍最苦而聲名最盛祈閣下酌盈濟虛隨時添解又致江西牙釐局李公桓書云鮑軍冒暑奔馳宣勞最久厥功最偉截贛餉以濟之自是

允當又致李公續宜書云江西奉新瑞州等城之賊聞皆
逃遁鮑公先聲奪人殊爲可喜及聞豐城之捷與文忠書
云春霆大捷江事已有轉機無論撫州能守與否忠賊總
可驅除耳先是李公鴻章覆鮑公書云按月接濟糧餉及
準糧台照章議添薪水此皆吾兄血誠忠愛感動帥意弟
何力之有江西四萬已據報二十六日由水路運解九江
計期可到賊聞雄師之來必併力過河上竄吉撫各郡望
隨時探明斟酌進取總期大加勦洗籌顧全局弟已疊函
切告李黼堂廉訪蔡芥舟觀察嚴飭各州縣設局代雇民

夫伺應並源源籌濟餉項又囑芥舟趕繪江境地圖呈覽
又囑黼堂時與尊處通信籌商一切此去必無掣肘之虞
鮑公於軍抵安義時請催江西多籌餉項解營文正批云
貴軍將到而奉新瑞州之賊悉數逃遁足見聲威遠播爲
賊所憚江西根本已固人心大定欣幸何已寔軍餉銀已
飭局台續解二萬矣

八月鮑公解撫州府城圍馳援安慶尋回軍掃清雙港湖坊
河口等處踞逆克復鉛山縣城遂解廣信城圍江西全省肅
清

賊圍攻撫州勢甚危急鮑公於初四日乘勝進援師至城下賊已解圍先遁先是胡文忠公於上月覆左公宗棠書云沅圍一軍究難深恃而禮堂又爲桐城所綴安可不籌顧大局春霆自今春以來終日奔走其軍殊苦月初甫奉滌帥令去打瑞州之賊未便遽調其援皖且瑞州雖復賊竄臨江江西省亦未必放之使來尋曾文正公以豐城一捷江省諸賊已無心戀戰章門人心大定腹地或可肅清而陳玉成糾合輔璋玕黃各酋力救安慶多軍糧斷恐難持久遂於上月二十九日專檄調鮑軍回援安慶鮑公亦以

撫州圍解賊必回竄皖浙東歸老巢遂於初五日兼程北
援初十日行距省城四十里之武陽渡始知安慶已於初
一日克復仍旋軍於十四日抵撫州時李秀成大股已竄
往貴溪雙港湖坊河口一帶句合閩賊三起及花旗廣匪
有眾二十餘萬蔓延數百里並分股竄往弋貴廣信一帶
十五日鮑公冒雨進兵二十日馳抵貴溪賊已聞風先遁
二十二日五鼓鮑公率隊進剿卯刻抵雙港秀成嚴陣以
待鮑公督軍迫之見賊陣互長二十餘里排列數十層知
廣匪最悍而輕佻適當我軍之右乃分兵五路並進而自

率精騎從右出先攻賊左廣匪不虞鮑公之先擊之也大驚反奔直衝賊陣而走其陣大亂賊悉奪命狂奔我軍追殺六十餘里沿途斃賊萬餘將雙港九思岩同田河口湖坊一帶賊壘七十二座全行踏平生擒長髮老賊近二千名內有僞成天豫保天安及檢點丞相指揮等數十人皆斬之是夜鮑公探知李秀成率敗賊奔鉛山四更初轉率領馬步全軍進攻卯刻抵鉛山城外見賊築七壘於北門外與城賊犄角鮑公令陳由立譚勝達分股攻壘拔開鹿角擁入濠邊於鎗礮如雨之中奮勇齊登將各壘踏平殲

壘賊淨盡各營乘勝揭水過河分段攻城相持兩時之久
鮑公親執桴鼓如牆并進火箭燃燒城內藥桶賊驚亂譚
勝達卽緣梯登城賊潛開東門逃走我軍先登者立開北
門迎各營一齊入城復追殺六十餘里斃賊無算生擒老
賊八百餘名將城東三十里梓溪一帶踞賊全行勦洗馬
隊追過廣信立解郡圍文正奏言此次閩賊廣匪與僞忠
王一股併聚一路聲勢浩大經鮑超痛勦兩日掃賊壘八
十餘座克復鉛山縣城周圍追擊二百餘里風馳電掣洵
足彰天討而快人心並隨摺保奏副將譚勝達加總兵銜

明興以副都統記名簡放均加巴圖魯名號李文益劉玉堂王衍慶熊鐵生均加總兵銜伍華瀚以知府仍畱四川遇缺卽補並加巴圖魯名號鮑繼高免補本班以知府仍畱湖北遇缺卽補李定貴以副將儘先補用並加巴圖魯名號唐仁廉翦炳南均以副將儘先補用其餘出力文武員弁查明保獎奏入得

俞旨陣亡都司王友德黃友勝守備周有勝千總趙勝武封樂善把總高林芳外委李安旺方祥應鄒富友蕭於成周鳳祿俱優卹如例文正又奏言記名提督綬靖鎮總兵

鮑超驍勇罕匹轉戰安徽湖北江西三省所向克捷本年正月破黃文金大股於洋塘四月破劉瑯琳大股於安慶厥功甚偉其部下各營官如豐城案內隨摺請保加提督銜之記名總兵宋國永陳由立黃慶請保記名總兵之婁雲慶張玉田等皆陷陣衝鋒戰功卓著此次克復鉛山縣城連解撫州廣信兩郡重圍當口糧缺乏之候行烈日驟雨之中竭力奔馳不得少休未滿兩月將江西腹地各賊一律掃除全省肅清實屬勞苦功多可否籲懇皇上特恩將鮑超補授提督實缺抑或另有

恩獎之處恭候

聖裁其所部之記名總兵宋國永陳由立黃慶婁雲慶張玉田等均請補授總兵實缺以示懋賞而勵戎行奏入奉
上諭鮑超著交軍機處遇有提督缺出儘先題奏宋國永
陳由立黃慶婁雲慶張玉田俱著交軍機處遇有總兵缺
出先行題奏江撫毓科公奏言逆首李秀成率眾攻撲廣
信府城經鮑超督兵追擊二十三日官兵過河直搗賊巢
適鮑超等軍馳至水陸攻擊立將城外賊壘一律踏平賊
勢大潰我軍追剿十餘里擒斬九百餘名廣信城圍立解

此次官軍殲除賊匪實爲異常出力惟鮑超係二品大員應如何獎敘出自

聖裁奏入奉

上諭鮑超著交部從優議敘先是文正致毓科公書云春霆一軍本擬至金谿後卽請左軍接辦繼思左軍必難遽到霆軍追剿得手之時不可中道停止使賊喘息再定又復徘徊不去因改檄鮑軍直追至河口等處將忠逆及湖坊二股驅出江境惟鮑公積勞太久請閣下慰勞而贍給之又覆鮑公書云雄師渡河追剿忠賊刻下想已追過撫

州矣國藩於初五日赴安慶初三日申刻多軍克復桐城
初四日水軍克復池州府城閣下在內地辦事儘可放心
不必念江邊之事俟貴軍追至河口將忠逆及湖坊兩股
盡行驅逐後大爲歇息乃可另勦他處以閣下盛暑行兵
過於勞苦也及聞廣信解圍致書胡文忠公云江西指日
肅清矣公自去夏惠撥霆軍助勦南岸迭破大敵公之福
江皖生靈豈可以數計哉尋覆毓科公書云鮑軍此次入
江馳驅甚勞功績甚偉而閣下與司道諸君子供億甚厚
情文甚周足以感動將士之心不特春霆軍門心暢神怡

卽弟此後凡有調度亦更能指揮如意矣鮑公之軍次武陽渡也驚聞

文宗顯皇帝於上月十六日

龍馭上賓自念八年以來仰荷

國恩由卒伍擢任專閫並蒙

賞賜珍物未能迅掃逆氛以圖報稱不禁撫膺痛哭立召

諸將士勉以盡忠報國奮力殺賊以仰答

大行皇帝豢養之

恩卽以副

皇太后

皇上維新之景運諸將士亦同聲感泣人人撫躬自誓於是卽刻拔隊馳抵撫州忠憤激烈奮勇爭先摧數十萬之巨股如疾風掃葉一戰而成大功及聞胡文忠公於二十六日卒於武昌悲悼不已謂諸將曰吾與若之有今日皆胡公之賜也吾今去一知己而國家失一長城矣

十月定議霆軍由甯國援浙

自安慶克復以來湖北蕪黃德隨等郡縣次第恢復多隆阿公連克舒城宿松黃梅楊公岳斌曾公國荃先後克復

銅陵縣無爲州運漕鎮及泥汊口神塘河東關等處賊壘而浙江自嚴州失守後連陷紹處各郡縣杭湖亦岌岌不保初三日左公宗棠軍至廣信曾文正公調鮑公一軍由青陽前進朱品隆唐義訓等軍由石埭前進會剿甯國十八日文正奉

旨統轄江蘇安徽江西三省並浙江全省軍務四省巡撫提鎮以下各官悉歸節制地段寬而兵力薄於是統籌全局奏定左公由衢州援浙從正路以張軍威鮑公由甯國援浙從旁路以掣賊勢文正又念霆軍進攻甯國本是最

要之區然羣賊聚於青陽南陵涇縣等處我軍不能直薄甯城於是檄鮑公由青陽進兵時文正覆左公書云春霆未赴江西之先已訂定只能救援南昌省城一帶卽求仍調回江濱弟與之約極遠不過至河口而止故渠至河口後不待調檄之至卽引師回省在春霆之意並慮一入浙境則銀錢子藥米糧均無人應付也冒暑奔馳傷病太多宜急回休息也積欠太久兵勇窮苦宜急回索餉也各營皆有船隻在江歷年轉運如意且多有家眷公私兩便也在國藩之意卽慮春霆一入浙境面面皆賊四顧失措不

足救浙適足害鮑也故弟之調霆軍由池州進甯國者俯順鮑意水次轉運者四分保全江西屏蔽饒景者四分進至甯國掣分浙賊之勢者亦二分也時左公欲令鮑公率軍深入浙境索賊野戰而已專圖衢州故文正覆書云然尋奉到十六日

寄諭浙省賊氛日熾必得謀勇兼備大員統兵援救鮑超追勦賊匪已抵廣信如江西全境肅清卽著該總兵前赴浙江督兵進勦曾國藩確切查明一併據實具奏時慶端公赴浙督勦奏稱衢州岌岌可危臣飛咨曾國藩派令鮑

併妥籌具奏

十一月鮑公督軍回皖南

自肅清江西後曾文正公屢囑憲軍休息以養鋒銳及定援浙之議多隆阿公又克復三河廬州之賊亦有遁意鮑公念賊將棄江北而全吞蘇浙大軍不到甯國浙賊更無顧忌請於文正刻日拔營冒雨前進行經東流貴池之境見黃蒿白骨並無民居市鎮或師行竟日不見一人鮑公爲之惻然亟請於文正設法賑濟難民時慶端公奏言總兵鮑超經曾國藩飭令馳往甯國攻剿查甯國與杭州府

屬之於潛昌化毘連若鮑超由於昌取道援杭可以朝發夕至奏入奉二十九日

寄諭浙江省城四面賊氛鮑超一軍取道於潛昌化尙恐中途或有阻滯未能刻日抵杭同日曾文正公奉

寄諭鮑超既經曾國藩派赴甯國去杭最近著卽飭該總兵統率所部由於潛昌化星馳赴杭力解城圍

十二月鮑公薄青陽城而營四戰皆捷盡毀城外賊壘

青陽爲甯國最要門戶賊苦守之以梗我師進兵之路鮑公率軍進紮城下初七初九等日賊乘夜撲營俱被擊退

並伏兵追殺斃賊數百而石埭太平大股援賊齊至築十數壘與城賊相犄角十一日鮑公督馬步由東北門進剿賊列隊抵拒鏖戰兩時賊大敗倚壘施放鎗礮鮑公命各營奮勇齊進穿過逆壘橫衝賊隊爲數段賊敗而走我軍四面兜剿將東北門賊壘全行剗平敗賊一股入城死守一股由石埭大路逃去鮑公督軍追殺十五里擒斬二千餘名總兵張玉田副將唐仁廉力戰受傷二十一日城外復添賊壘二座二十二日鮑公復督軍毀平之陣亡守備唐泗和韓玉廷千總余三友把總黃明漢鄧崇友杜得勝

周光元璩大勝曾有貴外委王爲美鄧必勝俱請卹如例
時曾文正公令鮑公暫住青陽不必遽進甯國免致被賊
包裹且云青陽劉古賴皆猾賊恐不易破尋奉初五日

寄諭薛煥奏甯波府城失守紹興所屬各縣均被賊踞現
在擄掠釣船爲縱橫海上之計杭城被圍四十餘日鮑超
一軍現駐甯國距杭州省城較近若由廣德州取道入浙
既可徑援杭城兼可分援湖郡或徑由徽郡取道於潛昌
化進援杭城併著曾國藩飭令該總兵相機辦理又奉初

八日

寄諭鮑超一軍現在青陽著照該大臣所擬飭令會合朱品隆分道並進迅攻甯國以掣浙中賊勢如或有間道可以馳援杭州湖州均著飭令該總兵等相機酌辦慶端公奏言廣西提臣張玉良統帶水陸兵勇萬餘人在蕭山之聞家堰紮營其礮船亦已駛至錢塘江杭城被圍甚急前皖南道李元度一軍進攻龍游未克總兵林文察一軍又爲處州之賊牽掣不能越救杭州仰懇

天恩飭催曾國藩速派鮑超入浙援剿另派勁旅進攻甯

國奉十四日

寄諭前因浙省危急左宗棠統兵援浙並令進攻甯國以牽賊勢如甯國未復鮑超卽繞道入浙於形勢諸多窒礙應令俟克復甯國再行前進尋因杭州省城失守張忠壯公玉良陣亡文正與左公同奉二十五日

寄諭左宗棠已授浙江巡撫責無旁貸刻下計已抵浙著卽會合閩師分道進攻毋令該逆久踞會國藩飭令鮑超進攻甯國以便進規浙省爲左宗棠後路聲援是爲至要文正又奉二十六日

寄諭現在杭垣已失江浙賊氛徧地江南只有鎮江一隅

爲進兵適中之地該大臣前奏李鴻章水陸各軍著迅速調撥布置起程鮑超如克復甯國由廣德進剿亦可直達蘇常互相援應一切布置情形卽著迅速復奏先是

諭旨垂詢堪勝將帥之人文正於是月初旬奏言堪勝將帥者臣意中實乏其選臣處所統諸將屢見奏報久邀聖明洞鑒惟綏靖鎮總兵鮑超功績甚偉與李續宜多隆阿勲名相等該鎮現當進兵甯國關繫極重可否仰沐特恩獎勵抑或俟諸異日出自

聖裁

卷四終

霆軍紀略卷五

銅梁陳昌世五編輯

門人

吳樹棠全校字

壬戌同治元年

正月鮑公補授浙江提督

時當建元之始 朝政一新自去秋霆軍肅清江西曾公
國荃克復安慶多隆阿公克復桐城陳玉成因以授首東
南大局漸有轉機朝廷乃於將帥諸臣中 獎勵一二特
出之人以期大功速蕝元旦

特詔欽差大臣曾國藩以兩江總督協辦大學士明日
特諭曰湖南綏靖鎮總兵鮑超深諳將略屢著戰功上年
正月破黃文金大股於洋塘五月破劉瑯琳於赤岡嶺七
八月間克城破敵馳驅二千餘里肅清江西全境厥功甚
偉著賞穿黃馬褂以示優異十七日奉

旨浙江提督著鮑超補授曾文正公於二十二日奏言鮑
超一軍與賊搏戰於青陽城下不能遽克即使克復而尙
有石埭涇縣等城爲賊所踞未能遽抵甯國又安能進援
杭湖聞蘇常之賊守禦並未稍懈似尙無可乘之機而左

鮑兩軍隔蘇常各八九百里必經過江南十數縣有賊之地前有堅城後無糧路將軍心之立潰實寸步而難行必俟左宗棠圍攻嚴州鮑超進抵甯國浙事乃有下手之處不敢過求速效尋奉

寄諭鮑超前已賞穿黃馬褂又簡放浙江提督實缺自當益加奮勵疏通入浙之路時文正以江西爲東南扼要之地又爲東征餉源儻浙賊竄入仍須鮑公回援霆軍旣應留作活兵若遽謀進攻甯國適成滯著故鮑公感荷殊恩急圖報稱屢請添兵以合青陽之圍而文正不許

二月鮑公合青陽之圍賊將張遇春來降

朱唐兩軍爲徽州之賊所牽不能符進兵石埭會勦甯國
原議而鮑公以孤軍久屯堅城之下兵勇欠餉至八九箇
月石太諸悍賊日夜伺隙謀來解圍曾文正公甚危之鮑
公於十五日飭劉順隆等先平西北門山嘴賊壘濬治長
濠爲四面合圍之計賊勢大促僞將佐張遇春率萬餘人
乞降鮑公納之簡其精銳三千編爲春字營同時曾公國
荃在蕪湖等處亦有編降卒爲崑字營之事文正俱批令
能戰者當勇每日給錢百文不能者當夫每日給錢七十

文文正奉初四日

寄諭鮑超進攻甯國之師曾國荃進攻巢縣和州之舉著該大臣分別檄催勿稍遲緩又奉十四日

寄諭鮑超圍攻青陽是何情形仍增懸繫又奉二十四日寄諭薛煥奏湖州危急請飭催鮑超速由西路援救較爲捷近等語前據曾國藩奏稱該提督尙在青陽與湖州音信難通此時已否前進卽著該大臣飭令速攻甯國取道廣德進援湖州最爲要著如果鮑超兵頓堅城猝難攻入仍須咨商左宗棠迅速設法援應湖郡毋稍延緩

三月鮑公擊退援賊悉毀青陽逆壘克其城遂連克石埭太平涇縣三城

自青陽合圍後城賊復潛糾浙江死黨三萬餘眾踞銅陵之順安鎮進撲銅陵去青陽百餘里鮑公念銅陵不守賊且竄大通斷我糧路不如先往破之初六日夜自率一軍偃旗息鼓倍道疾馳四鼓時抵銅陵後山圍獲守卡賊數十人訊之乃知山下一望無際纍纍然皆賊壁壘燈火無光刁斗無聞蓋賊不料官軍之能至此也夜嚮晨鮑公卽揮令顏紹榮黃慶王衍慶等分頭攻撲縱火焚其壘卡賊

從夢中驚醒一時瓦解土崩仍向蘭陵而走適銅陵守將周萬倬水師總兵唐學發亦率隊來會各軍合力奮追三十里遂將橫塘箬山東西王村直至順安沿途百餘卡二十六壘一律剷除擒斬無算方鮑公之破賊也守城官軍亦不解何處援至及知爲鮑公感深次骨追賊回堅請入城休息鮑公不可仍連夜馳還先是青陽賊目古隆賢屢爲鮑公所挫畏伏城中百計誘之戰不敢出至是偵知鮑公分兵往援銅陵陰結涇石太等縣悍賊在南門外豬婆店增築九壘以阻援師通糧路伺我之瑕以逞狡謀乃結

壘甫成鮑公已振旅而還卽於十五日督飭將士分九路
齊進古逆親帶龍旂老賊揮令各壘傾巢抵敵勢極猛鷲
我軍奮勇爭先以一當十明興伍華瀚以騎隊裏賊賊懼
返巢仍復倚壘施鎗死拒唐仁廉譚勝達於煙焰中拔開
鹿角踰濠直上一壘旣破眾壘盡亂馮標等乘勢薄之不
逾時而九壘悉平古逆率餘匪遁往石埭軍士追殺四十
里始收隊鮑公念南路旣平利在速攻以西門屬婁雲慶
等以東門屬譚勝達等以北門屬王衍慶等以楊應魁等
爲游兵十六日天甫向曙各營秣馬蓐食銜枚疾進將近

城闐城上萬礮雷轟附城卡壘中亦以火藥悉力抵禦諸將弁更番奮攻賊知不敵急退入城我軍毀壘填濠進次城下熊鐵生劉順隆挽盾自障攀堞先登眾軍乘之立將縣城克復斃賊萬餘人逆首僞游天義及各僞職共八十六名悉就擒縛鮑公在青陽息軍三日乘賊立腳未定計先取石埭太平以固嚴州之防繼取涇縣以達甯國之路二十日次軍龍口二十一日率隊前行直抵石埭城壘各賊伏匿不出鮑公分軍爲五合圍之附郭壘賊穴牆施礮鮑公令我軍佯卻數武使賊稍懈突將火藥環壘飛擲各

營乘賊駭亂之時囊土填濠而進悉踣十四壘平之將衝出之賊盡驅入城城上矢石交下將弁頗有傷亡婁雲慶李文益等帶領眾軍士各負片板直薄城根蕭信春身受數創猶復往來衝突奮力急攻遂從西北二門斬關而入立復城池追擊敗賊二十里殲斃五千有奇俘四百人石埭旣復賊愈惶懼因糾合援賊二萬餘由涇縣南陵而來羣集於甘棠鎮二十二日鮑公率軍倍道疾馳遙見賊隊如蠅如蟻密排十數層勢甚梟悍急令文九和等三營從中路進擊劉順隆王衍慶等六營分兩翼包抄戰數時賊

屢卻屢前馮標伍華瀚等忽由山後揚旗吹角整隊齊出衝動賊陣不復成伍盡棄甘棠營壘十七座而逃我軍悉力追逐進薄太平縣西門譚勝達先毀高山四壘引軍齊上俯瞰城中因以火箭環射延燒藥局煙焰蔽天賊驚潰啟東門望涇縣大道而逸各軍分投掩襲一路積尸若阜流血沒脛俘獲較石埭爲尤多擒僞主將徐國華等三十七人張遇春之乞降也鮑公以勁敵在前遽收降眾恐生他變諭令暫住旌德之三溪俟立功後再議至是古逆由太平遁出黃華嶺外所率敗匪不滿七八千將圖折入三

出賊不意縱橫格鬪賊大錯愕望密等叢莽中踰嶺急遁
遇春入山搜捕擒殺近四千人古逆一股幾無孑遺時鮑
公已回軍甘棠旣得遇春獻捷之信旋聞涇賊將由灣灘
至鳳村上竄二十七日率軍並挾遇春降卒以進將及鳳
村賊已遁回灣灘我軍疾馳薄灣灘下寨二十八日鮑公
先派遇春擇險設伏自督八營連環進擊使出壘之賊不
得少休令翦炳南梅仁富等潛出左右路遇春伏兵從後
路如牆壓下賊惶懼失措不能歸壘唐仁廉等率旗縱馬

直擣中堅盡破灣灘卡壘躡賊尾追至於涇縣城下仁富
先拔西門水卡仁廉等隨毀東南土壘一擁入城登時克
復斬獲甚多曾文正公自聞銅陵之捷卽致書鮑公云銅
陵之役實非兄意料所及讀捷報在座無不踴躍稱奇同
聲呼快者雖李郭用兵何以過此只候青陽克捷卽當據
實入告至是先後奏捷略云青陽一城淪陷十載繫皖南
之門戶據江介之要衝自上年定計以來相持四月踞守
益堅仰賴

聖主福威諸將用命卒能掃蕩援賊攻拔老巢從此規取

甯國可分浙賊之勢關繫頗大厥功甚偉石埭太平南蔽黟歙涇縣東達宣城爲戰守所必爭鮑超一軍自拔青陽而後仗

聖主之威席全勝之勢未逾七日連復三城從此羣蠭喪膽籌勦甯國較有把握鮑超身先士卒調度得宜惟係專閫大員應如何

加恩之處未敢擅擬等語當青陽捷聞奉

上諭官軍擊退大股援賊攻克青陽縣城勦辦甚爲得手浙江提督鮑超身先士卒調度得宜著交部從優議敘並

發去白玉搬指一個碧玉煙壺一個白玉柄小刀一把白玉佩一塊交鮑超祇領以示優獎其尤爲出力各員弁除明興已簡放乍浦副都統婁雲慶已簡放直隸正定鎮總兵外婁雲慶著再賞給二品封典甘肅涼州鎮總兵馮標著賞加提督銜副將譚勝達王衍慶劉順隆熊鐵生陳得勝顏紹榮唐仁廉均著交軍機處記名遇有總兵缺出請旨簡放劉順隆並賞給壯勇巴圖魯名號唐仁廉並賞給二品封典總兵黃慶宋國永張玉田均著賞給二品封典副將劉玉堂李文益段大貴李定貴蕭儀斌周有勝蔡得

勝均著賞加總兵銜湖廣卽補副將馬勝奎吳騰芳文九和翦炳南均著以副將遇缺卽補馬勝奎並著賞給振勇巴圖魯名號吳騰芳並著賞給銳勇巴圖魯名號卽補知府伍華瀚著賞給四品封典四川卽補參將陳永康著以副將仍留四川遇缺卽補游擊段大有著以副將儘先卽補其餘在事出力人員著會國藩查明保奏候朕施恩其單開順安青陽等處剿賊陣亡之參將李玉春都司楊安民張伯昇守備盧廷章外委雷得勝副將羅春鵬副將銜參將羅勝武千總吳定元王大有把總劉正高黃定魁李

仁壽外委楊宏勳劉名德唐從之張順發張有貴均著交部各照本職議卹文正奉

寄諭鮑超旣克青陽著卽飭令由涇縣進取甯國以掣浙中賊勢及石太涇三城捷聞又奉

上諭鮑超一軍自拔青陽後未逾七日連復三城剿辦甚爲得手殊堪嘉尙仍著曾國藩飭令鮑超乘此聲威迅將甯國一帶踞匪悉數殲除毋任久踞在事出力員弁英勇著准其彙入青陽案內擇尤保奏候朕施恩其陣亡之都司劉蘭桂周榮桂羅雲軒守備甘少白陳其美千總易元

凱劉仁運鍾高勝費朝富把總徐則勳易明昇王東升周
祥順田安宇蕭萬勝張安貴從九徐銘外委彭文榜陽其
庚蕭利山劉光榮張家春湛正海易飛林均著交部各照
本職從優議卹時浙撫左公宗棠肅清開遂駐軍常山文
正以東路旣臻安穩因飭徽州張唐兩軍出嶺先剿石埭
之賊與鮑公青陽之師相應謂可化板爲活至是致書唐
義訓云太平石埭皆已克復貴軍與老湘營出嶺無仗可
打矣遂令老湘營留守石埭太平當青陽旣克文正以鮑
公本可乘勝掃蕩涇石直攻甯國奈青陽東建等城都無

守兵稍有疏失則鄱陽景鎮立即淪陷又恐江山之賊一面與左公相持一面另犯江西腹地故令霆軍進止不得不略一徘徊審慎而鮑公於五日之後即連下涇石太三城蓋出文正意外也文正尋致鮑公書云青陽之捷閣下又蒙

天恩賞賜御用各物閣下當威望極隆之際沐

朝廷稠疊之恩務當小心謹慎謙而又謙方是載福之道前此曾以花未全開月未圓七字相勸務望牢記毋忘至麾下營頭太多營官哨官多係鎮將大員管轄實屬不易

一人之精神照管不到莫若擇一二人分統之而分管之如宋國永婁雲慶二員其資格才識俱可勝統領之任雲字十五營中儘可分五營與宋國永統帶分五營與婁雲慶統帶閣下僅親統五營此外如仁字禮字峰字春字及馬隊各營或全歸閣下親統或酌交婁宋分統亦須早早派定譬如大樹高幹無枝則無葉無陰必有大枝長條乃有密葉濃陰此一定之理也李希菴部下現分成大吉蕭慶衍金逸亭梁作楫蔣凝學毛有銘歐陽崇如各爲一枝多禮堂部下現分雷正綰石清吉楊朝林各爲一枝閣下

亦宜趕緊分枝庶幾擔子漸輕照料易周卽手下之有才者亦宜使之獨當一面俾得各顯手段各建功業庶無人居人下之怨如近日陳由立余大勝舍此而逃往別處亦因久居人下思另尋出頭之日也又如近日梅仁富張遇春之在涇縣同伴開仗亦因該處並無統領照管不到也閣下若再不派分統之人則將來之逃往別處者恐不止於陳余同伴開仗者恐不止於梅張可慮之至望吾弟早計之凡利之所在當與人共分之名之所在當與人共享之貴軍營務處用費浩繁閣下務當與之同甘共苦嗣後

若派分統之人須將銀錢公平派出使分統者寬綽有餘則人皆心服矣尋因鮑公牒請籌發一二月滿餉文正批令將副五營撥與婁雲慶統帶新五營撥與宋國永統帶銀錢歸該分統自支自放戰守仍歸鮑公節制調度鮑公卽遵批分撥是爲憲軍設分統之始外間稱分統爲小統領厥後憲軍規模益擴同治四五年間馬步各軍小統領多至六七十人截曠銀兩厯經捐置馬隊

四月鮑公由青陽進攻甯國府城

當青陽未報克復時趙忠節公景賢正苦守湖州勢甚危

急江蘇巡撫薛公煥奏言浙江湖州府久被圍困必須援師速至方無決裂之虞提臣鮑超一軍尙在青陽與賊相持即使攻復青陽而甯廣各屬節節梗阻勢不能長驅直入仰懇

天恩飭下曾國藩左宗棠商令鮑超朱品隆兩軍速援湖州奏入奉

寄諭著曾國藩於鮑超朱品隆兩軍內酌度情形分撥一軍從間道迅速往援如進攻道途較遠或有所牽掣不能前往卽著薛煥迅派勁旅由滬進援至是曾文正公以霆

軍旣克青涇石太進攻甯國卽所以救湖州催令張公運
蘭守旌太以保靈軍糧路鮑公遂於二十五日由青陽拔
營進攻甯國是時文正建節安慶居中控馭十道並出曾
公國荃循江北岸曾公貞幹循江南岸楊公岳斌彭公玉
麟水軍中江而下助剿兩岸爲直搗金陵之師李公鴻章
領湘淮水陸突過賊境爲援剿蘇滬之師大江以北多隆
阿公爲圍攻廬州之師李公續宜有派援潁州之師都興
阿公爲防剿江北之師大江以南左公宗棠爲規復全浙
之師張公運蘭爲防剿徽州之師而規復東南全局以甯

國爲用兵樞紐勢處中堅鮑公威名最著乘勝進攻各路將帥皆倚以爲重文正覆恭親王書云洋兵會剿內地關係甚重國藩所慮者不在他事而專在派出會剿之人實難其選大抵揀選將材必求智略深遠之人又須號令嚴明能耐勞苦三者兼全乃爲上選今欲派與洋兵會剿之將亦必擇三者兼全之人環觀江楚諸軍如多將軍左中丞李中丞楊軍門鮑軍門數人者各防剿數百里地面勢不能抽出與洋人會剿一處文正奉十六日

寄諭近日江岸南北連克城池並關隘多處事機極爲順

利著卽飭鮑超各軍迅將甯國府城攻克進取廣德以期
與湖郡聲勢聯絡該府城被圍日久岌岌可危現經曾國
藩飭令鮑超派隊由廣德績溪等處分道援湖卽著迅飭
前往毋稍延緩自霆軍連克青涇石太四縣後旌德與甯
郡賊勢中斷不能聯爲一氣張公運蘭遂克復旌德縣城
捷入奉二十七日

寄諭南岸軍威甚振卽著飭令曾貞幹乘勝進克蕪湖太
平直逼金陵鮑超一軍卽飭進攻甯廣分援湖州規復高
涇東壩以期與江上之師聲勢聯絡併力進攻

五月鮑公督軍擊賊於寒亭管家橋等處連破之奪取望城岡要隘

僞輔王楊輔清糾眾十餘萬堅守甯國府城而以僞對王洪逆屯聚團山圖犯蕪湖南陵等縣僞衛王楊雄清踞紫寒亭獅子山分擾梅家店管家橋一帶以阻進兵之路鮑公率馬步官軍進抵青弋江知賊勢方盛未可猝撓其鋒乃於抱龍岡隔河濬治濠牆不遽出戰以懈賊心仍帶各營哨循山徑而入勘明地勢於初四日先遣劉玉堂吳騰芳黃慶唐仁廉李文益五營潛渡山岡分道設伏飭周有

勝馬勝奎進薄寒亭散布隊伍誘賊出壘鮑公親督將士繞越翟村木瓜橋涉淺過河令婁雲慶劉順隆王衍慶諸營突從左路進以韋志俊四營繼之令宋國永譚勝達熊鐵生諸營突從右路進以翦炳南段大有兩營繼之寒亭之賊方以周有勝等孤軍深入無後援可吞而取也遂出巢猛鬪益逞梟悍瞥見左右兩路大軍掩至正在旁皇卻顧乃附近村落中羣賊響應擁眾齊列山梁鮑公遂令顏紹榮楊鎮魁騰蹕而入直擣中堅縱橫盪決將弁頗有損折明興伍華瀚以騎隊抄出管家橋先翦其右翼宋國永

劉順隆等橫躍入陣衝賊數段適山岡後伏兵亦發扼斷歸路唐仁廉擒賊目楊民清黎奉民於陣馬勝奎周有勝乘勢搶過寒亭浮橋徑取護橋二壘毀之賊負創驚潰眾軍追襲二十餘里將寒亭管家橋梅家店直至獅子山賊館數十處賊壘三十五座同時踏平斃賊六千有奇楊雄清糾合零匪遁回甯郡曾文正公奏言甯國一城屏蔽蘇浙爲賊與我所必爭之地近日南岸連克數城敗賊多萃於此聞逆黨聚至二十萬之多臣深以兵力單薄爲慮自有此捷則已復之數縣賊或不暇復萌窺伺而我軍節節

進取圍偏郡城亦漸有可乘之隙奏入奉

上諭逆匪楊輔清竄甯國府城分股屯聚團山寒亭等處經鮑超督飭將士奮勇進攻將各路賊館賊壘一律踏平斃賊六千有奇勦辦甚爲得手卽著鮑超迅速進勦攻克堅城盡殲醜類陣亡游擊鄭永福都司陳得勝向全璧守備葛紹賢陳桂林鼓思賢千總鄧顯明黃元義羅世發把總劉昭德范瑞恆陳泰加王朝富周桂華晏光照陳宏賓外委常子雲周樂成均著交部從優議卹先是楊輔清堅伏城中正在繕脩守具聞寒亭戰敗復糾逆黨僞入王

等四大股繞城結壘延亙三十餘里楊逆自與僞桂王合股由城西之敬亭山連營至望城岡一帶以圖力抗官軍初十日鮑公引軍進駐烏沙鋪暫息士卒周厯形勢必自抱龍岡得手而後可擊散賊黨尤必從望城岡下手而後可俯瞰賊巢十五日嚮明令婁雲慶等潛出碑林岡陳得勝等潛出安宜口會伏於望城岡後而以韋志俊所部爲游兵仍令宋國永王衍慶等數隊直取中堅以誘賊賊果輕我兵寡直壓山岡而下甫及交鋒鮑公復令黃慶劉玉堂等十營張兩翼抄來羣賊勢阻將圖卻走瞥見旗幟林

立掩映山谷間以爲城南城北之賊悉眾來援也回鞭轉
鬪洶湧若潮不意婁雲慶等兩枝伏兵突從山谷中騰蹕
而前衝賊數段韋志俊等截斷賊後宋國永等揮軍乘之
縱兵擊刺遇者輒殪逸出之賊又爲明興伍華瀚馬隊追
及擒斬八九千人遂破望城岡並將抱龍岡安宜口碑林
岡敬亭山十數壘悉平東南北三路賊眾亦卽棄巢紛竄
退踞河西河東

六月鮑公攻克甯國府城僞王洪容海以甯國縣城降鮑公
用其眾收復廣德州城

楊逆旣受大創略無鬪志乘我未布長圍陰結另股三僞王列隊城根並築堅壘於夏家渡石橋之側以爲負固自完之計鮑公派隊四次挑戰匿不出遂於初八日統率馬步各軍偪壘下寨賊不能堪由北城出萬餘眾前來迎拒我軍一擊敗之初十日賊復由南城出二萬餘眾悉力撲犯我軍再擊又敗之十四日僞循王魏超成僞干王洪仁玕等於南門胡廬山鰈魚山一帶列隊冀襲我後僞襄王劉官方等於北門廟埠圖山一帶列隊希圖夾攻而西門亦別出大股靠壘爲陣鮑公見賊已渡河喜告諸將曰彼

有鬪志吾乃可以一逞也遂飭婁雲慶馮標譚勝達唐仁廉伍華瀚等向北門進張應超楊鎮魁段大有等向西門進宋國永黃慶明興馬勝奎李文益等向南門進而以韋志俊四營趨南門之左張遇春二營趨南門之右時城賊壘賊蜂擁出敵我軍如牆併進搏戰逾時未遽得手宋國永黃慶躍入賊陣縱橫盪決先將中路一段擊敗明興劉順隆截出夏家渡口橋遏賊歸路賊旂漸亂撲河返奔馬勝奎李文益遂將石橋二壘踏毀韋志俊張遇春亦自山腰斜衝而出賊眾紛潰將過浮橋周有勝熊鐵生焚橋截

住幾無脫者南門旣已獲勝僞襄王一股瞭見南路火發遂棄廟埠圖山而遁婁雲慶馮標唐仁廉奮力尾追吳雲集從旁徑突出乘之張應超楊鎮魁等亦於西門告捷削平附城三壘三路整軍來會集於小東門外將沿河僵仆之賊補刀殪之十五日楊輔清復出大東門收合餘燼爲背城借一之舉鮑公率各軍驟進勢如風雨該逆一戰卽北狂奔六十里已近洪林橋矣楊逆忽率馬隊二千餘人回陣返撲馬勝奎緊躡賊後中鎗而殞將士亦多損折鮑公令諸營徐列圓陣以大圍包之環加剿洗楊逆單騎脫

去從馬千餘匹盡爲我有城賊見楊逆一敗不返倉皇失措議戰議降議守紛紜未定我軍已自洪林橋收隊歸來大呼直入東門除跪降及老弱婦女外一律斬薙無遺立將府城克復前後斃賊幾及二萬生擒酋目三百餘名得大小礮位六十五尊先是曾文正公致書張公運蘭云甯國賊數實在十萬以外必拚命與官軍苦戰鮑軍屢捷之餘將士難免驕矜又所撥他處劣營歸入統下者甚多尤覺散漫國藩深以爲慮貴軍現守石太務求鎮靜耐苦養精蓄銳不必急求會剿前途但求力保後路萬一鮑軍小

有挫失全靠貴軍爲後面長城又致鮑公書云聞楊七麻在城內又聞青石蕪太等處敗賊浙江援賊萃於該府數必不少務望閣下穩慎圖之不可因屢勝而輕敵或至疏失等語文正前因霆軍弁勇多長沙省城人而能屢破大敵謂軍事不可一律相繩是役又以撥帶劣營爲鮑公慮而鮑公竟以破二十萬之巨股是時文正念年來蜀將死亡太多特允江公長貴撤營履任之請而於鮑公愛護尤至及寒亭獲勝又致左公宗棠書云霆軍以能穩紮穩打爲幸更無餘力分援湖州初三日湖州失守文正奏稱鮑

超以甯國賊勢太重萬難抽兵援湖又致李公鴻章書云
鮑公於初四日獲勝後步步進紮楊七麻兄弟共三僞王
部眾二十萬之多聞鮑公之力足以制之等語是時多隆
阿公已克復廬州府潁江水陸官軍連克太平府蕪湖南
陵等縣及金柱關東西梁山各要隘曾公國荃克大勝關
秣稜關三汊河等處賊壘進軍金陵駐紮雨花臺文正以
金陵機勢可乘擬令多隆阿公進攻九洑洲乘勢會剿金
陵而多隆阿公尋因陝省之警經官文恭公奏派援秦於
是文正專待霆軍攻克甯郡後爲游擊之師以援應金陵

及聞十四日之捷奏稱甯郡一拔則江浙之門戶已開金陵之機勢漸緊由是略取東壩會剿下游可無兵單之慮奉

上諭僞輔王楊逆竄踞甯國經官軍進剿迭獲勝仗當將府城克復浙江提督鮑超親督諸軍冒暑苦戰屢復名城茲復攻克甯國洵屬戰功卓著忠勇堪嘉著加恩賞給雲騎尉世職以示優獎其尤爲出力之總兵宋國永婁雲慶黃慶均著交軍機處記名遇有提督缺出請旨簡放馮標副都統明興均著交部從優議敘總兵熊鐵生王衍慶譚

勝達劉順隆唐仁廉陳得勝均著賞加提督銜知府伍華
瀚著交軍機處記名遇有道員缺出請旨簡放副將周有
勝劉玉堂李文益均著交軍機處記名遇有總兵缺出請
旨簡放吳騰芳易昌煥段大有劉天勝均著賞加總兵銜
參將韋志俊著以副將儘先補用並賞加總兵銜儘先參
將四川順慶營游擊張應超著以副將仍留四川遇缺儘
先補用湖南鎮筵鎮右營游擊楊鎮魁著以副將仍留湖
南遇缺儘先補用游擊孫開華著以副將遇缺儘先補用
吳雲集都司韋以琳均著以參將遇缺儘先補用黃海清

著以游擊留於安徽遇缺儘先補用涂祖昌著以游擊遇缺儘先補用並賞換花翎薛金榜著以游擊儘先補用並賞加參將銜千總蕭治亨著以都司儘先補用並賞加游擊銜四川卽補副將陳永康著遇有副將缺出先行補用其力戰陣亡之副將馬勝奎游擊銜都司曹榮黃新林守備楊樹森千總楚訓武馮朝富楊吉盛把總楊加春劉伯鴻外委宋大有李來獻徐士太均著交部照原保官階從優議卹其餘出力員弁兵勇著會國藩查明請獎當鮑公攻克寒亭等處賊壘後曾文正公多隆阿公左公宗棠同

奉五月初十日

寄諭鮑超進攻甯國大獲勝仗攻克寒亭管家橋等處賊壘著該大臣飭令移營進逼速拔堅城一俟甯郡克復卽可由廣德進至高淳溧水節節掃蕩會同金陵水陸各軍擣穴擒渠共膺懋賞至是文正又奉六月初四日

寄諭前據曾國藩等奏稱官軍進逼金陵因兵數不敷布置俟增調多隆阿等軍到防再籌大舉當經諭令該大臣必須慎益加慎不可輕易進攻或致挫失因思鮑超一軍進取甯國約計以一萬之師抵數萬之賊雖日來攻破寒

亭等處要隘而賊勢太盛鮑超所部兵勇亦不免單薄且前據奏該提督平日馭將過嚴將士有渙散之意頓兵堅城日久不無可慮著該大臣密飭該提督於勇往之中仍須加意慎重甯國廣德爲蘇常門戶賊以全力死守若官軍奮勇進攻傷亡必眾鮑超營中是否必須添兵協助方可爲萬全之處著曾國藩迅速妥籌辦理如須添兵以何路之兵爲最宜卽著酌量調派毋失機宜尋又奉初九日寄諭鮑超一軍攻勦甯國自踏平寒亭等處賊壘後匪勢若何我兵是否得手並著曾國藩迅催該提督奮力攻取

以圖節節進剿文正於添兵協助鮑公之事尙未籌及而甯郡已克捷聞後又奉

寄諭鮑超一軍自可由東壩等處與曾國荃會師金陵曾國荃既不慮孤軍寡助似大局已有把握深堪欣慰僞保王洪容海者石達開死黨也驍勇善戰上年由汀州入浙轉隸李秀成隊下金陵洪逆令援甯郡占踞甯國縣城復屯聚於郡城東之孫家埠不敢與霆軍接仗具稟乞降詭云與羣賊有隙願取郡城縛輔逆以獻鮑公與之期約許以自新乃撫事未成甯郡已克洪容海遵鮑公約於二十

日襲取廣德州城因率眾六萬就撫

七月鮑公駐軍甯國安置降眾立新營

時曾公國荃與金陵城賊相持曾文正公檄鮑公進攻東壩高淳溧陽溧水句容一帶作遠勢盤旋以漸屯駐於金陵之東北爲犄角又念寇軍將士勞苦太久疾病者多令其稍爲休息而鮑公亦以安置降眾尙未就緒暫難拔營洪容海之取廣德州城也襲殺侍逆所派守將馬桂功並收其眾令薙髮於是降卒益眾鮑公議分別遣留文正奏給容海游擊虛銜隨降之頭目朱大椒等二十四人俱給

五六品頂帶有差及容海進剿建平不利部下頭目各爭雄長懷反側張得勝等帶二萬餘人投歸僞輔王而大椒等在廣德內亂容海率心腹萬餘人奪門出投歸鮑公營次廣德州遂仍爲賊所踞初文正議酌留降眾二千人餘全行遣散而鮑公則請多留及事聞奉

寄諭所辦甚屬妥協著鮑超趕緊辦理惟降眾六萬僅留二千人恐餘黨不能盡散若復聚而爲匪又成巨股不可不防如洪容海真心歸順不妨酌量多留將降眾分隸各營借資鈐束洪容海或令隨攻金陵或令助攻湖州均著

酌度辦理鮑公乃令容海酌留三千人編立啟化營隨同
征剿令攻克廣德州以贖前愆尋又議再留三營其遣者
每人給途費錢千文尋奉

寄諭此次洪容海部眾反復廣德復陷亦在意計之中鮑
超所辦尙屬合宜惟洪容海歸順之眾雖較前數大減而
人數尙復不少不可不防旣已准其來歸亦不可待之過
刻致令反側阻日後從賊者反正之路自鮑公隨征軍麾
所至輒建奇勳各路統帥疆臣爭欲得靈營部將以張其
軍記名總兵鄭陽和前年藉故告假誘同游擊龍德亮等

三十八人私往湖南經巡撫毛公鴻賓留統多營嗣總兵陳由立經河南巡撫嚴公樹森奏調得

旨飭赴河南軍營已而嚴公調撫湖北青陽戰事方亟鮑公請於文正將由立奏留原營而由立因陽和事相形不免缺望遂與副將余大勝先後託病離營並潛誘哨弁李殿華等十六人颺去尋接河南巡撫鄭公元善函知已委令赴湘募勇三千鮑公以由立等相從日久同甘其苦乃因假離營任意遠颺有干軍令函咨文正請旨將陳由立等一併革職並飭湖南撫臣撤去鄭陽和帶

勇差使查明陳由立余大勝等均不許招勇立營不許逗
遛境內派員押回皖南原營責令立功自贖以懲跋扈而
杜效尤

詔如所請行鮑公之軍紀由此益肅矣文正尋致毛公書
云陳由立回湘招勇求閣下立飭停招派員押回敝處此
風一開各處軍紀皆弛所關極大弟不能不認真嚴辦並
求閣下將鄭陽和撤營押回皖中俾弟法令得行等語後
余大勝經左公宗棠飭往鮑公軍營文正覆左公書云弟
於霆軍諸將均不過一面之識無德無怨並無痛懲一二

借以立威之意不過因春霆公牘私信屢請懲辦不得不爲之主持又見鄭陳余三人之去隨同颺去者至數十員恐繼之者大去不止故嚴行奏禁以截其流非弟有所不快於三人者也卽春霆於鄭陽和愛其驍悍而惜其他之其於陳由立則深惡其擲部劄於地而徑奔河內至其於余大勝則惡之迥不似陳而愛之亦微不逮鄭蓋牽連得書之類閣下與余有舊不爲保之受之而遣之歸鮑可謂力全大局寄雲中丞始終留鄭不遣則似不達鮑之情而亦少乖弟之志等語寄雲毛公鴻賓字

八月軍中大疫鮑公至蕪湖養病以宋國永暫護軍事

時曾文正公奉

寄諭鮑超旣克甯國自宜乘此聲威攻取東壩溧水高淳
句容等處使蘇常之賊與金陵隔絕便可斷其接濟迅下
堅城然後以全師赴湖州等處蘇常之賊豈能自保鮑公
方擬撫事就緒乘勝進兵而大江以南癘疫繁興甯國境
內最甚寇軍勇夫病者萬餘死者數千至於炊爨寥寥猛
將黃慶伍華瀚等俱先後物故鮑公亦染病甚重因以宋
國永權護軍事各將領以舟送鮑公至蕪湖養病文正奏

言軍事甫順疾疫流行惡耗頻來心膽俱碎若有大股賊
匪撲犯甯國旌太等處鮑超張運蘭兩軍不特不能出隊
迎戰並不能堅守城壘以待外援亦並不能預逃以待再
振金陵徽州戰守俱無把握數年來千辛萬苦戰爭之土
地由尺寸而廣至數百里儻有疏虞何堪設想若皖南藩
籬一壞則工西內地空虛毫無足恃興言及此憂心如灼
奏入奉

寄諭鮑超營中暨曾國荃等軍皆疫疾大作曷勝軫念廣
德固須急圖攻取而甯國尤爲地所必爭著飭令鮑超等

竭力固守使賊不得肆其狡謀尋又奉

寄諭自諸軍進逼金陵逆匪老巢已成阱檻惟以艱難時
會誠不易得疊經寄諭總以毋徒求效旦夕惟當立足不
敗之地以俟可乘之機當此艱危時局疫疾流行將士摧
折深虞隙士氣而長寇氛該大臣惟宜愈矢忠誠拊循加
意使軍心益固沴氣潛除各營疾疫將士其各傳旨優加
存問本應明降諭旨慰勞誠以事關軍務或恐人心疑懼
且致奸宄從而生心賊人轉益張其兇燄先是文正覆李
公鴻章書云鮑公中秋後可打東壩高淳二溧以達金陵

若其順手九月可至鍾山至是致鮑公書云聞貴部病者極多傷憫之至茲送去高麗棧三十兩煩閣下擇弁勇之病重而應補劑者酌量勻給以表鄙人區區愛士之心又致郭公崑燾書云鮑張二公皆遘疾頗重寔營如黃慶伍華瀚皆關係全軍之興衰等語尋爲黃慶伍華瀚疏請照軍營立功後病故例從優議卹並請從祀湖南原籍昭忠祠得

旨俞允

閏八月大股援賊上犯宋國永出隊禦之於新河莊不利鮑

公自蕪湖力疾回甯國

曾文正公奉十九日

寄諭鮑超營內並金陵徽防各營近來疫氣已否平安軫
念實深時李秀成由蘇州率大股上援金陵黃文金胡鼎
文李世賢等股十餘萬由東壩撲犯金寶圩以抄霆軍糧
路二十日宋國永遵文正之檄派霆字四營峰字二營於
距甯郡五十里之新河莊禦之始到營壘未定爲賊所乘
退回甯國鮑公在蕪湖病漸愈徧身發瘡癰以金陵援賊
圍撲曾公國基營甚急深恨不能赴援及聞國永小挫黃

胡等逆將由東西兩路分撲甯郡恐於皖南全局有失遂於二十七日力疾回甯國軍次先是曾文正公覆左公宗棠書云春霆現在蕪湖養病雪琴見之云兩人扶掖以行神氣尙完或無他慮東壩之賊連日擾及水陽鎮金寶圩一帶甯國之師向由蕪湖運糧恐將中梗亦大局之憂也弟飭宋國永派人三千紮新河莊以救金寶圩不知霆營病卒尙能成隊否尋又覆書云春霆將力疾回營賊若直犯甯國固慮霆營病卒不能禦此大敵卽由灣沚南陵斷我餉道甯國亦無可守之理又覆鮑公書云得知尊疾稍

愈爲之一慰而猶以未全愈爲念也賊至金寶圩擄糧此
意中之事現已函商雪琴侍郎請其派船赴水陽一帶矣
此時急務第一望閣下與各將士病體全愈第二保甯國
府縣兩城第三清水陽等處保甯國之糧路第四救金寶
圩之百姓請閣下告知宋馮婁諸公依此次第分別緩急
辦理餉項又缺鄙人愧念之至今日解銀四萬以濟貴軍
五日之內必續解也後又致李公續宜書云春霆力疾回
營而水師已退出甯國糧路已斷安能保全

九月鮑公移營高祖山

鮑公自回甯郡以宋國永前次紮營新河莊甚失地勢於是力圖整頓將病者傷者安置城內簡選精銳約得五千人紮營城外主戰令張公運蘭所部老湘營登陴主守賊以鮑公大病新起於初三日率黨至廟埠撲犯官營鮑公揮隊出擊賊即敗走鮑公因於初六日扼紮距郡城二十里之高祖山兼顧西河灣汴等處又以南陵爲內竄之路派婁雲慶駐守之時黃文金胡鼎文及僞隨王楊柳谷僞跟王藍仁德等久盤踞高嶺梅嶺油榨溝新河莊等處時竄擾灣汴紅楊樹一帶蔓延百餘里冀抄甯郡糧路以牽

制高祖山大營十八日鮑公派隊搦戰賊亦排隊於仰賢
圩新河莊等處依傍港汊阻水自固不敢渡河接戰初降
將韋志俊洪容海同守甯國縣城俱因病隨同鮑公赴蕪
湖調治甯國縣城遂於初六日失守鮑公飭其收集潰散
重整隊伍至是見我之守禦日完賊之怯情日露擬將高
嶺梅嶺之賊痛剿數次以挫兇鋒因可戰之士太少乃飭
志俊容海率所部隨同進剿於二十一日出隊而新愈之
卒黃瘦無力戰不利幸賊亦不敢猛抗曾文正公覆鮑公
書云黃老虎本係悍賊又加楊七麻胡鼎文等酋均係百

戰之寇未可輕視現由湖北調來何紹彩三千五百人吳華廷一千人均於五日內可至安慶到皖後卽派赴貴處助剿梁美材三營已至貴處否閣下若自度力能取勝則速戰亦可若力量不足則堅守營濠待梁何吳三營到後再行開仗亦無不可大凡客兵多不甚得力全靠主兵自強客兵僅助聲勢而已梁何吳三軍雖到齊而打仗之時仍全靠霆營自己努力也又致書云賊數太眾而貴部病者太多目下總以先固營濠先保糧路爲要梁營十月初必至何吳等營十月半必至但望閣下穩守穩紮韋洪兩

部皆不可靠不宜令之同戰尋又致書云梁美材已至甯國否渠請添招二百人余批令由閣下代爲呈請蓋使之稍感閣下之恩或肯出力耳聞該二營不甚和睦不知打仗尙肯齊心否閣下須留心查看戰陣時純靠本營之兵得力切莫專靠客兵恐誤事也文正於上月奏稱楊岳斌鮑超病皆漸愈擬於二十六七回營其軍縱有疏失尙可徐圖整頓奏入奉初十日

寄諭現在漸寒疫氣當已消盡鮑超楊岳斌等病皆就痊覽奏爲之稍慰著曾國藩催令鮑超等回營拊循士卒先

圖固守使人馬強壯再議進攻毋得稍分畛域江蘇巡撫
李公鴻章議調多隆阿公援秦之師折回會剿奏稱忠侍
護輔等僞王合股上竄分援金陵甯國蓄謀甚狡適值鮑
超曾國荃兩軍疫病繁興之際曾國荃前敵稍有挫失則
太平蕪湖防兵皆單賊可循江邊上竄鮑超一軍恐受圍
困實關係蘇浙皖南江西數省全局現在統計上下游各
路兵數皆僅可自立不足分援甯國金陵軍營亦僅可守
而不可以戰必另有大隊援兵方可制賊等語於九月初
旬奏入曾文正公奉十七日

寄諭金陵大營苦守待援甯國又復喫緊鮑超之病是否痊愈曾國荃受傷是否平復頗深慮念厥後多隆阿公卒爲秦事所牽不能東下先是援賊初至時金陵急而甯國稍緩曾文正公商之左公宗棠令撥蔣公益澧一軍至甯郡騰出霆軍下解金陵官軍之圍尋因蔣公爲龍游湯溪之賊所牽而霆軍之糧路日梗甯事日棘文正致左公書云春霆久屯高祖山賊亦未敢尋之開仗自是懾於夙昔威名然霆軍可出隊者不過四千人自治且有未遑况能遠援金陵念此不無氣餒又致官文恭公書云春霆回營

兩旬尙未開仗幸病體全愈軍心已固又致李公續宜書云春霆至今尙未開仗蓋霆則患病卒之太多賊則畏霆營之積威皆相持莫敢先發也

十月宋國永攻剿西河不利

自有上月二十一日之戰賊知我軍病羸餘卒不堪再鼓新募勇丁又未到營因一面在上游與霆軍相持一面在下游灣沚方山等處與水師相拒初五日渡過清弋江占踞西河初八日鮑公派宋國永攻剿西河賊壘損折勇丁數百人國永恐太傷士氣急收隊回於是水路糧運被賊

梗塞金陵曾公國荃之師苦守四十六日於初五日大捷
賊解圍去曾文正公於十二日疏陳金陵戰狀云前奏可
慮者四端今所慮專在甯國一路再能支撐一月新募之
勇一到鮑超能出營痛剿或可力遏賊氛不令上竄臣派
員於繁昌南陵多雇民夫趕辦陸運又派湖北調來之何
紹彩等營由南陵前往保護陸路又自金陵調出王可陞
五營由蕪湖前往冀通水路總期能通運道而後能保鮑
超之營壘能保營壘而後能守甯國之城池奉
寄諭甯國雖偶爾小挫鮑超謀勇兼優諒能支持金陵援

賊經曾國荃等斬殺數萬逆膽已寒該藩司兵力本不甚厚頓兵堅城之下進退兩難恐日久逆黨復生詭計非鮑超之軍由東壩馳往會剿則成相持之勢故甯防甚關緊要非獨逆賊內犯南陵爲可慮也又奉

寄諭甯國旌德同時喫緊鮑超張運蘭朱品隆諸軍尙屬羸病之餘著曾國藩照所擬各策分兵往援

十一月鮑公丁母憂改爲署理浙江提督在營穿孝尋擊賊於黃麻渡勝之復大破賊於歇建廟馬頭鎮等處

李秀成自上月竄江北連陷含山巢縣和州等城至是旌

德之賊復竄擾太平縣攻陷祁門甯國糧路迄未大通
自紅楊樹青弋江西河灣沚等處面面賊氛鮑公所部病
餘各營分汛太廣正擬俟赴湘新募之七千人陸續到皖
再行分途痛剿二十日忽聞訃丁母鄧太夫人憂鮑公請
於曾文正公給假奔喪文正復書云閣下至孝性成驟嬰
大故哀慟迴逾尋常急思奔喪回籍乃人子之至情惟閣
下統領雄師獨當一面正值萬分喫緊之際卽日當專摺
奏明仿照咸豐六年福將軍在江甯丁憂之例奉

旨後在營穿孝二十七日目下請節哀順變公而忘私仍

以軍事爲重力支危局甯國之艱難已歷四月全賴閣下
與各營官勉力撐持再支一月則米糧已運足朱軍必到
青陽熊鎮馮鎮之新勇必陸續到齊一交新年貴軍補足
勁旅又可復從前之舊掃清甯郡之賊克復金陵再行奏
請回籍則哀榮備至矣時李公續宜亦在假守制文正致
書云鮑軍門堅請奔喪回籍鄙人未允亦望台旆早來免
致渠得藉口文正疏入奉

上諭浙江提督鮑超現在聞訃丁憂呈請給假奔喪惟甯
國一帶現值防剿喫緊該提督係帶兵大員勇敢善戰久

爲各軍倚重更不可輕離防所鮑超著照例毋庸開缺改爲署理卽著在軍營穿孝二十七日俟江南軍務大定再由該大臣奏請給假回籍營葬以遂孝思文正於未具奏時批鮑公牘云貴軍門一再陳情詞旨迫切孝思肫篤又係屢立大功之人本部堂當奏求

皇上破格天恩賞假回籍治喪惟獨當一面之人須視軍務之緩急以定行期之遲速貴軍門丁憂正值甯國軍務萬分喫緊之際恐須三四次陳奏乃能仰荷 聖恩俞允若能將西河灣沚之賊擊退糧路早通 聖心大慰或能

早邀 恩准亦未可知文正又奉

寄諭鮑超所募湘勇已否到營著於到營後飭令酌量情形妥籌戰守現在該營情形若何實深廬念著該大臣隨時具奏鮑公自聞訃後雖堅請奔喪敬候 成命而於哀毀擗踊之中仍力顧大局不敢稍有疏忽慮黃麻渡守兵單薄水陸糧路可虞乃督馬步數營並何紹彩二營於二十四日馳赴黃麻渡會合王可陞防軍誘賊過河一擊敗之旋報花旗廣匪六萬餘眾由甯國縣進歇建廟直至高橋楊柳鋪吳村馬頭鎮一帶布滿賊館自甯郡南至涇縣

北至鮑公營盤自高祖山老營至清弋江南陵俱爲賊氛
所梗鮑公以老營空虛懼有挫失遂自黃麻渡捲旗息鼓
振旅還援遙見四面傳烽煙燄紛起訶知藍仁德等分對
高祖山清弋江下寨另有賊騎數百由寒亭高祖山摩壘
而過繞出抱龍岡冀襲我營之後鮑公旣次清弋江先派
宋國永守定高祖山二十七日昧爽部勒各營徑從抱龍
岡進令周有勝王衍慶萬守根孫得友各營攻中路唐仁
廉劉天勝吳雲集羅國才各營攻左路譚勝達李文益洪
容海鄧雲貴各營攻右路賊恃眾列陣來拒旌旗一展鼓

音若雷我軍以排鎗輪擊多有應聲而殪者賊乃愈聚愈眾密布長圍傷我營哨數人羅國才衝賊過猛並陷於陣適鮑公親督梁美材王壽泉萬鳳書劉順隆何紹彩唐友勝黃海清等營自山岡後分兩枝抄入截賊數段賊隊大亂奪路奔竄諸將士合力薄之遂將歇建廟至楊柳鋪十數村落中賊卡賊壘一律平毀追襲五十餘里殲賊七八千人擒僞侯林如彪及大小頭目三十餘人獲器械馬匹無算文正奏稱鮑超進攻馬頭鎮楊柳鋪之賊大獲勝仗踏毀賊館賊卡甚多惜所招新勇未齊不能乘勝痛剿水

路陸路仍有梗塞之虞等語其詳細戰狀至明年正月涇縣捷後始合疏以聞

十二月鮑公出隊擊賊未果

自馬頭鎮等處旣捷凡附近官營之高嶺梅嶺麒麟山各賊股伏匿不出者經月二十三日朱品隆一軍乘勢收復青陽鮑公以南陵繁昌已無後路之虞卽於二十五日抽隊出勦行次中途以積潦未乾泥淖盈尺不利軍行因收隊鮑公先於十一日接准兵部火票由驛六百里遞到議政王軍機大臣咨稱十一月二十八日浙江提督鮑奉

旨由內交出年終 賞給貴大臣福字一方大荷包一對
小荷包四個銀鏤四錠銀錢二枚南棗三斤半奶餅五斤
藕粉三斤半百合粉三斤半白蓮子一斤半橘餅一斤半
掛麪十把貴大臣照數分別祇領等語故事年終 恩賞
福字等件外臣惟及將軍督撫之聲績丕著者鮑公以提
督而膺茲異數叩頭祇領感激涕零召將士而指勵之謂
君等知此榮遇所自來乎願戮力爲之勿自菲薄也前此
得黃馬褂雲騎尉世職後此得一等輕車都尉世職雙眼
花翎一等子爵加一雲騎尉世職皆嘗指勵將士云

霆軍紀略卷六

銅梁陳昌世五編輯

門人

吳樹棠

全校字

癸亥同治二年

正月古隆賢等股圍攻涇縣鮑公馳援大破之賊解圍去復追破之回軍高祖山撲營之賊驚遁

賴文鴻古隆賢劉官方諸僞王糾合花旗股匪於初一日竄入大坑黃村守將老湘營易開俊等戰敗賊遂進逼涇縣連營二十餘座初三四等日悉銳撲城是時鮑公在高

祖山老營一聞易開俊告急恐涇縣不支將貽甯郡後路之患計莫如速往擊之遂簡行隊疾馳九十里初五日抵涇縣入城少息初六日五更時裹飯傳餐拔關齊出先遣王衍慶鄧雲貴張遇春唐仁廉李文益唐得勝六營蹴過山麓分匿叢箐深樹間而以易開俊吳廷華所部遙爲之應復令婁雲慶羅文宓周德馨何文喜四營依山而上譚勝達蕭凌雲洪容海陳開用四營循河而上鮑公督飭梁美材王清泉萬鳳書三營暨黃海清孫得友騎隊直前挑戰羣賊爭相出巢從山梁壓下婁雲慶羅文宓等正當其

衝梁美材王清泉黃海清等馬步競進戰逾兩時將弁多有損折羅天順躍入重圍被賊矛抉出右目顛暈下馬王清泉急率步卒挾之而走亦爲飛子所傷鮑公令約軍佯退引賊將近山麓號鼓一聲伏兵頓發蜚雲慶回鞭轉鬪四面夾擊賊大敗正欲歸壘瞥見壘中火起已爲譚勝達等所破我軍乘勝併進盡掃羣壘立解涇縣之圍長驅三十餘里遂入黃村賊不虞官軍之驟至有棄壘欲遁者有閉壘死守者眾軍士擁至濠下搶拔地鉞肉薄而登又平十數壘追二十里至大坑斃賊盈萬初七日鮑公自涇縣

回軍適西河之賊撲近寒亭高祖山老營將圖乘虛一逞
南望旗幟蔽空軍容甚盛乃相顧錯愕曰鮑大人來矣卽
一開散走賊畏憚鮑公望風驚潰類如此當鮑公赴援涇
縣隱慮高祖山老營兵單且疫病者尙大半將爲賊所乘
故涇縣圍解卽日引軍還將士日夜奔馳戰鬪未得少休
頗有謂鮑公不恤士卒者至是始服其料敵如神皆自愧
以爲不可及時曾文正公與友人書方謂霆軍徒呼庚癸
難賈餘勇及聞捷音覆江西巡撫沈文肅公葆楨書云南
岸甯池等處以楊黃胡李及賴古劉三股爲最多江西邊

患仍在西而不在東春霆帶隊馳九十里大獲全勝立解涇縣之圍此近事之堪慰者因奏稱甯國徧地逆氛鮑超以病餘之將新補之卒四出雕剿得此兩戰軍威可以復振危局可以漸安奏入奉

上諭此次官軍勦辦馬頭鎮悍賊大勝並涇縣解圍出力員弁著會國藩擇尤保獎其節次打仗陣亡之參將羅國才等六十七員暨涇縣打仗陣亡之參將倪昌明等五十一員均著交部從優議卹是役也黃村大坑賊所遺糧米城中搬運累月涇縣守兵感鮑公恩次骨惟霆軍將弁皆

羸病之餘力摧強寇冒死血戰故傷亡較多當涇圍初解
文正疏報軍情奉

寄諭賊匪麇集寒亭清弋江等處鮑超謀勇素裕著曾國
藩飭令嚴爲戒備毋爲該逆所乘幸鮑公回軍甚速保全
老營宸慮所及早已化險爲夷矣

二月鮑公督軍大破賊於高祖山連毀西河灣汴等處賊巢
分攻麒麟山梅嶺諸隘悉破平之甯國境內肅清

時隨跟堵孝諸僞王嘯聚甯郡不下十餘萬人霆軍雖兩
獲大勝而灣汴高嶺西河油榨溝等十餘處仍爲賊踞我

軍猶須運米於二百里外賊復以大枝出高祖山之前潛匿村落中距我營七八里十數里不等以一小枝繞過高祖山之背橫出楊柳鋪揚言上犯涇縣火光燭天晝夜不滅鮑公見山前隱約山後煙燄突起計在誘我赴涇圖襲老營乃令宋國永布置高祖山營塞堅壁穩守在板橋溝寒亭清弋江等營抽隊數成親自督率示赴援涇縣之狀而潛伏於太子廟山坳以伺其變初一日昧爽楊柳鋪火光漸息訶知甯郡守將劉松山等出城雕剿擒斬數百人楊柳鋪一股旋向烏沙鋪遁去鮑公料賊不得逞於郡城

又謂我果率勁旅赴涇必將挾全力以撲老營因登太子廟山岡瞭望果見烏沙鋪之賊進偪獅子山去營不遠各邨落之賊分三四萬眾旌旗蔽空迤邐而來將高祖山八營層層圍裏有擁至濠下爭拔花籬者鮑公急率太子廟伏兵向山僻小徑捲旗疾趨行至離營二里許聞營中礮聲轟發知老營業已出隊接戰卽派譚勝達顏紹榮甘星平徐連升等直取中路萬守根洪容海張遇春等由營後左路進以婁雲慶黃海清唐得勝等爲之應王衍慶何紹彩曹志忠等由營後右路進以唐仁廉鄧雲慶孫得友等

爲之應仍令梁美材王清泉萬鳳書等潛伏茯苓山之旁以斷賊後部勒既定鼓角一聲譚勝達萬守根王衍慶各軍突分三路包賊宋國永乘勢從右營夾縫中擊出截賊數段鄧訓誥周有勝等張兩翼抄殺賊隊譁亂不復成伍正思奪路竄走適婁雲慶黃海清唐仁廉等馬步齊至我軍縱橫盪決賊之前鋒鮮有脫者而賊之後隊尙欲抵死來援鮑公揮令諸將士奮力衝擊追近茯苓山梁美材大呼突出早斷歸路羣賊駭懼罔知所措紛紛竄入田壠眾軍合力蹙之追襲四十餘里遂平高嶺周家橋諸壘直抵

西河賊乃倚水爲險對河列陣以圖抗拒鮑公已先令盧榮忠帶霆營礮划由清弋江駛下我軍結筏爭渡水陸夾擊俘戮無算立毀堅巢賊始往桃花園灣止一路而遁西河以北曰馬家園爲眾賊屯糧之所迤西則曰黃麻渡曰小淮窰爲王可陞進兵之地西河旣復可陞知羣賊膽寒卽於初一夜督隊奪取馬家園小淮窰壘卡焚其積聚其由西河遁入灣止者經盧榮忠隨同外江水師日夜轟擊賊乃於初二初三等日縮入灣止之後山退聚竹塘旋分大股歸併梅嶺麒麟山意在伺間再逞鮑公謂賊餒雖衰

不速除之終貽後患初四日引軍渡河進次紅楊樹偏壘而陣賊匿不出戰鮑公令以火藥環擲延然哨棚軍士冒煙突入踰濠直進一壘陷而眾壘悉亂各將弁揮隊蕩擊殲獲頗眾直追過桃花園竹塘灣汴後山賊皆聞風先遁遂焚其巢是夜鮑公遺書劉松山令於初五日自郡城率師來會將有事於梅嶺及麒麟山而密授諸將方略天甫向曙秣馬蓐食傳令宋國永等十五營專攻麒麟山婁雲慶等八營專攻梅嶺而以劉松山各旗營爲斷後行未十數里賊竟糾眾來迎國永同各營哨就山麓布列陣勢直

前搏戰潛遣銳卒自山後舉旗先登襲破賊壘周麾而呼
賊咸驚疑卻顧國永等縱兵掩擊積尸若阜麒麟山堅壘
悉平是日松山亦破廟阜之壘殲賊千餘雲慶鄧榮貴等
擊破梅嶺之壘並收復仰賢圩各處餘匪分道竄逸一由
新河莊敗往東壩一由油榨溝敗往廣德建平曾文正公
奏稱西河小淮審爲水路要衝自被賊踞數月糧運梗阻
大爲甯國各營之患仰賴

聖主威福將士同心五日之間悉復諸隘距郡城數十里
內一律肅清在事人員厥功甚偉請彙入楊柳鋪涇縣各

案酌給獎敘力戰陣亡之參將李芳菲等二十六員弁請旨飭部從優議卹奏入得

俞旨並奉

上諭仍著鮑超等乘勝追擊將敗竄之匪盡數殲除宋國永婁雲慶二人尋俱奉

旨賞穿黃馬褂鮑公自上年八月以後危險迭出視咸豐九年小池驛之役所處尤難當小池營壘被圍只會胡各帥設法保救此次則動煩宸慮垂詢病狀飭派援師爲之疏通糧路蓋江皖蘇浙數省俱視甯國一軍爲安危

而鮑公專制此路責任綦重不似從前潛太之軍僅爲上游偏師鮑公又僅五營統將也文正於黃麻渡未戰之先令楊公岳斌調劉連捷等陸營進駐三山東西致書有云春霆十分危急舍此別無救援之法又致湘撫毛公鴻賓書云鮑軍營官病者太多死者四五員強兵變爲孱弱灣沚之賊竄入青弋江糧路已斷鮑軍殆難久支幸春霆濠牆堅固或可轉危爲安尋覆左公宗棠沈文肅公書云鮑公糧路水運久斷弟派人在南陵繁昌辦理陸運本不足以贍大軍近日淫雨連綿尤多不便鮑營軍米不足十日

弁更有逃散者實堪憂歎又云數萬人之食挑運於百五十里之外而又時有馬賊要截人夫駭散之事何能久支又覆李公鴻章書云皖南旌石青太四城被賊占踞橫互徽甯夾縫之中鮑軍糧路迄未大通相持不決終恐自潰耳又致官文恭公書云甯郡關係至大鮑若不支則皖南數城均恐難保又覆左公書云甯國之事不特春霆漫無成算卽弟亦忙亂可笑又覆毛公書云大約糧路不梗則鮑軍可全甯國可保開春新勇補齊霆營可期再振等語其實鮑公之成算亦只俟將弁病痊卽可與賊決戰大振

軍威先後數月無日不在驚濤駭浪之中而惟以從容安
靜撫循病卒鎮定人心所致文正各函牘亦絕不作一頽
唐沮興之詞蓋氣吞醜虜之素不以危險而稍渝又不欲
以無益之張皇淆惑大帥軍謀也文正始料其必不能支
繼謂其可期再振乃鮑公並不以待新勇到營而已將甯
郡肅清東征全局復振霆軍履險如夷轉危爲安每出人
意料之外如此鮑公自聞訃後請於文正俟甯郡漸臻穩
固仍應奔喪回籍而文正終不許當西河等處旣捷之時
致鮑公書云新河莊水陽鎮金寶圩之賊不知已退去否

閣下趁此聲威將此一帶賊巢掃清與下游蕪湖金柱關各軍聯絡一直追至東壩將該處收復然後關閉門戶固守藩籬庶甯郡可以安枕前功不至盡棄若不趁此辦清閣下一離營賊卽蔓延於甯郡之左右前後矣金陵大營後路空虛舍弟亦求閣下急攻東壩庶幾金陵一軍安如泰山國藩俟風息卽回舟西旋在蕪湖少住望閣下前來會晤一商時文正又批鮑公牘云貴軍門急思回籍治喪自是人子至性惟前次欽奉

寄諭俟江南軍務大定再行奏請給假旋又奉

特恩賞賜福字 朝廷於貴軍門禮數甚渥屬望方殷本部堂實不敢代爲陳奏抑且不忍再爲竄陳貴軍門當強抑哀思勉竭忠忱暫時仍督師節節進剿以答 恩眷之隆趁此機會卽日進剿東壩占奪要隘庶皖南全局安於磐石金陵後路不久空虛九伐之功切勿虧此一簣李撫部院江軍門忠義三月間可由巢含進剿江浦九洲洲貴軍門若由東壩進孝陵衛則四月間金陵可以合圍此十年以來未有之機會何可錯過企望企望

三月鮑公移軍青陽進援江西景德鎮尋渡江援皖北軍次

無爲州石澗卑之圍立解進援廬江未至而賊已解圍西竄復進援六安

自甯郡肅清鮑公派何紹彩一軍守西河王可陞一軍守灣沚洪容海一軍守清弋江劉松山等軍仍分守甯國涇縣逐節布置糧路通暢曾文正公令鮑公進攻水陽鎮金寶圩直趨東壩抄李世賢之後路而黃文金胡鼎文大股以甯郡旣無隙可乘於十五日合竄青陽將由東流建德以入江西文正因檄鮑公暫回青陽要擊冀驅賊東返鮑公引軍赴援而賊已攜入江西彭澤鄱陽境內文正遂檄

鮑公由青陽赴援景德鎮以保江西完善之區文正與江西巡撫沈文肅公同奉十九日

寄諭甯國各逆西竄會國藩已飭鮑超回軍南陵青陽一帶截剿惟此時賊蹤已至東流建德鮑超一軍勢難繞至賊前如果江省防兵布置得宜到處迎頭堵剿後路得有鮑超勁旅跟蹤追躡當不難收夾擊之效乃鮑公正進兵馳剿而北岸各營告警蓋僞忠王大股自渡九洑洲攻陷提督李世忠營盤連陷江浦浦口兩城自江浦上竄分枝牽制廬江無爲州之兵初三至初七日圍攻石澗埠毛有

銘劉連捷營盤糧路斷絕文報不通文正不得已飛檄鮑公改旆渡江鮑公北援之師十六日抵無爲州正欲進勦石澗埠而賊已於十七日解圍去鮑公登舟仍回上游欲再踐赴援江西之約而文正以賊之大股並未退回巢縣悉銳上犯直撲廬江乃飛檄鮑公急登北岸先援廬江時文正奏稱江之南岸徽州與江西同警江之北岸下游與上游同警調度乖方艱危百出殊深憂灼奉

寄諭曾國藩現住皖省爲中權扼要其北自巢含舒桐以至英霍賊氛密布髮捻交乘又值苗沛霖復叛潁壽六安

逆練紛紛撲擾兇燄頓張金陵逆黨自九洲北渡聲言就食不卽擾及裏下河等處而直上和含且與捻苗各匪均相勾結殊恐賊之蓄謀故爲此包抄大舉勢將圍裹安慶以解金陵之圍曾國荃之軍逼城爲陣不能遽撤曾國藩所部桐舒守將僅能自固鮑超一枝勁旅往來策應兵力已不甚厚恐賊乘兵分備單之時麇集羣醜四面圍逼該大臣駐紮江汴實爲東南大局安危所繫南顧彌增憂念等語而鮑公血誠果毅志期滅賊進止一遵文正約束每聞朝旨忠憤填膺雖疲於奔命弗自恤也鮑公之自

樅陽登岸也各營歉餉過久途費缺乏部卒逃散一千餘
人文正因請於九江洋稅項下撥濟皖餉並參革倡逃之
將弁鄒慶星等鮑公之赴援景德鎮也文正以一路荒涼
無米可買專令李公榕駐建德爲霆軍照料米糧子藥等
件及檄鮑公改援皖北又覆李公書云計畫不精致霆軍
忽而東壩忽而江西忽而皖北舉棋不定良自愧也尋致
沈文肅公書云敝部派守南北城池至十六處之多佔住
兵力盡成呆著除鮑軍外別無大支游擊之師所爲全力
急解石澗埠之圍非僅慮毛軍覆沒亦以力保無爲裕溪

西梁山三處也幸而立解重圍鮑軍回援祁景總在一月以後等語及鮑公進援廬江未至而廬江之賊已解圍西竄二十一日圍攻舒城二十三日李秀成分隊衝至六安州二十五日至三十日疊次攻城勢甚危急文正以六安係淮南樞紐皖鄂要衝恐秀成與苗捻句合愈不可制檄鮑公由廬江往援限以四日趕到

四月鮑公至舒城六安之賊解圍東竄引軍追擊分兵會克巢縣親擊賊於清溪鎮大破之連復含山和州兩城皖北之賊全退

賊之攻撲六安也曾文正公并檄劉連捷等軍由無爲州往援乃鮑公之軍將至舒城而六安之賊遂於初二日解圍遁往廬州文正以賊悉數東竄並未西犯鄂疆卽屬大局之幸急檄鮑公由廬州追擊李秀成鮑公遂從柘皋進兵分數營以攻巢縣之北而劉連捷等從迎珠塔進兵以攻巢縣之南於二十二日克復巢城二十三日鮑公由柘皋督軍出清溪鎮擊賊大破之擒斬數千略地而東是晚蕭慶衍亦截尾賊於林台圩旋會劉連捷及彭毓橘等渡河前進二十四日與鮑公會師含山而賊已宵遁鮑公以

賊去未遠商同蕭慶衍等星夜往襲和州比入州境天甫曙也但見賊旗靡亂不絕於道而水師成發翔等已駛入和州港內城賊逃遁不及半聚壘中鮑公卽商同蕭慶衍等與水師環壘急攻賊大怖出壘乞降鮑公命盡釋脅從者而斬其頭目陸佑祥宋名安以徇於是各整部伍入城少息所獲遺穀甚多文正奏稱賊自北渡以來力爭要地堅踞數月意將西竄鄂省北犯淮甸掣動上游之全局冀解金陵之重圍茲於四日之內疊下三城從此進取江浦九洑洲不難翦其枝葉圖拔金陵等語並將出力人員擇

尤保獎文正於石澗埠解圍後致湘軍統將書云接吳長慶抄寄偽忠王書僕細閱之知其中有故作大言恐嚇亦有實係賊中主意賊稱曾某之兵守則有餘戰則不足此實忠酋確有所見之言蓋兩三年來除鮑春霆在豐城一戰外我軍從未與忠黨痛打一仗卽雨花臺石澗埠兩次亦皆僅能堅守故忠酋欺我全不能戰叮囑羣賊如遇曾某之兵一到卽與交鋒該酋自信戰有把握也若再不與痛打幾仗恐官兵愈疲賊燄愈長矣

五月鮑公督軍追賊而東與水師夾擊殲賊數萬收復江浦

浦口江北肅清因會克九洑洲僞城

北岸賊旣連不得逞折而東趨曾文正公方慮其竄犯揚州擾及裏下河鮑公與蕭慶衍劉連捷擬在和州息軍數日卽席捲東下乘其未定而殲之而賊因雨花台連破石壘恐曾公國荃大舉攻城又因崑山新陽旣克恐李公鴻章大舉圍蘇李秀成與諸僞王紛紛改圖議由江北返援近救金陵遠救蘇州於是天長六合來安等處次第解圍羣醜南渡浦口之賊棄城遁江浦賊詣鮑公營獻書乞降鮑公察知其詐於初九日會同劉連捷引軍疾進初十日

李朝斌道出金陵之水師由大江衝過先駐浦口以扼李秀成餘黨之未渡江者彭公玉麟楊公岳斌率親兵數營同入內河師次江浦而賊又聞風宵遁遂與鮑公會師將江浦浦口一併收復當二浦未復時曾文正公奉

寄諭鮑超曾國荃所派各軍連復巢縣含和已逼至江浦浦口其另股賊之竄至天長揚州者飢疲實甚著曾國藩督令鮑超等軍速克二浦絕賊過江之路則南北兩岸之賊勢成中斷各軍分投勦辦當必所向無前較易爲力也及二浦旣克我軍仍沿途追勦抄遏逃賊之前賊正竄併

九洲之上僞城之賊不納舟師截江圍擊賊不得渡霆
軍復從北岸蹙之賊蟻聚於濠汊蘆葦之中溺死者以數
萬計其飢啼江邊者皆攫又就戮彭公楊公乘勢督飭水
師疊克下關草鞋峽燕子磯三隘九洲在驚流急湍之
中高峙僞城陸師不能飛越三隘旣克十五日昧爽水陸
各軍兩岸並舉九洲之賊三路分伏以洋鎗悍隊伺間
出擊水師精銳折損甚多戰至晚成發翔彭楚漢等用火
攻越牆撲入聚殲羣醜無一脫者遂奪僞城獲大礮百尊
牛馬器械無算文正奏捷並將出力人員專案保獎俱奉

俞旨又奉

寄諭鮑超彭玉麟等水陸各軍由江浦浦口掃盪而前羣賊望風奔靡其勢頗壯九洲洲爲江中要地賊踞堅壘數年之久官軍此次攻克竟能敏速如此曾國荃業將雨花臺賊壘攻克茲九洲洲又爲鮑超等乘勢掃除金陵勢成檻穽其機大爲可乘應卽如何相機進擣及會商左宗棠李鴻章進攻蘇杭使賊應接不暇以圖進取之處曾國藩諒必成竹在胸

六月鮑公督軍渡江助圍金陵扼鍾山而軍尋因疫疾回駐

江干城賊撲營擊卻之

九洲既克曾公國荃商請鮑公合圍金陵楊公岳斌令蕭慶衍紮神策鳳儀門一帶以保鮑公糧路鮑公因以礮船濟師南渡曾公尋奏言臣金陵之營幾於不保蕪湖金柱關暨鮑超甯國之師亦瀕於危者半載至今年二月始得出險入夷方其存亡呼吸之際大局幾幾決裂未嘗不咎謀之不臧然去冬忠侍諸僞王悉力與臣及鮑超相持而滬浙兩軍遂得少紓兵力屢下名城現在鮑超一軍立營幕府山一帶與臣相隔四十餘里擬俟天氣清涼各營

病勢稍定鮑超卽進兵孝陵衛合圍金陵等語鮑公南渡
後在鍾山築營將竣正擬移紮孝陵衛以合金陵之圍旋
因自染暑瘧軍士亦疫疾大作死亡相繼恐前敵爲賊所
乘遂平毀鍾山營壘仍駐神策門沿江一帶時曾文正公
以金陵城垣太廣兵力尙單不宜遽求合圍恐大股援賊
至一隙可乘全局俱震因奏言江西未靖皖南孔棘鮑超
須調勦上游不敢令其遽爾合圍奏入奉

寄諭目下自宜廓清江西然後併力皖南規取金陵鮑超
自染暑瘧軍中疫疾大作死亡相屬朝廷甚深廬繫曾國

藩以鮑超須調勦上游不令遽圍金陵所籌甚是該提督一軍應調赴何路策應之處卽著曾國藩相機辦理李秀成之狼狽南歸也本意援蘇僞天王洪秀全強留之令與楊輔清李世賢等共守金陵聞鮑公兵至因於東北城外趕修石壘以圖抵禦又飛調黃文金胡鼎文賴文鴻古隆賢諸逆回援城賊時復伺隙出戰以圖一逞訶知遼軍正患疫疾於二十二日突分兩枝一出鳳儀門直撲遼軍右營一出太平門繞撲劉連捷營壘我軍轟擊賊負創遁文正覆左公宗棠書云軍士多病實用兵第一苦事微聞杭

嚴各軍與江西金陵諸軍多寡相等而霆營獨甚上年三次派人至湘募萬餘人旋募旋逃且病且死今又不滿七成其不病者則不滿四成外間多咎霆軍不應圍紮金陵以活兵置之呆地不知初渡江之際係厚雪沅霆四人乘機定議敝處甫接克復九洲之信時霆軍渡江已畢後之不能遽進孝陵衛速圖合圍又不能抽至皖南改爲活兵者則皆以酷暑多病之故等語楊公岳斌字厚菴雪謂彭公玉麟沅謂曾公國荃霆卽鮑公也文正尋又致沈文肅公書云鮑春霆卧病月餘其部卒病故極多舍弟營內

較去年病者稍少迭次鏖戰該逆洋鎗隊至八千之多不知天地戾氣何時可減目前金陵萬無得手之理等語鮑公自進軍金陵卽擬令降將洪容海入城謀內應屢次面商於文正文正以其計險不從

七月鮑公駐軍金陵江干

時曾文正公致鮑公書云貴恙近已全愈各營士卒病者日見輕減至以爲慰金陵米鹽菜蔬比前稍賤軍士日用之需少得便益則苦况亦減矣貴營紮城北離孝陵衛太遠難於施功必須從城南進兵庶幾糧路易通聞黃李古

賴等股皆將回援金陵貴軍至大勝關後先紮一不甚當
衝之地俾各營略得安閒待擊退援賊後再進孝陵衛可
也又覆左公宗棠書云沅霆二部今病不能戰者尙有四
成餘軍亦略相等弟現調霆軍仍由燕子磯渡回北岸再
由江北渡過南岸以備上援甯蕪之急上游無恙則再進
孝陵衛扼截金陵糧路

八月鮑公移軍援皖南未至青陽圍解

當鮑公進軍金陵時苗沛霖攻陷壽州臨淮危急曾文正
公覆楊公岳斌書云臨淮爲數省樞紐皖北根本一有疏

失 朝廷將責成國藩親赴該處或於閣下及雪霽三公
中派一人爲臨淮主帥皆屬意中之事等語南岸自湖口
肅清後江西賊黃文金等股七僞王悉數東趨遂略池州
圍撲青陽將大擾皖南以掣動金陵官軍之勢雖有朱品
隆劉松山易開俊劉典等軍防剿賊勢迄不少衰文正先
以彭公玉麟水師上援進駐銅陵至是復檄鮑公由金陵
上援青陽時金陵各軍新破上方橋二壘城賊水運已斷
而北岸苗逆日益猖獗

廷旨飭於南軍中抽調勁旅赴援臨淮文正奏言臣調鮑

超西上乃不得已之計方今滬軍正在得手之際本宜加
功於金陵收效於蘇郡分金陵之兵以救皖南已屬失算
若再遠救淮上所失尤大等語鮑公是時亦以力保皖南
支持危局自任力疾移師西上乃甫拔營而病又反復頗
爲沈重其軍由燕子磯渡至北岸又由大勝關渡至南岸
十日始渡畢又值陰雨連綿沿途阻水故不能遽到青陽
時文正覆李公鴻章書云青陽圍困數年所僅見江席二
軍不知能解此重圍否春霆病體漸愈日內可至蕪湖大
局或不決裂等語及鮑公之軍行至三山鎮而青陽之圍

已解

九月鮑公督軍由南陵進規東壩

鮑公師抵南陵擬由蕪湖進攻曾文正公令其先剿新河莊水陽鎮金寶圩之賊由建平直達東壩以東接浙師之氣北絕金陵之援十八日鮑公將有事於水陽而金柱關守將朱南桂乘勢襲博望鎮破其二卡七壘時僞奉王古隆賢通款於青陽守將朱品隆願以石埭太平旌德廣德四城獻品隆商請鮑公分任廣德撫局鮑公恐有中變令宋國永往察之而自督軍進仙人橋

十月霆軍攻毀東夏賊壘會克東壩偽城收復建平縣城降其眾數萬遂復溧水縣城

時曾文正公奉

寄諭著曾國藩卽飭鮑超等軍實力攻剿務將皖南各賊一律肅清不得任令回竄江西並會合浙軍力圖攻剿鮑公自上月進兵仙人橋將攻新河莊因浮橋未成不克卽渡而彭公玉麟楊公岳斌水師已於二十七日攻破水陽新河莊兩隘至本月初一日又連破塘溝等數隘並收復高淳縣城新河莊旣克尙有東夏四壘爲建平東壩之樞

紐初八日鮑公令馮標周有勝王衍慶等屯軍曹塘攻東
夏賊恃濠闊牆堅伏不出標摩壘而進手又悍酋有勝衍
慶率眾爭抽鹿角齊登一壘平而眾壘俱下於是東壩守
賊黎立新等請爲內應建平賊張勝祿等請獻城池鮑公
因令馮標任建平撫事而自率馬步十三營趨東壩見壩
上高峙三大壘壩後築有偽城橫亙數里正議分兵立寨
僞隨王楊柳谷馳告壘賊梗命楊輔清爲謀主乞速進兵
以踐黎立新之約鮑公卽令譚勝達李文益熊鐵生黃海
清孫得友等繞壘圍攻彭公楊公亦派隊向水路助陣戰

不逾時殲賊盈千賊多踰壘而逸者我軍乘勢將沿河賊館賊卡數十處一律踏平追殺三十餘里斃賊二千餘楊輔清從亂軍中敗往溧陽楊柳谷立獻僞城遂克東壩要隘鮑公於降眾中察出脅從者三千餘人悉遣散其老賊一律正法當東壩未克時曾文正公奉

寄諭東壩爲金陵水陸要衝廣德爲皖浙門戶與湖州毗連一經得手則賊之險要已失著曾國藩卽飭鮑超迅速攻克等語及東壩克而建平之捷書亦至自馮標入境宣諭張勝祿等十二人感激涕零矢志不貳卽於是日斬僞

跟王藍仁德舉城以降建平復而溧水之降書又至踞溧水者爲楊英清黨眾萬餘願繳軍械各散回籍十二日彭公楊公往受其降盡資遣之曾文正公併案保獎出力人員奏給降人楊柳谷張勝祿鄭魁武等十四人都守虛銜疏稱江皖接壤之區以東壩爲最要關鍵仰賴

天威震疊讐服羣酋旬日之間收取四城並奪東壩重險臣現檄鮑超全軍駐守東壩保此三省扼要之地卽爲附近游擊之師當黎立新等之乞降也彭公玉麟致書鮑公云茲有東壩一百一十天將黎立新功勳定天福明邦蜀

率頭目李爲樑李爲棟金大順等又隨王龍旂隊長譚體乾石興元等來稟投誠弟均批候霆軍抵壩辦理究不知該逆等真心向化否今特專三板將該逆投誠之稟送來尊處以便進兵辦理如其是真卽可免死如其詐僞卽行勦殺淨盡可也如吾兄東壩克復留重兵守之分勦溧水溧陽皆可迎刃投誠省得許多兵力請迅攻東壩爲要後又致書云辰刻派水師同楊軍門進東壩會合雄師勦撫兩施酉刻專弁回欣悉東壩已克所收之楊柳谷黎立新等不可設立營頭總宜遣散以免後累弟已有告示曉諭

如有精壯由尊處挑選分與各營可也弟作惡人一定遣散兄作好人暗收安插則免許多後患弟辦理高寤遣散事件一人不留當須數日乃能善後清楚始來東壩一行十一月十二月霆軍駐守東壩

自上月曾公國荃攻破金陵城東賊壘斷其糧路李公鴻章尋克復蘇州省城至是金陵官軍治地道轟城未克而李秀成自蘇州率黨二萬回援金陵奉

寄諭鮑超全軍現紮東壩此時溧水已復自應進取句容以斷忠逆救援金陵之路時鮑公察知廣德賊尙無降意

因牒請曾文正公派防各處以便霆軍進剿廣德文正批復後奏言忠逆近由金陵退竄句容潛入溧陽與侍逆合股意在分擾溧水建平奪我東壩一關並圖上竄東壩爲三省關鍵鮑超正須以全力爭此要區暫不能進取句容以合金陵之圍自句容而外論者又謂宜急取廣德肅清全皖扼賊上犯之路臣以廣德易取而不易守鮑超旣力扼東壩更無他軍可當廣德一路句容廣德之不能早爭先著實由限於兵力難以兼顧奏入奉

寄諭蘇常一帶軍情正在得手賊勢趨重丹句金陵意圖

奪圍上竄馮子材兵力苦單急盼鮑超之軍會攻句容而鮑超力扼東壩旣不能與之會攻又不能分攻廣德祇是相持局面日久終慮變生該大臣仍當於慎重之中力求出奇制勝之策方爲妥善鮑公復訶知侍逆將親率悍黨裹二十日糧蓄意由長興廣德一帶上犯江西先據產糧之地以俟忠逆續至因急謀文正籌防勦文正卽飛咨左公宗棠沈文肅公併力扼守以保上游完善之區十二月十二日鮑公接准議政王軍機大臣咨寄遞到年終恩賞福字一方大荷包二個小荷包四個銀鍍四錠銀錢

二枚奶餅五斤南棗三斤半荔枝三斤半藕粉三斤半百
合粉三斤半白蓮子一斤半掛麪二十把

霆軍紀略 卷六

三

霆軍紀略卷六終

霆軍紀略卷七

銅梁陳昌世五編輯

門人

吳樹棠
王澤全校字

甲子同治三年

二月鮑公駐軍東壩進規句容丹陽備剿金陵援賊

曾公國荃屯兵金陵將及兩年上月攻克鍾山僞天保城
因調派各軍分扼太平神策門城圍遂合至是用雲梯猛
攻未得手曾文正公以金陵圍師不滿五萬偪困數十萬
賊深慮窮寇衝突致蹈和張諸帥覆轍因留楊公岳斌暫

緩江西之行仍紮金陵江面以斷接濟而鮑公一軍駐扼東壩羣賊望風遠避久無戰事時江撫沈文肅公陳奏機宜文正奉

寄諭鮑超是否仍在東壩東壩固係入蘇門戶能否另易他將駐守而以鮑超之軍分路進攻俾賊匪首尾不能相顧著該大臣速籌辦理蘇撫李公鴻章奏陳力攻常州機宜文正又奉

寄諭曾國藩當檄飭鮑超東壩溧水防兵前後兜擊以期聲勢聯絡文正因令鮑公分營進取句容丹陽一帶尋致

鮑公書云聞僞忠王以血書求援於湖州賊目侍堵等逆侍堵許以三月間來援金陵舍弟所部分紮百餘里汎地太廣圍城賊則有餘打援賊則不足如侍堵果來務望閣下妥慎禦之如句容已克則請閣下親駐句容一以防侍堵來援之賊一以防克城後大股衝出之賊句容最爲扼要之區侍堵來時無句溧兩處駐足斷無能久之理閣下雖不打援賊而舍弟軍已受福矣若句容未克則貴軍仍須回駐東壩侍堵來時應請閣下帶行隊至溧水等候賊撲舍弟之後閣下卽抄賊之後亦如在高祖山時出行隊

打涇縣也敝處札萬方伯爲貴軍辦米萬石閣下可派員至泰山守催以期迅速

三月鮑公督軍攻破三岔賊卡克復句容縣城生擒僞王項大英方成宗遂克寶堰賊壘收復金壇縣城

句容踞逆僞守王方海宗聞鮑公之軍將至在金壇寶堰等處糾結項大英方成宗兩大股同守句容以拒初五日鮑公親督各營冒雨疾馳行過溧水攻三岔賊卡破之初六日軍次距句容十里之塔岡正修築營寨城中突出三四萬眾密布山岡將乘我立營未定悉銳猛撲鮑公卽令

周有勝王衍慶鄭德亮等七營直前迎敵而以宋國永帶
領譚勝達易昌煥段福唐仁廉等八營攻其左以馮標帶
領劉順隆何田玉李文益孫開華等八營攻其右搏戰至
數時賊不稍卻鮑公令黃海清唐得勝閃連陞劉得勝蔣
魁南等各率騎隊分兩路直抄賊後而以襲雲慶步隊佐
之賊見歸路將斷大譁欲遁我軍且戰且進逼近城下殲
賊數千附城四壘之賊相顧錯愕一閔散走鮑公料城賊
膽落利在速圖乃飭各營徹夜環攻漏至四下忽見城東
一角火光燭天知內變已作急引軍東向而賊已啟南門

傾巢衝出諸將士乘勢截剿斬馘尤多並縛二酋以獻俄有內應之翟本邦等七人叩馬通報指擒賊而言曰此僞翰王項大英僞烈王方成宗也鮑公遂於初七日黎明率軍入城生降五萬餘人悉遣散之檻送二酋至安慶經會文正公訊明正法寶堰者距句容四十五里南通金壇北達丹陽有五堅壘在焉句容逆首方海宗遁至此與壘賊僞顯王袁得厚合謀阻進兵之路初九日鮑公率隊前往摩壘而攻賊但穴牆施礮堅閉不出是夜鮑公派婁雲慶唐得勝等潛伏壘下又派馮標鄒連陞胡良作等五路併

進萬鎗齊發賊漸不支各軍負草填濠爭躍入壘一壘旣破眾壘盡亂壘中逸出之賊又經伏兵掩殺蹙逼入河者無算海宗得厚遁走金壇丹陽奪獲大礮二十一尊礮船旗幟多件文正奏言句容一城與金壇丹陽鼎足而三實爲金陵之左輔鮑超率師進剿一戰克之並執二僞王毀五賊壘而金陵亦有日孤之勢裨益全局厥功甚偉奏入奉

上諭賊匪踞守句容縣城負隅抗拒提督鮑超督兵進剿立將句容縣城克復其實堰賊壘復經鮑超率隊攻破剿

辦甚屬得手所有尤爲出力之總兵馮標譚勝達唐仁廉均著交軍機處記名遇有提督缺出請旨簡放周有勝易昌煥李文益均著賞加提督銜王衍慶劉順隆張玉田均著交軍機處存記遇有總兵缺出先行提奏參將黃海清著以副將仍留安徽儘先補用並賞給彥勇巴圖魯名號副將孫開華著賞加總兵銜並賞給擢勇巴圖魯名號陳永康羅運昌均著無論四川推題副將缺出先行補授羅運昌並賞加總兵銜段福著遇有副將缺出先行補授並賞加總兵銜參將唐得勝著以副將儘先補用並賞加總

兵銜游擊洪容海著以參將儘先補用並賞加副將銜其餘在事出力員弁准其查明彙案保獎陣亡知府田芬參將陽茂泰都司易新勝黃昌陳光謨守備向忠國均著從優議卹鮑公以降人翟本邦張宏發楊文明龔福全張明道張志寬童得勝潛爲內應冒險圖功牒文正奏給守備虛銜時馮公子材奏陳進規丹陽機宜文正奉

寄諭句容與丹陽互爲犄角此次鮑超督軍進逼一戰而下堅城勦辦甚爲迅速深堪嘉尙該軍出力人員及鎮城會剿之軍著曾國藩查明彙案保奏惟句容餘賊竄往何

處未據馮子材等奏明著飭鮑超速行追剿丹陽之賊此時必聞風喪膽攻剿更易爲功曾國藩卽檄鮑超移得勝之師直擣丹陽使該逆不遑喘息富明阿卽飭該總兵與鮑超之師南北夾擊迅圖攻拔勿稍遲延賊之分踞金壇丹陽也計與常州相犄角丹陽一路有富明阿公及馮公會軍進攻之其金壇一路灌濠成河自西洋村以達城根凡隔小河數十道十二日鮑公親督所部渡河競進將壁於城下俄得馮公書以丹陽賊勢綦重乞移師助剿鮑公卽派婁雲慶周有勝等率馬步七營留住金壇城外而自

率十四營暫回句容十六十七等日金壇之賊擁眾出城
疊撲我營雲慶力戰卻之鮑公回句容後接馮公催剿丹
陽之書又奉文正力保東壩之檄十九日乃飛馬傳知金
壇城外各營盡行撤回句容以備分援二處之急鮑公甫
傳令轉念金壇撤營之時恐城賊追攝我後或致疏失乃
親率各營偃旗息鼓於二十日折回西洋村備擊金壇出
巢之賊遂於後茅山一帶面面設伏令周有勝曹志忠等
四營伏茅山之左而以黃海清劉得勝等騎隊左之令唐
仁廉李文益等四營伏於茅山之右而以婁雲慶熊高望

等騎隊佐之金壇逆酋盛明友聞官軍撤隊卽糾城賊二萬餘眾悉力窮追過茅山正向田隴村落間迤邐而進鮑公揮令張玉田羅運昌張遇春楊友益等突出中路賊以洋鎗小隊蜂擁來迎遇春於羣子如雨之中衝入賊隊賊爲披靡鮑公催動號鼓伏兵四起旌旗滿山海清得勝等驅馬入陣截賊數段雲慶亦率高望等從山後抄出橫斷歸路賊倉皇失措棄械滿道各軍追殺五十餘里逼至金壇西門敗賊不敢進城而城賊亦啟南門急向三仙關遁走我軍正跟蹤追勦間乃丹陽小路出賊一股自北而南

循西洋村以至店埠連互不斷勢將出我後路鮑公傳知各將士暫不入城分軍縱擊賊受重創竄遁據獲賊供此常州城外敗匪取道丹陽欲由建平廣德以上竄者也鮑公於是揚隊西洋村以備續至之賊一面移軍金壇文正奏言金壇雖彈丸小邑而旁接丹陽內蔽常州亦賊所必爭之地鮑超因調隊暫回句容恐城賊躡追爲其所乘引軍設伏計破此城不特常州丹陽輔車失依卽金陵老巢愈成孤立實屬有裨大局奏入奉

上諭此次官軍進攻金壇誘賊出戰收復縣城剿辦甚爲

得手仍著將敗殘餘匪迅速殲除毋任竄逸游擊張遇春
馳入賊陣奮不顧身著以副將儘先補用其餘出力員弁
兵勇卽著彙入東壩句容各案查明保奏其力戰陣亡之
參將鮑昌齡都司宋連陞王正禮均著交部從優議卹金
壇甫克文正奉

寄諭金壇一城已爲鮑超攻拔丹賊更必聞風喪膽著曾
國藩卽飭該提督迅移得勝之兵與鎮揚各軍會攻丹陽
以期迅拔兩邑連下常賊之勢益孤攻剿更易得手

四月駐防東壩之憲軍截擊丹陽竄賊大破之

句容金壇旣克鮑公自駐句容而以部將譚勝達分統東壩防營乃丹陽經馮公子材等克復敗賊僞顯王等糾餘黨三四萬眾分股圖犯東壩高滄十三日鮑公引軍自句容出溧水正欲馳諭譚勝達等率東壩各營先勦大頭山一股仍親督騎隊專勦漆橋一股行抵漆橋而賊已合股併向東壩一路十四日譚勝達商同鄧訓誥李文益曾成武黎光照等營蓐食出隊天未曙也少頃師次安興遙見山谷中賊旗林立若遠若近迎面撲來諸將士奮勇直前然鎗環擊賊乃全無怯志前股少卻後股繼至往來猛鬪

十餘次更以賊馬分兩翼抄出勢益剽悍勝達於敵騎衝突之際橫躍入陣徑取中路抽刀疊刺立梟數首賊氣爲奪吳雲集見中路搏鬪方酣卽以所部向左路大呼疾馳左脇已受重傷猶復與成武麾兵疾進截賊數段乘勢追過右路而右路聚賊尤眾洋礮排列擁護一酋各弁勇指曰此渠魁也訓誥策馬當先突出斬之中左兩路之賊奔走不及譁亂欲遁適文益從山後掩至光照亦節節掃蕩而來各營會合併力長驅勢不可遏甘逆顯逆率悍黨在高岡督陣正思折隊反走不料我軍颺馳電掣一擁卽至

亂鋒交下死者山積賊乃大潰軍士踐尸而過逐出三十里外始各回軍下壩旋有股匪來自漆橋適與我軍相值不敢尋戰捲旗急行悉向湖州廣德竄去是役也以少勝眾斃賊約七千人中有僞王以下酋目十七名曾文正公奏言丹陽各賊股意在衝出東壩由皖南併竄江西經鮑超飭令譚勝達等督軍痛剿雖未能悉數殲除而下游多殺一賊卽上游少竄一賊挫此兇鋒亦屬有裨大局在事出力員弁請附東壩句容各案優保陣亡及前案續查人員開單請卹奏入得

旨嘉允

五月鮑公督率全部由蕪湖拔營上援江西請假回籍葬親
詔慰留之

數月以來蘇浙郡縣疊報克復杭州省城亦於二月內經
左公宗棠督軍克復於是兩省之賊先後由徽甯上竄江
西計將取上游遠勢以掣動全局卽以援救金陵曾文正
公於三月下旬已奏調鮑公率師上援以句容東壩無軍
換防未卽起行文正檄令趁勢會剿丹陽於是有四月十
四日之捷文正奉四月初七日

寄諭鮑超全軍是否業已拔營著曾國藩檄令迅赴事機
與江西官軍前後夾擊痛加剿洗時髮捻巨股已竄過隨
州棗陽逼近黃德二郡將與江皖之賊聯成一氣文正奉
四月十八日

寄諭鮑超一軍自攻克金壇後該處敗匪全股殄除現在
常丹兩城已克鮑超一軍自可騰出移援徽郡或卽令渡
江北防剿潛太英霍桐舒一帶三十日又奉

寄諭皖北兵力甚單事機緊急著曾國藩卽檄令鮑超統
率所部迅速前往楚皖交界地方嚴密遏堵文正奏言目

下賊情以江西爲最重而江西之待援實比皖北爲尤急
鮑超全軍不宜改援皖北致辜江西軍民雲霓之望奉

寄諭著催鮑超迅率所部馳援江西毋再延緩時沈文肅
公覆鮑公書云雄師連復名城生擒巨逆欽佩曷有涯量
江省軍情本日又探聞沙溪一股業已渡河果爾則需救
援甚急江省別無他望延頸帥旌日夕以冀而已左帥派
援之安武軍四營已抵沙溪湖州未復湘克等營能否遠
來未可知也文正致郭公嵩燾書云金陵逆首堅忍異常
本無糧盡確信竄江之賊人數不少蹂躪將徧敝處各軍

江西各軍絕少良將勁旅無一人能制此散漫之賊此時局之最可慮者現調春霆馬步萬六千人上援江西少荃已派軍接防東壩旬容霆軍於五月內當可到江等語是時軍中欠餉甚久文正致李公鴻章書云餉絀異常爲近數年所未有霆營尤有立見譁變之虞又復富明阿公書云此間餉項奇絀積欠至十八九箇月不等名爲金陵各勇月支四兩二錢霆軍月支四兩實則自去年以來從無一月支至二兩者間或一月並未支得一兩霆營轉戰南北尤爲窮苦貴部在丹陽等處與霆軍互相往來當可得

其大略等語文正以霆軍援江程途二千餘里須得一月
滿餉乃可行因商之李公由上海措銀十萬兩資鮑公途
費次第解到鮑公遂於五月初六日督率全軍由蕪湖啟
行沿途阻雨十七日軍至九江尋接沈文肅復書云迭奉
兩函知旌節十九日抵湖部曲直向豐城台旆定於二十
一日由水路晉省闔省官民同聲欣忭承囑飭各屬毋庸
致送酒席仰見清風亮節體恤逾恆曷勝欽佩謹囑首府
函致各屬矣聞二十二日繼果營於金谿之許灣中伏挫
退云云初文正致范公泰亨書云收復東壩是此間最適

意事而甚不適意者江軍門病極危險楊鮑兩軍門堅請回籍皆有礙於大局不勝憂灼等語謂江公忠義楊公岳丈及鮑公也鮑公於三月初旬乞假文正致湘撫惲公世臨書云春霆丁艱請假屢次允許而屢次展期此後恐難再展而金陵之能否倖了又覺茫無把握中心耿耿如負重疚等語其時左公宗棠已疏薦楊公督辦江西軍務而文正則尙未檄鮑公赴援江西也至是鮑公拔營赴江文正仍據情代懇以踐前言於十二日奏言鮑超於同治元年十一月間訃丁母憂時值皖南全局震動鮑超獨當一

路斷難離營經臣奏奉

諭旨俟江南軍務大定再由臣奏請給假回籍營葬鮑超
一聞成命悲不自勝仍復公牘私函再三申請臣與之期
約俟攻克西河灣止保全甯郡必當代爲陳奏上年二月
臣巡閱沿江營伍行次裕溪口鮑超迎謁舟中以西河灣
止並復甯郡肅清請踐前言情辭迫切聲淚俱下並稱臣
與胡林翼李續宜三人丁憂俱得邀恩離營回籍治喪
超母鞠育之苦迥異尋常懇爲援例聲請俾展孝思等語
臣多方撫慰又與之期約待攻克東壩後始行具奏十月

間水陸諸軍奪取東壩一關而乞假之文旋至臣復婉辭
批答屬其暫留五箇月勉扣一時哀慕之忱以待金陵大
勦之集如金陵逾期弗克亦必專疏籲求 恩准給假歸
營葬事今年三月初間五箇月之期又滿鮑超復以悽詞
苦語懇請代奏臣查該軍赴援江西斷非一蹴所能了事
前次節節爽約致其家奄柩在堂久不克成歸窆之禮至
此而再失信於鮑超竊懼此後之號令不復能示信於諸
將矣目下江西軍務喫緊本不應奏請離營惟鮑超部將
如宋國永馮標婁雲慶諸鎮皆相從十年之久其餘驍將

尙多足資勦辦頃奉

諭旨派楊岳斌督辦江西軍務鮑超係其舊日部曲卽令楊岳斌統率該軍以行必可指揮如意合無籲懇

天恩俯念鮑超苦戰功多賞假四個月飭令暫回四川本籍俟營葬事竣卽回營俾展人子烏私之誼彌彰

聖朝孝治之隆奏入奉十九日

上諭前因曾國藩奏浙江提督鮑超聞訃丁憂當經明降諭旨無庸開缺改爲署理俟江南軍務大定再行給假回籍營葬茲曾國藩復據情代奏懇請賞假回籍葬親等語

情詞肫摯出於至誠原應勉如所請惟念鮑超自轉戰江皖以來勇略過人所向克捷爭關奪隘屢保名城現因賊竄江西復經曾國藩檄令率師往援江皖軍情緊急雖經簡派楊岳斌督辦仍須該提督合力剿賊方可迅奏膚公鮑超著毋庸給假回籍加恩賞銀五百兩由四川藩庫給發交該提督家屬祇領經理葬事鮑超務念移孝作忠之義勉抑哀思專意剿賊俟金陵克復江皖肅清再行賞假回籍以遂孝思朝廷破格奪情本屬萬不得已之舉該提督其勉力圖功毋再瀆請又奉

寄諭鮑超謀勇兼著屢立奇功爲江皖諸軍之冠此時金陵功在垂成現今該提督赴援江西事機至迫自未便遽易生手本日已明降諭旨命鮑超俟金陵攻克江皖肅清再行給假並賞銀五百兩經理葬事曾國藩當傳諭該提督移孝作忠奮勉勦賊不得再有竄請四川總督駱文忠公奉

寄諭曾國藩奏鮑超懇請給假回籍葬親而江西軍務正在喫緊該提督斷難離營已明降諭旨賞銀五百兩由四川藩庫給發交其家屬祇領經理葬事此項銀兩著駱秉

章飭知藩司遵照諭旨辦理鮑公未入江境接沈文肅復書云續奉大咨有賦旋之議伏思台端性成純孝松楸之感刻弗去懷弟何敢固作不情之請第念江西士庶如溺如焚但得大纛親臨則羣逆震於先聲必望風而靡所以遲台端回籍之期者不過維月而獲再生之賜者奚啻百萬生靈謹懇俯念災黎稍緩歸程以慰眾望是時霆左霆右等營之留湖北者經官文恭公督令隨同石清吉等於二十日以後迭次擊賊於麻城之舊街柳林等處俱獲勝六月鮑公擊賊於秀才埠獲勝進軍撫州

鮑公於初四日行抵江西省城適奉到奪情

恩旨哀感涕零誓立清羣醜以圖報稱卽於初九日出省督軍十七日由豐城拔赴橋東而以譚勝達統帶數營暫留豐城爲後路聲援適花旗廣匪從南豐來援崇仁訶知鮑公將取道秀才埠進撫州因於秀才埠層層設伏以待分股出閒道撲犯豐城以牽綴譚勝達之兵使官軍彼此不能相顧秀才埠一名相公嶺鮑公督軍至離嶺里許見嶺上賊旗林立前部各營已陸續踰嶺深入賊伏之中鮑公正諦視間吶喊聲鎗礮聲相間大作蓋近路伏賊已與

各營接戰矣鮑公卽率親兵數百舉旗登嶺賊見鮑公親至已接戰者奪路狂奔未接戰者望風爭潰數十層伏賊獸駭鳥散不復成伍鮑公揮軍追截擒斬近十敗賊遁歸崇仁先是鮑公由豐城拔營時賊卽詭爲銅鼓營官兵來爲霆軍作鄉導鮑公疑之旣念卽有詐可臨機應變也因於踏平賊伏後督隊倍道回援豐城賊至豐城正排隊擬與譚勝達接戰瞥見鮑公旗幟驚曰何其神也一鬪散走是役也賊計甚狡而霆軍於分隊遄行之時遇伏不挫轉獲大勝兩面兼顧動無失策威名因以益彰賊從此益畏

鮑公不敢輕於嘗試矣自鮑公出省進兵江西各軍聲勢
爲之一振十七日韓進春進勦金谿出擾之賊二十一日
王德榜王開琳進偪東鄉迎擊撲營之賊俱有斬擒鮑公
於二十五日督軍至撫州察看形勢而金陵先於十九日
經曾公國荃督師攻克捷入曾文正公蒙 賞加太子太
保銜錫封一等侯爵世襲罔替曾公國荃蒙 賞加太子
少保銜錫封一等伯爵均 賞戴雙眼花翎其部將得封
爵者李臣典一等子蕭孚泗一等男均 賞戴雙眼花翎
同日奉

上諭軍興以來各路統帥疆臣公忠體國共濟時艱督飭官軍掃穴擒渠將各路逆氛次第掃蕩江甯賊勢日孤卒就殄滅現在紅旗奏捷東南軍務即可從此底定良由各該統帥疆臣不分畛域同心剿賊調度有方允宜特加異數以沛殊恩浙江提督鮑超前在江楚屢克名城肅清江西轄境及隨征東下疊克青陽甯國府石埭太平涇縣及西河等隘並復江浦浦口九袱洲本年克復東壩句容金壇等處使江甯蘇常之賊不能聯爲一氣厥功甚偉著加恩賞給一等輕車都尉世職楊岳斌鮑超此次雖已加恩

仍俟江皖肅清同膺懋賞有厚望焉時楊公已由提督改授陝甘總督此次蒙 賞給一等輕車都尉世職賞戴雙眼花翎並加太子少保銜自鮑公與楊公外僧忠王官文恭公駱文忠公李公鴻章彭公玉麟都興阿公富明阿公馮公子材魁玉公吳公棠等十人俱蒙 賞敘有差鮑公函賀文正並請代奏謝 恩文正覆書云閣下前敵多年肅清數省每遇大股悍賊狂風駭浪悉賴貴軍捍禦化險爲夷固宜 天語褒嘉賞延於世而 諭旨特將此次雖已加恩仍俟江皖肅清同膺懋賞之處 溫綸宣示尤爲

非常之榮企祝曷已國藩謬踐戎行德薄能鮮全賴閣下
與彭楊胡李諸公維持一切實因人以成事敢貪天以言
功乃叨 朝廷逾量之恩更承僚友過情之譽寸衷深抱
不安湖州廣德克復後餘賊數萬仍圖竄江貴軍宜留駐
撫建備勦此股已於公牘批答時文正又批鮑公牘云貴
軍門忠孝性成戰功卓著疊蒙 寵賚殊恩罕有倫比恭
繹六月二十九日 諭旨可見 朝廷相信有素於貴軍
門多年勞苦忠勲一一注記初不藉另有薦章也尙望誠
以愛民謙以接物公以馭下庶幾集思廣益無愧名將之

風先是楊公岳斌奉初二日

寄諭該督於五月二十七日起程取道安慶上駛著卽兼程前進會同沈葆楨督飭各軍將崇仁貴溪等處賊股次第剿除其鮑超一軍前據會國藩奏已抵九江將繞出樟樹鎮迎頭遏擊並著該督與鮑超之軍互相聯絡會同夾擊以期盡殄逆氛及楊公以霆軍先剿崇宜等情入奏奉
二十七日

寄諭侍逆李世賢自力攻撫建不下橫踞崇仁宜黃與南豐沛逆聯爲一氣以竄撫建西路康聽兩逆蔓延金谿東

鄉以窺撫建東路漸成長圍之勢侍逆著名兇悍金谿東鄉南豐之賊耽耽環伺恐其以金陵巢穴已覆將圖踞有撫建以爲喘息之謀此時進兵要著自應先從崇宜下手擣其要害使該逆長圍旣破則東西兩路無難迎刃而解楊岳斌現檄鮑超一軍由瑞州改趨宜黃鮑超所向克捷卽著飭令該提督悉銳星馳實力猛攻期於必得並著楊岳斌沈葆楨飭令兩路官軍同時並舉以期一鼓殲除掃清腹地

七月鮑公督軍擊賊於許灣大破之平賊壘七十餘座尋克

復金谿縣城僞王陳炳文以六萬餘眾降尋克復南豐新城
兩縣江西東境肅清

賊之占踞許灣者爲僞康王汪海洋大股鮑公抵撫州後
見賊自雙鳳嶺以至洋洲高直連營至許灣縣互五十餘
里更於外周築長牆環以深濠牆上密排鎗礮濠外廣布
梅花椿守禦十分嚴密初一日鮑公進軍七里崗逼近雙
鳳嶺堅修營壘相定地勢於初四日五鼓調派各軍分路
環攻逆眾亦出大隊排列長濠我軍冒險直前極力猛撲
先將雙鳳嶺賊壘踏平並將琉璃崗九子嶺北岸林神嶺

等處賊壘以次踏毀赤橋突出伏賊萬餘周有勝等三路抄擊乘勢攻毀尙莊賊壘張玉田亦拔許坊賊營許灣等處復出悍賊二萬餘人鮑公督飭周鵬舉等前後夾擊將賊衝爲數段賊乃大敗各軍四面掩殺匪黨死傷枕藉隨將苦竹中洲洋洲高許灣賊壘一概削平我軍追殺十餘里日暮始行收隊共斃賊萬餘人生擒千餘內有僞東平王翟天鳳等賊首十一名悍賊三百餘名救出難民無數鮑公之突取雙鳳嶺也賊然大礮抗拒鮑公親率勇士從礮雨中拔梅花椿填濠毀牆而入縱火焚其一壘各處壘

賊悉出抵禦鮑公喜謂諸將士我已深入長圍賊若據壘各自爲守則我進退失據坐困堅壁之下矣今如此破之易耳乃分軍爲數道使各擇利迎戰步步進攻當者盡靡然賊眾數倍於官軍前雖敗如摧枯後復來如潮湧一望無際接續不窮我軍勇氣百倍無不一以當百轉戰而前勢如破竹自寅至酉血濺征衫屍積徧野共毀許灣周圍一帶數十里賊壘七十二座軍械積成山阜賊之分踞金谿東鄉者爲僞聽王陳炳文大股初十日鮑公率隊進攻金谿行至長岡鋪見近城之楓山鋪賊壘十五座兩旁山

岡排列賊隊城賊接踵而出陣於山谷鮑公令唐仁廉等督率步隊分三路齊衝山岡另用馬隊包抄鏖戰二時之久逆眾大敗我軍直壓楓山鋪將十五座賊壘一律踏平乘勢直抵北門城根城上礮石如雨各將士勇氣百倍冒險進攻周有勝等將北門外賊壘七座踏毀王衍慶等由東門斬關而入賊遂從南門出竄婁雲慶等追殺十餘里餘匪望瀘溪遁去於是日戌刻收復縣城是役斃賊五千餘擒獲長髮老賊二千餘內有僞成天豫莫自成等賊首九十八名拔出婦女三千餘人奪獲大礮三十六尊劈山

礮抬鎗烏鎗一千三百餘桿羸馬五百餘匹旗幟器械萬餘件炳文先已懾於許灣之戰至是膽益寒率黨乞降鮑公納之於是收復東鄉縣初楊公岳斌旣奏定霆軍宜先勦宜黃而鮑公則謂如此進兵恐許灣之賊圖襲其後須先掃蕩庶無後顧之虞藉通撫建兩郡之氣且悍賊聚於許灣老巢許灣破則各路之賊勢將瓦解楊公從其議於十一日奏陳調度機宜奉

寄諭康逆聚悍黨於許灣以爲崇仁聲援著檄令鮑超由撫州先勦許灣以孤賊勢楊公之入奏在克復金谿之明

日許灣捷後之六日也十四十五等日鮑公分遣將領剿捕金谿山內餘匪復擒斬大小頭目五百餘名斃賊數千初李世賢等股堅踞崇仁宜黃兩縣劉公典周公寬世各軍與之相持久不下自鮑公攻破許灣進規金谿各賊股相率南竄官軍乘勢於十一十二等日收復兩城楊公沈文肅公先後奏稱鮑超督率勁旅直擣許灣剪除巨逆崇東之勢已孤劉典等亦連日苦戰遂得克復城池各軍冒暑攻勦力摧大敵勞苦異常厥功甚偉又云鮑超一軍甫經掃平許灣賊壘不數日卽進攻金谿先掃逆壘立拔縣

城實屬非常勇敢卓著戰功奏入奉

寄諭江西各股賊匪分踞金谿東鄉宜黃崇仁南豐五城
不數日間已克其四鮑超於削平許灣後卽進攻金谿破
數萬賊眾如拉朽摧枯實屬勇敢異常戰功卓著著楊岳
斌沈葆楨傳旨嘉獎仍飭各軍乘勝進攻南豐以期一律
掃蕩又奉

上諭提督鮑超一軍攻克許灣賊壘並劉典等軍會同克
復東鄉崇仁縣城辦理均屬得手所有出力員弁著楊岳
斌沈葆楨擇尤奏請獎勵其單開攻剿許灣崇仁陣亡之

游擊楊維慶等四十六員弁均著交部從優議卹其鮑超
一軍自掃清許灣後不數日卽進拔金谿實屬奮勇可嘉
此次出力員弁並著楊岳斌沈葆楨一併擇尤請獎陳炳
文之乞降也與其黨偽甯王張學明偽樊王陶金會等於
十一二等日三次遣炳文之弟陳報林具稟投誠稱伊等
前被廣西賊匪所擄並非甘心投賊因康逆汪海洋平逆
翟天鳳有眾十餘萬人致被欺伏屢欲投誠均爲攔阻今
汪海洋賊壘被毀翟天鳳就擒伊等喜無阻滯具稟投誠
懇請寬其既往部下人眾尙有六萬洋鎗隊七千餘人等

語鮑公以炳文等敗伏山谷一經進剿勢必遁走福建擾害鄰疆旣據悔罪投誠情詞懇切應准免罪遂派總兵洪容海前往飭令薙髮並將炳文投誠之稟飛呈曾文正公奏入奉

寄諭聽逆陳炳文率眾求撫自是懾於軍威惟黨眾人數太多安置遣散均不易辨楊岳斌當督飭鮑超查看真偽妥籌辦理不可稍涉大意楊公沈文肅公尋奏言鮑超轉戰數省頻摧巨寇收撫降眾威信素著降人陳炳文等悔罪投誠深明順逆情實可原自應寬其旣往予以自新使

他股逆眾聞風向化經臣等咨行鮑超妥爲辦理並委員
會同查造降眾籍貫清冊發給護票分別遣散奏入奉
寄諭陳炳文等投誠旣屬真心悔罪自應准予自新楊岳
斌等當傳知該降眾等俾知感奮圖功如續有勞績仍准
保獎但其人數在數萬以上概予遣散後患必多是否酌
留效力未據聲明其洋礮等件會否呈繳均著飭令鮑超
等妥爲經理又奉

上諭陳炳文著賞給參將銜張學明陶金會陳報林均著
賞給游擊銜均准留營効力鮑公自受陳炳文之降卽已

挑留精銳六百人命炳文管帶隨營自効與酌留効力之
諭旨適相符合崇仁收復後餘賊悉走南豐歸併偽沛王
譚逆一股十三日鮑公在白桿村收降計乘各路之賊驚
悸未定分派各營出不意剿之卽日唐仁廉等由珀玕三
江港口搜剿瀘溪賊踞山列陣以待仁廉率同吳雲集曾
成武萬守根黎光照等營包抄掩殺大獲勝仗斃賊一千
七百餘人生擒一百二十餘人一路搜剿而進敗匪向新
城竄去瀘溪縣境一律肅清其竺油亭坊譚市街洪木街
一帶賊館賊卡於十七日經各營一律掃蕩斃賊四千餘

名生擒千餘奪獲騾馬七十餘匹旗械無算其進剿南豐之馬隊於十七日偪其城時江軍董德春魏高勝各營已至分攻西北東北各門未得手及見霆軍馬隊馳至各營氣勢一振十八日黎明出隊馬步齊進賊於東北兩門列陣我軍三面抄擊賊勢大潰城外之賊繞城逃竄城賊由西門擁出各營縱橫截殺斃賊無數敗匪一竄廣昌經王昌全等追剿一竄河東爲霆軍馬隊殲斃殆盡捷聞諭旨嘉其勦辦得手十九日進剿新城丁太洋已率悍賊布滿山谷唐仁廉等分路齊進轟擊兩時之久殲斬悍黨

多名追殺十餘里突遇伏賊萬餘敗匪遂卓旗回抗曾成武等愈戰愈奮賊勢不支伏賊亦潰是日丁太洋厚集悍黨層層設伏我軍以少擊眾所向無前先後斃賊四千餘人時鮑公馳抵建郡探知僞利王朱興隆業已逃竄二十日親率馬步各軍進紮上塘墟二十一日將大洋渡賊卡漢源鋪中田一帶賊壘全行削平追至距新城十里之甸泉天晚因不便立營收隊回駐中田夜四鼓偵知城賊將遁卽督催各軍馳至由西北兩門進攻而賊適啟南門遁走鮑公督令各營乘勢追過永臨橋王店木勺山沿途斃

賊甚眾計兩日共斃賊六千餘人斬僞祥王黃雲龍於陣
生擒長髮老賊八百餘內有僞天將陳玉林等大小頭目
八十三名奪獲鎗械騾馬無算新城旣克鮑公訶知朱興
隆帶傷走閩境旋分數股闖入張村橫村圖與前路敗匪
相合因卽督飭唐仁廉吳雲集等於二十七日乘勝進剿
將張橫二村賊卡一律掃蕩追殺四十餘里直抵長山餘
賊棄械奪逃計共斃賊三千餘生擒五百餘內有僞中天
安檢點師帥陳雲明等各頭目十數名於是江西東路肅
清楊公沈文肅公奏言江省自撫建各屬疊遭蹂躪各軍

累月血戰苦與賊持幸提督鮑超許灣一戰摧強寇十數
萬羣逆膽寒各城次第攻克又經鮑超收降陳炳文六七
萬眾疊克金谿南豐新城賊燄頓衰相率西遁自應席全
勝之勢期於殲盡又奏言汪海洋與黃雲龍朱興隆等逆
經鮑超大戰四次賊始敗遁現踞瑞金縣境鮑超所部自
抵江以來連次血戰營官多受重傷卽令暫駐建昌藉資
息養既可防瑞金各匪被擊四竄並可堵截湖郡逆眾西
竄等語奏入奉

寄諭鮑超探知康逆汪海洋與利逆朱興隆等麇聚新城

遂親率馬步各隊奮力克復又復追剿大勝陣斃賊目甚多在事尤爲出力各員著擇尤保奏陣亡都司陳明德等二十七員均著交部從優議卹汪海洋等在新瀘等處經鮑超追擊四次敗遁現踞瑞金縣境該縣通會昌大路著楊岳斌等飛飭席寶田王文瑞兩軍兼程前進毋任再有他竄皖南之防最爲緊要楊岳斌等已派劉典率所部暨王開琳等營同赴徽甯擇要扼守該處本有防兵現在洪幼逆等仍在皖浙之交冀圖負隅死拒左宗棠已派兵窮追會國藩當飭皖南守將會江浙諸軍合力殄除爲一勞

永逸之計鮑超一軍卽令暫駐建昌防瑞金各匪回竄並堵湖州餘逆窺伺西路以竟全功楊岳斌已屢諭馳赴陝甘總督新任江西各路未竟事宜卽交沈葆楨鮑超劉典等妥爲籌辦先是

諭旨飭派金陵陸師赴江協剿及東境肅清曾文正公以江西軍威大振奏請止派當許灣甫捷文正致郭公嵩燾書有許灣長濠守禦甚固竟爲鮑公所破江西必可肅清云云又奏大概情形云聞許灣賊壘已爲鮑超掃盪殲賊四萬餘人

八月鮑公駐軍撫建備勦北路竄賊

皖南餘匪從開化之華埠闖入江境逼近玉山時鮑公正患感冒赴省就醫念賊股仍走李侍賢汪海洋故道入江必由撫建而西勾結前股蔓延爲患因於二十九日力疾起行出貴溪金谿之間確探賊蹤迎頭兜擊事聞奉

寄諭鮑超赴省就醫聞報力疾起行奮勇可嘉先是曾文正公於上月奉

寄諭楊岳斌赴任後督辦江皖軍務不可無人接替鮑超謀勇素裕能否勝督辦之任抑或江西軍務無庸再需督

辦之人著曾國藩迅卽悉心酌度奏聞至是新疆失陷三城楊公奉

諭旨飭令迅赴陝甘之任文正奏言鮑超戰功最偉屢次收降巨股賊中服其威信自足勝督辦之任惟侍逆未受大創趨重南贛自湖州克復賊股又將續入江西目下江西軍務應分兩路辦理鮑超現駐撫建應責令專顧北路備剿湖州廣德續至之賊劉典席寶田江忠朝王文瑞劉勝祥韓進春等現已併趨南贛應責令專顧南路追剿侍康等逆上竄之賊果能分任責成撫臣和衷調度當不必

另派大員督辦而江境亦可次第肅清矣奏入奉

寄諭楊岳斌赴任後鮑超與劉典等分辨南北兩路不必
另派大員督辦沈葆楨有地方之責著與鮑超等隨時商
推和衷辦理以清疆圉曾國藩仍當會同沈葆楨統籌兼
顧卽令鮑超等分任南北兩路以專責成十月文正奉
旨赴楚督兵覆奏有臣部之名位勲勞以鮑超爲最著尙
奏由沈葆楨和衷調度等語及江省肅清後沈文肅公疏
辭世職有臣自知韜略不及諸將一切未敢遙制悉聽前
敵相機辦理等語是鮑公於援江之役不必有督辦之名

而固已得行其志宜其成功之速也楊公是時赴贛州督師防勦至明年二月始由湘赴陝甘云

九月鮑公分軍出贛南截擊親督全軍大破賊於池富鋪乘勝踏平甯都州城外賊壘立解重圍遂克復瑞金縣城江西全省肅清

鮑公正由建昌拔營東行以顧廣饒兩路楊公岳斌復派孫昌國帶水師嚴扼廣信等處河面江省東路之防旣固而湖南巡撫毛公鴻賓以賊勢蔓延南雄迤東江西各軍雖已進至甯贛等處而無一營繞前截擊因咨商鮑公請

派王衍慶五營繞出贛州以南會同廣東防兵四面掩擊
楊公奉

寄諭催令王衍慶迅速起程赴粵以厚兵力時僞幼主洪
福瑱僞佑王李遠繼率餘黨分兩股驀出光澤瀘溪其出
瀘溪者劉公典截之於珀玕其入光澤者復走杉關鮑公
馳赴南豐截剿而賊不循蹊徑避兵而行汪海洋自許灣
敗挫後句合丁太陽等竄踞瑞金其勢復熾鮑公計由甯
都馳赴瑞金楊公沈文肅公因奏稱東路肅清我軍可以
專注西路鮑超謀勇兼全爲賊所憚統其全部西向必能

殲除羣醜指日盪平等語已而丁太洋等攻陷雩都縣城
鮑公於初九日已刻抵廣昌正擬由石城進剿瑞金而瑞
金之賊已於前二日遁走忽報僞康王汪海洋圍撲甯都
州賊館聯絡四十餘里鮑公率所部倍道馳援初十日起
至池富鋪連夜築壘十一日黎明賊乘我軍營壘未成將
士勞乏分三路猛撲賊陣林立鮑公指揮諸將分路應敵
賊拌命衝突我軍五路齊進敗其前隊譚勝達唐仁廉等
軍奮力衝殺左右兩路之賊先後潰退周有勝等直擣中
堅馬步各軍橫截直衝賊勢不支我軍追至山下圍殺方

酣忽另股從山巔壓下拌命搏鬪適勝達等乘勝馳至斷其歸路賊遂大潰我軍追殺四十餘里當將吳口渡張連湖坑山港烏林壩沙子營夏村連湖劉芳塙大路口等處賊巢悉數踏平積屍盈野是夜就賊館休息片時五鼓復率隊前進十二日辰刻抵甯都州城踏平城外數十壘立解城圍我軍乘勢追勦三十餘里斃賊萬餘名生擒二千餘名內有僞朝將王金瑞等賊目一百二十四名均斬之我軍亦陣亡員弁十八勇丁百餘名曾文正公奏令鮑公專顧江省北路至是而霆軍之功又徧及於江省西南矣

文肅以捷聞奉

上諭鮑超一軍自入江後連獲大捷所向有功此次馳援甯都以萬餘眾疊摧巨敵立解重圍固全腹地實屬謀勇兼優深堪嘉許鮑超著加恩賞戴雙眼花翎以示優異所部將領員弁勇丁並著曾國藩查明保奏候旨施恩陣亡游擊牟占魁都司洪龍海曹志本洪潮海守備鍾世名張明坤把總譚尙德外委杜賢才楊國友高凱風均著交部從優議卹以慰忠魂又奉

寄諭鮑超馳援甯都血戰解圍已降旨賞戴雙眼花翎沈

葆楨卽傳知該提督益圖奮勉將康侍等逆悉數誅鋤肅清江境用副委任賊自甯都敗後回踞瑞金鮑公率師連日追剿擒斬極多十五日午刻馳抵瑞金北門城下賊之前股入城死守後股背城而陣汪海洋情勢迫急見鮑公屢次納降不戮一人因遣其僞丞相宋中受僞將軍秦彪至營詐降鮑公知其詐而陽許之約期縱之去至日鮑公嚴陣以待海洋先設伏於要隘自率悍黨來迎相距數十武鮑公揮軍驟擊之三路猛進馬隊由兩傍樹林抄出海洋出不意大駭跳而遁城賊驚惶開西南門潰走當將縣

城克復城外賊壘賊卡一律踏平鮑公復揮軍分頭剿捕追至距城三十餘里之埜田直達閩界始行收隊駐瑞金縣城計三日內擒斬長髮老賊五六千人乞降解散者不計其數餘賊由武平山路潛遁鮑公急知會閩省防軍一體截剿於是江西全省一律肅清文肅奏言鮑超統師入江冒暑血戰平許灣七十餘壘攻克金谿瀘溪南豐新城力解甯都重圍削平瑞金踞逆東南大局深資保障應如何優加恩獎伏候

聖裁其所部將領員弁兵勇可否

飭下曾國藩破格請獎出自

天恩尋因僞幼主遁走石城荒谷經席寶田所部搜獲又
奏言李世賢汪海洋等股東西奔竄方欲得幼主以冀死
灰復然當幼逆遁至廣昌去康逆已閒不容髮幸席寶田
晝夜窮勦追至石城鮑超援甯都克瑞金使康逆無可容
足而幼逆輾轉荒谷卒就生擒東南大局從此底定等語
奏入鮑公蒙

賞一等子爵尋奉到封爵 勅書其文曰奉

天承運

皇帝制曰朕惟尙德崇功國家之大典輸忠盡職臣子之
常經古聖帝明王戡亂以武致治以文朕欽承往制特設
文武勲階以彰激勸受茲任者必忠以立身仁以撫眾智
以察微防姦禦侮機無暇時能此則榮及前人福延後嗣
而身家永康矣敬之母怠署浙江提督鮑超前在江楚皖
勦賊卓著戰功此次督師入江所向大捷鵬勦東西兩路
疊摧巨股連克堅城斬馘解散不下十餘萬賊眾聞風膽
落遂能盡掃逆氛膚公立奏鮑超前因江甯克復甯都解
圍先後賞給一等輕車都尉世職賞帶雙眼花翎加恩著

錫封一等子爵以示優異與鮑公同膺 懋賞者沈文肅
公一等輕車都尉世職並頭品頂戴席寶田雲騎尉世職
並黃馬褂游擊周家良雲騎尉世職並擢副將左公宗棠
亦同日 錫封一等伯爵蔣公益澧騎都尉世職以肅清
全浙及派兵窮追洪福瑱之功也此次霆軍援江楊公沈
公俱以客軍相待但爲奏報戰狀其出力將士應獎敘者
仍推候曾文正公保奏故數次大捷俱未隨摺開單但有
彙案保獎

十月鮑公請假回籍葬親以宋國永婁雲慶分統其軍尋奉

旨出關勦辦新疆回匪

時江皖一律肅清鮑公因請給假一年馳回四川本籍親營葬事兼養傷病曾文正公許以六箇月於十二日據情代奏奉十九日

上諭署浙江提督鮑超於本年五月閒以母柩久淹乞假歸葬當經降旨賞銀五百兩經理葬事令俟金陵克復江皖肅清再行賞假回籍現在江西安徽兩省賊蹤已淨而鮑超縈心窀穸悽惻陳情未便再拂所請鮑超著賞假兩箇月回籍葬親以遂孝思同日又奉

寄諭鮑超轉戰數省所向有功本年冒暑西征累獲大捷肅清江西全省厥功尤偉前已加恩賞戴雙眼花翎復錫封子爵此次又准其回籍葬親所以獎其勤勞而遂其孝思者想鮑超必愈加感奮現在甘肅軍務未戡新疆回匪日益蔓延前已命穆圖善帶兵出關剿賊而兵力尙單非得勇略出羣如鮑超者前往協力恐難壁壘一新著曾國藩傳旨鮑超令其俟假期一滿卽行由川起程出關剿辦回匪其舊部兵勇及得力將弁並准其酌量奏調隨帶同行從前回疆用兵楊遇春卽係四川土著立功邊域彪炳

旂常鮑超務當督率諸軍肅清西陲威揚萬里以與前賢
後先輝映該提督忠勇性成接有此旨必卽欽奉遵行以
副朝廷委任時鮑公牒報交卸營務往舟中養病文正批
復云此次貴爵軍門疊膺 懋賞錫爵酬庸並勗以揚威
萬里與前賢楊忠武比例 朝廷禮遇之隆有加無已一
俟假滿希卽帶隊西行以副 國家倚畀之深而立人臣
非常之績馮標現赴涼州本任貴爵軍門正可奏帶隨往
也先是瑞金踞賊經憲軍擊走後繞竄廣東平遠鎮平大
埔等處闌入閩境窺伺龍巖直犯漳州左公宗棠等奉土

一日

寄諭鮑超攻克瑞金仍著督軍出境會合閩省防軍將此股敗匪追捕盡淨以竟全功又奉十三日

寄諭李世賢等股撲陷武平張運蘭進剿失利賊卽分股竄陷龍巖南靖並陷漳州府城汀州徧地賊氛閩浙粵東諸軍兜剿難保不回竄江境著曾國藩飛飭鮑超一軍乘勝越境會剿務將入閩賊匪就地殲除毋得稍存畛域之見貽誤戎機此兩次

諭旨皆於鮑公乞假之後始行奉到鮑公旣得假文正復

奉

寄諭前因鮑超請假諭令左宗棠等卽飭宋國永婁雲慶分帶鮑超所部赴閩剿賊著曾國藩再行檄催該員等迅速前進歸左宗棠調遣毋失機宜湖南巡撫毛公鴻賓廣東巡撫郭公嵩燾尋奏稱江西踞賊雖經鮑超疊次大創而逆首李世賢汪海洋等尙稽顯戮且據鮑超咨開湖州廣德敗賊現已投入汪逆股中是以江西雖暫肅清而後患猶巨鮑超一軍在楚軍中最爲驍勇若責令跟蹤窮追會同閩粵各軍合力兜剿萬無不立就殄滅之理且該軍

乘屢勝之威鼓行而前賊眾懾於先聲聞風膽落更有事
半功倍之效相應籲請

恩旨責成鮑超迅將此股餘孽一律掃蕩無論在江在閩
在粵必殲滅無遺而後已庶可竟此一簣之功勿貽將來
之患奏入奉

寄諭鮑超已經賞假回籍葬親其所部之軍前已有旨令
宋國永婁雲慶分統其眾入閩援勦歸左宗棠發縱指示
必能會合閩軍痛掃賊氛

十一月十二月鮑公在江西籌議西征

鮑公旣奉迅赴新疆之旨急思回籍募勇立功西域以圖報稱因牒曾文正公詳詢出關事宜並請將現統之楚軍全數帶赴新疆文正批復云甘肅回氛日熾朝廷之眷顧西陲至切而急盼貴爵軍門之率隊出關又至殷諭旨不令貴爵軍門帶全部西征而令在四川募勇蓋深知楚勇離甘太遠不服水土不如川勇相距較近曾在新疆著有成效由江西帶去舊部以六千人爲率由四川續添新軍以四千人爲率若再多則籌餉不易轉運尤難且還蜀募勇不宜用川東之人宜用川北保甯龍安兩府之

人由龍安至甘肅之階州古所稱陰平道也由保甯昭化而至階州近日水陸通行之道也保龍二府與甘肅風氣不甚相遠若兩湖兵勇帶至階州倘其不服水土卽須酌量遣回換募川勇乃可率之出關至霆軍馬隊本係貴爵軍門與各營官捐出截曠銀兩購買之馬理應全帶出關惟由江楚而入三峽又由夔渝而至保甯以上達甘肅階州水路六七千里換船數次萬不能載馬以行若人舟行而馬陸行則馳驅太遠斃者必多甘肅新疆之馬甲於天下旣多且賤不若酌帶操熟之馬勇並帶買馬之銀俟入

甘後多購良馬最易成軍其震營現有馬匹仍留江西歸
婁鎮管轄庶爲兩便如貴爵軍門以爲可行則購馬之二
萬金可由本部堂籌解甘省等語時閩中賊勢正熾江西
官紳爭留震軍先清閩匪鮑公以西征係 朝命不敢違
遂議帶舊部八千三百人並調撥川省制兵加募川中步
勇統帶西行者由沈文肅公代奏

震軍紀略卷七終

霆軍紀略卷八

銅梁陳昌世五編輯

門人吳樹棠全校字

乙丑同治四年

正月鮑公在江西料理西行

時曾文正公與駱文忠公等先後奉到上年十二月十五日

寄諭據沈葆楨奏接准鮑超咨稱擬帶所部八千三百人出關另調川兵四千募川省步勇數千酌添馬隊統計新

舊各營月需餉十餘萬兩請飭各省酌撥協餉等語新疆各城變亂勢甚猖獗非有內地大枝勁兵出關難資剿辦鮑超勇略過人聲威素著必能立功邊域迅掃逆氛該提督以塞外用兵必須厚集擬帶萬餘人前往方能制勝自係實在情形惟籌兵必先籌餉庶幾士飽馬騰所向克捷新疆地處沙漠餉無所出從前用兵皆由各省轉運接濟此次鮑超所帶兵勇月餉計需十餘萬須合各省之力協濟俾免缺乏著官文曾國藩都興阿駱秉章毛鴻賓李鴻章吳昌壽惲世臨劉蓉閻敬銘沈桂芬郭嵩燾恩麟體察

情形每月可以協撥若干均各酌定數目奏明辦理卽按月如數撥解不得宕延此係緊要兵精眾擎易舉該督等總須顧全大局寬爲籌備毋許稍分畛域藉口推諉也又奉同日

寄諭沈葆楨奏甘肅福建軍情均極喫緊霆營兵不宜分並將鮑超原咨抄錄呈覽一摺所稱關外平沙廣漠利在用眾閩地重山複水利在用奇西陲軍務緊急鮑超宜統全部西行方可獨當一面第閩事大棘江防亦警若欲肅清康侍各逆亦須霆營全部兵力方能摧陷廓清等語尙

屬實在情形惟新疆自庫爾喀喇烏蘇失陷伊犁被圍情形萬分岌岌都興阿穆圖善雷正綰等分勦甯夏固原之賊正在得手未能遽爾分兵非另撥大枝勁旅迅速西行則出關勦賊之說幾成虛語况閩省餘氛已由左宗棠三路援勦鮑超又分兵萬餘人交婁雲慶等統帶會勦閩省兵力不爲不厚自可無須再留鮑超全部致增朝廷西顧之憂著曾國藩沈葆楨傳知該提督於假期一滿卽日率領所部宋國永等各軍由川起程入甘節節掃蕩早日出關相機進勦婁雲慶等軍俟閩賊殄滅後仍著前赴鮑超

軍營聽候調遣鮑超請撥川省制兵四千名並由川中招募步勇數千名之處著駱秉章卽日妥籌辦理毋稍遲誤致滯師行沙漠地方平原曠野非馬隊車營相輔而行不克有濟應如何添設馬隊及入甘購馬之處著鮑超咨商曾國藩斟酌情形實力籌辦文正尋奏言新疆回氛甚熾本宜及早撲滅惟甯夏淪陷階州未復秦隴戒嚴甘肅兵單餉絀軍無固志內地之根本未穩焉能揚威塞外似須將嘉峪關以內一律掃蕩方能大舉出關鮑超目下回籍葬親所部全軍儘可暫留江西防剿閩匪待數月假滿以

後一面由夔州馳赴川北另募新勇大加訓練宋國永一面由江西馳赴川東管帶舊部續行入甘兩者均不至遲誤臣處兵勇尙多餉項奇絀實無餘力協撥關外巨餉駱文忠公於正月二十三日奏言川楚兵勇遠征西域甚非所宜况甘肅賊氛徧地關外自哈密而前中途不無梗阻一旦糧運不繼非同內地尙可擇近就食師懸絕漠進退維艱雖有勁旅不戰自困餉超所部萬餘人每月由各省籌解餉銀十餘萬兩無論各省現值籌防籌剿款項皆非充裕即使勉力湊解而道途通塞無定難期隨時接濟且

鮑超行營每月縱有十餘萬兩所有糗糧行裝皆須於關內預爲購備沿途轉運所費不貲出關後卽無處可以採辦師無宿飽何以言戰欲再增餉力更不及現在川省防剿正急勢難抽調制兵隨鮑超前赴新疆臣竊通籌大局必俟內患旣平然後可從事西域僞侍康等逆以敗殘之餘遁入閩疆兇焰復熾鮑超之霆字營剿辦此股旣已屢挫逆鋒賊中間風喪膽似不宜遽行抽調正可藉此以靖餘逆疏甫發奉到正月初四日

寄諭前經諭令鮑超於假期一滿卽日率領所部各軍起

程出關進剿該提督請撥川省制兵四千名並由川募勇數千名諒駱秉章已妥爲籌辦現在伊犁軍情萬分危急本日已諭令穆圖善帶所部出嘉峪關著駱秉章傳知鮑超無論假期已滿未滿卽日整頓隊伍率同宋國永等分起取道入甘節節進剿以救倒懸之危其婁雲慶一軍俟閩省軍務稍平仍准鮑超調回以厚兵力該督等仍遵照上年十二月十五日寄諭妥速籌辦不得稍涉遲疑以副委任駱文忠公又奉初六日

寄諭甘肅軍務未清原不能揚威塞外第新疆南路各城

大半淪陷北路亦形岌岌若不迅圖掃蕩恐全局淪胥必至不可收拾昨諭鮑超無論假期已滿未滿卽日整隊西行著稟遵前旨趕緊辦理至鮑超赴甘前因沈葆楨奏到已有旨准其將所部八千人統帶前往曾國藩所稱鮑超回蜀募勇宜用川北保甯龍安兩府之人一節著駱秉章傳知鮑超迅速馳赴川北募勇成軍尅期赴甘一面檄調宋國永等軍由江西馳赴川東管帶舊部續行入甘毋稍遲誤其所需軍餉一切仍著駱秉章源源籌解以利師行二月鮑公由江西起程回籍

鮑公令宋國永統西征之八千人暫駐江西省城河以西
婁雲慶統萬人赴閩援剿

三月鮑公至夔州原籍

鮑公抵籍念太夫人病時旣不能躬侍醫藥又未能親視
含殮撫棺悲痛幾不欲生葬後廬於墓側時曾文正公密
奏略曰新疆大漠苦寒艱苦異常雖有名將深得軍心者
至塞外亦恐攜貳思歸鮑超統率該軍出關後倘部曲離
怨潰散必見輕於回眾一有挫失則叛回大熾全局震動
後人更視關外爲畏途矣且行軍貴顧根本貴取遠勢今

甘肅未平而遽謀新疆不惟難期急效又將更長寇氛求
速而反遲求揚威而反損國威鮑超之功自咸豐四年以
至九年屢破大敵頻受重傷姑不復論卽自十年以後臣
駐祁門四面爲賊所困全賴鮑軍左右翼蔽縱橫苦戰危
而復安如青陽之堅城甯國之悍賊東壩之要地皆該軍
獨任其難而辛酉甲子二年兩次肅清江西勲勞尤著若
令出塞償事不特鮑超身名俱裂而天威一挫亦難遽圖
再振惟有仰懇

聖明垂鑒飭令鮑超隨同都興阿楊岳斌先剿甘省俟內

地全數底定一塵不驚再行大舉出關每月非確有三十萬之餉猶不可輕於一發不獨鮑超一軍爲然古來有事塞外者未有不慎於始謀者也時楊公岳斌已赴陝甘總督之任文正致書云霆軍出關較之甘肅用兵其難數倍鄙人深慮春霆身名俱裂故具片密奏不宜獨令出關語雖近於參劾意實設法保全將來春霆行至甘肅如詢及此事乞閣下以鄙意告之後又致江西護撫孫公長紱書云霆軍欠餉旣多而新疆萬里之外人人聞之膽寒不獨霆營憚於遠征弟三月十五密片非劾鮑帥也力阻該軍

不宜出關也等語婁雲慶以整理軍行刻難就緒未遽赴閩左公宗棠徐公宗幹孫公長紱奉

寄諭婁雲慶接統鮑超所部既未入閩卽著暫留江境協同防守及雲慶由江西拔赴武平左公等又奉

寄諭漳州西面之雲霄平和漳浦詔安等處賊氛甚熾左宗棠慮及閩軍攻急該逆必以粵東爲退步徐逞其竄江下海之謀婁雲慶一軍現在武平距粵較近正可移緩就急爲江西助粵之軍著孫長紱卽飭婁雲慶統帶所部迅速前進瑞麟郭嵩燾一面迎提相機調撥所有該軍餉需

卽由江西廣東兩省源源接濟鮑公與官文恭公等同奉
初八日

寄諭前因新疆回氛日熾迭經諭令鮑超整隊出關該提
督現已由鄂赴川料理葬親事畢卽可部署起程惟派員
分赴北口廣東採買馬匹洋鎗等項並回川招募勇丁需
費甚鉅著駱秉章先行籌款撥濟俾得及早成行不得藉
詞推諉至鮑超一軍起行後每月所需餉項前經諭令湖
北等省督撫酌定數目奏明撥解僅據沈桂芬奏撥地丁
銀十萬兩陸續批解其餘尙無確數將來全軍西行若非

籌定月餉源源接濟必致貽誤軍行楊岳斌前請以東征局厘金移作西征之用業經諭令官文等將甘肅及出關剿辦餉銀一併斟酌籌辦仍著官文侯楊岳斌抵鄂後與之熟商應如何酌量分撥俾鮑超一軍得此有著之款庶期士飽馬騰剿辦不至棘手官文楊岳斌素顧大局諒必能妥籌辦理也甘肅自固原克復後雷正綰陶茂林等軍分投進剿軍威甚振鮑超抵甘後如果出關之路已通卽可徑赴哈密尅期進剿以期迅殄逆氛不必俟甘省全行肅清再行前進致關外望援孔迫也鮑超回籍以後所有

籌備西征一切情形並准其專摺奏報該提督當奮勉圖功以副委任是爲鮑公承奉 廷寄之始鮑公又與都興

阿公穆圖善公駱文忠公雷公正綰同奉十六日

寄諭鮑超告假回籍此時想可抵川著駱秉章迅催該提督趕緊部署入甘都興阿等出關後甯夏北路軍情或交鮑超接辦或卽由雷正綰兼顧屆時自可酌度辦理不至接替無人

四月西征之軍至湖北金口潰變援閩之軍在福建上杭因饑大譁尋定

霆軍自咸豐十年六月改隸曾文正公部下陸續欠餉至百數十萬同治三年五月以後改歸江西糧臺發餉積欠亦鉅窮窘難支宋國永所統赴甘各營於本年二月初七日在江西省城索餉鼓譟經巡撫沈文肅公續發餉銀十九萬餘兩共供支六箇月軍心乃定嗣國永統率各營西行於上月二十八日行抵金口不肯前進聲言欲回江西索餉及本月初七日潰至咸甯楚督官文恭公奏聞文正及駱文忠公等同奉十八日

寄諭總兵宋國永等統帶鮑超舊部由江西行抵漢陽經

官文派員護送前進師次金口該勇丁等不願西行全行潰散覽奏實堪駭異直隸宣化鎮總兵宋國永甘肅涼州鎮總兵馮標於全軍潰散毫無約束實屬咎無可辭姑念從前尙有戰功均著卽行革職並撤銷記名提督仍飭前往鮑超軍營効力贖罪首先煽惑之參將歐陽暉游擊羅三元都司李守澤李受春千總梅里光均著先行革職嚴拿務獲就地正法此起勇丁叛卒降眾雜出其中雖投回有二三千人而結隊上行者爲數尙多現由咸甯一路竄去行走甚急著官文卽飛催成大吉等拔隊跟追繞前攔

截如該勇丁等尙遵約束除將爲首之犯擒治外其餘脅從卽著妥爲彈壓分別安插倘敢抗拒卽當就地殲除毋令逸入鄰境其業已投回勇丁並著官文分別遣散以息事端該勇丁等聞風急竄趨向靡定江西安徽湖南等省路路可通著曾國藩孫長紱喬松年李鴻章石贊清各派兵勇於湖北交界地方探蹤攔截並飭各該地方官一體嚴拿免致蔓延爲患不可稍涉大意鮑超所部之勇旣多潰散是出關一節勢難成行該提督於勦滅粵匪素著聲威現在福建漳州之賊尙在負隅並有西竄粵東之意前

已飭令婁雲慶等由武平赴粵援應若得鮑超前往督帶必更得力著駱秉章傳知該提督趕緊起程取道湖北一帶順便將已散之勇丁招集申明紀律統帶赴閩剿賊以贖前愆毋庸前赴西路剿賊該提督素稱勇往諒不至遷延觀望貽誤事機也瑞麟公及左公宗棠等奉二十六日寄諭現駐武平之婁雲慶一軍尙有萬餘人卽著孫長綬仍遵前旨檄飭進赴粵境由瑞麟郭嵩燾迎提調撥迅克雲霄等處以固邊防官文恭公李公瀚章奉同日寄諭霆營前收降眾復叛在湖北咸甯地方劫掠勢甚猖

獫狁是此起潰卒已有聚而難散之勢亟應乘其初起迅速撲滅官文前派追截之兵是否足數分布著嚴飭派出將弁認真妥辦將爲首逆犯擒治設法分散餘黨岳州地控南北李瀚章已飭趙煥聯抽帶營勇馳赴岳州駐紮卽著督飭該臬司會同劉國斌等水師分巡控扼仍察看緩急隨時增兵助守毋稍疏忽左公宗棠徐公宗幹孫公長紱等又奉二十七日

寄諭霆營勇眾潰散孫長紱已派總兵萬泰等帶兵先扼義甯武甯並檄提督孫昌國率領礮船巡防義武河道又

於鄱湖贛河分路布置截其竄皖竄閩之路所籌尙屬周
妥第武義逼近興國通山難保該叛勇等不乘虛急竄本
日已傳諭鮑超飛速來楚招致此起叛勇管帶入閩剿賊
究恐緩不濟急孫長紱派出各軍務當檄令迅速到防遇
賊卽擊至援閩霆字各營尤應防其煽惑著左宗棠飭令
婁雲慶妥爲駕馭鎮定軍心駱文忠公同奉是日

寄諭前諭駱秉章傳知鮑超趕赴湖北招集散勇統帶赴
閩剿賊毋庸出關近日疊據李瀚章孫長紱奏報霆軍降
眾復叛在湖北咸甯地方劫掠聲稱赴江西索餉實欲赴

閩投賊並句結援閩霆軍是該叛勇逆迹昭彰亟宜趕緊籌辦此股叛黨係屬鮑超舊部該提督雖已先行回川究不能辭其責湖北湖南江西等省前派成大吉等軍分路扼截難保該叛勇不恃眾抗拒鮑超統領霆營素爲勇丁所懼服卽著駱秉章傳知該提督稟遵前旨馳赴湖北咸甯一帶會同成大吉等軍協力兜拏其自拔來歸者卽著分別招集與前次投回勇丁或酌留管帶赴閩或資遣回籍均由鮑超相機妥辦俟辦理叛勇事竣卽著督軍入閩毋稍延緩婁雲慶等軍由武平赴粵援應並著該提督飛

速知照婁雲慶嚴密防範毋令所帶勇丁爲叛勇煽惑勾結以杜亂萌先是雲慶所統援閩各營在上杭因江省餉項不繼而閩省斗米千錢勇丁日難半飽雲慶於三月二十五日密稟曾文正公有賣馬易食行將不能忍饑等語尋於四月初九日絕糧而譁倡脅雲慶率之回江就食初十十一十二等日譁譟數次雲慶以從容鎮靜處之幸未決裂孫公初聞上杭鼓譟之時尙未奉到憲軍停止出關之旨奏言憲軍人數眾多全仗鮑超約束得宜用能眾心帖服應懇

天恩飭令鮑超暫緩赴甘星馳來江將婁雲慶所統霆營
選帶西征餘皆遣散回籍江閩等省亦可消患未萌奏入
鮑公與左公宗棠駱文忠公等同奉五月初一日

寄諭霆營叛勇已至新昌圖由袁吉竄閩著孫長紱飭令
普成忠等乘其喘息未定併力迎擊並飭劉于浚督飭水
師嚴防贛河無任偷渡左宗棠亦當預籌布置毋令此起
叛卒由江入閩致滋蔓延援閩霆營因米糧缺乏譁謀劫
餉雖經婁雲慶卽時撫定若非江省迅籌接濟亦無以救
定軍心孫長紱當督飭省局寬籌銀米陸續接濟不得以

省嗇從事致誤大局鮑超離營後霆軍叛逃譚潰之事層見疊出朝廷念其前勞未忍卽行加罪該提督宜如何感激圖報現在咸甯叛卒一意南趨婁雲慶所部退駐會昌白埠地方若再不迅速東下撫循約束萬一潰勇勾結閩氛又成不了之局該提督自問當得何罪著駱秉章傳知鮑超剋日馳赴鄂省探明潰勇趨向分別招集遣散並迅赴江西統領婁雲慶所部霆營入閩會剿力贖前愆倘敢遲延不進致令釀成變亂必惟鮑超是問至鮑超帶兵出關剿賊之命疊經有旨停止孫長紱可卽傳知婁雲慶宣

布各營俾軍心得以綏定不致別滋事端官文前派成大
吉等進剿潰勇此時該潰勇已竄江境並著督飭成大吉
等越境跟追會同江省官兵前後夾擊東南軍事僅餘閩
海一隅圍剿合宜可望盡殲醜類若霆營別有變局則逆
匪乘機出竄必將餘燼復燃左宗棠當妥籌兼顧防患未
然不得稍分畛域曾文正公自聞沙井之譁卽函商孫公
長紱另派委員支應霆軍令其米糧鹽菜足敷度日乃書
甫達而金口之變已起文正又致書孫公略云霆軍至金
口索餉滋事聞其擄掠而不燒殺不知究竟何如隻鎮一

軍忍饑待餉情形極爲迫切若不速籌接濟恐其與湖北八千人同叛應請閣下速發一月滿餉七萬三千餘金並食米六千餘石卽日起解俾免譁潰滋事感切禱切現飛咨鮑軍門由夔東下速赴江鄂弭此巨患尤望閣下先行安慰婁鎮一軍不令與鄂潰之八千人相合乃可徐爲收拾等語正封函間接孫公書知婁軍四月十五日已過白埠十六日全抵會昌十八日開往贛郡沿途騷擾聲言至省索餉文正卽加函并致孫公略云敝處所調水陸諸軍均落後著若非倉猝剽掠省城則上杭一軍終可設法安

撫金口叛卒亦斷不能成大氣候苟劉朱朱三軍彭鮑兩帥次第趕到則大局總可無礙承示各單江省釐局米局共解過霆軍餉數六十餘萬各屬辦解軍米尙不在內沙井上杭滋事續解近二十萬亦不在內可謂優待霆軍不遺餘力前恐婁部煽亂思消患於未萌故詢及給餉之數今事已如此祇宜籌後之補救不必問前之釁端弟於金口潰勇告示中每人賞銀十兩計八千人共須銀八萬兩咨明由湖南協解江西給發等語上杭旣譁經孫公一面具奏一面發銀六萬兩迎解軍前其變遂定時文正奏言

金口叛亂一股斷難再事羈縻臣現調劉連捷朱洪章朱南桂三軍由宿松渡過九江徑赴瑞州臨江兩府嚴防陸路以保贛河之西並咨彭玉麟酌派水師數營布置湖口南康吳城四處分防水路一面出示撫慰在閩霆軍無令與金口潰卒勾結一面飛致鮑超星速來江招安已叛之卒總以解散爲妙又奏言鮑超一軍久稱勁旅積勞太久立功最多將卒以屢勝而驕又以無餉而怨又值統將回蜀之時又有新疆遠征之苦故赴川之八千人臣早慮其潰散曾於三月十五日密奏一次然臣慮其潰而滋事尤

不料其叛而爲寇是否別有情節尙須詳細訪查婁雲慶所統各營在閩鼓譟初九日之譁其詞似有忿激思亂之情十二日之揭帖其詞又似有儆戒畏禍之意大抵因饑生變毫無疑義霆營欠餉多至百數十萬其咎皆在微臣不在江西又臣明知霆營出關必將生變乃不能於去冬奏請停調直至三月始奏釀成今日之禍皆臣區畫不善恩信不孚咎無可辭俟金口兵潰原委詳查到日再當據實奏明自請嚴處等語嗣徽休防軍於五月內鬧餉滋事喧鬧十三日之久並毆傷皖南道張鳳翥其時主將唐金

二公俱已乞假離營文正奏稱靈營潰變固由累年積欠之多尤憚萬里遠征之苦其致變之故與各軍迥不相同惟臣未能先期陳奏力阻遠調究屬咎有應得此次徽休兩軍索餉譁譟臣有督辦之責未能先事預籌尤深愧歉
應請

旨將臣交部議處並將統將皖南鎮總兵唐義訓鞫奏階道金國琛革職代統之唐義謨革職審訊定擬以肅戎行等語

五月潰勇撲袁州府城尋解圍竄入廣東婁雲慶率師迎剿

嘉應州髮賊鮑公在籍力疾籌備西征並請續假部將劉車龍大破甘肅援賊解安定城圍

鮑公與官文恭公駱文忠公孫公長紱同奉初二日

寄諭霆營勇丁路經鄂省金口地方乘間潰散至咸甯縣冒充官兵戕害知縣羅琳及其幕友家丁在城鄉肆行擄掠經提督唐仁廉等率勁卒馳勦官文派成大吉等率營繼進追至江西義甯州之藍圖嶺地方該匪膽敢頭裹紅巾設立卡座抗拒唐仁廉等攀援上嶺斃逆首陳大發等生擒把總林文龍等二名解省正法成大吉隊亦至沿途

斬馘頗多解散尤眾現已追至白沙嶺地方著官文督飭成大吉等越境追剿不得稍分畛域並著孫長紱嚴飭水陸各軍認真堵截毋任再有竄擾以期一鼓聚殲霆營副將孫得友參將閔玉林都司胡達萼記名總兵副將鄧雲貴馬勝泰游擊姜先兆卜先兆劉致友赴官文衙署伏地請罪並求給假回籍省親治喪就醫該員等俱未從逆尙有天良著照官文所請一併暫行革職假滿後仍赴霆營効力贖罪以觀後效記名提督唐仁廉等當霆營潰散卽能帶兵追剿擒斬首逆功過尙足相抵均著加恩免其置

議此外營哨各官或隨同背叛或乘間私逃均屬法無可貸著鮑超自行查明分別從重參辦如尙有機實奮勇材堪造就者亦著該提督查明分別去留妥爲經理該提督當稟遵迭次諭旨星夜馳赴江西探明潰勇尙有若干會同楚西各軍實力剿除毋貽後患如敢遷延必當治以約軍不嚴之罪稟之據駱秉章奏通籌兵餉緩急請飭鮑超一軍就近先剿河南髮捻各匪一摺鮑超舊部迭諭毋庸西行此時潰勇未靖自應仍令督率所部由鄂赴江將潰勇剿除再行相機進剿鮑公又與官文恭公亨公瀚章孫

長江集卷四
公長紱同奉初八日

寄諭霆營叛勇由鄂東趨因湖南平江業經戒備卽由通城等處竄入江西義甯州境經該處兵團迎頭截擊疊獲勝仗該逆敗回銅鼓營邊界銅鼓營爲江西湖南交界之區據李瀚章奏稱已派趙煥聯等扼要駐紮足遏賊衝卽著督飭派出各軍會同江西官軍四面夾擊官文仍飭成大吉等督兵跟追合剿毋令回竄鄂疆此起彼叛勇數旬之內裹脅至二三萬人且有僞指揮檢點名目是其甘心叛逆實爲法所難容官文李瀚章孫長紱務當督率各軍乘

賊氛初起之時迅速撲滅毋得稍分畛域致成蔓延援閩
霆營眾心未固萬無再令赴粵之理孫長紱所解餉銀六
萬是否已經勻放近日該營軍心若何孫長紱當籌畫餉
銀陸續解濟毋令再因饑餓逃潰鮑超迭經有旨嚴催令
其速赴鄂省將潰勇一事迅速辦理著稟遵迭次諭旨星
夜兼程東下招集舊部率赴江西分別勦撫力贖前愆倘
敢稍涉遲延貽誤軍事恐鮑超不能當此重咎也李公瀚
章孫公長紱等奉十五日

寄諭霆營潰勇尙在銅鼓營一帶會昌縣駐紮之婁雲慶

一軍前亦索餉思潰雖經孫長紱籌解銀米勉強拊循此
軍究未可深恃李瀚章所調之趙煥聯等計已到防卽著
嚴飭該員會同江軍將銅鼓營一帶叛勇殄除淨盡仍隨
時確探閩賊消息嚴密防範孫長紱亦卽督飭諸軍迅將
霆營叛勇剋日剿除廓清腹地毋稍遲延又奉十九日
寄諭霆營叛勇攻撲袁州府城經官軍擊敗由萍鄉竄逸
該逆裹脅已至萬人若由吉贛以趨閩粵恐與閩賊勾爲
一氣剿辦更爲棘手著孫長紱督飭派出之席寶田等軍
會合成大吉等協力兜剿婁雲慶所帶霆軍由閩退回經

王文瑞等接濟餉糈始行撫定而汪海洋等逆復竄回永定與李世賢等股合圍老湘營城內米糧缺乏外無援師其分紮城外之湘軍入營亦被圍撲情形喫緊婁雲慶赴援之軍能否得力尙無把握孫長紱卽飭席寶田迅將霆營叛勇撲滅回紮瑞金一帶以資扼守其曾國藩派往江西之劉連捷等軍並卽趕緊迎提藉資戰守尋孫公奏稱李世賢汪海洋竄上杭武平一帶前隊已至廣東嘉應州境逼近江西會昌長甯兩縣邊界定南龍南亦相去不遠臣已咨商婁雲慶率霆字全軍視賊所向迎頭兜擊等語

時叛勇已由新甯桂陽入粵十六日至樂昌十七日至仁化逼近江西南安府邊境尋竄至南雄信豐曾文正公致郭公嵩燾書云霆營叛卒爲江湘勦敗解散甚多聞入粵不滿千人當不足爲大患行將入閩賊黨中先是鮑公雖聞金口潰散之事其疊次催令東下之諭旨尙未奉到因於五月初二日疏陳籌備西征情形並報到籍日期是爲鮑公專摺奏事之始奏言三月二十四日接准軍機大臣字寄三月初八日奉

上諭前因新疆回氛日熾迭經諭令鮑超整隊出關等因

欽此臣跪誦之下仰見

廟算周詳無微不至於籌畫兵餉之際寓體恤將士之心私衷感激惟有涕零竊臣仰荷

殊恩給假回籍葬親二月初八日由鄂起程三月二十六日到籍因限期嚴迫晝夜奔馳途次阻風感受寒疾致前發舊傷未愈然以軍事在身不敢稍事稽遲到籍卽就近擇期力疾治辦喪事茲於苦塊之次奉到

恩諭並准於回籍後專摺奏報籌備西征一切情形聞

命自

天悚惶無地伏思臣東川下士西蜀庸材迺因采芑微勞
濫列執轂顯爵方愧涓埃未報何期艱鉅重膺惟有勉矢
愚誠倍加勤慎前沐

聖恩高厚

諭令移孝作忠側聞邊警頻仍不覺積憂成憤雖身未出
玉門之外而心已馳瀚海之西竊揣西陲形勢大異東南
風氣嚴寒幅員遼闊其地北界俄羅斯東界喀爾喀西界
布魯特南界烏斯藏東西七千餘里南北三千餘里雪山
綿亙冰嶺迢遙又有不毛之沙山無水草之戈壁動輒數

百里而遙必須囊水束芻裹糧策馬疾馳數晝夜始能與賊一遇現當回匪滋擾非厚積兵力多備馬隊不足以敷勦辦伏查臣舊帶兵勇一萬八千名當協勦東南賊匪時憑仗

天威恪遵

訓示將士協力兵機幸無貽誤原擬先後帶赴西征藉資驅策昨據臣委帶八千兵勇之記名提督宋國承等稟稱該兵勇等因欠餉不願出關在途潰散臣不勝駭異當飛遣隨行得力部將前往查探彈壓免致別生事端因思委

派婁雲慶所部留閩會勦之兵勇萬人年久疲羸閩事平後卽該兵勇情願出關挑選精銳恐亦無多况道遠軍懸緩不濟急此次西征期迫不得不創立營頭從新招募臣擬照舊帶兵勇原額選募步隊一萬四千馬隊四千計一萬八千外再就川營挑選熟習邊情曾任征戰精銳制兵二千以爲嚮導其將弁亦由臣指調茲尙有隨帶舊時將弁俟新營立後卽以舊將練新兵舊弁練新勇統由臣親身指示務使士知將意將識士情心性相孚險危共命然後臨陣可收指臂之效况邊地苦寒非精壯之人不能耐

辛勞而支嚴冷故必選精練熟而後可成節制之師不獨練兵尤當練將不獨練陣尤當練心不獨練人尤當練馬務使二萬人如一人呼吸相通進退如意而後訓練功成前次四川督臣欲以階州一軍交臣統帶意在息力節費非不甚善第此軍非由親手募練倉卒恐難得力俟開募就緒再行酌覆此籌備西征練兵之大略情形也夫勦賊固須練兵而練兵先須籌餉必先備兩月之餉而後可以開募又必先備三月之餉而後可以啟行合計必先集五月兵餉而後辦事不憂棘手否則餉未備而遽開招必致

招未齊而餉隨罄不能成軍遑計啟行此太困之道也至於邊地利用騎戰購馬尤爲要需現咨四川督臣就近於夔關厘局先撥銀七萬兩及兩江督臣咨撥之三萬兩俟到齊卽分遣員弁前往廣東北口採買洋鎗馬匹如有不敷再商動撥此外募勇經費及軍裝器械各項需用甚鉅現奉

諭旨飭令駱秉章先行籌款撥濟俾得及早成行臣自當遵旨咨商辦理至臣指撥九省兵餉僅准山西撫臣來咨許撥地丁十萬按月批解餘省尙無確款總數合無仰懇

天恩俯念軍需緊急

飭各省督撫未經議覆者卽行議覆已經議覆者卽行撥解於萬難兼顧之時設通融協濟之法在於何項款下每月源源撥解若干總期款皆有著解不悞期俾臣一軍二萬人月餉不憂缺乏庶幾士飽馬騰勦辦可期得手早日解伊犁被圍之困卽早一日釋

聖主西顧之憂此臣効命之至願也至此次行軍餉必隨兵而進兵必護餉而行緣出關勦賊路必由甘而甘省所在有賊旣須迎擊當頭之寇奪路而行又須防備抄尾之

賊截糧而去蓋軍行一遇伏莽必至腹背受敵首尾不能相顧故必先勦梗途之賊而後可以安行出塞之兵正不必俟甘省全行肅清始行前進但阻軍行卽予殄滅所以防後患而保全軍餉也關外平沙廣漠曠無人煙必須計月裹糧方可深入故兵餉必預給師期必預定統計現到兵餉若干足供一軍幾月之用然後可以剋期進剿否則不能輕易出關此籌備西征餉項之大略情形也茲聞邊烽日急疊奉

諭旨嚴催不論限滿未滿迅速出關援救臣竈窳甫就衰

經未除茹泣含悲仰維

宵旰焦勞則眠餐俱廢俯念邊城危急則立坐不安旣不敢補請終喪更不敢稍懷偷惰惟是各省餉項尙與確款總數亦未據解到分釐而臣此番創立新營需費浩大每月軍餉約計十七八萬兩現在空懷焦灼其實一籌莫展再四思維臣未成軍以前所有募勇經費及買馬製械各項四川督臣自應遵

旨設法籌撥以便及早成行臣旣啟行以後所需各省月餉無論已到未到可否仰邀

恩旨一併飭交四川督臣駱秉章代臣經理催收俾臣得以專意勦賊不分心於催餉不掣肘於缺糧該將士等自當倍加感奮踴躍爭先至如何在於四川省城設立糧台之處可否卽倣照道光六年前提督楊遇春西征成案由該督臣斟酌辦理想該督臣公忠體國素顧大局必能籌備盡善不悞軍行臣惟有激發天良俟募勇畢後率師啟行到甘體察情形緩急相機迅速整隊出關徑赴哈密剋期進剿以期迅掃回氛仰副

朝廷靖逆安邊之至意奏入於二十六日奉到十四日

上諭所稱招練新軍採買戰馬各事宜非鉅餉不能濟事
非數月不能成軍前因霆營潰勇竄至江西銅鼓營一帶
疊經諭令該提督前赴江西分別招集遣散著仍遵前旨
無庸西進迅卽由湖北至江西探聽潰勇擾及何處卽向
何路速籌妥辦此起潰勇就平後仍卽統領婁雲慶所部
霆營入閩會剿該提督惟當懷遵歷次寄諭迅速赴江毋
稍遲緩干咎鮑公未奉此 旨時於十一日奏言臣蒙
恩賞假回籍葬親在途感冒引發舊傷到籍力疾營葬等
情已於遵

旨奏報摺內陳明在案猶冀調攝漸愈即可勉力部署一切詎料受寒太深未經表出醫藥誤投感冒微疴轉爲傷寒重症前發舊傷日益增劇喪葬大事旣不得不竭力支持而軍務重情更不敢不盡心籌畫公私並集神形交瘁以致體愈困而病愈深心愈急而症愈變近復添患怔忡之疾心慌意亂氣喘聲嘶據醫稱受傷太多血流虧損久未息心調養所致須屏除思慮安心靜攝輔以藥餌不限時月方可漸次望痊若求速效用藥偶差必致病入膏肓雖和緩不能爲力伏枕聞言倍深焦灼竊念臣出身行伍

知識毫無自効力軍前以來仰荷

先皇帝特達之知

皇太后

皇上不次之擢由偏裨洊升提督更沐

天恩逾格優錫高爵榮封叨忝過多殊漸非分况荷帑金
之

賜俾增泉壤之光

天語褒嘉許與前賢比烈假期寬予准其回籍葬親凡此
稠疊之

殊施實爲臣工之榮遇臣受

恩深重感泐肌膚洵夢想所弗期豈捐糜之能報近復以西征事重

特許專摺奏聞鉅任初膺小心彌勵夫以臣之識短材庸不獨自審有素卽兩江督臣亦所深知是以遇事謹慎退讓不敢居先卽如臣厯年統帶將弁兵勇應領之月餉俸薪前則請湖北撫臣胡林翼後則請兩江督臣曾國藩特派支應糧台及臣營務處大員管理支放臣未肯經手者誠自知才能鮮薄恐分心於軍餉轉貽誤於兵機前此從

征倖免愆尤一皆仰賴

國威恪遵

廟算稟指揮於節帥資策力於戎行自顧實無寸長未曾獨當一面惟身率士卒奮勇殺賊前後十有餘年大小數百餘戰攻城破壘陷陣衝鋒受巨創者十餘突重圍者數次裂腦折肱縮筋損骨鱗傷徧體痛楚纏心雖節次醫痊而時愈時發左手成廢騎則猶能執韁食竟不能舉按皆與臣時常會食之都興阿曾國藩李鴻章等所親見現因體患傷寒引發舊傷宿疾更添怔忡新症寒熱交作汗涖

頭暈兼之傷發骨痛肉跳心驚更加五內騰躍氣湧身顫
內外交攻心神俱困若不信從醫師之言屏除思慮安心
靜攝輔以藥餌恐病勢愈加沈重憂著不能爲功惟念軍
事在身假期嚴迫欲專心於養疾難兼顧乎籌兵再四圖
維只有瀝情縷陳籲懇

天恩俯念積苦年深於前次兩月假限之外再行

賞給短假百日俾得息心調理一俟諸症漸次就痊病軀
稍有起色不拘假滿未滿卽當抖擻精神料理軍務以期
仰答

高厚鴻慈於萬一臣素非偷安怠惰之人耿耿愚忱仰蒙垂鑒奏入與官文恭公瑞麟公等同奉二十四日

寄諭婁雲慶所部勇丁旣經撫定卽可飭令該軍駐紮由閩入江要路遇賊卽擊以壯聲勢而固藩籬靈營叛卒由江西萍鄉竄至湖南攸縣雖經官軍擊退而逆蹤已向安仁一路竄走並渡河焚舟以阻追兵其謀甚狡著李瀚章督飭水陸防軍兼程追剿相機分隊繞出賊前迎頭攔擊迅殄賊氛席寶田一軍已抵茶陵並著孫長紱檄令會合楚軍四面兜剿以期一鼓殲滅成大吉等軍前令其越境

追賊此時行抵何處著官文查明具奏一面飭令探明潰
勇趨向相機合剿不准遷延觀望致干重咎前因靈營勇
卒潰叛迭經飛諭鮑超停止西征毋庸出關迅赴湖北辦
理此事此次鮑超籲懇續假自係尚未接奉前旨故有是
請現在叛勇已擾及攸縣安仁一帶事機孔棘著鮑超稟
遵迭次諭旨一面趕緊調理一面束裝赴鄂探明叛勇蹤
跡分別剿撫遣散卽赴江閩剿除髮逆以副委任倘再遲
延不前任令舊部勇眾日益蔓延自問當得何罪此起叛
勇蹤迹飄忽若由郴桂一帶趨往西南兩廣地方處處可

通與竄粵髮逆亦可句合爲患更大著瑞麟郭嵩燾張凱
嵩各飭兵弁擇要嚴防毋稍大意鮑公部將劉車龍者自
咸豐十年安徽小池驛大捷後隨鮑公請假回川尋經署
督崇文勤公委充翼長帶親兵千餘仍用霆軍旗號會同
提督蔣公玉龍等破滇匪李永和於牛腹渡等處論功擢
總兵明年鮑公檄令回營同治元年五月車龍至皖南鮑
公委帶霆軍老五營勇丁八月豫撫鄭公元善檄調車龍
赴河南辦理營務處尋命接統臬司洪貞謙所部剛毅精
銳等八營堵剿舞陽一帶捻匪左臂受傷二年赴楚調理

官文恭公委帶親兵三年十一月固原提督雷公正綰奏
令在楚用霆軍營制招募馬步十二營曰海字軍率赴甘
省至是大破援賊解安定城圍嗣因回匪竄撲涇州車龍
疊獲勝仗保全名城及鮑公赴楚治軍又調車龍回營車
龍將所部海字營交雷公而隨鮑公赴粵於是有嘉應州
之捷又明年而有永隆河之捷車龍皆有苦戰功先是車
龍因甘省官軍失利褫職及同治十年李公鴻章奏稱劉
車龍由咸豐元年出師廣西久經戰場著有勞績轉戰數
省身帶多傷請開復原官等語

卷八終

霆軍紀略卷九

銅梁陳 昌世五編輯

門人 吳樹棠 全校字

乙丑同治四年

閏五月婁雲慶率霆軍馳防信豐會擊閩賊潰勇入廣東境
自楊忠勤鼎勳等率淮軍克復漳浦雲霄各城漳州府城
亦經左公宗棠督飭各路官軍克復於是閩省肅清而江
西贛南二郡情形喫重吉安亦當衝要孫公長紱因令婁
雲慶率霆字各營馳防信豐仍視賊所向與閩粵追師相

機夾擊時潰勇經任星元等擊敗後遁入江西信豐龍南各縣境初七日竄至安遠擾及定南潛入廣東和平龍川之江廣亭初十日抵興寧縣之十三都司等處數不盈萬鮑公奏言五月十二日准湖廣督臣咨會四月二十六日准軍機大臣字寄四月十八日奉

上諭官文奏霆軍赴川路經鄂省金口地方乘間潰散等因欽此臣扶病跪誦之下悚慙無地汗淚交流當卽飛飭宋國永等分投招集潰勇俟臣病間東下帶赴勦賊正在力疾籌畫間續於五月十四十五二十等日先後接准軍

機大臣字寄五月初一初二及初八等日迭次欽奉

諭旨嚴催啟行臣始知赴川潰勇有戕官擄掠之事留閩

霆營有譁譟退回之變並潰勇竄江有被兵圍截之舉心

膽震驚魂魄飛越伏念臣受

恩深重未效涓埃茲因請假葬親身甫離營到家未及兩

月而所部叛逃譁潰之事卽已層見疊出雖奉

恩旨未忍遽行加罪臣問心何以自安相應請

旨將臣交部議處至婁雲慶宋國永馮標等歷從征戰多

年屢著微效由偏裨洊升總兵臣察其勤奮樸誠堪副任

使是以此次將霆營一萬八千人分爲統帶藉資熟手不料婁雲慶所統留閩會剿一軍爭米譁退婁鎮尙能及時撫定而宋國永等所統赴川一軍竟至全行潰散毫無約束實屬咎無可辭乃荷

聖恩從寬革職仍准効力贖罪以觀後效仰見

鴻慈高厚至極無加不獨該革鎮等均當捐糜矢報卽

臣

隨帶將士無不聞而感泣誓當百倍出力奮勇殺賊仰報國恩現在潰勇由楚竄江迭奉

諭旨嚴催臣若再不迅速東下撫循約束萬一潰勇勾結

閩氛又成不了之局自當星夜由湖北馳赴江西探明潰
勇尙有若干會同楚西各軍實力勦除勿遺後患力贖前
愆豈敢稍涉遲延貽誤事幾自干重咎惟臣現在諸證叢
集怔忡尤甚據醫稱怔忡起於血虧現夾傷寒未可用補
寒疾起於感冒理宜忌風舊傷謹依舊方自可漸愈今當
先治傷寒次理怔忡各症少安勿動方可循序施功臣雖
愚庸略知大義臣之事上猶子之事親東西南北惟其所
使自奉移孝作忠之

諭益懷以身許國之心豈踴躍於西征轉遷延於東下徒

以病軀急切未敢輕動合無仰懇

天恩俯准

臣

暫緩起行一俟傷寒怔忡次第就痊卽當擡

帶醫藥力疾就道帶治舊傷前已遣弁馳赴江楚一帶張
貼奉

命東下告示仰託

聖主福威俾潰勇知

臣

業已返旆東指自知斂戢兼畏各

軍跟追攔截或縛首歸降聞風解散未必非先聲後實
之一助也此起彼潰勇雖係衅起索餉而膽敢戕官擄掠頭
裹紅巾設卡抗拒并有偽指揮檢點等名目卽與賊匪無

異縱窮蹙歸命不可復用應與漳州負隅之寇一律盡數殄滅以彰

天討而快人心至一切會剿事宜

臣擬俟到鄂會商督

臣

酌籌餉項量募新軍更就投回潰卒中挑其尙堪驅策者申明紀律帶赴江西會軍合剿誓不留一賊以貽後患然後酌帶婁雲慶舊部入閩會剿殘匪東南軍事僅餘閩海一隅圍剿合宜可望盡殄醜類

臣

屆時自當恪遵

廟算悉力圍攻以撲餘燼而掃閩氛現在惟有趕緊醫調俟病症少愈卽當謹遵疊次

諭旨取道湖北順便招集舊部並量募新軍率赴江閩分別勦撫力贖前愆藉以仰紓

宸厯奏入奉

旨知道了著懷遵疊次寄諭一面趕緊調治一面束裝赴鄂探明叛勇蹤迹分別勦撫遣散並將髮逆次第殄除以副委任該提督自請議處之處著加恩寬免如再遷延貽誤卽當從重治罪當鮑公具奏時不知閩賊已竄廣東叛勇自聞舊帥東下之信已先後解散十之六七矣先是婁雲慶稟霆營受病亟宜遣撤曾文正公批復云本部堂之

意總欲將霆營極好聲名爭回不特金口勇丁叛潰之名要設法爭回卽上杭勇丁饑譟之名亦須立志挽回金口一起雖已叛潰但使見我告示有一二千人歸誠就撫就把名聲爭回一半了上杭一起若目下全行遣散下場究不體面只好於休息兩月之後先將春字五營遣散此外正五營副五營親兵禮字馬隊等營暫不宜遣待鮑爵軍門到後統帶立功或再打幾個勝仗克幾箇城池不特饑譟之名可以挽回無迹卽金口叛潰之名也代替他遮蓋幾分了卽本部堂與鮑爵軍門之體面也救全了或卽留

江西勦賊或調至山東隨征均無不可候咨商鮑爵軍門辦理

六月潰勇降於粵軍尋叛鮑公由夔州起程赴閩勦賊

孫公長紱奏言霆營叛勇在龍川之吉祥墟與髮逆搜括糧食分派不均互相鬪殺叛勇於初二日由新寧之羅浮司竄入江省長甯縣留車墟等處初三日經周公寬世親率隊伍堵勦遂仍由原路遁往平遠縣中坑周公追至粵界而還叛勇進退失據因赴大柘向粵軍乞降總兵方耀收受查點降眾連沿途附從者共計七千餘人飭令前赴

嘉應州石港聽候處置尋又奏言叛勇行抵嘉應州仍不就撫於初六日還屯平遠縣之中屯當該叛勇乞降時正值康逆汪海洋猛撲武平邊界顯係汪逆嗾令詐降牽綴粵師以遂其專力犯閩之計臣現飭江防各軍一意主剿庶免墮其奸謀康逆現仍踞鎮平並於城外添築賊壘叛勇亦移鎮平距城八里地面等語瑞麟公郭公嵩燾等同奉初六日

寄諭霆營叛勇竄至南雄信豐地方萬一與康逆等股合併一處爲患更鉅鮑超尙未奏報起程瑞麟等惟當督飭

朱國雄等就現有兵力視賊所向跟蹤追勦以靖地方又奉十五日

寄諭霆營叛勇數不滿萬時思歸入逆股現經該督撫飭令黃添元等移紮老隆等處絕其內犯及回竄之路又令方耀抽撥勁旅親赴龍虎墟會商吳贊誠等乘該匪初至亟圖撲滅匪數無多諒不難一鼓殄除斷不可令其勾結康逆大股致成不了之局又奉十八日

寄諭霆營叛勇困守十三都司築圍自固瑞麟等現已責成卓興勦辦此股並有鄭紹宗遙爲聲援檻獸釜魚不難

撲滅倘任其竄逸或煽惑土匪再肆鴟張卽惟卓興等是問是時汪海洋大股尙踞平遠鎮平逼近長甯孫公長紱令婁雲慶分紮信豐縣之大塘鋪爲席周兩軍策應奉二
十一日

寄諭賊眾數萬麇聚龍川毗連鎮平與定南龍南相距均不甚遠霆營叛勇若與合股賊燄益張設往來竄越則勦辦更形棘手又奉二十九日

寄諭前據瑞麟等奏霆營叛勇已困守十三都司何以此次又與花旗合股擾及平越汶水等處可見卓興等勦辦

不力致被賊匪竄突瑞麟等務須嚴飭卓興鄭紹宗等軍實力兜剿毋稍鬆勁著孫長紱嚴飭在防各軍併力堵剿毋任竄越時鮑公因寬免處分具摺謝恩力疾起程東下又奏言閏五月十三日軍機大臣奉

旨著懷遵迭次寄諭一面趕緊調治等因欽此仰見

皇上於策勵之中寓寬恤之意下懷感悚莫可名言又伏讀本年五月二十四日

寄諭知叛勇已擾及攸縣安仁一帶事機孔棘誠恐日益蔓延爲患更大下獲罪益深萬分焦灼惟恨不能奮飛立

翦此賊藉紓

宸厯而免重愆

臣

現在寒症已愈舊傷亦漸平復惟怔忡

起於受傷血虧時止時作刻難就痊晝夜加倍服藥以求

速愈

臣

自維受

恩深重不敢不自愛其身抑維受

恩深重愈不敢自愛其身俟稍靜攝數日心氣略定不俟

病愈卽攜醫藥力疾登舟沿途調治已定於本月二十八

日起程到鄂後自應仍照原奏就商督

臣

迅速酌撥餉項

量募新軍調率舊部憑仗

天威稟承

廟算將叛勇髮逆次第一律殄除總望各省糧餉接濟無
悞庶勦辦不致棘手早一日釋杼柚驛騷之苦卽早一日
紓

廟堂宵旰之憂以期仰答

高厚鴻慈於萬一奏入奉七月初八日

寄諭霆營叛勇現與花旗股匪合併竄擾興甯一帶大爲
江粵邊境之患鮑超擬於六月二十八日力疾起程赴鄂
募勇往勦具見以國事爲重惟兵在精不在多鮑超此次

招募新勇尤當慎重簡選嚴明約束務使增一勇得一勇之益總以三四營爲率不准再多尤不准再以無賴之人雜廁其間致貽後患宋國永覆轍具在該提督當時時引以爲鑒不可稍涉大意所有該營一切應用餉項卽著官文鄭敦謹李瀚章孫長紱妥爲籌畫設法協濟各該省每月撥餉若干並著迅速定議具奏一面如數撥解俾利進行康逆大股尙踞鎮平叛勇又於江粵交界出沒無常鮑超一軍應由何處先行進兵並著與左宗棠等妥商辦理鮑超到江西後一切進止機宜卽著歸左宗棠節制以一

事權婁雲慶所帶各營本係鮑超舊部將來即可仍由該提督調度庶呼應靈通剿賊必更得力

七月婁雲慶駐軍鐵石墟尋進紮鵝公墟鮑公至湖北

自四月僧忠王在山東戰歿後曾文正公以欽差大臣協辦大學士兩江總督節制直隸山東河南三省文武剿辦捻匪至是左公宗棠以閩浙總督節制福建廣東江西三省官軍剿辦髮匪婁雲慶以汪海洋盤踞鎮平伺隙思逞親率霆字馬步各營赴定南長甯交界之鵝公墟並會商席寶田由澄江墟出粵東平遠縣之東石而自率各營

由長甯八尺墟出平遠縣之大柘分路並進聯絡粵省武
平防師爲合力圍逼之計兼截逆匪圖竄江省會昌瑞金
之路時總兵王開琳所帶新老湘營於抵贛後索餉鼓譟
左公奏言譟索之端一開士氣已囂然不靖如江西之餉
必譟索而後可得則各軍難免效尤霆營叛勇何嘗非有
功江西之人祇因積欠過多有所藉口遂致決裂厥後婁
雲慶一軍留閩數月僅得餉二萬兩並向領食米亦概不
給發迨軍中大譁擁至贛州江西始發餉銀七萬兩是士
卒饑譟之由皆因餉項不能勻給等語奏天奉

寄諭孫長紱於此事實屬辦理不善嗣後新老湘營及婁雲慶所部各營餉銀著劉坤一等源源撥解毋令缺乏
八月婁雲慶率霆軍擊賊於平遠之亂石徑大柘湖背等處連破之鮑公治軍武昌

婁雲慶會同席寶田於初九日以兩營留守平遠親督八營進扼東石其餘八營次日繼進初十十一等日寶田迎擊汪海洋及僞東平王等股獲勝賊竄大柘雲慶飭總兵劉順隆馳往要擊十二日行至良畚卽與賊遇順隆令洋礮隊直前擊之斃賊三千餘人雲慶恐賊出中坑以犯長

甯之篁鄉堡卽於十三日飭順隆徑趨大柘自率各營由間道馳赴中坑行至要馬山適鳳祐兩酋胡瞎子李遠繼領羣賊擁至瞥見官軍登時驚走退至亂石徑地方我軍追至賊眾擁擠落澗死者無數雲慶派隊由小路繞出要賊順隆由大柘會合閩粵之師追擊賊腹背受敵分股向西南竄去我軍追至南極地方又斃賊二千餘人生擒百四十名江撫劉公坤一以捷聞奉

上諭席寶田一軍由平遠進逼鎮平殺賊六七千人生擒二三千人婁雲慶一軍在大柘地方擊勦竄賊擒斬尤多

援剿均屬得力雲慶軍旣連捷復於十五日派吳雲集等馳抵篁鄉助剿十六日逆眾由浮羅司竄龍川之赤石渡等處逼近江境十七日周寬世出龍川之上坪迎擊大塘墟之賊雲集等出龍川之牛形岡兜剿湖背之賊寬世行至下村地方擊敗僞佑王李逆一股雲集等行至湖背遇汪海洋前隊僞周王汪麻子僞天將李逆率眾分左右兩路拒敵雲集等亦分路迎擊斃匪無數汪麻子負創遁走賊隊遂亂雲集等乘勢衝突陳慶福中鎗陣亡各營憤甚縱橫盪決斬僞朝將等賊目多名斃賊千餘生擒百餘賊

自遭此巨創不復窺伺長甯矣鮑公於初二日抵武昌尋經官文恭公鄭公敦謹奏請飭赴江西辦理江粵軍務奉寄諭官文等奏提督鮑超現已抵鄂募勇赴江助剿前次霆營叛勇已與汪逆句合抗拒官軍其婁雲慶所部勇丁前亦因索餉譁譟必須鮑超親往整頓方可復成勁旅著傳諭該提督趕募四營馳赴江粵邊境聽候左宗棠調遣汪逆身受重傷困守鎮平鮑超打仗素能得力左宗棠得此生力一軍會督閩粵諸將鼓勇前進諒不難剋日殲除鮑超一軍應支月餉現已由湖北籌給兩月以利遄征該

提督抵江後卽著劉坤一孫長紱就近籌撥毋令缺乏

九月鮑公治軍武昌議赴河南督姜玉順等軍勦捻

鮑公與官文恭公會文正公等同奉十一日

寄諭河南地方爲四達通衢恐賊此勦彼竄曾國藩徐州
兵力難分且楚豫之交亦屬鞭長莫及鮑超新募楚勇數
營前赴江粵勦辦髮逆餘黨現在鎮平賊勢已孤該處有
江西福建廣東三省兵力合勦不難剋日殄除著官文鄭
敦謹傳知鮑超如尙未起程卽毋庸赴粵將所募勇丁帶
赴豫南由裕州泌陽一路勦賊姜玉順等軍均歸調遣仍

聽會國藩節制以一事權餉項由楚省解濟無令缺乏如
粵省軍務漸竣仍准將婁雲慶等軍調回用資得力曾文
正公奏言屢接稟報閩軍黃少春等攻克鎮平江軍席寶
田婁雲慶等連獲大捷髮逆勢甚窮蹙又有劉典康國器
劉連捷周寬世各軍星羅棋布似閩粵餘孽不久即可殲
除

諭旨令鮑超改赴河南實屬於粵無損於豫有益惟餉項
由楚省解濟未知能否無缺臣擬商之李鴻章若能由江
南協濟數成則河南多一枝勁旅湖北少一分供應似於

大局有裨左公宗棠奉十五日

寄諭前因粵省賊勢漸衰已有旨令鮑超募勇成軍後帶
赴楚豫交界勦辦張總愚股匪仍歸曾國藩節制婁雲慶
一軍本係鮑超舊部仍准該提督酌量檄調著左宗棠傳
知該員懍遵前旨赴裕州泌陽地方勦賊如汪逆一股辦
竣卽著飭婁雲慶一軍亦赴南裕一帶交鮑超調遣以資
得力鮑公於十一日陳報赴江起程日期奏言臣前自在
籍奏報起程後於宜昌途次承准軍機處遞到
批摺並奉

另旨諭臣在鄂添募三四營由江督率舊部進剿髮逆遵

卽催舟星駛旋接湖廣督臣官文飛函內稱鄂省軍情萬

緊擬留臣移緩就急統師迎剿先清豫境以固中原抵鄂

後適值髮捻各逆東西分竄逼近鄂疆意圖深入當與督

臣官文面商一面確探賊蹤以期有備一面挑募新勇以

助先聲甫及成軍湖北邊防稍鬆因仍剋期赴江惟臣此

次開招餉項悉賴湖北籌運合計新募四營暨原帶之水

陸親兵員弁等月需餉銀一萬八千餘兩由鄂抵江督臣

官文本擬代籌兩月全餉計共需銀三萬七千餘兩因鄂

餉支絀除招募經費製造旗幟號衣銀三千兩外僅湊足
餉精銀三萬兩臣權領支放卽於九月十一日起程逆計
中途難免匱乏已函商江西撫臣迅撥大批月餉迎途接
濟以資騰飽而利遄征奏入奉

旨覽奏已悉著仍遵本月十一日寄諭將所募勇丁帶赴
豫南勦賊毋庸馳赴江省

十月鮑公由楚啟行赴粵抵贛州

官文恭公於上月奏言金口之變覆轍不遠霆軍之留上
杭者雖目前敷衍無事奈其中降眾太多心志不一並未

帖然畏服。倘聞鮑超留楚赴豫之信。卽引羣呼類紛紛而來。諸多窒礙。臣愚昧之見。該提督既定於本月十一日起程。卽催令迅速前進。一面請

旨飭下該提督於抵防後。如粵省軍務稍鬆。迅將婁雲慶等所部之營。由江省籌給欠餉。妥爲遣散。再令單騎赴豫。屆時另募新勇。痛除積習。訓練成軍。較爲得力。奏入奉初四日

寄諭。前因豫南軍情緊急。是以改調鮑超一軍由楚赴豫。茲覽官文所奏所見。亦是卽著官文傳知鮑超。仍馳赴江

西將所部新舊各軍妥爲部勒相機進兵聽候左宗棠節制該軍餉需仍著劉坤一源源撥解毋令缺乏曾文正公李公鴻章同奉十五日

寄諭南陽捻逆豫軍旣不能剿除恐其日久裹脅愈多前諭鮑超由襄赴豫嗣因官文奏請飭仍赴江右第念鮑超勦賊向稱勇往若令嚴汰游勇妥加鈐束使該提督有敬懼之心未始不可資其攻勦特恐鄂餉難支著曾國藩李鴻章妥爲商酌於江蘇接濟數成餉需並令該提督將游勇嚴行裁汰不許任意招留卽檄令赴南陽勦賊統歸曾

國藩節制以一事權倘事屬可行一面札調一面奏聞復
奉二十七日

寄諭鮑超一軍前諭曾國藩酌量調赴豫省如果於豫省
有益卽著迅速檄調以資得力文正奏言鮑超之所長在
威名素著爲賊所憚平日本有敬懼之心又慕古人忠盡
之名自金口軍叛以後該提督鑑於前車以後斷不敢輕
收降卒若令少統數營赴豫勦捻餉項則不甚缺乏米糧
則派員專管獎其多年之勲勞勗以後日之忠愼必於大
局有裨惟進兵之路須以襄陽爲老營乃能北控南汝西

蔽鄖陝凡銀米軍械子藥等事均應由湖北糧臺作主江南雖可協餉數成而不能隨時照料臣前已函商官文一俟接到覆信如可由官文主持一切俾該軍米糧有著臣卽當奏調鮑超會剿捻匪專辦西路奏入奉

寄諭曾國藩所籌尙妥年來捻匪出入楚豫之交皆由無得力之兵痛加勦洗以致任其去來總未大受懲創鮑超帶兵素稱勇往若令簡鍊精銳申明紀律卽可成節制之師該提督現在雖已赴江而豫省軍務較之江粵尤爲緊要卽著曾國藩檄調鮑超統帶新募各營馳赴湖北由襄

陽一帶相機進剿一切進止機宜仍著曾國藩妥籌調度
並傳知該提督遵照辦理至鮑超旣赴楚豫剿捻必須寬
籌餉項俾無缺乏所有銀米軍械等件著官文督飭湖北
糧臺籌定數目按月撥解不得稍有推諉江南月協之項
卽由曾國藩咨商李鴻章酌定成數源源接濟鮑公自奏
報起程後卽已拔隊赴江劉公坤一奏言鮑超督率新募
勇丁四營自鄂來江已抵吉安不日卽可到贛茲值汪海
洋股匪自廣東連平州東竄和平江省定南長甯會昌等
廳縣堵剿喫緊鮑超長於戰陣聲威素著爲汪逆所憚且

婁雲慶所部仍歸鮑超統領婁雲慶循照舊章管理全軍
營務行間將士必能勇氣百倍爭先効命臣現已飛咨鮑
超星速前進視賊所向疾馳痛勦務必窮其所之悉數殄
滅庶免蔓延江閩藉以保衛浙江至婁雲慶所部餉項向
來每月籌給銀五萬兩今鮑超又添新募四營應需餉項
臣仍當督飭藩司勉力籌解俾資接濟第該營所開薪糧
公費等項覈與湘楚各軍月餉數目多有參差該營前在
湖北江南征勦有年曾否定有畫一章程尙須咨商曾國
藩覈覆辦理奏入奉

寄諭鮑超不日即可到贛現在汪逆東竄和平江省定南
長甯會昌等處正在堵剿喫緊之際卽著劉坤一知會鮑
超統率婁雲慶等軍星速前進視賊所向疾馳痛剿鮑超
新募四營應需餉項並著劉坤一督飭藩司竭力籌撥俾
資接濟至該營所開薪糧公費等項如何覈實支放以歸
畫一之處著咨明曾國藩妥商辦理婁雲慶所統霆軍自
大柘等處連勝後尋於八月二十三至二十九等日會同
席寶田王開琳等在定南信豐連界小江墟一帶扼擊汪
海洋全股復疊獲大勝上月賊竄踞連平雲慶進紮龍南

之新興堡以固邊陲賊竄和平又經劉公坤一檄令率師窮追由墩頭前進期與席王兩軍夾擊及賊竄平遠鎮平雲慶復進紮安遠鮑公雖不在營而雲慶代統所部於江閩粵三省之交馳驅數月襲鮑公聲威亦復能所向克捷江省官民尤恃爲保障至是廣東嘉應州於二十一日失守鮑公於二十三日抵贛與劉公面商機宜卽率新募生力之兵於二十八日起程馳赴安遠婁雲慶行營察看事勢審度進止如賊尙在武平等處當舉全軍迎擊或出汀州會同福建藩司王德榜一軍併力邀賊如賊已至汀州

則取道建昌之新城縣出杉關至邵武一帶扼賊去路屏蔽浙皖而商令席寶田各軍循贛甯而東以衛江西腹地相機出境相與前後夾擊仍聽左公宗棠節度劉公以會商機宜奏聞奉

寄諭逆蹤剽疾旬餘之內已竄擾三省邊境倏忽東趨江粵各軍並未大加懲創扼其奔突何能制賊死命鮑超現已抵贛卽著迅由安遠一路覘賊所向扼其去路毋任蔓延

十一月鮑公移軍會昌

皇清已各 卷乙 同治四年下

乙

劉公坤一奏報嘉應州軍情因陳合圍未可稍緩進兵不容參差督辦必在得人三策並言臣現在咨行浙江提臣鮑超一軍及臬司席寶田總兵劉勝祥兩軍共計近三萬人簡卒嚴裝分途出境仰懇

天恩飭催閩浙督臣左宗棠迅速赴粵調度俾將領有所稟承各等語鮑公亦奏言康逆竄踞嘉應州城並分股在城外四五十里一帶擄掠盤踞悍賊猶復不少非三省實力合剿未易撲滅臣進兵以會昌爲後路會昌通贛河水運便於轉輸臣於十一月十二日移紮會昌由會昌達嘉

應三百餘里江粵交界山路崎嶇不通水道轉運爲難臣
一面函商江西撫臣劉坤一兩廣督臣瑞麟廣東撫臣郭
嵩燾轉飭就近地方官設法轉運藉資軍食並函商閩浙
督臣左宗棠暨江粵各帶兵大員剋期會剿務殄餘氛惟
辦理軍務貴因時變通從前賊勢蔓延自應分防以固門
戶今汪逆雖悍孤注無援合三省兵力不下百十餘營若
處處分防適形單弱况賊蹤靡定東防西竄顧此失彼轉
有防不勝防之勢不如以剿爲防或少防多剿會合各軍
直逼賊壘如得地勢自不難一鼓蕩平倘該逆勢蹙負固

即可四面兜圍圯壕增壘俾檻獸釜魚一律殄除至各軍越境會剿利固百倍弊亦無窮未進之先各存意見臨敵之際牽制堪虞勝則爭功敗則諉過窒礙多端難逃

聖鑒非督師大臣親臨前敵目睹實情驅策羣力恐不免耽延時日虛糜軍餉仍蹈紙上空談

臣

自奉閩浙督臣左

宗棠節制之

命到江西後屢次致函請其指授方略乃於途次疊接咨函均以賊蹤千變勢遠不能遙制爲辭意涉謙遜

臣

暨各

軍靜候調遣無所適從深懼貽誤事機可否催令左宗棠

仍遵入粵前

旨迅臨前敵督飭諸路謀定而戰合力進攻俾事權歸一
庶收指臂之效臣得以奮力前驅稍圖報稱但能早爲蕞
事則東南永除後患江閩數省邊防可以不設臣管蠡之
見原不敢妄瀆

宸聰特以軍務緊要事關大局冒昧直陳不勝悚惶之至
奏入鮑公與左公宗棠同奉二十九日

寄諭鮑超奏會合舊部抵防並請督辦大臣調度一摺髮
逆大股盤踞嘉應州城江閩粵三省地界毗連此勦彼竄

非合三省兵力四面圍殲勢將復行茲莫尤須有督兵大員節制調度方足以一號令而齊進止現據鮑超奏稱各等語該提督老於戎行洞悉軍情利弊所奏深合機宜左宗棠前辭節制三省之命朝廷未經允准疊經諭令視賊所向馳赴江粵督兵合剿該督旋因賊陷嘉應奏明帶兵赴粵督剿著卽調齊江閩粵三省官兵四路進逼務乘賊勢窮蹙之餘就地殲除不可再令他竄又成燎原之勢並著該督親往嘉應視師以期呼應靈通鮑超所部現已會齊駐紮會昌聽候左宗棠調遣著該督卽約會閩粵各軍

訂期前進並檄令鮑超所部合力進攻毋得稍分畛域坐失機宜所有鮑超軍營糧餉卽著該提督行知廣東江西各督撫嚴檄地方官設法轉運毋許貽誤前經諭令曾國藩將鮑超一軍酌調赴豫勦辦捻匪現值江粵軍務喫緊之時鮑超駐軍會昌距嘉應甚近卽著該提督暫緩赴豫俟髮逆盪平後再行聽候曾國藩檄調入豫助勦捻逆同日曾文正公亦奉

寄諭髮逆竄擾粵東勢尙猖獗鮑超就近由江赴粵勦辦此股必能得手此時若將該軍改調赴豫則舍近圖遠往

返又需時日疲於奔命殊失機宜所有鮑超一軍卽著該大臣暫緩檄調文正未奉此 旨先已奏言

諭旨飭臣檄調鮑超統帶新募各營馳赴湖北由襄陽一

帶進剿本應欽遵辦理惟臣接官文來函鮑超必欲統帶

多軍鄂省實難供應雖江蘇分任協濟尙恐不足以資挹

注又接李鴻章來函粵中髮匪尙熾汪逆悍黨數萬人以

一隅遙爲牽制而我數省不得解嚴須留鮑超在江方足

支撐各等語臣思鄂省之餉源旣如此江粵之賊情又如

彼不敢固執已見致誤事機目下鮑超一軍已由贛州進

兵暫難更調應俟江粵肅清再檄該軍剿捻庶不至往返
僕僕顧此失彼同日官文恭公鄭公敦謹又奏言賊之大
股竄至光羅一帶黃麻一路甚屬空虛昨奉

諭旨令鮑超統帶數營赴豫剿捻擬請

旨飭鮑超就近取道黃麻迎頭截擊直搗中堅以寒賊膽
其餘各路卽令楚豫各軍四面兜剿亦屬得勢奏入奉

寄諭昨據鮑超馳奏業由會昌赴粵剿賊當經諭令會國
藩暫緩檄調著該提督將竄粵髮逆剿平後再行赴調豫
省助剿以免往返奔馳鮑超一軍急切不能到豫官文急

須另籌兵力扼紮黃麻豈可專待此軍致滋貽誤左公尋
率親兵出屯平和縣琯溪以固漳州門戶並催令劉典高
連陞黃少春等十餘軍三面進逼嘉應州而咨令鮑公督
軍由武平上杭分進以逼嘉應州之北一面以成四面鎖
圍之勢左公又奏稱鮑超一軍尙未得其行抵何處信息
臣已四次飛催此軍入粵以後人地生疏必須廣東設立
米局始免缺乏臣已咨請廣東督撫臣委員辦理其月餉
由江西籌解伏乞

皇上天恩飭下江西撫臣力籌按月接濟不致如從前新

湘長左等營一入閩境卽推置不顧方於大局有益奏入
鮑公與左公同奉

寄諭鮑超一軍前已據奏行抵會昌著該提督卽進兵嘉
應會勦聽候左宗棠調遣該軍入粵人地生疏著劉坤一
按月籌餉解濟瑞麟等派令妥員設立米局均須寬爲籌
備毋任缺乏瑞麟公郭公嵩燾奏言鮑超一軍萬二千人
日需食米臣等前聞鮑超入粵之信已飭軍需局籌解銀
一萬兩由龍川一路向前迎護兼爲採辦食米之計惟所
行多山谷小徑不通江路又屢遭兵燹商旅無至者各處

村莊頑獷飭法公行劫掠不獨經費難籌亦且求一完善地方設立轉運局而不可得惟當竭力籌維務使此軍食米不憂缺乏以資合圍掃蕩之力奏入奉

寄諭汪逆竄踞嘉應於城外四面建立土城望臺負隅抗拒西北一路平遠相公亭大坪石正一帶可以橫竄江西之長甯又可北竄龍定西出南雄以窺楚境必須勁旅扼守以防該逆分竄之路著左宗棠等催令鮑超星速進紮相公亭等處嚴密布置遇賊卽擊迅殄逆氛各營需用軍火及鮑超一軍食米著瑞麟郭嵩燾竭力籌辦妥爲接濟

十二月鮑公進軍平成鋪擊賊大破之乘勝平毀嘉應州城外賊壘復其城閩粵各軍分路追賊霆軍追至白沙壩盡殲賊眾粵逆平東南一律肅清

時劉公坤一奏言賊匪竄至嘉應州城勢益猖獗江西各營除鮑超一軍外惟席寶田一軍萬餘人爲最精頃據先後咨稟均遵左宗棠調遣鮑超一軍於十二月初六七等日以次前進廣東平遠縣之相公亭席寶田劉勝祥兩軍於初九十等日以次前進平遠縣之東石大柘從此漸逼漸近當可剋期合圍等語左公奏言嘉應州城東路北路

及東南東北路長圍漸成然猶去賊二三十里也其所以
不近偏者以州城西路之相公亭大坪兩路急盼鮑超全
軍及江西席寶田劉勝祥前來扼紮庶可杜其北竄平遠
西竄興甯之路山谷之間購米極艱臣勻撥閩餉一萬六
千兩爲鮑超採辦軍米如鮑超等軍日內馳至臣當親率
親兵由東南松口繞至東北一路親歷各營共商分布長
圍之策等語先是閩粵各軍於上月分路齊規嘉應先後
進紮葵嶺樟樹坪烏泥坪藍口西洋白宮市等處或營壘
未立爲賊所乘或被掩襲挫敗損折將弁勇丁甚多事聞

奉

寄諭汪逆盤踞嘉應左宗棠籌調各軍分路進剿高連陞等於雙板橋一帶血戰數時雖將賊擊退而哨弁傷亡不少粵軍復被賊掩襲失去營壘是賊勢雖蹙而凶焰益張該督現進大埔分布劉典王德榜黃少春高連陞康國器等軍互相聯絡長圍之勢漸成正可力圖進取昨據劉坤一奏鮑超已前進平遠之相公亭席寶田劉勝祥兩軍前進東石大柘兩路官軍計日業已到防自可扼其北竄平遠東竄興甯之路著左宗棠督飭各軍剋期齊進合力兜

圍以收聚殲之效倘粵省帶兵員并不能得力卽由左宗棠嚴參治罪鮑超及江西各軍入粵瑞麟等務須設局寬爲採辦軍米以期無誤兵食十二日汪海洋率黨出撲與官兵鏖戰於塔子坳雙板橋等處海洋中鎗死其子汪長林糾同僞偕王譚體元僞佑王李元濟及胡瞎子汪麻子黃矮子何元亮等酋踞紮城內人數尙多鮑公於十七日抵州西北三十里之相公亭十九二十兩日進紮平成鋪去州城只十里耳維時閩粵各軍分紮黃竹洋佛子岡曹塘西洋市龍津橋藍口金雞石坳口等處賊以鮑公長途

疲乏所部又多新募之卒計乘其初至力撼之幸而勝則諸軍長圍可潰而出也二十日鮑公方督隊築營譚體元率大股來犯據嶺布陣鮑公先派婁雲慶譚勝達等自山下分抄嶺後而自督唐仁廉李文益等從山下仰攻騰蹕而上賊以鎗礮矢石抗拒我軍士雖接遞受傷無敢回顧者曾成武被礮子穿過左肋猶裹創血戰督率蔡立成等大呼陷陣各手刃數賊鮑公亦親督軍士躍馬直前賊盡披靡紛紛向嶺後逃竄我軍奮勇畢登乘勢壓下山下包抄之軍亦左右繞出截賊歸路賊益慌亂鮑公督催各軍

縱橫掩殺四面兜剿擒斬僞將軍范宗康等三巨酋於陣斃賊四千有奇生擒老賊二百餘名直追至城下盡平其壘卡賊悉敗入城我軍亦陣亡守備以下鍾福春等三十餘人二十二日大風雨徹夜不止鮑公計城賊膽落將速竄預派唐仁廉伏兵黃砂障譚勝達扼守北溪白沙壩賊果於二十二日夜潛啟西南門由小密出黃砂障而遁鮑公卽率輕騎追之二十三兩日由黃砂障左路追至白沙壩伏兵邀擊於前追師掩殺於後將賊截作數段屍橫徧地共斃賊八千餘名逆眾見四面被圍羅拜求生當將

二萬餘眾一律兇擒查出僞忠誠天將何明亮僞大將佐何明輝暨叛勇頭目黃矮子等二十餘名俱磔誅僞侯丁德泰等大小賊目七百三十四名內多著名渠魁鮑公不欲訊報命悉在軍前正法續於降人中得逆酋汪長林及僞王宗汪起賢等均立予斬決首逆譚體元在黃沙障北被唐仁廉親開洋鎗擊中墜馬落崖死叛勇頭目歐陽輝暨髮賊酋目胡瞎子譚標等均被分路會追之閩粵各軍擒斬無遺諸路受降五萬餘人其殲斃賊數寔軍獨多鮑公自聞金口之變時深疚憤及是叛勇殲除淨盡粵逆亦

全數盪平心稍慰左公宗棠以捷聞奉

上諭浙江提督一等子爵鮑超著賞加一雲騎尉世職記
名提督婁雲慶著以提督遇缺儘先題奏仍交部從優議
敘唐仁廉譚勝達曾成武均著賞穿黃馬褂總兵孫開華
著交軍機處記名遇有提督總兵缺出請旨簡放鄧訓誥
著以提督遇缺題奏其餘在事出力各員弁著左宗棠查
明擇尤彙案保奏是役也 朝廷以十餘年髮逆餘孽盡
數殲除東南一律肅清特沛 恩施左公以督辦軍務調
度有方蒙 賞戴雙眼花翎疆臣蒙 賞者兩廣總督瑞

麟公復還花翎並給三品頂帶廣東巡撫郭公嵩燾給二品頂帶江西巡撫劉公坤一給頭品頂帶廣東提督高公連陞浙江按察使劉公典均雲騎尉世職得黃馬褂者霆軍三將領外提督黃公少春福建布政使王公德榜二人隨摺保獎者霆軍數人外餘軍大小文武計百人鮑公尋將霆軍在事出力文武員弁彙咨左公奏保其武職大小一千七百餘名當經左公彙保以文員各名未盡加考與定章不符未經出奏及同治六年正月鮑公在湖北營次奏請補保奉

寄諭克復嘉應州文員著鮑超酌保數員毋許冒濫鮑公
因奏言臣前咨左宗棠冊內出力文職原有三百餘員茲
復細加確查除將出力稍次者刪去一百餘員俟續有勞
績另行再保外現保各員或隨同陷陣衝鋒或首先攻克
堅壘或陣前擒斬首逆或前敵運送子藥均能奮不顧身
親冒矢石實非尋常勞績可比合無仰懇
天恩俯賜允准以示鼓勵等語奏入奉

上諭鮑超奏遵保克復嘉應州城尤爲出力文員開單請
獎一摺上年鮑超一軍會克廣東嘉應州城撲滅全股髮

逆東南一律肅清武職各員業經左宗棠彙案保獎其尤
爲出力文職各員均能奮不顧身親冒矢石實非尋常勞
績可比自應量予恩施以示鼓勵於是道員康明哲以下
大小共一百九十三員俱 獎擢有差

建軍紀略卷九終

霆軍紀略卷十

銅梁陳昌世五編輯

門人吳樹棠全校字

丙寅同治五年

正月鮑公自粵旋師

時奉

上諭署浙江提督一等子鮑超現在服闋並在籍補制期滿著補授浙江提督實缺曾文正公奉

寄諭現在東南雖已肅清而捻匪竄擾北路楚豫等省到

處戒嚴防剿正當喫緊鮑超一軍前本令其馳赴北路助
剿此時粵賊業已辦結卽著左宗棠飭令統帶所部迅赴
楚豫之交聽候曾國藩調遣以期厚集兵力早殄逆氛鮑
公因卽自粵拔營仍取道江西旋楚鮑公自同治元年二
年兩次奉年終 恩賞福字等件均咨由曾文正公附奏
謝 恩是月初二日在嘉應州行營又奉到四年分
恩賞福字一方大荷包一對小荷包四個鍍金銀錢二枚
銀鏤四錠奶糕五斤奶餅五斤桂圓三斤掛麪十斤蓮子
二斤藕粉三斤白合粉三斤祇領後乃自具摺奏言臣免

且朽質駑駕輅材夙蒙

特達之知未效涓埃之報茲幸

天威遠懾鯢氛與舊歲同除欽逢

景福遐頒

鳳藻共新陽交麗廣含和之

帝德春澤充囊勵清白於臣心寶泉借鑑金錢重選

寵耀龜魚

玉食分嘗歡騰鵝鶴疊荷

九重之湛渥彌增五內之悚惶臣惟有夙夜寅恭始終惕

厲率鐵騎而賈勇勒銅柱以

宣威聊答

高深期無隕越奏入報

聞自鮑公初抵粵境粵省官紳士民已歡聲雷動及到營數日立奏膚公遠近益望若天人願要鮑公至廣州省城作一往返以便沿途父老藉伸仰望之忱亦使羣慝得覩軍容潛消反側於是準備供張專人至嘉應行營諄請而鮑公不欲擾累粵人又念楚豫追待軍麾急須拔營前往因力卻粵人之請粵人乃將供應送迎之費二萬金由大

府轉送鮑公鮑公重違其意遂受之謂此紳民愛戴之忱
亦各將士遵守營規所致也因捐作軍中購備馬隊之需
二月鮑公軍次會昌

成公大吉一軍扼紮黃麻上月因索餉譁潰勇丁多投入
捻匪官文恭公奏請抽調霆軍赴豫卽以固鄂省邊防奉
寄諭鮑超一軍如已抵鄂卽著曾國藩飭令馳赴豫省助
剿由曾國藩調遣又奉

寄諭鮑超一軍調赴鄂豫約有若干名楚北可協濟此軍
餉銀若干兩江蘇省能否於現協甘省月餉外再行籌添

若干兩著官文曾國藩左宗棠李鴻章劉坤一妥籌速奏
初鮑公籌備西征曾文正公卽派蕭以德等赴口外採買
戰馬八百匹以爲霆軍出關剿辦回匪之用嗣因西征未
果卽將此項馬匹奏撥別軍至是鮑公拔營抵江西豐城
奏言去歲嘉應州之捷雖屬將士用命全賴江西大批月
餉源源接濟並會合廣東設立轉運廣東督撫臣委員採
辦軍米絡繹解營故士飽馬騰臣得專意剿賊仰仗
天威蕝事如此之速也臣甫抵粵時粵省便解送銀一萬
兩以士卒尙未立功卻之及旋軍復解送銀二萬兩備西

北購馬之用閩浙督臣亦解送馬價銀一萬兩不惟顧全東南大局而西北馬價亦預爲籌備軍務省分皆能如此士卒誰不思奮賊醜安能久延哉臣自由籍赴防後檢點舊部將前收降眾接遞更換汰弱補強去驕畱樸整頓隊伍訓練將士使知臨敵則奮不顧身愛民則秋毫無犯現擬全軍拔駐豐城稍爲休息得以精銳之中更求精銳惟數年以來軍中戰馬陸續倒斃所存百餘匹均不堪用舊設馬隊改爲洋礮各營甚爲得力前奉

寄諭移師剿捻查豫省地勢平曠捻逆利在騎戰去來飄

忽掩襲靡常非多設馬隊不足以禦其奔衝更無以躡其蹤跡去歲曾經湖南撫臣李瀚章重念軍務知馬匹在所急需該省非應撥餉之處竟肯籌撥銀二萬兩當以一萬兩派員赴粵採辦馬鎗一千桿並洋藥等件以一萬兩派員解赴北口買戰馬千匹鞍韉千副咨請湖廣督臣官文代奏在案計此批馬價尙需銀七千五百兩茲復由廣東閩浙解送馬價銀三萬兩以二萬兩委員赴口續買戰馬一千五百匹鞍韉一千五百副咨請兩江督臣曾國藩代奏以一萬兩委員赴粵採辦洋鎗一千五百桿並洋藥洋

火等件備馬隊之用俟馬匹到齊編立十五營揀派得力
鎮將分帶操練精熟靜候曾國藩隨時調遣兵力既厚再
加餉項充足庶將士百倍踴躍早一日靖逆賊披猖之勢
卽早一日紓

朝廷宵旰之憂現在臣所部新舊各軍月需餉銀九萬七

千零馬隊編立照章需餉三萬四千零合共月需餉銀十
三萬一千有奇臣原歸曾國藩節制進止機宜餉糈贏絀

諒有成局屢次咨商請示方畧道途遙遠每多羈滯現值
東南軍務告竣江省各軍悉分別裁撤籌餉之力尙屬從

容_臣馬步全軍月需餉項可否仍由江西按月籌撥不至

缺乏至於催收支放_臣從未經手歷年師行所至皆各省

督撫設立糧臺隨營管解由各營官具領散給此後仍請

飭照舊章辦理俾_臣不分心於筭餉得併力於戎行遙揣

西北地平風勁烘藥恐難施放近來營中所用火器惟洋

礮爲上備辦最多茲於攻剿嘉應髮逆又奪獲洋礮三千

二百餘桿仍分給各營儘敷步戰之用馬隊各營均用洋

鎗所需洋火更當寬爲籌備可否

飭下廣東就近陸續採運以資衝擊奏入鮑公與官文恭

公等同奉

寄諭著官文曾國藩稟遵前旨將鮑超軍營月餉迅速函商籌撥有著之款源源接濟如鄂省餉項缺乏不能全顧鮑超軍餉或由江西每月協濟若干亦著官文曾國藩酌度情形奏明辦理其洋槍所需火藥等件應用若干著官文等酌定數目咨明廣東趕緊籌解以利師行擒匪張總愚現由豫境東竄曹考而賴牛等逆尙蔓延於光州等處亟應分兵剿辦著鮑超迅率所部尅日起程由鄂赴豫探明賊蹤認真剿辦毋稍遲延鮑超原摺著鈔給官文曾國

潘閱看文正尋奏言鮑超所統步隊月需餉至九萬七千有奇爲數過多應令裁撤三千餘人酌畱一萬二千人按鮑超向來營制可編二十營每月給予餉銀七萬兩其馬隊之數應令招募三千二百人按_臣處新定營制可編十二營有奇每月給予額餉三萬兩除口糧外又有柴草之費添換馬匹之費西洋軍火之費雇買車輛駱駝以資陸運之費每月不下一萬四五千金通共供支該軍月需十一萬數千兩_臣查鮑超一軍馳援江西驅除李秀成巨股肅清全境同治三年再援江西許灣大捷挽回危局此次

克復嘉應州併江粵得以撤防有功於江西甚鉅擬請
飭下江西月解銀七萬湖北月解二萬江蘇月解二萬五
千供霆軍餉需至勦捻之師新添餉超一軍步隊愈厚馬
隊亦不爲薄但患調度不善不患兵力不敷無庸再調遠
兵致滋糜費餉超所部各營去歲金口之變沙井之譁頗
爲人所詬病然猶有可原者前此餉項支絀士卒終歲無
銀寄家間或食米稍缺將領不能以空言撫慰故號令有
所不行今既籌得有著之款十一萬餘兩應卽在襄陽設
立該軍糧臺派襄陽道總司其事仍由江西派委員駐臺

支應步軍口糧湖北江蘇各派委員駐臺支應馬隊口糧及洋藥器械等事俾鮑超得專精辦賊不分心於管餉以符原奏之意等語鮑公自奏明買馬卽派道員許世福總兵袁國祥等先後赴北口採辦又念軍事未已籌餉維艱旣須措備勦擒專餉則從前積欠何忍再索因以忠義激勸所部各營將士將歷年積欠應領餉銀全數報捐奏言臣統率馬步各軍勦辦髮逆轉戰大江南北十有餘年茲幸巨寇蕩平

臣與諸將疊荷

鴻恩厯膺顯秩涓埃未報時切悚惶伏思東南雖一律肅

清而

國家之庫帑未充草野之瘡痍難復且回捻猶煩

天討餉糈正在急需

臣

現據各營將士稟稱自咸豐十一

年起截至同治三年撥歸江西發餉之日止歷年積欠陳
餉銀兩情願全數報效作爲霆軍捐輸毋庸再行補發以
節

國儲而紓民困

臣

當飭營務處核算數目約計二百餘萬

兩既該將士咸知赴義何敢壅於上聞惟念軍中先後陣
亡諸人膏沃原野骨暴沙礫燐燐露碧慘目傷心當時幸

蒙卹典日久猶恐湮沒因核計歷次陣亡大小文武員弁
兵勇不下數千都係川楚之人而川省又以夔州爲最多
原臣籍隸夔州故也合無仰懇

天恩飭下湖北湖南四川三省督撫於各該省城地方並
夔州府城內建立寔軍昭忠祠各一所春秋祭享以妥忠
魂而勵士氣又查近年湘鄂各軍俱有報捐欠餉請

旨廣額之案臣軍此次報捐積欠陳餉銀兩除湖北湖南
已於別案得邀

曠典外可否援照成例永增四川鄉試文武解額若干名

並永增夔州府奉節縣歲科試文武學額若干名以廣
皇上棧樸作人之化以振士子砥礪名節之心倘蒙
恩允籲懇

飭部核議照章酌定額數辦理庶奔走戎行者彌思自奮
而呶唔矮屋者益知自愛矣臣禱昧愚忱實爲節
國帑紓民力勸忠義育人才起見奏入奉

旨所奏霆軍報捐欠餉情形具見惻忱著準其作爲霆軍
捐輸毋庸再行補發其應如何永增四川文武鄉試中額
及夔州府奉節縣學額之處著該部議奏至欠餉實數並

著鮑超造具清冊咨部核辦該軍從征日久厯次陣亡員弁兵勇著準其於湖北湖南四川各省城及夔州府城建立昭忠專祠各一所以慰忠魂卽由鮑超咨明各該省督撫遵照辦理該部知道該提督已抵會昌卽著懍遵前旨督率所部赴鄂會剿迅殄賊氛以副委任後經部咨飭查寔軍欠餉確數並令將欠餉之將士兵丁籍隸湖南湖北四川各若干名捐輸各若干兩分別冊報以憑核辦鮑公查明各軍厯年領食軍米應折價抵還共扣銀六十八萬三千零實欠發餉銀一百四十六萬五千零又據各營將

士稟稱營中歷年勇丁數有一定名無不更難執一冊爲憑準按現在所隸省分仍以四川之勇爲最多其歷年亦最久捐餉廣額分諸各省數以散而於事無成不如併歸一省數以聚而於例相合且湖北湖南曾經屢請廣額惟川省未邀曠典合軍將士情願將捐餉併歸四川一省加廣中額學額鮑公據情咨覆尋準部議奏定照章加廣四川鄉試一次文武中額各十四名於同治六年丁卯科舉行加夔州府學永遠文武額十名奉節縣學永遠文武額八名卽自同治六年科試爲始中額後展至庚午科舉行

鮑公咨請以廣額餘銀派作湘鄂川夔各處建立霆軍昭忠祠經費其霆軍歷次陣亡員弁勇丁各省均有未便徧請建祠將來湘鄂川夔各祠落成應普列歷年陣亡員弁勇丁銜名尋經部議旣因餉欠而報捐安得餘銀以派建該軍業已竭忱報効未便再令捐貲干城之選卽爲閭里之光旣準建祠以慰忠魂應照現行事例請飭四川湖南湖北各督撫並轉飭夔州府縣官倡率紳富勸諭合力捐建霆軍昭忠專祠以光志乘祠成並由各該地方官春秋致祭以隆肸鬯仍一面由該提督查明歷屆陣亡員弁勇

丁銜名籍貫及各省應準附祀陣亡諸員分別徑咨該三省督撫按名列位祠內毋稍遺漏俱於同治五年十一月二十九日奏奉

俞旨

三月蹇軍次江西豐城

鮑公準左公宗棠客到補實及加世職 恩旨卽於江西省城營次具摺謝 恩奏言 臣自典戎行常虞隕越疊邀寵渥未報涓埃茲以補制滿期卽荷提封重任積氛胥靜復蒙世職增榮惶感之私詞章莫罄用命本武臣之分何

敢言功此身忝

異數之頒有加無已臣惟有愈嚴素守倍切丹忱策將士

以共矢忠勤掃欃槍而上紆

宵旰以冀仰副

聖主陶成策勵之至意奏入報

聞時御史賈鐸奏陳勦擒四策請飛催鮑超速帶大兵從
荆襄北上會合豫將宋慶一軍由南陽汝州一路向東進
勦曾文正公奉

寄諭賈鐸所奏雖不爲無見惟軍情旦夕變遷逆蹤靡定

著該大臣通盤籌畫辦理

四月鮑公至武昌

官文恭公會公國荃奉初九日

寄諭鮑超一軍急盼北來何以尙在江西著該督撫趕緊
咨催赴豫不準任意逗遛並將該軍餉需妥爲解濟以利
軍行鮑公在蘄州行營奏言臣準兩江督臣曾國藩迭次
函咨俱囑臣由鄂省取道襄樊前赴豫境就便與湖北撫
臣曾國荃面商機宜並於襄陽府設立糧臺陸續解放臣
查襄樊爲楚豫交界之區舟車接替之處其平原足利進

攻漢水可通餉運距南裕葉鄭較近且得尋閒道與賊迎擊卽兩次採買戰馬亦可徑趨襄樊會合大營藉厚兵力續準湖廣督臣官文函稱賴任股逆現擾及河南之新鄭鄭州等處有偷渡黃河窺伺河北之意是襄樊更爲進兵要路應卽由此取道前往惟臣前由會昌輕舟前赴江省與撫臣劉坤一面商餉精大隊循陸繼進詎料入春以來陰雨連綿溝渠水溢以致兵勇節節阻滯於三月二十六日始抵豐城接準兩江督臣曾國藩抄摺咨行欲臣酌畱一萬二千人編爲步隊二十營招募三千二百人編爲馬

隊十二營其餘概行裁撤查臣舊部馬隊前因馬匹倒斃已改爲洋礮隊八營攻剿嘉應甚爲得力茲復挑選精銳添設四營足成十二營以符奏定之數馬匹未到之先仍暫充洋礮隊戰則以礮轟擊暇則日習騎技俟馬匹到齊卽編入馬隊以資熟手而就兩全除酌畱步隊二十營外餘皆如數裁撤部署甫定卽於四月初八日由江起程臣仍先行馳赴鄂省與督臣官文撫臣曾國荃協心商酌大隊仍由陸路而行抵鄂後便督率前進竊計西北地勢平曠騎賊飄忽靡常追蹤築壘必思一便捷之法方足以制

其驍悍

臣

擬憑臆揣製造獨輪手車每營各若干輛藉載

鍋帳行糧上安撫牌開列礮眼臨敵時使人推行於前以禦騎賊之奔衝內伏鎗礮由牌眼連環轟擊馬步各隊分中左右三陣隨之由兩翼抄出或腰截或圍剿或出其不意而猝然掩襲或乘其旣北而連日窮追均可相輔而行天晚收隊倉卒不及紮營則以車仗排列周圍暫當壁壘倘埂高坎深之處難肆衝突卽以載運行糧軍械如遇沙土鬆散不堪築壘且可藉以爲營差免劫襲之虞亦無輜重之累

臣

管蠡之見輒欲因地制宜未知是否可用仍當

與督臣官文撫臣曾國荃商酌行之臣前因西北軍情利用火器曾派員赴粵採辦軍火開花礮子等件均如數到營茲復準兩廣督臣瑞麟重念軍需不分畛域另咨送到礮礮礮彈各件旗兵礮手製礮工匠人等當卽演試允屬利器將來可期得用臣所擬車式成否尙未遽定如果可行卽一面就近趕緊製造一面仍派員赴粵採辦輕便之礮以備車上之用倘能稍假時日俾器具粗備遇賊時追剿捷利用不掣肘庶幾仰仗

天威膚公早奏冀臨機之迅速補前此之羈延奏入奉

批諭覽奏俱悉現在髮捻各匪分竄皖豫一帶飄忽靡定該提督務當督率各軍星速前進確探賊蹤迎頭截擊毋得因製車買馬等事任意遷延致負委任同時左公宗棠奏言捻匪蹂躪江北河北等處萬騎縱橫今剿捻匪既議減步兵而添馬隊宜兼用車輛以遏賊衝如慮製造兵車經費維艱則廣雇兩輪車倒縛礮位間以車輪開花礮測準施放行則爲陣止則成營似亦制賊之一奇奏入奉寄諭據奏剿捻利用車戰等語捻蹤剽疾異常日前鮑超曾有擬用獨輪車放礮之奏能否合用制勝尙未據該提

督續陳行軍之道全在因地制宜將來仍須諭令曾國藩斟酌辦理

五月鮑公率軍由鄂北渡

曾公國荃奏言浙江提督鮑超於四月杪到鄂所部霆字營馬步全軍於五月初九初十等日到武昌縣適兩江督臣曾國藩檄調該軍由麻城商城以達光固督臣官文與臣等商派撥船隻令該軍過江並飭司道籌備銀四萬兩以資行糧又允按站設局轉運將輜重運赴商城至商城前途則應歸河南撫臣李鶴年派員督率各州縣按站接

運呼應較靈查黃州至光固不過六百里該軍六月初間當可到豫應由兩江督臣河南撫臣各派幹員前至商城會同該軍營務處道員康明哲設立遷軍行營糧臺俾各省所解協餉軍裝子藥均有收納之所方可以利遄征此次遷軍自廣東由江西入鄂境沿途秋毫無擾市肆不驚實賴鮑超整頓之力從此統師前進可期所向有功

六月遷軍次蘄黃境上

官文恭公等奉初九日

寄諭張總愚股匪因被官軍追躡由甯陵等處南竄陳州

周家口牛洛紅一股亦由亳州竄往與張逆合股均向上
蔡一帶奔竄賊蹤麇聚一隅正可厚集兵力一鼓殲除鮑
超一軍前據曾國荃奏報由麻城取道商城以達光固現
在賊匪已由上蔡一帶奔竄鮑超由光固進兵正可確探
賊蹤迎頭截擊著官文曾國藩嚴飭該提督迅赴戎機毋
得任意遷延前據左宗棠奏剿捻之法利用車戰等語日
前鮑超曾有擬用獨輪車放礮之奏與左宗棠所見略同
軍事因地制宜左宗棠所奏能否合用制勝著曾國藩酌
量辦理又奉十三日

寄諭鮑超一軍計應由楚赴豫官文曾國荃當遵疊次諭旨催該提督確探賊蹤迅速迎擊曾國荃派赴應山之軍能否令其入豫爲鮑超後路聲援著酌度情形妥爲調度時李公鶴年奏言浙江提督鮑超統帶霆字營馬步全軍卽日來豫所有轉運協餉軍裝子藥等項均關緊要臣已派南汝光道蒯賀蓀馳赴商城辦理霆營轉運事宜以期無誤曾文正公尋奏言羣賊南竄不出南汝光固黃州六安等處則鮑超所統之霆軍劉秉璋楊鼎勳王永勝所統之淮軍劉松山張詩日所統之湘軍分路游擊亦尙足敷

剿辦各等語奉

寄諭鮑超一軍疊諭官文曾國荃催令相機進剿現在曾國藩既建設防限賊之議賊不得出此數百里勢必竭力死戰鮑超現在行抵何處著官文曾國藩嚴飭該提督奮勉圖功毋得遷延時日自取咎戾

七月鮑公進軍汝甯

官文恭公會文正公奉初二日

寄諭鮑超一軍自粵東撤回後數月以來尙未與賊接仗仍著官文曾國藩傳諭該提督迅赴豫境會同各軍合力

勦辦毋得玩現軍務自干重咎文正尋奏言沙河西南之賊頃已分咨鮑超等相機辦理惟自五月下旬以後淮南北諸郡大水爲數十年所未有積潦盈途深過馬腹軍中米糧子藥車載夫運寸步難行不特各軍拔隊濡滯卽臣處文報往來亦多阻隔遲誤奏入奉初九日

寄諭防河之策尙難遽行曾國藩現今劉銘傳等軍移紮睢州曹考一路專辦沙河東北之賊鮑超等軍仍辦沙河西南之賊卽著分飭諸軍相機進攻勿任遷延貽誤鮑公於上月二十八日軍次白杲奏言

臣抵鄂垣與督臣官文

撫臣曾國荃面商一切旬日之間所部馬步各營概亦由陸至鄂適陰雨連旬江漢水漲低處多被淹沒道路半皆倒塌正商酌搭造沿途浮橋以濟兵勇由襄樊前進復準兩江督臣曾國藩來咨以捻逆東竄徐淮囑臣一軍改道由黃麻至商城以達光固因卽折回黃州循陸前進欽奉批諭飭臣督率各軍星速前進等因欽此欽遵之下彌切悚惶恨不奮飛立剪狂醜以慰

宸廑惟各軍帳棚年久未經更換風翻雨濕朽爛不堪臣營向來不許搭蓋草蓬篾席以防火燭又禁止打館民房

杜絕騷擾前於勦辦嘉應之役隆冬雨雪寒冷異常已迭次咨催江西撥解旋因東南軍務告竣回江期迫未及更換而兩江督臣曾國藩咨定章程步軍月餉派歸江西協濟馬隊月餉派歸蘇鄂協濟全軍帳棚江西又不能一體全發當茲冒暑遄征士卒辛苦萬狀晴則薰蒸於赤日之中雨則坐臥於淋溼之地目擊心酸急應將各營帳棚更換以資遮蔽而利師行查舊章凡軍中所需帳棚子藥軍械等件照餉項從出之省一體發給

臣

軍馬隊十二營需用帳棚

用帳棚千數百架應由湖北發解步隊二十營需用帳棚

三千數百架應由江西撥解經臣分咨江鄂兩省催解在案旋準湖北撫臣曾國荃飭局星夜趕造先後全數解齊江西撫臣劉坤一亦經飭局撥發僅據支應糧臺於六月內解到八百餘架續解之二千四百餘架江漲路遙風隔雨阻未審何日到營臣因帳棚爲軍中急需江鄂來咨俱云趕辦誠恐拔隊日遠轉運羈遲不得不略爲停待不圖日盼一日急難到齊焦灼萬分實形跼蹐一面飛函咨催一面藉以訓練操演北征之法臣念西北賊情地勢與東南迥殊其應用器具當以堅樸輕便爲宜因撤去平日磁

鐵笨重之物乘間趕辦木杓竹簞及鑊鐵小鑊盛菜飯以供食並購鑼鍋爲炊具按營哨各棚人數分給行則佩於腰間騎則挂之馬上其營哨官所用皆以錫爲之一則取其堅樸輕便無搬運之累一則便於稽查以絕騷擾之端已再三曉諭士卒如此後再有私用磁鐵等器者卽係在民間掠來定按軍法從事又念賊情狡變飄忽靡常我軍師行所至臨敵之際自應挖濠築壘先固根本作灶支釜炊食如故如遇破賊之後追奔之頃必攜帶輜重米糧隨隊奔走日日埋鍋造飯則賊去已遠必難尋其蹤跡因以

所製雙輪手車藉載行糧並飭各營預備熟食麪粉每人計足一月之食以二十日分載車上隨行以十日各置腰纏備用庶連日窮追不致因食耽延無論追於何地天晚便可藉車爲營以免根本之慮籌辦甫具旋接撫臣曾國荃函商若爲中原大局計不如任齊豫追軍驅之入境我軍從隨州出唐縣預躡其退回豫境之路而檄請濟甯雕勦之師以一枝扼光固以一枝扼信陽以一枝屯周口任賊在南陽盤旋以入鄂境而後調唐縣躡後之師突發於其間適有雄師尙在鄂之東北將來亦可西趨兜擊捻股

雖眾不阻於山谷卽死於水濱矣如此次擒眾果入鄂地
似此辦法實於大局有裨雄師本應覘賊所向進剿目下
賊旣西趨似不宜急進商城請在黃安麻城少待以觀賊
之定向約會進剿其收夾擊之效等語臣再三審度其布
置實有卓見誠爲大局所係且並經通咨江豫皖各省督
撫想日內均可見覆當有成議不能再爲停待竊臣身
膺重寄何敢任意遷延自負委任卽此次因事耽延亦未
嘗偷安暇逸惟自率師以來必先將器械之利鈍弱強之
形勢緩急之機宜熟思審度謀定後戰戰則期其必克克

則追奔逐北務大傷其元氣或徑殄其狂氛所謂量敵後
進慮勝後會庶不至有名無實以副臨機慎重之本意現
在捻逆雖經西竄尙無定向臣軍中器械行糧漸次齊備
戰車二千四百輛已成千數一俟確探賊蹤或果西踞南
陽抑或旁竄他路仍就近與曾國荃函商進剿尙能仰仗
天威一鼓殄滅藉以稍紓

宵旰之慮是則臣之所夙夜奮勉者耳奏入奉

批諭覽奏均悉卽著趕緊拔營前進該逆現趨舞陽一帶
應由何路迎剿之處並著相機妥辦毋得因製造戰車等

事再行遲誤先是曾文正公復劉公銘傳書云春霆一軍
國藩於四月二十五日檄令由麻城進兵光固渠於五月
初七日接到計此時已將抵麻城茲復飛檄霆軍探明賊
蹤先保六安後顧光固尋覆李公鴻章書云春霆雖久處
鄂垣而所部於五月十一日自黃州渡江駐上巴河去固
始六安均不過三四百里馬隊帳棚已齊所短者僅步隊
帳棚如其緊急應可由湖北趕發請其赴敵也至是文正
與官文恭公曾公國荃同奉十一日

寄諭鮑超現在麻城據稱因帳棚車輛未齊暫行駐候並

述曾國荃函商之語欲分軍布置於光固信陽周口等處
及任齊豫追軍驅賊入鄂截賊歸路就山谷水濱爲扼險
殄賊之舉第該匪避兵而行是其慣技旣知鄂省駐有重
兵豈肯自入陷阱官文曾國藩務當權衡緩急辦理嚴飭
鮑超規賊所向迎頭截擊時文正方自宿遷南由湖入淮
溯流赴周家口而御史朱學篤以兵貴神速不可爲一隅
牽掣請 飭曾國藩擇要進兵相機速剿毋得仍前遲延
並 飭鮑超一軍趕緊前進與曾國藩會合剿辦不得逗
遛等情於十七日入奏奉

寄諭著曾國藩卽趕緊趲程星速馳往陳郡飭各營視賊所向盡力窮擊不得專恃防守官文恭公會公國荃奏言擒匪大股竄至南陽唐縣新野鄧州一帶勢甚蔓延逼近隨棗襄樊光穀均在咫尺之間臣等檄飭水陸防軍嚴爲戒備鮑超一軍因製造戰車不免稽遲時日尙非有意遷延然此時若從信陽一路進兵不但尾追弗及且恐逐賊入陝更成不了之局應由隨棗繞出光穀乃可遮截賊蹤臣等業已咨會鮑超囑其改道前進不至貽誤事機奏入

奉二十六日

寄諭鮑超雖因製造戰車未免耽延著官文等傳令該提督卽由隨棗繞出光穀迎頭截擊毋許再有延緩同時官文恭公奏稱提督鮑超係於六月十二日自黃州拔隊起程由商城確探迎剿現聞該提督因捻逆均由舞陽泌陽一帶西竄擬卽改道黃安由羅山驛徑往汝甯府適中之地駐紮探明賊蹤相機剿辦兼顧光固業已催令趕緊前進勿再遷延

八月鮑公軍次棗陽尋進駐樊城

時曾文正公奏報軍情奉初五日

寄諭現在捻蹤西趨防河之議可成卽著該大臣督飭地方官紳實力修浚以杜分竄並著飭鮑超等軍往來游擊迅殲醜類以慰厯念官文恭公曾公國荃奏言浙江提臣鮑超率霆軍行抵棗陽已咨會該提督隨時覘賊所在或徑達浙川或繞過內鄉總須注意西路空虛之處攔頭截擊如賊折而東趨卽檄福建提臣郭松林候補藩司彭毓橘合軍從桐柏唐縣橫截而出並派候補總兵劉維楨候補道唐協和向新野一路進發遙爲霆軍聲援鮑超饒有智勇必能與各軍會合夾擊以收聚殲之效第恐賊蹤

剽疾若先霆軍而西則全賴豫省秦省扼關嚴守方免入秦之患秦人奉十四日

寄諭調度甚合機宜曾國荃業已馳赴德安鮑超一軍亦已馳抵棗陽卽著就近傳諭該提督規賊所向迎頭剿擊毋令賊騎入陝文正奏陳調度機宜奉十八日

寄諭張牛等逆經劉松山等軍急追折竄寶豐葉縣等處有回竄東北再窺山東之意前據官文曾國荃奏張牛等股竄至鄧州恐被擊西竄當令鮑超率軍由西路繞截曾國藩現今鮑超由汝甯北出迎勦力扼東竄此時東路各

軍兵力尙敷剿辦而西路甚屬空虛若不嚴爲之備萬一西竄入秦又成不了之局鮑超一軍自應遵照前旨由內鄉一帶攔截偪賊東趨以收聚殲之效著該大臣等悉心籌畫相機調撥不可稍有疏忽時御史盧士杰奏稱曾國藩所帶各營合之鮑超一軍不下四五萬人楚豫皖三省現有兵勇亦不下五六萬人若同心協力剿此餘孽如摧朽拉枯乃不爲合剿之計而惟籌分扼之策未協機宜等語文正及官文恭公會公國荃李公鶴年同奉二十一日寄諭盧士杰所奏不爲無見曾國藩總統師干尤應統籌

全局督率湘淮各軍視賊所向前截後追不可僅以扼守沙河爲劃疆自守之計鮑超一軍卽著曾國藩飭令迅速由鄂入豫相機兜剿毋任延緩是時捻蹤所近百姓遷徙一空閉寨自守賊得因地爲糧而官軍每無從買食及得一飽而賊已遠颺其兵民相仇之地奸民得藉口糾眾以與官軍爲難奪其衣物器械戕其身命至有活埋零隊兵勇或舉數十百人而同付一坑者其咎不盡在兵亦不盡在民也鮑公自進軍楚豫之交人民歡悅當路寨堡開門迎納至是鮑公令軍士每人各備一月乾糧攜帶追賊近

營一帶村寨居民爭爲霆軍兵勇代磨麥粉萬數千人一月之乾糧不日而辦及由陝洛追賊旋師沿途頂香結綵鼓吹以迎歡喧不絕婦女亦環立道旁指觀軍容以爲笑樂文正謂霆軍此次入豫紀律嚴明毫不騷擾各處函牘無不稱讚曾公國荃奏稱霆軍秋毫無擾市肆不驚實賴鮑超整頓之力皆公論也

霆軍紀略卷十終

霆軍紀略卷十一

銅梁陳昌世五編輯

門人

吳樹棠全校字

丙寅同治五年

九月鮑公督軍追賊至魯山

時捻匪分兩路東竄者爲任桂賴文光等股西竄者爲張
總愚牛洛紅等股曾文正公於十八日檄令劉公銘傳潘
公鼎新張公樹珊三軍馳剿東路而以霆軍及劉公秉璋
楊公鼎勳劉公松山等軍專辦西路文正之檄未至而鮑

公已於十六日拔隊窮追師抵魯山奏言臣接准湖北撫臣曾國荃函商刻下捻逆大股已羣趨新野鄧州南陽等屬晝夜兼馳囑改由隨棗一路繞出襄樊庶於局勢較緊兼可堵其入楚之路當卽由樊城前進該逆聞風東竄臣仍連日由新野趕至南陽據探大股之賊復由蘭考折回盤踞許州邊馬竄擾襄城葉縣一帶遂於九月十六日由南陽拔隊取道裕州前赴襄葉迎頭截擊十九日至裕州葉縣之間復據探稱該逆又旁遁寶豐郟縣前隊已至魯山境內當卽率隊隨帶乾糧每日趕行九十餘里由魯山

迎剿二十一日午刻行抵魯山而賊又遁往汝州所轄之
臨汝白沙地方去魯山不下二百餘里該逆馬匹甚多飄
忽無定未遇官兵尙敢盤踞一聞官兵將至於百里外先
行遁去臣連日奔馳未遇一賊不勝惶悚慙赧之至現仍
尋蹤跟追務期盡殄逆氛奏入奉

批諭賊既避兵奔竄卽當覘賊所向迎頭兜剿以遏狂氛
著懷遵迭次諭旨妥速籌辦用副委任時山西巡撫趙公
長齡奏請飭令鮑超分撥數營進紮陝州所屬地方攔
頭遏剿以顧晉省邊陲兼保靈閔潼關奉

寄諭張總愚賴文光等各率大股併力西趨恐該逆分犯靈寶閿鄉逼近潼關全陝亦爲震動關係極爲緊要鮑超一軍現在魯山應否卽令該提督移紮陝州一帶專顧西路著曾國藩李鶴年相機調度後又奉

寄諭前諭曾國藩調鮑超防陝州一路未知該提督曾否與賊相遇如尙在魯山南召正可移師南陽以防浙川一帶著曾國藩相機調派

十月鮑公追賊至陝州回軍南陽

鮑公之抵魯山也臨汝白沙之賊由宜陽永甯遁走鮑公

卽由汝州洛陽跟追甫抵洛陽而賊已遁往陝州遂派唐仁廉曾成武兩軍由盧氏小路前進以達靈寶自率各軍出韓城間道以達陝州均日行百餘里冀收夾擊之效李公鶴年以狀聞奉

上諭該逆避實擣虛鮑超此番間道出奇當可制勝該撫卽咨行鮑超妥速進剿並預計該逆必由之路伏兵待之可期得手鮑公於軍抵汝州時牒報賊情曾文正公批復云現在無論賊竄何處貴爵軍門總以力剿西路一股爲主總以本營專人確探爲憑各路地方官探報不足盡信

目前賊勢東西分竄東路任賴較弱西路張逆較強此人人所共知者並非東路強而西路弱若霆軍舍張逆而尋任賴則外間必笑其尋弱者開仗則霆軍之名稍損矣貴爵軍門務宜專心西剿不可另作比較凡賊在豫境河南南陽兩府陝汝兩州均請跟蹤追剿若賊入秦省則不必越境剿辦貴軍此次入豫紀律嚴明毫不騷擾各處函牘無不稱讚此爲可喜惟尙未與賊接仗向來霆營敢戰之名外間佩服者多責望者尤重務須確探張逆所在痛快一戰以慰民望若因山路崎嶇轉運艱難糧食不便行走

稍緩則可改剿東股則不可也初一日鮑公抵陝州之章茂砦楊忠勤劉公秉璋兩軍亦由新鄭汜鞏一路行至陝州之觀音堂賊知追兵將至遂於閿鄉西南之大峪口繞越潼關以南闌入陝西之商州一帶連日狂奔晝夜不停沿途拋棄馬匹甚多鮑公以各軍餉項皆未到米糧罄盡陝閿商雒萬山之中初冬苦寒士卒寒衣未備萬難再進又訶知賊以陝西無食可覓意欲由荆紫關竄往湖北而商州與湖北之鄖陽毗連近接南陽之內鄉鎮平等處因率軍由章茂砦回至南陽一面籌備米糧一面備剿回竄

之賊楊劉兩軍亦由觀音堂回至新鄭時陝撫劉公蓉奏請飭令鮑超親督所部分由商潼前進奉

寄諭鮑超一軍卽著曾國藩催令入關助剿鮑公於軍次河南府奏言逆蹤飄忽與其尾追於後不如迎截於前臣擬率軍折赴南陽相機迎剿前買戰馬千匹已過汴梁日內當可到營就便迅練馬隊賊若窺竄鄖陽則由光化出擊若圖犯豫境則由內鄉斜出擊之惟此次迴環角逐竟未能痛加剿洗實深慚懼現準賊情以度地勢似宜以南陽爲肆應之處當函商兩江督臣曾國藩定奪可否一面

率隊馳赴等語奏入奉

批諭覽奏已悉陝省東西兩路兵力甚單該提督若不兼程往援誠恐腹背受敵蔓延關隴爲患尤深洛陽新鄭一帶既有劉秉璋等軍駐紮防其回竄該提督仍當遵照昨日諭旨趕緊入關助剿迅殄逆氛無負委任趙公長齡亦同時奏請飭鮑超分撥勁旅十餘營星夜前進由陝州直達潼關鮑公與曾文正公等同奉十六日

寄諭鮑超一軍前令由陝州追剿昨據該提督奏移師南陽當經批令趕緊入關若由內鄉淅川以趨荆子關不數

日即可入陝一與賊遇可以痛加剿洗著曾國藩卽飭該提督酌度地勢賊情何路最爲便捷卽由何路前進總期痛挫兇鋒力保完善毋任遲回觀望致干重咎豫省之宋慶等軍留爲防守隘口之用劉秉璋等軍卽可酌量分撥赴陝與鮑超互爲聲援並著曾國藩李鶴年相機調度不爲遙制文正奏言鮑超奔馳千里未及接仗實深焦憤陝西艱苦已極不特官軍米糧子藥籌運萬難卽該逆志在擄掠恐亦無所得食不久仍將回竄臣已檄飭各軍沿途確探相機迎剿奏入奉十七日

寄諭西路賊股已竄至同朝華陰節經降旨令鮑超入關
未知該提督現抵何處曾國藩以該逆到陝無從覓食數
月後又將回竄不知陝省尙多完善地方若無大枝勁旅
應援恐關內益遭蹂躪爲患滋深著卽嚴催該提督遵照
連日所奉

諭旨取道入關探賊所向痛加剿洗毋再遷延干咎文正
尋因二十二日以前探報稱賊將回竄豫鄂自二十三日
以後探報並無西股回竄之說遂於二十七日檄令霆軍
由鎮平內鄉浙川進荆子關以達商州入秦援剿以霆軍

入秦不特秦省米糧極少卽豫省陝洛一帶糧食亦艱貴
異常因函商豫撫李公鶴年晉撫趙公長齡設法多辦糧
米舟運入渭接濟霆軍又奏言鮑超軍中向少明幹之員
料理米糧等事前在皖南由臣派員辦糧接濟在江西時
各官紳亦竭力助糧毫無缺乏故能專心打仗所向有功
一離江皖至福建者卽有上杭缺糧之譁赴甘肅者又有
金口棄舟之變若入秦以後糧米不繼深恐滋生事端從
前多隆阿楊岳斌諸軍一入秦境勇丁逃回者極多以僧
格林沁之忠勇亦未嘗派兵西追皆因米糧難購之故臣

此次檄鮑超文內有云如實無米可辦到萬分爲難之際亦可中途折回並許以兵行至西安省城爲止不再西征仍奏明專剿捻匪不剿回匪等語與之約定臣蓋鑒於金口之變故特參以活筆預爲維繫軍心之地伏乞

皇上曲賜原諒臣仍一面諄催鮑超西行得尺則尺得寸則寸總期有益秦疆不生他患

十一月鮑公在南陽整軍援秦

先是曾文正公以剿捻年餘無效引咎自責奏請 飭令署兩江總督李鴻章出駐徐州與山東巡撫閻敬銘會辦

東路幫辦軍務湖北巡撫曾國荃移駐南陽與河南巡撫李鶴年會辦西路而自請仍駐周家口居中聯絡嗣李公視師徐州曾公視師襄陽尋駐黃州文正遂於上月十三日奏稱病難速痊請

旨另簡大臣接辦軍務於是李公鴻章以欽差大臣專辦剿匪事宜奏言

諭旨以西路賊股已至同朝華陰嚴催鮑超取道入關臣前准鮑超函稱探悉陝地無食賊欲仍竄湖北覓糧過冬該營因餉解不到兵勇凍餓堪虞仍率隊由洛汝回紮南

陽昨據曾國藩咨稱據南召縣稟報賊欲竄鄖陽過冬老
湘營劉松山稟報入秦之賊已回竄盧氏霆軍仍應在豫
鄂防剿不必遽行入秦且入秦之後銀米子藥萬難接濟
各等語想曾國藩必已據實覆陳臣維嶠函古稱天險秦
中徧處榛蕪賊似無可留戀萬一深入與甯州踞回東西
相距二千餘里有劉蓉支柱其間豈能遽合旣無從掠食
則終必回竄鮑超軍勢浩大入關後糧運艱難恐生意外
之變仍宜留在豫鄂有曾國荃李鶴年爲籌轉運必可得
力應請

旨勿庸嚴促於西路全局有裨等語奏入奉初一日

寄諭西竄之賊仍在華陰一帶盤踞逼近省門劉蓉穆隆阿等疊次請兵援剿是以令鮑超一軍入關該提督不知已抵何處劉蓉雖係知兵所轄各營亦復不少而此大股悍賊一意西行回捻交乘兵分力薄實屬支持不易鮑超已否入關抑或另派援軍入秦助剿卽令鮑超於楚豫境上防賊回竄著李鴻章酌度情形仍與曾國藩隨時籌商妥辦務期萬全無失未可謂陝省有備遂可置之膜外也劉公蓉奏請嚴飭鮑超率所部霆軍迅速入關會剿以

支危局尋又具奏請 飭曾國藩改撥劉秉璋等三軍來
陝會剿仍令鮑超一軍分扼閬鄉盧氏及浙川之荆子關
等處截其去路亦不難悉數聚殲奏入奉初五日

寄諭鮑超一軍旣未入關著曾國藩李鴻章檄飭劉松山
劉秉璋楊鼎勳分道前進鮑超一軍卽令分扼閬鄉盧氏
及浙川之荆子關一帶務須痛加剿洗毋再與賊相左致
誤戎機文正自上月二十七日檄鮑公入秦其奏疏至初
七日始入奉初八日

寄諭現據曾國藩奏稱劉松山一軍已令在汝陽州截擊

東股捻匪並至陝州與晉軍夾河設防楊鼎勳一軍現在
陳州所屬追賊是該二軍能否迅速入秦尙未可定鮑超
一軍旣由曾國藩檄令入陝卽著飭該提督星夜兼程前
進總以迅速援秦爲主不可稍涉遲疑如鮑超能卽入陝
應嚴申軍律毋任將士擾累所過地方李公鶴年奉十八
日

寄諭陝省華陰踞匪向西南遁去究向何路奔突鮑超駐
紮楚豫之交自可就近要擊著李鶴年卽催鮑超探蹤剿
洗毋悞戎機鮑公自奉文正入秦之檄於十一日奏言欽

奉

諭旨飭臣入關迅速進剿亟應倍道馳往力加剿除以期
仰副我

皇上軫念西陲之至意適准兩江督臣曾國藩函咨以該
逆不久必仍回竄鄂豫囑臣暫緩入秦且恐入秦之後銀
米子藥萬難接濟昨復准來咨因慮賊深入秦境令由鎮
內浙川進荆子關以達商州如賊已遠去亦進至西安省
城爲止霆軍係奏定剿捻之師不必與回匪接仗現已咨
商山西撫臣代辦米糧由黃河舟運入秦接濟如無糧可

食萬分爲難卽在中途折回等語伏念用兵之道宜思萬全若不慎其難於前斷難善其事於後秦省頻遭回擾民鮮蓋藏大軍從內浙進征山路崎嶇萬難攜糧而行勢不得不就地籌辦聞秦中米麪價昂難於購買此時在豫因距江西太遠營中常懸三月餉銀難以解到一入秦境則相去更遠轉運愈難山西地瘠民稠本地居人尙資糧於鄰省安望接濟秦中况值此嚴冬河凍雖有舟楫亦難濟急臣再四思維與其將來缺糧至中途而折回不如此時籌畫萬全而後發計自率師轉戰大江南北十有餘年從

未以兵食爲慮者因處處河運可通而各路餉項較近不難由營自行採買惟上年進征粵東因山徑崎嶇糧運不易故於江右未發之先卽咨會江西撫臣設立數百里轉運直連粵界又咨會廣東設立轉運數百里由江界接替均四十里一局局養長夫直連大營並由粵省多派幹員各路採辦米糧而江粵兩省均照所議於十日之外將轉運設齊每日來營運送糧米及軍火子藥絡繹不絕糧價運腳均由粵省自行發給將士目覩莫不奮興當轉運未設以前人或疑進兵稍遲及轉運旣設到防不及十日仰

賴

天威一戰克捷卽能將東南一律肅清亦賴先有此一番籌慮耳卽此次由鄂赴豫轉運係兩省共相籌辦米麪則全賴河南撫臣李鶴年預飭經過州縣寬爲豫備從無缺乏當此隆冬督軍入陝將士之辛苦與夫米糧之昂貴轉運之艱難皆數倍於粵豫除已迭次咨商陝西撫臣籌辦轉運米糧外合無仰懇

天恩飭下陝西撫臣於入秦處所接連安設轉運局直抵大營並多派委員督飭經過地方官寬備米麪料豆其糧

價運腳均飭由秦發給卽使營中餉到稍遲亦免臨敵缺糧之累臣得專意勦賊不爲他務紛紛前買戰馬頭起甫經到宛二起馬匹三五日亦可到營現在急於援陝亦難待馬隊訓練純熟昨據督辦豫省轉運道員蒯賀蓀稟報江西協餉業已抵信陽臣已派兵星馳迎提俟此起餉到卽督全部由內浙前進從此當窮賊所至無論在豫在秦見賊卽勦無論是回是捻總期勉竭駑駘迅掃欃槍以慰宸厪奏入鮑公與曾文正公李公鴻章等同奉十九日寄諭鮑超一軍現由內鄉浙川馳援關中山路崎嶇難於

裹糧而行秦省米麩昂貴採買維艱非由各地方官就地先備米麩及馬匹所需料豆不足以利師行著李鶴年迅飭豫省地方官將應需糧米等項寬爲預備此軍糧米事宜本係鄂豫兩省共辦且荆子關本有鄂省設立糧臺轉運各省餉需如該軍經過浙川內鄉山路中有須設局轉運之處卽著官文會國荃與李鶴年會商籌辦不可互相推諉致誤師行喬松年劉蓉於該軍經過秦省地方預行籌備糧麩等項就地發給毋任缺乏所有運腳等項卽由秦省籌發其沿途師行經過及駐紮處所應如何設局節

節轉運及預行屯糧給發之處並著喬松年劉蓉按照鮑超江粵設局轉運之法斟酌陝省情形妥速籌辦曾國藩李鴻章檄令鮑超卽行起程入秦窮賊所向盡力追剿毋再延誤鮑超原摺著各抄給閱看時曾文正公奏卸督師關防請以散員留營幫同李公鴻章照料摺內有維繫湘淮軍心等語另摺奏言臣前派鮑超一軍援秦旋接鮑超來文瀝陳入秦之難有三一在米糧之難辦一在餉銀之難解一在回匪之牽掣兼以口馬尙未到齊擬在南陽陸續操練一俟馬隊練成陝省米糧轉運等事布置周妥再

行入關且引上年進援粵省爲證謂粵省大吏一面催援
一面代爲豫備糧草轉運照料客軍至爲周到等因請臣
代爲陳奏臣詳閱該提督所稱均係實在情形惟所慮之
三端回匪牽掣一節雖屬意中之事然臣前次檄文內詳
言專剿擒匪不剿回匪業經奏明此時無庸預慮餉銀難
解一節該營餉項以江西爲大宗路途太遠轉折太多自
難免停軍待餉之憂臣已咨商劉坤一格外趲早一面咨
請河南陝西兩撫臣設法按站接解當不至十分遲誤米
糧難辦一節則爲軍中最要之事查有陝州靈寶縣丁憂

在籍之前任蘇州府知府薛書常熟悉秦晉豫三省交界情形臣已派該員就近稟請山西撫臣領銀三萬兩商之臬司陳湜就地購糧接濟霆軍並以軍士入秦艱苦其買糧之價由臣籌款另發一箇月不扣勇丁月餉一箇月之外續辦糧米由臣加價一半在勇丁月餉中酌扣一半事
事籌畫清晰咨復鮑超復稱俟接江西協餉日內即可赴秦矣查署陝西撫臣劉蓉先經疊催鮑超入秦嗣又奏請改派劉松山劉秉璋楊鼎勳三軍入秦不知各軍前在洛
陝未能赴秦先後退回者皆由米糧太缺之故若秦中米

糧有著則劉楊等軍可往鮑軍亦可前往現在劉松山一軍業已馳赴汝洛與陳湜協防黃河力扼賊竄晉省之路楊鼎勳一軍駐防周家口劉秉璋一軍經臣調回山東因行至睢州遇任賴等逆回竄跟蹤追剿四百餘里現經李鴻章調赴清江接防成子河等處此三軍者一時均難更動惟鮑超一軍人數較眾約束亦嚴今又爲之酌加米價廣辦軍糧自不至更有他虞應請

旨飭下河南撫臣李鶴年行知薛書常本籍催令赴晉領銀并請

旨飭下山西撫臣趙長齡迅籌銀三萬兩發交薛書常採辦米糧以濟軍食山西所籌銀兩或由應協臣餉項下扣抵或由臣另籌解還仍如上次所奏辦理遑軍入秦後離臣一千餘里離李鴻章二千餘里似應由提臣鮑超自行奏報軍情庶

朝廷之見聞較速調度較靈並懇於寄信

諭旨中許以專剿擒匪不剿回匪俾鮑超得以安慰軍士之心免生意外之變等語奏入鮑公與文正等同奉

寄諭鮑超一軍前已疊諭飭令速行赴秦現經會國藩布

置周安卽著照所議辦理薛書常籍隸靈寶卽著李鶴年飭赴晉省並著趙長齡趕緊提銀三萬兩交薛書常收領與陳湜購辦糧米接濟鮑超軍食李鶴年仍於霆軍經過處所飭地方官備辦屯糧及轉運事宜以免缺乏喬松年於秦省預辦糧運源源接濟毋令該軍停兵待食現在西股捻匪已逼西安省城待援孔亟著曾國藩李鴻章嚴檄鮑超星夜兼程赴援鮑超西行餉米均已不患缺乏該提督自當奮勉立功將捻股力行掃滅此次援秦專爲剿捻而設並非令其剿辦回匪該提督當鼓勵兵將視捻所向

力加勦洗毋稍疏懈時陝撫喬公松年奏陳陝省軍情鮑公與曾文正公等同奉二十八日

寄諭捻逆在陝省盤踞已久難保不與回匪勾結務須嚴加堵截毋任合併爲患陝軍力本單薄捻股人數眾多情形萬分危急著曾國藩李鴻章嚴飭鮑超一軍就近兼程入陝探蹤力勦並著將該軍餉需迅速籌撥以利進行此時鮑超諒已起程該提督當立意前進奮勉圖功如中途遷延且前且卻藉故逗遛則貽誤大局咎有專歸懍之慎之鮑超一軍兵力頗厚足敷勦辦毋庸另調淮軍皖軍致

稽時日喬松年劉蓉當就現有兵力提催鮑超全軍妥籌防剿文正自上月檄霆軍入秦時覆劉公蓉書云秦中米糧奇貴將士視爲畏途鄙人恐霆軍偶缺糧食遽生事端不欲奏令入秦反爲閣下之累亦因旬餘探報均稱賊卽回竄自後五日未接回竄之信乃檄霆軍由荊子關入秦春霆之不願赴秦蓋有數端一則患米糧無出二則畏回匪牽連三則懼歸左帥調度凡人各有隱衷不能不曲爲體貼而缺糧尤爲切膚之痛故於公牘中酌參活筆到萬分爲難之時聽其中途折回蓋亦不得已而出於此等語

至是爲鮑公奏請入秦後專摺奏事尋復鮑公書云該逆
久踞華陰秦兵失利現由赤水西去圖犯西安距省僅五
十里閣下務宜迅速啟行由商州探明捷路直趨省垣安
慰省城之人心俟抵秦後遮其西面無令入蜀或驅之東
還陝洛與湘軍會合夾擊或驅之南竄鄖陽與鄂軍會合
夾擊較易收拾閣下自行奏事及不期回匪兩層僕已於
十七日專摺奏明另咨冰案閣下雖可奏事但須十分謹
慎不可亂說一句若任意妄說言不當理或觸 聖怒不
准再奏則反失台端之體面又負鄙人之期望矣國藩道

光末年在京上疏頗有鋒鋦自出京後在軍十四年所奏之摺無一語不樸實無一字不謹慎卽如此次因軍務不順請開 欽差江督各缺並非得意之時而所奏兩摺兩片仍字字謹慎茲特抄寄一閱從古居大位立大功之人以謹慎敗者少以傲慢敗者多閣下千萬記之鄙人老病日增本難再辦軍務所以屢奏請開各缺而仍乞以身留營者徒以捻匪未平此心難安又以閣下一軍相從日久僕遽離營恐貴軍爲人掣肘被人指摘雖少荃宮保暨舍弟皆與閣下至好而鄙人猶不甚放心數月之後閣下與

少帥共事水乳交融則可放心矣貴軍聲威素著所可慮者尙有數端一則軍中少明白公事之文員於米糧轉運等公牘不甚詳明又不能預先料理二則今年在鄂豫境內紀律嚴明恐入秦後百物昂貴又復騷擾三則貴軍向不分兵秦中山多之處較之祁門更窄不特三千匹馬無處安放卽萬餘步隊亦鮮紮營之地必須善看地勢善於分兵乃不致擁擠吃虧此三者閣下宜時時留心無論行至何處均須多派幾起人看路至囑至囑

十二月鮑公由南陽移軍援鄂尋議入秦

鮑公於初三日在南陽營次奏言欽奉

諭旨令臣軍速行赴秦臣先因秦中米糧轉運應照上年江粵章程辦理由陝西撫臣轉飭地方官預爲籌備旋准兩江督臣曾國藩來咨特派江蘇候補道薛書常在陝西代辦糧米並囑臣俟辦有端倪再行前進臣惟恐由晉領銀赴秦辦米往返不免耽延又因疊奉

諭旨催令西行迫於星火是以先後六次羽書諄懇陝西撫臣劉蓉就近籌辦米糧轉運至本月初二日始准新任撫臣喬松年及劉蓉會咨允許代辦並稱捻逆竄擾藍田

輞川藍橋各處現檄各軍張兩翼前進步步爲營業經屢
獲小捷誠恐該逆被剿情急由鎮安以竄興郡則湖北鄖
襄皆爲震動除飭陝省各軍奮力剿擊外擬請分撥得力
步隊六七千扼駐鎮安以截分竄之路仍留大半駐紮荆
子關以防回竄等因臣正擬於初三日拔隊前進初二日
亥刻准湖北撫臣曾國荃八百里羽書以東路捻逆已由
黃孝竄至德安檄令楚中各軍或跟蹤追剿或迎頭截擊
誠恐賊眾日間相持夜則避兵而行或由隨棗北竄唐泌
或由棗襄窺伺鄖陽飛商臣應如何嚴加防範同日據安

襄鄖荆道崔蘭馨稟稱東路之賊已竄鍾祥舊口襲家集等處距襄屬流水溝不遠日夜狂奔有上竄之勢同刻並淮會國藩咨稱因淮湖北撫臣飛咨知賊上竄德安逼近襄棗蹙軍如已拔營卽無庸回顧如未起程卽在南陽附近數十里內會剿其期殲滅各等因查陝西咨內情形不過欲臣前往防堵且旣屢獲勝仗是西股賊情現已稍鬆楚中則鍾京一帶逆氛蔓延襄鄖等處尤形空虛此會國藩所以欲臣會剿也臣熟計緩急宛南距秦千有餘里至楚祇一二程耳况張牛任賴同一叛逆秦中楚中莫非王

土再四籌思未敢以奉有

成命在先自存拘泥舍近圖遠轉似避賊而行迹近取巧第該逆慣避兵而行宛南駐有大兵附近數十里內未必敢犯與其駐兵待賊不如前進夾擊聞任賴逆股上竄甚速如必候奏奉

諭旨然後前往誠恐緩不濟急用特不揣冒昧暫行變通辦理定期於初六日卽率全部由新野迅赴楚疆相機夾擊以遏其西竄之路如能先將此股就近殄滅然後專意西征以慰

宸廑奏入鮑公與曾文正公李公鴻章等同奉初九日

寄諭張總愚股匪有循南山竄興安之信鮑超因等候軍
餉尙在南陽著曾國藩李鴻章催令迅速進剿不准再有
遷延致誤戎機正在寄諭間復據官文鮑超馳奏任賴等
逆竄至雲夢等處相繼失守曾國荃駐紮德安統帶兵勇
不少調度無方致令該逆如入無人之境不知所司何事
著傳旨嚴行申飭鮑超已由新野赴鄂該提督數月以來
從未接仗此次統軍赴鄂距賊甚近若與湘淮諸軍前後
夾擊卽可就地殄除斷不准徒託空言復任他竄陝西張

總愚股匪現在情形是否窺伺興安一帶鮑超業已先行赴鄂其陝西軍務著喬松年劉蓉督軍追剿毋得專待客兵該省前因官兵挫敗久未接仗鮑超所稱屢有小捷之信未免藉詞掩飾稽留著該提督於鄂豫之交迅殄醜類後仍卽折赴陝中會剿不得稍有趨避致損軍威同時李公鶴年陳奏軍情奉十二日

寄諭逆蹤已竄天門其西南有江漢之阻現在鮑超一軍業已入鄂著譚廷襄曾國荃督飭郭松林張樹珊劉銘傳等各路之兵三面兜圍務須就地殄除不准再有竄逸會

國藩李鴻章卽檄鮑超援鄂之軍實力會剿盡殲醜類不得稍有退縮譚公廷襄奏報防剿情形奉十三日

寄諭鮑超一軍諒已抵鄂距賊不遠當可接仗並著曾國藩李鴻章催令迅速進剿毋再遷延譚公又以陝賊回竄南山恐其與鄂賊聯絡西逼川疆東擾楚境因奏請嚴催霆軍迅速進兵商南商州斷陝賊入楚之路鮑公與譚公等同奉十六日

寄諭鮑超一軍現已拔隊入鄂卽著該提督視賊所向認真剿辦先將此股殲除則陝賊勢孤不難撲滅勿再遷延

瞻顧與賊相左徒勞跋涉也鮑公自奏明移師赴鄂卽日拔隊於初九日軍抵棗陽劉公銘傳張公樹珊等軍亦向隨棗進發於是楚軍淮軍集於湖北境者凡七萬餘人賊見援兵大至疾馳東趨鮑公因與各軍分途追剿時曾文正公批復鮑公云此次貴爵軍門自行奏明先剿東股仍未與賊一遇朝廷必不以爲然本部堂籌畫月餘無兵入秦尤覺無以對秦人貴爵軍門能將任賴痛剿數次庶幾上可以對聖主下可以免物議一切進兵之機宜就近與曾爵部院隨時熟商本部堂與李爵大臣均不遙制

等語當鮑公於初三日奏請移師赴鄂曾公國荃亦於是日有請改遷軍回援鄂省之奏及賊東趨黃孝一帶又與譚公廷襄奏請仍令遷軍入秦而文正自聞遷軍回援鄂省則已改檄劉公松山入秦矣至是奉二十七日

寄諭鮑超一軍著曾國藩李鴻章飭令由潼關大路入陝會合劉松山等在同朝一帶盡力截剿鮑超等軍入秦後著喬松年轉運糧米以資軍食同時鮑公亦奏言臣前因東股捻逆逼近襄棗曾奏明移師赴楚會剿拜摺後卽於初六日由南陽拔隊行抵新野聞流水溝之賊全行遁回

鍾祥舊口一帶因倍道前進初十日馳抵棗陽之平林店
距鍾祥僅一百七十里其時前發探馬因師行甚速回報
不及適據鍾祥縣訓導楊承先函稱鍾祥舊口之賊於初
六日全行遁往隨州臣因該訓導此信係由鍾祥所發定
屬確實且計該逆竄逾四日之久深慮已過隨境當卽改
道兼程馳往以便迎頭截擊乃將抵隨州始知該處並無
賊蹤據本營探馬回報該逆實未他竄仍盤踞鍾祥舊口
一帶築牆修壘意圖在此度歲因迅速回軍於十八日冒
雪趕行至安陸府城而賊已於十三日由天門應城遁回

黃孝而去查該逆刻已遠遁數百里而提臣劉銘傳江蘇
臬司劉秉璋南陽鎮總兵宋慶及提督周盛波張樹珊等
軍現已陸續會集是楚中兵力已厚臣自應遵奉前
旨趕緊入陝進剿西路之賊以慰

宸廑惟士卒連日奔馳又值大雪不止擬休兵二日定於
二十一日自安陸府拔隊由樊城至荆子關直達秦省探
明賊蹤痛加勦洗奏入奉二十九日

寄諭捻股遁走黃孝距該軍已數百里劉銘傳等軍俱陸
續會集是鄂中兵力已厚現在陝西捻股麇聚待援孔亟

著該提督懍遵二十七日寄諭趕緊入陝如何路徑捷卽由何路前進總期探明賊蹤迎頭截擊痛加勦洗毋得徒事尾追再致與賊相左縱逆氛而疲兵力該提督自問上何以對朝廷下何以安黎庶也懍之慎之喬公松年尋奏言陝省湘果英毅雄毅定中等營於十九日大敗於灞橋惟候補道黃鼎自整所部彝字三營六成隊伍突圍而出傷亡較少其餘將領不知下落賊勢西趨鄂蓋省城文報梗阻等語奏入鮑公與曾文正公等同奉三十日寄諭覽奏曷勝焦急此時非有大枝勁旅星夜赴援陝事

將不可問曾國藩李鴻章於擒匪竄陝以後將及兩月所
調各軍並未到陝鮑超一軍屢經諭令赴秦遷延逗遛致
令陝省糜爛至於此極昨據鮑超奏稱已定於本月二十
一日由鄂省安陸起程取道樊城荆子關入陝若再中途
遲延該提督自問當得何罪懍之是月初九日鮑公接准
軍機大臣咨寄奉到年終

恩賞福字一方鍍金銀錢一對鍍金銀錠二對大荷包二
個小荷包四個奶糕五斤奶餅五斤桂元三斤蓮子三斤
掛麩十斤白合粉五斤藕粉五斤

卷十一終

遼軍紀略卷十二

銅梁陳昌世五編輯

門人吳樹棠全校字

王澤

丁卯同治六年

正月遼軍擊賊於楊家澤永隆河等處大破之追剿至豐樂河等處復連破之東捻幾滅

鮑公與曾文正公李公鴻章李公鶴年等同奉初二日

寄諭捻匪竄過渭北擾及三原高陵勢將東偪同朝鮑超一軍著兼程入秦痛剿逆氛勿再遷延亦不可以驅賊入

晉爲卸責奮勉圖功毋干重咎並著李鶴年籌運糧米接濟援陝諸軍毋得稍分畛域先是郭公松林張公樹珊於上年十二月先後在鄂境挫敗張公死之譚公廷襄曾公國荃奏言霆軍前因賊竄孝感追之不及業已回駐樊城欽奉

諭旨飭鮑超在鄂會剿任賴大股臣等已飛咨該提督迅速拔營從棗陽東下安陸相機進剿等語奏入鮑公與譚公等同奉初四日

寄諭鮑超一軍前已奏報起程入陝現在陝省正須勁旅

協剿未便朝令暮改再令赴鄂曾國荃雖久在軍營頗少
定見鮑超毋得藉端折回徒奔馳於無賊之地致悞事機
初九日國子監祭酒車順軌奏言陝西在籍紳士等函稱
省城被圍勢極危急所望鮑提督一軍西來救援奈因鄂
警返旆若救援稍遲關輔將不可問應懇

天恩卽飭提督鮑超迅速赴援以救生靈而保關輔奏入
鮑公會文正公李公鴻章等同奉

寄諭前經疊諭鮑超帶兵入陝諒已遵旨赴援刻下陝西
各軍新潰招集未齊著曾國藩李鴻章迅催鮑超劉松山

等兼程赴陝相機進剿仍兼顧山西河防慎勿驅賊入晉
鮑超一軍前諭徑行入關毋庸回鄂不得再有觀望致干
重咎維時鮑公已先於初二日奏言臣遵

旨率師赴陝二十一日自郢城拔發途次接曾國荃來咨
以捻逆遠遁黃孝業經奏明令臣軍入陝進剿張總愚股
匪與臣前奏意見正合詎軍抵樊城又連接曾國荃羽書
賊被官軍攔擊回竄鍾祥舊口一帶楚中主客各軍皆成
尾追之勢東路要隘已有兵嚴防特留臣在樊城專顧西
路一面此年前二十七日事也因卽暫駐樊城一面專弁

往探該逆於二十九三十兩日由安陸沿隄上竄直河二
神廟研盤山一帶而初一日午刻已至襄陽所屬之王家
集本日卯刻全股突至霸王山下距樊城僅六十里臣聞
信之下不勝憤懣該逆旣逼樊城牽掣我軍不能西向亟
應就近先剿此股除飛商曾國荃迅派大軍赴隨棗一帶
擇要嚴防外臣卽日拔隊馳往仰賴

天威能將此股全數撲滅庶得專意西征實爲萬幸惟該
逆狡悍異常慣於避實擊虛倘仍逞其故技於官兵未到
之前復又遠遁屆時或應窮其所向專剿此股抑或仍赴

陝中進剿西路之處臣未敢擅專合無仰懇

天恩指授方略俾臣得有所遵依銳意剿賊誓當勉竭駑駘仰報

高厚於萬一奏入與譚公廷襄曾公國荃同奉初十日

寄諭鮑超一軍數月以來僕僕道途未遇一賊前據曾國荃奏援軍陸續到鄂鮑超一軍可令入秦朝廷亦因陝西望援孔亟是以疊諭星夜迅速入關該提督既報起程又爲曾國荃奏留何以朝令暮改茫無主見若是鮑超如已遇賊接仗自當酌度軍情辦理如賊又遠颺仍卽懷遵本

年正月初一初四初九等日諭旨迅速拔營兼程援陝勿再游移觀望湘淮各軍均集楚境著譚廷襄曾國荃妥爲調遣嚴扼隨棗襄樊設法殄除以副委任曾公國荃等於未接奉此次

諭旨時又有請留霆軍之奏奉十四日

寄諭鮑超一軍疊次諭令入秦曾國荃復令在鄂會剿實屬毫無主見徒令該提督跋涉道途迄未遇賊一擊老師糜餉莫此爲甚著仍遵前旨迅飭赴援秦省卽已與賊相持湘淮各軍均在鄂境儘可妥爲調度禦賊狂竄曾國荃

屢託空言殊無把握若僅以奏報鋪張敷衍搪塞該撫自問當得何罪時李公鴻章奏言臣查任賴等股流竄鄂中趨向不定初欲由安陸竄襄樊與秦賊句合賴鮑超扼之聞鮑超於初四日自樊城拔隊南下曾國荃以任逆如再竄陝爲患更烈擬暫留鮑超在豫鄂之交來往扼塞俾淮軍逐賊而東庶賊分而糧運較易似亦老成之見奏入奉二十五日

寄諭劉松山一軍援陝在魚化鎮獲勝惟兵力尙單亟須鮑超入陝援應前已迭次嚴諭此軍入陝曾國荃何得任

意留住鄂境著李鴻章懍遵前旨嚴檄鮑超剋日拔隊西
行不得抗違致悞大局郭張兩軍之相繼敗挫也曾文正
公致李公元度書云捻匪勢極猖獗善戰而不肯輕用其
鋒非官兵與之相逐相迫從不尋我開仗戰則兇悍異常
必將馬步層層包裹困官軍於垓心微有不利則電掣而
去頃刻百里故我有大挫之時而賊無吃虧之日其難辦
有數倍於長毛者不謂衰憊之年遇此棘手之事恐湘淮
各勇均不能了此賊身名不足惜大局殊可憂又致李公
鴻章書云春霆省三二人平日皆視賊太輕閣下亦頗易

視此虜僕觀僧邱屢勝之餘自九里關呂堰驛羅山數敗
之後而遂難再振湘淮各軍亦本爲賊所畏自三月初六
初七奪我炸礮洋鎗嗣後不復畏我云云此去年十二月
語也省三劉公銘傳字鮑公經曾公國荃奏留並自行奏
明後卽於初八日督兵趕至郢城捻逆已遁往舊口忽接
曾公函稱下游東北兩路要隘均已派有大軍囑與劉公
由西路進剿適奉兼程援陝 嚴旨鮑公以爲賊牽制不
能拔隊西向正深焦急而劉公追賊亦抵郢因與熟商俟
雨雪稍住卽分兩路夾擊十三日天雨微小鮑公率軍沿

河直向舊口賊已先遁楊家澤拖船埠尹隆河一帶盤踞村館百餘里於是鮑公軍舊口劉公軍下洋港十四夜彼此函商約定十五日兩軍同時分路進剿及日辰刻鮑公督隊將抵楊家澤而劉公已率軍先進被賊馬步包裹軍士紛紛敗潰損折將弁兵勇甚多輜重亦失鮑公急催隊接應見馬步賊眾排列三十里密布數十層馬賊分三路左右兩路從旁十里外包裹而來每路約數千騎中路則橫列步賊之後層層并進兇猛異常鮑公令提督宋國永帶同總兵陳由立史宗興鄒連陞向世珍提督曹志忠分

帶霆正五營總兵胡良作領總兵袁國祥提督蕭連貴參將羅天貴總兵黃海清分帶霆副五營並由中路前進以提督曾成武領總兵孫玉林張有鳳黎大海副將孫興發分帶霆春五營副將程扶鼎帶親兵營策應之提督唐仁廉領總兵徐連陞江自康參將閃連陞分帶霆正馬隊四營由左路進以提督鄧訓誥副將戴宏勝帶霆新中左二營策應之令提督譚勝達領總兵章茂李定明副將湯順分帶霆新馬隊四營由右路進以總兵楊謙萬羅進春帶霆新右前兩營步隊策應之又令總兵楊德琛領總兵鄧

榮佳張再勝參將臧德分帶霆副馬隊四營作游擊之師
賊見我軍分路迎敵先以步賊奮力來犯我軍步隊各營
鎗礮齊施刀矛并進鏖戰一時之久賊之前隊已敗後隊
復蜂擁而來宋國永胡良作袁國祥羅天貴黃海清蕭連
貴等奮勇直前先擊敗中路左偏步賊陳由立曹志忠史
宗興鄒連陞向世珍等遂大呼陷陣擊敗中路右偏步賊
中路後之馬賊數千馳前接應曾成武孫興發孫玉林張
有鳳黎大海步隊急起接戰各奮生力用連環鎗礮步步
前進賊馬多傷楊德琛等之馬隊從夾道而入縱騎乘之

維時左右兩路馬賊包抄我軍之後者愈進愈眾鄧訓詣楊謙萬等步隊各以進步連環鎗礮轟擊騎賊多應聲落馬唐仁廉譚勝達等之馬隊乘勢前衝已抄出賊後兩路馬賊見歸路已斷惶顧返走鮑公督令各軍一齊奮力猛進賊不支各路同時大敗勢如土崩瓦解我軍馬步四路圍剿追殺六十餘里將楊家澤拖船埠尹隆河等處賊館數百盡行踏毀時久雨之後沿途河港泥淖甚深賊挺險陷溺而死人與騾馬重疊積壓處處盈溝滿壑約其斃賊萬餘生擒老賊八千餘名救出裹脅難民數萬奪獲騾馬

數千旂幟器械山積鮑公以捷聞並奏言據獲賊供任懷
邦受傷甚重賴文光不知下落臣軍尤爲出力文武員弁
或由臣彙冊咨送兩江督臣曾國藩暨江蘇撫臣李鴻章
抑或就近送交湖北撫臣曾國荃奏請獎敘之處伏乞
訓示祇遵奏入奉二十五日

寄諭劉銘傳鮑超先後進剿將賊擊退官軍追殺六十餘
里斃賊甚多辦理尙爲奮勉任懷邦賴文光是否殲斃著
曾國荃查明具奏楚賊已屬無多兵力足敷剿辦尙不趕
緊肅清再致竄擾惟曾國荃是問鮑超一軍仍著迅速援

陝該提督所向有功不得因循自悞入關以後軍情咨報左宗棠具奏此次陣亡之總兵陳永康王開國副將劉金山參將張金魁游擊李宏勝李占彪力戰捐軀均堪憫惻著交部從優議卹以慰忠魂鮑超所請保獎打仗出力人員著覈實開單知照李鴻章奏請獎勵毋許冒濫是時曾文正公未知鮑公已進兵舊口也奏言剿辦流寇不可以無定之賊蹤改已定之成局鮑超一軍前經議定援秦不應於十二月初三日奏改援鄂既已援鄂則鄂事未清不應遽奏赴秦該提督急於立功曾國荃亦無定見遂有前

後互異之處疊奉

諭旨飭責洵屬明見萬里無微不照臣在歸德途次聞任
賴亦有入秦之意恐鮑超從荆子關援秦潼關一路空虛
萬一任賴西趨汝洛則秦晉兩省均屬可慮已於初十日
檄令鮑超緊躡任賴一股無令再竄秦中凡賊在開封以
西如許州南陽汝甯境內均與之縱橫馳逐如任賴至汝
州河陝等處亦卽跟蹤西行藉助晉省河防爲陝省援師
之繼頃來徐州與李鴻章熟商亦謂現僅劉松山一軍入
秦糧運已極不易若使任賴續竄陝省則各軍皆須赴秦

以四五萬人之糧餉從江南運至陝西勢必竭蹶貽誤自
應暫留鮑超一軍於豫省攔截任賴不使西竄俟任賴一
股賊情稍定後再行奏調霆軍赴秦乃爲穩著奏入奉二
十七日

寄諭鮑超一軍已在楊家澤大獲勝仗昨據該提督奏報
仍督軍進剿現計旬餘諒可次第殄滅湖北兵力已厚劉
銘傳等軍當已足敷剿洗陝西軍情萬緊劉松山一軍勢
尙單薄鮑超仍須迅速援秦以資得力該軍糧運仍著該
督源源接濟毋令有所藉口譚公廷襄曾公國荃奏言任

賴大股自入鄂後往往避兵疾趨此次經鮑超率軍追及大挫兇鋒實屬異常出力應懇

天恩准將鮑超所部有功員弁彙案保獎以示鼓勵奏入奉二十八日

寄諭覽奏各情與鮑超前奏大略相同鮑超所部打仗出力人員已諭該提督知照李鴻章奏請獎勵矣自尹隆河大捷後鮑公卽於是夜四鼓拔隊進追黎明軍至多寶灣賊遙見旗幟倉皇上遁四散狂奔經湖北副將唐瑞廷之戰船沿河轟擊追師一路斬殺逼入河港溺斃者甚眾十

七日追至鍾祥所屬之池河其地有橫港一道賊之未渡者經唐仁廉譚勝達馬隊追及斬殺及溺斃者千餘敗匪合股竄至豐樂河不意我軍乘夜跟追也均於豐樂河周圍村館歇宿屯住二十餘里鮑公於三鼓時趕到急令譚勝達楊得琛等率馬隊八營分道由山邊抄出賊前令唐仁廉等率馬隊四營暗抵賊巢令曾成武陳由立胡良作鄧訓誥等率步隊二十營各向村館一帶四面埋伏令宋國永程扶鼎謝榮勝等率親兵馬隊循環策應鮑公舉動號令唐仁廉徐連陞龍太勝等由豐樂河街口奮勇衝入

直擣中堅賊從睡夢中驚起倉皇失措多駢首就刃並斬賊首僞朝將顧崇榮逆眾拋棄騾馬器械紛紛奔竄各村館之賊同時驚走譚勝達楊德琛之馬隊攔頭截殺賊正奪路狂奔而曾成武等之伏兵四起分隊圍殺伏屍塞路血流有聲計斃賊六七千人投河落港者無算其逸出者獸駭鳥散翻山越嶺而奔時天甫曙也我軍乘勢抄殺四十餘里至雞鳴山於菟山沿途斃賊約四五千人生擒三千有奇逃出脅從盈山滿谷至晚鮑公仍督各營乘夜由三合寨板凳岡田家集各路分追賊於十九日奔至河邊

之王家集一帶經副將龍藻琦陸成祖師船沿河轟斃頗多而唐仁廉譚勝達楊德琛等之馬隊跟蹤緊追由老營寨東津灣八條岡抄出賊前攔擊殲斃尤眾賊折回向霸王山逃走馬隊營官章茂湯順等衝突過猛窮寇拚死抗拒致弁勇頗有損折適遇鮑公親督步隊由山中追賊繼至揮軍分投掩殺殄賊無數追逐五十餘里適湖北提督江公長貴與道員唐協和率所部協同追剿均有斬擒計自十五日大破逆眾後連日夜追殺又斃賊一萬數千有奇生擒四千餘名內有僞天將朝將丞相檢點等三百餘

名賊因畏避追師不敢停頓由隨棗交界一帶向泌陽桐柏等處遁去鮑公於二十三日報捷並奏言據擒獲賊酋並任懷邦賴文光李允之妻供稱此股捻逆糾合精悍原多騎賊居半合計不下十萬之眾議欲以一股偷渡襄河循荊州宜昌上犯川境以一股屯住湖北爲聲援以一股入陝與張總愚股合併倘各路皆不得手又不能竄回潁亳一帶解散歸家則共趨秦中勾連回匪以成負隅之勢等語該逆詭計已可概見今旣受此大創四路狂奔必無定所我軍連日晝夜奔馳人馬疲乏因暫收隊樊城稍爲

休息俟鍋帳到齊再覘向前進臣再四籌思該逆尙因受創之餘驚竄疲乏暫在南汝之交稍息殘喘臣仍當乘勢進剿仰賴

天威或能先將此股敗匪全行殄滅然後專意入陝剿辦西股如該逆東竄已遠臣卽便整隊西行奏入奉二月初二日

寄諭該提督勇於立功所向克捷實爲奮勉惟賊數不下十萬鮑超旣已與賊相持自不能舍而之他該逆現由泌陽桐柏竄去鮑超若已入豫著卽整隊前進會合豫鄂諸

軍將此股全行殄滅並著曾國藩李鴻章酌度軍情如任
賴股匪鮑超一軍足能戡事卽令該提督暫紮鄂豫之交
先將此股辦竣倘賊蹤東竄已遠卽檄令該提督仍遵前
旨迅速入秦軍情旦夕變遷朝廷不爲遙制曾國藩李鴻
章務當權衡緩急統籌大局不得置陝事於膜外曾國荃
於湘鄂諸軍毫無調度糜餉老師又於鮑超一軍援鄂援
陝朝令夕更茫無主見鮑超雖疊獲大捷而曾國荃所部
各軍竟如坐視倘再不知激勵將士振刷精神致援陝之
軍日久爲賊牽掣或陝事因之日壞該撫豈能當此重咎

耶鮑超此次追賊出力文武各員著彙入前案咨明李鴻章奏請獎勵其陣亡之總兵章茂金明亮副將楊明德湯順黃先芝黃光立謝九和參將賀高志黃起勝游擊范金福劉開勝都司王景雲梁景陞守備王有田何玉方馮春元千總周歲福鄭友才把總余登祥李鳴洪均著交部從優議卹時曾文正公復京外各友人書云捻匪狡詭善戰鄂軍屢挫秦軍大潰幸春霆大捷於楚北劉壽卿獲勝於關西僕與少荃新舊交替之際得此聊以解嘲然捻黨兇悍異常饑民從者日眾巨患方長偶有勝仗不足爲喜云

云壽卿劉公松山字初文正於鮑公自奏移剿東股之時復山西臬司陳湜書云霆軍如果能將東股痛剿亦是一法但春霆多此波折致鄙人失信於秦殊深憂愧後復李公鴻章書云劉松山拔營援秦河陝空虛請閣下於劉楊周張四軍中撥一二軍協防陝州將來續爲入秦剿張之地留鮑軍專辦東股一則霆軍不願西征恐生金口之變二則恐人疑閣下重淮而輕湘亦不可不略避嫌疑以示大公尋又致書云春霆一軍鄙意欲留之東路閣下出省後一切皆應由左右主持此是最大關鍵請煩妥籌迅速

見示至是李公奏言臣部各軍在鄂數月遠役疲乏急切未能趕到豫境銘樹兩營新挫亦須休息整頓目前別無可調之軍曾國藩前檄鮑超緊躡任賴一股實屬切中事機應令鮑超迅督所部由豫西兜擊等語時文正復李公書云頃奉

寄諭已令霆軍先擊任賴一股想接尊疏後益不强霆軍西征矣目下賊勢任賴實較張酋爲強人亦較眾銘樹新挫鄂軍未振自應留鮑軍久勦東股大局私情均無疑義閣下調度之檄向不輕發發皆當於事理春霆必樂馳驅

云云銘謂劉公銘傳樹謂張公樹珊李公奏入奉二月初七日

寄諭任賴股匪經鮑超在鄂痛剿竄入豫境桐泌一帶勢向東趨李鴻章現由徐州督兵西進著於歸德周家口相機駐紮就近調度鮑公之軍舊口也營中獲賊諜或請斬之鮑公曰不能殺賊而徒殺其間諜是不武也吾向不殺賊諜正欲賊知我而畏我耳因令諜者徧觀各營畢始縱之去曰歸語汝二王鮑某依然如昔耳二王者僞魯王任柱卽任懷邦僞遵王賴文光也諜者伏地乞留營自効曰

二王聞大軍至一知不敵欲降一願姑待一戰再決之今公軍容整肅如此賊敗必矣不願駢首隨若曹死也鮑公笑允之厥後有詢永隆河戰事者鮑公曰擒匪最剽疾不易獲勝勝亦不能多殺賊是役之大勝在賊志先惶惑故其黨多而不固其氣勇而不剛擒斬溺斃之多則由彼之先失地利耳論者謂是役也再得勁旅如霆軍者從西北攔截夾擊必殲賊淨盡劉公所統銘字營於淮軍中號爲精勁馬步人數亦多倘不先時敗挫與霆軍相角相將亦未必不立殄逆氛事會差池使餘孽得由桐信光羅復擾

鄂東騷動皖北旬日之間所在掠馬脅人逆燄復熾於是湘軍彭忠壯毓橘淮軍楊忠勤鼎勳等相繼敗挫覆軍殺將當時曾公國荃奏言此次捻逆入鄂六十餘日東西奔竄經鮑超正月十五日之戰殲其大半方冀殄滅有期不意敗殘餘匪仍從西路逸出應請將臣交部議處

二月鮑公駐軍樊城養傷病

曾公國荃查明任賴兩酋傷敗下落奏稱此股捻匪有南隊北隊之分北隊以偽魯王任柱爲渠而李允等七酋副之南隊以偽遵王賴文光爲渠而邛朝貴等五酋副之北

隊較南隊尤強正月十五日之戰與銘軍交鋒者爲北隊
與霆軍交鋒者爲南隊霆軍所傷之酋爲僞懷王耶朝貴
至任柱賴文光等酋均從西路逸出尙未殲斃等語奏入
奉十三日

寄諭逆匪經鮑超等軍擊敗後由桐柏一路回竄鄂疆此
時賊勢雖肆奔突其氣已衰曾國藩李鴻章等務須統籌
全局一鼓殄除毋任其東西分竄疲我兵力李公鴻章奏
言鮑超馬步全軍約二萬人就目下賊情揆之應令鮑超
在鄂豫先辦東股擒匪臣已飛咨鮑超自樊城拔隊由德

黃山內兼程東下會同曾國荃所部分投截勦劉銘傳一軍已抵信陽暫息該提督血性忠勇平素好戰輕敵疊經曾國藩與臣批令並加持重不料尹隆河之役接仗過猛又因鮑超期會錯悞致有此失幸霆軍援應奮勇再接再厲乘機大捷轉敗爲功該提督經此挫折之後閱歷更增當倍穩重該軍新挫之餘臣已令其及時休養整練再圖大舉等語奏入鮑公與曾文正公等同奉十五日寄諭現在鄂捻東西奔竄正資大枝勁旅追擊卽著照李鴻章所請仍著鮑超在鄂豫之交相機勦賊鄂省東路空

虛著鮑超卽由樊城東下會同曾國荃所部分投勦辦倘賊趨皖境卽跟追至宿太一帶賊勢尙無定向該提督務當會合鄂豫各軍迅將任賴全股就地殄滅以便騰出兵力西顧陝疆不可意存觀望致干重咎並著曾國藩李鴻章妥爲調度劉銘傳於尹隆河之敗進退失機其自請參處本屬咎有應得惟悞由鮑超未照約會分勦致令劉銘傳敗挫鮑超更不得辭咎姑念劉銘傳果敢有素鮑超屢獲大勝過不掩功均加恩免其議處嗣後當益加奮勉迅掃賊氛李公又奉十九日

寄諭捻逆被豫軍扼截折向黃麻一帶鮑超一軍前由樊城東向現在已否接仗若連捷之後縱賊奔竄俾得休養裹脅則剿滅又屬無期著李鴻章申明賞罰飭令各軍同心協力奮勉圖功毋任遷延貽誤鮑公因上月追賊過勞引發舊傷自顧非倉卒所能就痊於十六日奏言臣從征十有六年由陸而水由水而陸大小數百戰咸豐二年三月十九日在廣西文昌門外焚燒得元樓右股受鎗傷左手受矛傷流血被肘五年十一月十二日克復金口右肋受礮子傷筋骨內陷昏暈三時嘔血數斗七年正月初五

日踏破小池口賊壘亂石傷右額血流滿面三月十六日
攻拔小池口僞城鎗子貫入頂右腦漿隨子迸出昏絕兩
日復甦又滾木打及左手傷筋鎗子貫穿右股七月初一
初二兩日踏毀黃蠟山甘家畝一帶賊壘刀傷左膝矛傷
右手八年五月初四日收復麻城在黃土岡地方左右兩
股俱受矛傷血由兩膝下注當時雖經醫治軍務匆匆傷
口稍合卽止未得久加調理兼之流血過多元氣虧損每
遇陰雨傷處之內恆自跳掣頭腦昏暈心神動盪左手筋
縮每食不能舉碗此兩江督臣曾國藩湖廣督臣李鴻章

湖北撫臣曾國荃盛京將軍臣都興阿暨曾經會食之人莫不共見上年在籍時曾奏請寬假百日安心靜攝適以軍事方急未蒙

俞允遵卽力疾起程攜帶藥物沿途調治所望軍務稍鬆再行乞假調養及東南肅清又疊奉

諭旨赴豫勦辦捻逆維時尙可支持未敢瀆請不料近日以來舊傷之處無論陰晴時時發作痛楚纏心較常加劇百般醫治竟不獲痊以致精神愈虧頭眩更甚左手麻木前猶可以執纜今並纜亦不能執矣又復心驚肉跳事多

健忘勉強惕勵實難支持伏念臣身膺重寄督率全軍非
得精神充足何以審機宜而臨戰陣今旣傷病迭增形神
俱困恐因循日久釀成癱痺肢體深入膏肓棄置臣之一
身其害甚小若因以廢弛軍政貽誤戎機辜負

皇上天恩其罪則大再四思維與其抱病留營氣餒神昏
究屬無濟於軍事何如請假醫治攝心澄慮尚可圖報於
將來臣年未強仕報稱有時合無籲懇

鴻慈俯念臣積勞年深屢傷病久准其開缺回籍靜心調
養一俟傷痊再竭駑駘以酬

高厚於萬一臣所部各營應就近交與何路大臣揀員接統之處出自

聖裁奏入奉

寄諭仍著督隊由南陽取道信羅至光固一帶無論任賴等逆竄往何處皖鄂何路有警卽行兼程進擊設法兜滅以奏全功並著李鴻章催令移營進紮毋任藉詞延宕同時喬公松年等以陝省兵力單薄須有大枝勁旅勦辦奏催霆軍早清鄂賊馳赴陝境合勦鮑公與李公鴻章左公宗棠等同奉三十日

寄諭鮑超勦擒屢獲大勝甚屬奮勉所部將士亦頗出力
著仍遵前旨會同曾國荃所部迅將任賴股匪殄滅以便
騰出兵力西顧陝疆不可意存觀望並著李鴻章曾國荃
妥爲調度迅奏膚公是時左公以 欽差大臣督辦陝甘
軍務行抵鄂省奏稱鮑超所部馬步全軍以荊子關一路
山徑崎嶇難以整隊遄行改由宛洛以入潼關二月十五
日已由樊城啟行臣軍到襄樊時鮑超全軍必已由潼關
入秦如同朝有警自可渡渭援勦等語是時鮑公已請開
缺並無啟行入陝之說而彭公毓橘於十八日擊賊斬水

6
境內所部十三營俱覆沒彭公死之左公奏入奉

寄諭該督既已西行秦中自可無虞而鄂省賊眾兵單勦辦殊難得手鮑超一軍著仍遵前旨留於鄂豫將任賴逆股勦滅再行移師入關彭公覆軍事聞鮑公與李公鴻章曾公國荃同奉

寄諭鮑超現由南陽取道信羅至光固一帶卽著懷遵前旨無論任賴等逆竄往何處何路有警卽行兼程進擊一鼓殲除以副委任鮑公於奏請開缺調理時附片爲部將譚勝達奏請開復革職處分仍以提督遇缺題奏奉

旨俞允

三月鮑公在樊城臥護諸將勦賊

李公鴻章於上月十二日行抵周家口至是曾文正公於初六日抵金陵李公鶴年陳奏軍情奉初七日

寄諭鄂賊距光固不遠著李鴻章激勵鮑超等迅速移營前進勿任遷延貽誤喬公松年又奏言接督臣左宗棠來信已飭鮑超一軍來陝惟盼該軍早抵陝境可以合力痛勦迅殄狂氛免致捻回句合爲一等語奏入奉初九日

寄諭鮑超一軍前已諭留皖鄂勦捻左宗棠帶兵入關後

騰出陝省兵力合併郭寶昌劉松山兩軍計數目前分布
該大臣當坐鎮關中妥籌勦辦鮑公於初二日奏言臣奉
二月二十五日

寄諭欽奉之下伏枕汗流莫名悚懼竊臣受

恩深重未報涓埃雖肝腦塗地亦未足仰酬

高厚於萬一顧何敢辜負

聖恩自取罪戾委因十六年來徧體鱗傷惟有腦後一傷
爲最重當時髓流杯許今尙深陷寸餘從前每一舉發必
頭目昏暈然尙可勉強支持自尹隆河追賊接連五晝夜

假寐不遑致患目疾嗣以發表太過引動腦傷先只頭目
昏暈繼更心驚肉跳精神恍惚肢體漸以不仁臣前於拜
摺後一面延醫趕緊調治而病勢轉增據醫者云頭目昏
眩由於虧髓太多精神恍惚實因流血過甚若不安心靜
攝不惟釀成癰瘰厥疾難瘳且恐病入膏肓竟成不起臣
思臨敵制勝全賴智慮周詳而驅策羣力尤須身先士卒
今臣左手已成偏廢不能執纜心神日益恍惚健忘更甚
輾轉牀褥舉動維艱營中諸事均不能躬自料理老師糜
餉自問何安萬一貽誤事機其罪滋大現已兩次咨商湖

廣督臣李鴻章迅速派員來襄接統馬步各軍合再瀝情
仰懇

天恩俯准開缺回籍調養並飭下李鴻章迅派妥員前
來接統以專責成奏入與李公鴻章等同奉初九日

寄諭鮑超轉戰東南數省受傷最多朝廷素所稔知近因
追賊五晝夜舊傷復發諒非捏飾惟該提督榮膺五等受
恩至重朝廷畀以干城腹心之寄與尋常將領相待不同
當此捻逆鴟張鮑超必深憤激况營中月餉供應艱難停
兵糜餉該提督亦問心難安鮑超著賞假十日在營調理

設值劉銘傳等軍追剿喫緊仍應嚴飭各將領迎擊一俟
假滿卽督兵進剿以保數年之威望昨據左宗棠奏催該
提督赴陝已諭留於鄂豫剿捻其調度機宜朝廷責成李
鴻章辦理而追剿迎擊惟鮑超劉銘傳兩軍是望著李鴻
章曾國荃飭令各軍隨同進剿迅奏膚公同膺懋賞毋許
遷延委卸李公鴻章尋奏言捻勢西趨鄂軍單弱鮑超久
住樊城疊奉

諭旨飭令追剿任賴等股若就近由德安馳赴黃州迎剿
最得機勢乃迭准鮑超函稱傷病難支已奏懇開缺並請

臣處派員接統該軍等語臣查霆軍馬步人數甚多皆由該提督自行募練必須該提督統率進剿呼應方靈臣處實無勇幹大員可以遴派接統可否仰懇

天恩俯念該提督宣勞最久鄂事正緊

飭催力疾統軍由樊城徑趨黃州會同各軍迅將任賴捻股合力剪除再行

賞假調理實於剿捻全局有裨奏入鮑公與曾文正公李公鴻章同奉十四日

寄諭捻匪蔓延黃岡黃陂腹地鄂省西北一路甚屬空虛

前已疊諭鮑超奮擊嗣雖賞假十日仍令督兵協剿該提督素稱勇往當此逆氛尙熾諒不至意存觀望著卽力疾督師由德安馳赴黃州迎剿毋失機會以竟全功並著曾國藩李鴻章剴切開示毋任初終異轍以保勦名而副期望尋因譚公廷襄曾公國荃陳奏軍情鮑公與李公鴻章等同奉十八日

寄諭任賴二逆上趨雲孝將由應城天門以赴舊口冀擾襄河南岸完善之區鄂軍三十餘營只可併爲一路現由孝感雲夢緊躡其後僅成尾追之勢不足以遏兇鋒鮑超

假期屆滿自必督軍迎勦用收夾擊之效該提督何日拔隊啟行卽著趕緊奏報以慰馳繫不得任意遷延自棄前功致干重咎李鴻章已派李昭慶等率淮軍由麻城入鄂卽著催鮑超一軍與之會合上下夾攻以紓鄂患又同奉

二十三日

寄諭捻匪分竄孝感之小河司等處趨向靡定曾國荃赴德安調水師堵截並督陸軍追勦惟上游扼截之師尙少勁旅鮑超素稱勇敢如已全愈著卽督隊前進倘尙須調養卽先派得力將弁會同鄂軍進勦自爲後勁以竟全功

何日拔隊啟行仍遵前旨馳奏以慰厯繫左公宗棠奏言臣軍於十六日行抵德安府城擬稍停數日視賊所向再定進止俟淮軍霆軍有來鄂會師信息卽由隨棗取道襄陽西行臣到襄陽後如捻逆尙在舊口計淮霆各軍當已遙合長圍臣軍自無中道逗遛之理當卽整隊入秦曾文正公尋奏言臣接李鴻章曾國荃來函均擬令鮑超由樊城會師東下不知其傷疾舉發近狀若何臣已馳函再三勸誠勉其力疾進兵不知能否迅速拔隊

四月婁雲慶來統霆軍未至宋國永等擊賊於團山破之鮑

公至武昌養病

鮑公於上月二十六日又奏言臣奉初九日

上諭鮑超轉戰東南數省等因欽此欽奉之下仰見我

皇上體恤矜全天高地厚莫名感激惟有涕零伏念臣年甫強仕未便就衰不知者將謂年力正強何至一病奄奄竟將不起此誠非一朝一夕之故也溯厥由來祇緣頻年所受各傷虧血過多從未將息浸淫至於今日外感內傷一齊發作而人遂以不支一月之前卽未起牀形銷骨立殘息僅存近又引發左肋一傷肌肉跳掣不止此傷內損

甚重心神驚悸更覺難支而十二日忽添手足痠癢披體汗流卒然暈去兩時之久牙關緊閉藥力難施取嚏開關始得甦醒現仍筋惕肉瞤四支厥冷頻投薑桂之劑並不回陽轉因藥味過辛痰中帶血醫師束手困頓益形種種病因均非佳兆臣起身行伍賦性愚直平日立志律身惟以忠孝二字兢兢自勉昨奉十四十八二十三等日上諭鮑超諒不意存觀望何日拔隊卽著趕緊奏報以慰馳繫等因欽此臣自問有何才能而上縈

宸厪至此犬馬猶戀豢養之恩臣具有天良第使病軀稍

可支持雖粉身碎骨亦所不辭何至犬馬不如而猶意存
觀望况臣素日爲人每於苟且偷安之輩心竊鄙之豈今
日而反自蹈其轍委因病勢十分沈重又深念
國帑艱難是以不揣冒昧瀝情瀆懇

賞假離營調治不欲因臣一人之身老師糜餉坐失機宜
也刻下假期已滿而病症曾不稍減非特不能乘騎親臨
前敵並不能離牀挪移一步病勢至此實非急切所能望
痊合無仰懇

天恩俯念臣傷病已篤暫准離營調治

飭下李鴻章迅速派員權統此軍俾臣得以安心靜攝區區微命或不至遽委溝壑則以後有生之年皆出

高厚之賜如李鴻章實在無員可派現在曾國荃已抵德安可否請

旨飭下就近權時統率之處出自

聖裁頃聞捻逆日漸上趨臣暫飭提督宋國永譚勝達唐仁廉曾成武等帶同馬步各營赴安陸府一帶相機迎剿奏入奉初三日

上諭鮑超奏傷疾舉發請假調理一摺著賞假一箇月在

營安心調理並賞給人獲四兩交該提督祇領以示體恤
又與李公鴻章曾公國荃同奉

寄諭鮑超平素勦賊所向有功非尋常統兵將領可比現
因病勢較重奏請離營朝廷實深厯繫本日已明降諭旨
賞假一箇月安心調理並賞人獲四兩以示體恤卽著該
提督在襄陽調治毋庸離營現在鄂捻西竄勦辦正當喫
緊鮑超已派宋國永等赴安陸一帶迎勦著李鴻章曾國
荃督飭湘淮鄂豫諸軍會合夾擊迅殄賊氛鮑超亦當力
疾協籌勿稍鬆勁該提督年力正強醫治易痊當卽親統

所部力竟全功以副朝廷腹心干城之寄譚公廷襄曾公國荃尋奏言臣等前聞浙江提臣鮑超疏陳病狀委候補道洪璠前往存問旋據該道稟稱該提臣病勢沉重萬難督師會勦已派宋國永等於二十四日移營八條港霸王山地方屯紮如鮑超之病可以速痊庶西路可期堵截否則不免竄出豫境奏入奉初七日

寄諭鮑超患病甚重昨已賞假調理其所派宋國永等軍移營八條港霸王山屯紮並著歸曾國荃調遣令其會同鄂軍奮力殺賊李公鴻章尋奏言臣前催調鮑超一軍由

樊城迎勦嗣據鮑超函稱傷病沉重實難支撐賊現乘隙北趨駸駸有出豫之勢臣部各軍一轉瞬間又落賊後可勝焦慮臣本擬遽准各軍進抵安陸上下分投扼紮漸逼漸緊臣再馳往鄂境調度乃兵甫深入而賊又旁逸頃據宋國永等三月二十七日自八條港公稟鮑超病勢委頓急欲離營調養醫治請臣就遽軍將領中選員暫代等語此次鮑超引疾臣商詢曾國藩曾國荃如何辦法曾國荃覆稱現調宋國永唐仁廉等統營進紮仍望鮑超病愈親往視師曾國藩抄示致鮑超信稿勸其力疾治軍與臣處

致書慰勉之意均相脗合臣維鮑超身經百戰勞傷過重殊堪憫念惟該部三十餘營素稱得力現值賊竄棗襄堵剿喫緊似應擇人暫代俾資鈐束合無仰懇

天恩准令鮑超在營安心調養臥護諸將飭就霆軍將領中酌派老成勇幹者一二員暫行代統進剿仍俟鮑超病痊親行督率以示體恤而專責成奏入鮑公與李公鴻章等同奉十一日

寄諭鮑超前派宋國永等軍協剿會諭曾國荃就近調度李鴻章身膺統帥著通籌全局妥爲調度以合機宜一俟

該提督病痊仍由鮑超親行督率以專責成先是曾文正公致書慰解鮑公曰月初接奉寄諭始知有引疾求退之請正欲作函詢候起居適接尊函並咨送二月十七日疏稿又接李少帥來函並抄與尊處往復數書方悉閣下以上元日之捷與舍弟遵旨覆奏情形不符不無芥蒂舍弟疏中所稱銘軍係與任股接仗霆軍係與賴賊交鋒蓋誤聽擒賊之供詞賊中任強而賴弱人人共知擒賊之供蓋心中實畏霆軍而口中故作不畏之詞以爲霆軍所攻破係破賴股之弱者非破任股之强者作此誇張之詞

以欺騙舍弟舍弟既不知任賴之強弱迴殊又不知擒賊之大言欺騙遂據此以入奏閣下正月十五日之奇功五日窮追之苦戰幾致埋沒一半宜閣下憤憤不平浩然思歸也惟舍弟此次奏片之錯由於誤聽擒賊欺騙之言而平日於閣下實深愛而敬佩之數年來舍弟寄敝處家信數十封無一封不稱閣下之好也自去秋至今春寄諭多責備閣下之詞閣下告病開缺知者以爲與舍弟新有嫌隙不知者或妄生擬議人生在世所爭者名耳古來賢將帥所以流傳萬世不過得一忠字之美名耳閣下苦戰

十餘年久著忠勞之美名豈可因與舍弟小有嫌隙而令外人妄爲擬議乎僕自去歲以來寄諭責備者七次御史參劾者五次從無不平之意形諸言色卽因病陳請開缺亦不敢求回籍又不敢求進京但求留營効力耳頃又接閣下三月初二日之摺兩次皆請開缺回籍與僕之請留營者情事不同恐外閒之擬議更多僕欲勸閣下力疾治軍又恐閣下名望大減若僅爲舍弟奏片錯誤則僕當代爲負荆謝過若別有抑鬱之處則請閣下勉強忍耐古來忠臣未有

不多受磨折者幸無堅執爲荷又復丁公日昌書云春霆
以小嫌引退雖奉 廷旨諄留少帥函催然遠在南陽恐
急切未能趕到漢黃與諸軍會剿至是覆友人書云鄂中
自銘軍挫後又有二月十八日彭軍六安神口之敗幾不
能軍春霆雖屢著奇功因少荃宮保暨舍弟先後奏報與
其自奏戰狀小有不符再疏引疾初疑其芥蒂未融正在
貽書勸慰頃接春霆來函言其病勢甚危欲以軍事暫交
舍弟統屬爲之焦灼倣處卽日委員攜帶遶棧前往看視
且請其乘坐輪船來金陵養病而另調婁雲慶南來接統

該軍未審卽能定局否又復李公鴻章書云春霆病勢甚重尊處覆奏求獎護之等語文正又奏言浙江提督鮑超傷疾舉發兩次奏請開缺調理未蒙

允准臣亦以軍情正緊馳書鄂中再三勸勉屬其力疾進兵尙未接到該提督回信頃接李鴻章函抄寄霆營各鎮將宋國永等公稟瀝呈鮑超病狀據稱本年正月間楊家澤接仗獲勝後鮑超督隊追賊五晝夜迄未少息虛火上炎兩目盡赤嗣以發表太過引動舊傷日益增劇左手已麻木不仁頂上傷疤肉跳轉側呻吟三月十二日昏暈二

時之久痰湧咽喉良久始蘇又加左肋之傷亦復跳痛不止實屬萬分危險請迅派大員前來接統近日尙可親爲交代萬有不測更無人親算交代等語臣接閱之下不勝憂灼鮑超帶兵十餘年肅清東南無役不從實爲第一著名驍將其受傷多而且重眾所共知今宋國永等縷稟如此當無捏飾臣現已派員前往襄陽攜帶藥物屬其酌量情形如實難支持卽由李鴻章奏明前來江甯安心調理或可冀其漸次痊愈惟霆營人數較多立功最久各營官類皆百戰餘生資望相等非有才智卓越情誼相聯之大

員難勝接統之任查鮑超部下諸將以宋國永婁雲慶二員爲最著宋國永前在江西之沙井湖北之金口不能定亂因案革職此次在營出力尙未奏請開復且其才欠剛斷不足以資統率惟現署直隸提督正定鎮總兵婁雲慶臨敵調度條理秩然同治三年駐軍上杭各勇以缺餉譁譟該員從容鎮靜危而得安是其才堪應變已有明證目前劉長佑添練新兵保衛畿輔亦屬需才孔亟之際然較之鄂豫等省賊氛之熾湘淮各軍求助之殷究有緩急之殊而婁雲慶在直隸日淺尙非必不可少之員以之接統

霆軍則可和輯眾心李鴻章來函反覆熟商與臣意見相合合無仰懇

天恩飭下直隸督臣劉長佑迅卽派員接署提督篆務俾
婁雲慶卽日交卸由天津乘坐輪船前來江甯臣與之商
定一切速赴軍營庶霆軍得有主持之人鮑超得以安心
養病如鮑超病勢日愈無須更換統領臣當令婁雲慶另
募一軍在於安慶認真訓練其餉項取之湖北卽以郭松
林彭毓橘兩軍裁撤之款作爲婁雲慶新軍之餉臣當常
坐輪船馳至安慶親督操練務成勁旅以遏寇氛前月賊

至黃梅宿松之交安慶及附近州縣遷徙一空逮淮軍星馳往援賊又倏忽西趨如此軍練成則皖鄂之江濱有備各淮軍專勦北路李鴻章可省南顧之憂於大局似有裨益奏入奉

上諭浙江提督鮑超現在因病賞假所部霆軍需員管帶著派婁雲慶前赴鮑超軍營暫行接統直隸提督著劉長佑派員署理文正與李公鴻章劉公長佑等同奉十四日寄諭婁雲慶於霆營情形尙稱熟習著劉長佑迅卽遴派妥員接署古北口提督令婁雲慶交卸後由天津乘坐輪

船前往江甯與曾國藩商定一切速赴軍營庶憲營有主持之人鮑超即可安心養病曾國藩李鴻章於婁雲慶到營後面授機宜令其妥爲接統認真勦賊以副委任至曾國藩所奏另募一軍在安慶訓練一節所籌甚是仍著隨時籌畫辦理再行具奏鮑公與李公鴻章曾公國荃同奉十五日

寄諭該逆旣已回竄鄂境將來竄皖竄豫均在意中鮑超前曾力疾派員會勦甚堪嘉尙尙病體痊愈卽著督師迎擊用副委任李公鴻章奏言臣前以鮑超病甚不能督軍

派員赴襄陽看視該提督病狀尙未回報惟鮑超旣蒙

恩賞假調理並賞人蔭四兩實屬格外體恤該提督傷病醫治就痊諒當感激圖報銷假視師勉圖協剿如鮑超病勢果漸危殆當會商會國藩妥籌辦理奏入奉十六日

寄諭將來鮑超病痊著該大臣加意聯絡俾仍奮勉圖功以副朝廷終始成全之意曾文正公尋致彭公玉麟書云戈什哈劉國成自襄陽回署接春霆覆信已於十三日登舟將赴漢口養病據劉弁察其病狀十分沈重各傷皆發頭頂一傷最重時流黃水久不能言面色如炭僅食米湯

少許非得神佑恐難痊愈焦慮曷已嗣譚公廷襄曾公國
荃奏稱賊於十四日過雲夢義堂鎮上趨應城淮軍仍緊
躡其後其時浙江提臣鮑超病勢沉重於十一日往漢口
養病而令宋國永率霆軍由隨州棗陽東來會剿臣等因
賊竄應城勢必趨京山鍾祥一帶遂函囑宋國永折回洋
梓鎮先扼西路要衝奏入奉二十五日

寄諭捻逆自東竄後經官軍追躡仍復回竄應城雖屢有
擒斬而逆燄未衰卽著李鴻章譚廷襄曾國荃督飭淮軍
鄂軍會合追剿並令宋國永折回洋梓鎮以扼西路要衝

鮑超戰功卓著實爲國家干城之選現聞病勢沉重深爲
厯繫著曾國荃就近傳諭令其慎重醫治安心養息以冀
速痊左公宗棠尋陳報隨州途次所聞鄂省軍情奏入鮑
公與李公鴻章及左公等同奉二十六日

寄諭鮑超患病以來所部各軍暫派宋國永統帶何以至
今未聞宋國永與賊接仗若早能移軍駐扼洋梓雙河何
至縱賊亂竄著李鴻章曾國荃傳諭鮑超速令宋國永等
扼紮要隘聽候調度奮力剿賊如再貽誤必將宋國永等
從重治罪鮑超亦不能辭咎也時曾文正公復友人書云

春霆病重離營已於十三日舟行返鄂舍弟及各處來信均稱十分沈重萬難就痊等語文正與劉公長佑同奉二十八日

寄諭署直隸提督婁雲慶劉長佑已飭令交卸起程卽著催令乘坐輪船赴江甯聽候曾國藩差委倘鮑超病體就痊婁雲慶可以不必接統霆軍並著曾國藩察看情形仍飭回任以資教練時捻股經淮鄂各軍追躡於十九日忽折向京山由郢東洋梓上竄宋國永等由隨州回軍西向是日抵棗陽之吳家店適賊由宋家集竄至平林店團山

一帶距我軍約二三十里不等二十日國永商令唐仁廉率隊夜襲團山賊館殺悍賊四百餘名生擒百餘名賊向西南大路奔竄國永等追過棗陽十五里始行收隊曾公國荃李公鴻章先後奏聞奉

寄諭劉銘傳等軍追賊過雲夢賊向阜市奔突遂竄洋梓宋國永等由隨州回軍夜襲賊館擒斬甚多刻下逆蹤尙無定向陝豫俱應嚴防著李鴻章督飭劉銘傳周盛波等軍相機兜剿李鶴年令宋慶迅赴新唐會合霆軍夾擊

卷十二終

三

遼軍紀略卷十二終

霆軍紀略卷十三

銅梁陳昌世五編輯

門人吳樹棠全校字

丁卯同治六年

五月鮑公在武昌養病

楚督李公瀚章奏言浙江提督鮑超因病來鄂垣就醫

臣

接篆後親詣寓所看視該提督病勢沈重不省人事間或

蘇醒見臣在旁似欲訴說而言語不清惟作憤恨之狀查

該提督前奉

諭旨賞假一月現屆期滿而病勢未能減退恐非旦夕可痊籲懇

天恩再予展假俾得安心調理如果病有起色臣卽隨時陳報以慰

宸厪奏入奉初八日

上諭著卽傳知該提督在省安心調理俟病勢稍愈卽行奏報曾文正公復李公鴻章書有云春霆病重回鄂聞近日毫無轉機東股不忘運東幼良勲盛四軍皆須歇息僅省三琴軒兩軍力尙不足以制之奈何

六月鮑公開缺養病

曾文正公李公鴻章等同奉初五日

寄諭捻騎奔突飄忽官兵追逐多致落後劉長佑擬就運河劃段分守英翰派兵出境分防運河並擬就東省兜圍殲除與李鴻章前奏大略相同婁雲慶計可抵鄂鮑超如病尙未痊卽著曾國藩迅飭婁雲慶接統霆軍兼程赴東歸李鴻章調遣以厚兵力文正於初十日奏言竊鮑超傷病情形臣於四月初七日專摺陳奏後嗣由署湖廣督臣李瀚章於五月十九日會同臣弟國荃陳奏該提督病狀

在案二十三日鮑超派委補用同知吳葆儀前來金陵據
函稱超自三月十二日暈去時許之後日益沈重常常昏
迷一二日不省人事到鄂省後連服清心養陰之劑近始
日漸清醒無如左手及兩腿麻木更甚於前轉側非人不
可舌蹇雖愈但不敢多言話久則氣凝痰喘不能接續傷
痕仍然跳掣驚悸則較前尤甚每食惟稀粥半盞聞油膩
則作惡欲嘔形銷骨立輾轉在牀凶多吉少無論未必能
愈卽有萬一之望亦非一年半載所能起牀者伏望格外
矜全奏請回籍調治如蒙

聖慈允准生當隕首死當結草等情到

臣

查鮑超苦戰功

高一時名將無出其右此次傷病大發垂危之際曾集將士環列卧榻勗以報國盡忠感動部曲仰蒙

聖慈賞假賞葭該提督感激涕零雖神志不清而喃喃嚶語猶思殺賊立功惟病勢過重現雖有三分轉機而臣詢之來員吳葆儀據稱面目黧黑左足脾痿頭頂傷痕跳躑不止似此情形斷非一年半載所能全愈若勉強留於軍中既不足以示體恤而他人代統其眾恐號令不一轉非慎重軍務之道可否仰懇

天恩俯准鮑超回籍養病出自格外

鴻施至所部霆軍馬步各營現在駐紮襄陽臣商之李鴻

章等分別撤留令婁雲慶赴鄂酌辦能否妥協得力再行
專案陳奏疏入奉十八日

上諭浙江提督鮑超前在湖北追賊勞瘁傷病大發疊經
寬予假期並賞給人役調理茲覽曾國藩所奏該提督病
勢急切難期痊愈著准其開缺回籍調理所部各營著提
督婁雲慶接統以專責成並奉

寄諭鮑超傷病深重懇請回籍本日已明降諭旨允准其

所部各營並令婁雲慶接統矣該提督馬步各營應如何嚴加裁汰分別撤留之處著曾國藩李鴻章悉心籌商並責成婁雲慶嚴加整頓毋貽他患

七月撤霆軍留十四營新設霆峻營

曾文正公於二十九日奏言霆軍步隊二十營馬隊十二營自鮑超患病後暫交前宣化鎮總兵宋國永代統數月頗稱安靜而宋國永秉性謹慎徧於慈柔又鑑於昔年金口之變屢次來稟不敢接統臣奏調正定鎮總兵婁雲慶統轄該軍而霆軍各將領公稟不願隸其麾下五月之季

婁雲慶自直隸馳至金陵臣與之商酌該鎮亦以霆軍人

數太多彈壓匪易各將領共事已久勢分本相等夷雖公

稟不過出於一二人之私意而情誼既有未孚臨急必難

得力不敢冒昧接統臣又與李鴻章及湖北督撫兩臣往

返函商會謂代統全軍固難其人分統各支亦非長策遂

定分別撤留之議霆軍之制步隊每營六百人馬隊每營

二百四十人步隊苦戰多年爲賊所憚馬隊募練未久尙

無威名於是先撤馬隊十二營步隊六營尙留步隊十四

營暫由臣弟國荃主持調度仍令宋國永駐營照料一面

卽令婁雲慶馳赴安陸府另招步隊九營俾已撤者可應
新營之募新招者仍係慣戰之兵由臣分別檄行去後正
在籌辦閒續奉六月二十一日

寄諭譚廷襄奏此軍人數較眾內多降勇一議遣撤勢必
藉端索餉枝節橫生祇可議分不可議撤等語所奏不爲
無見著曾國藩李鴻章設法籌辦總期駕馭得宜毋滋事
端等因欽此臣早夜籌思亦嘗深慮及此不敢以未定之
事遽行入告仰煩

宸念茲據宋國永馳報於七月初一日起至初四日止先

遣步隊六營次遣馬隊十二營籌給口糧收回器械各弁
勇悉遵約束並無浮言閒有不法之勇欲肆煽惑立即查
獲正法其遣撤之勇有回籍歸農者有至婁雲慶新營應
募者各聽其便遣散時既已安靜則沿途必不至另生事
端宋國永辦理此事頗爲妥協所留之十四營現仍駐紮
襄陽之八條岡該軍若防堵鄂境必可得力若令征勦外
省則宋國永久勞之身苦求卸肩臣亦慮其過於慈柔難
勝重任容俟續爲籌商奏明辦理其霆營馬隊既撤之後
內記名提督譚勝達唐仁廉曹志忠等均著名驍將臣令

其酌帶鞍馬另募北人附入淮軍馬隊之中會同剿賊現經李瀚章等檄令挑選精騎一千匹帶赴濟甯歸李鴻章調遣大約馬隊雖撤仍須就現有馬匹補招足額不過裁減南勇多換北人改霆軍之名目就淮勇之範圍以便會剿一路耳至婁雲慶新募之營已據稟報於六月二十八日前赴安陸府開招將來募練成軍飭駐何處防剿宋國永既不能遠征或將其部下各營酌量撥歸婁雲慶統轄均俟另案陳奏疏入奉

寄諭曾國藩奏霆軍分別撤留並婁雲慶另募新軍以備

防勦均著照所擬辦理卽飭婁雲慶認真選擇毋以游勇率行應募致難得力所紮八條岡之十四營應調往何路防勦並著會國藩李鴻章妥籌調遣該軍以後情形會國藩仍當悉心酌辦隨時奏聞婁雲慶到鄂遵照文正咨會章程募勇五千人名曰霆峻營

八月鮑公由武昌起程回籍

李公瀚章會公國荃奏言據宋國永稟稱霆營所繳馬匹除疲瘦倒斃外尙有精銳臣等卽飭原帶馬隊之提督唐仁廉及總兵徐連陞江自康等挑選臚壯戰馬一千匹酌

留得力弁勇如數備帶鞍具洋鎗迅赴濟甯大營一面函商李鴻章酌立營制重整規模並籌解銀一萬兩發給該馬勇川資以利進行等語奏入奉

上諭婁雲慶招募新軍昨已諭知曾國藩飭令認真選擇矣唐仁廉等所統馬隊卽著飭赴李鴻章軍營聽候調遣以備迎剿

十月鮑公至夔州原籍部將唐仁廉率馬隊勦捻

時李公瀚章曾公國荃奏言欽奉

諭旨命臣等飭婁雲慶卽日拔營馳赴東省歸李鴻章調

遣查婁雲慶在安陸一帶開招成軍移紮黃州該軍半是
霆營舊勇半是招募新勇舊勇固須認真振刷新勇尤宜
加意訓練前准兩江督臣曾國藩咨開未撤之十四營以
九營歸提督鄧訓誥統帶以五營撥交婁雲慶統帶飭由
樊城移赴黃州一律整頓刻下尙未接鄧訓誥稟報拔隊
日期此婁雲慶一軍尙未整理就緒之情形也臣等現已
函囑婁雲慶俟鄧訓誥所部到黃州後趕緊訓練成熟聽
候李鴻章調遣奏入奉

寄諭新勇訓練未齊固難強之就道現在東省勦捻獲捷

任桂被官兵轟斃賊氣已奪亟須多集兵力一鼓殄除著
曾國藩檄催鄧訓誥統帶各營刻卽拔隊馳赴黃州會同
婁雲慶將新舊各軍趕緊訓練務須紀律嚴明壁壘一新
以備折衝之用並著李鴻章何璟轉飭婁雲慶俟鄧訓誥
所部到齊迅卽整頓就緒馳赴山東聽候李鴻章調遣毋
得遲誤李鴻章仍遵前旨迅速迎提以期早奏膚公是月
李公鴻章奏言臣查鮑超統領霆軍轉戰鄂皖江粵等省
十餘年蕩平粵逆戰功最著部下戰將亦最多如婁雲慶
宋國永唐仁廉譚勝達其尤著名者也婁雲慶長於訓練

宋國永長於營務唐仁廉譚勝達長於衝鋒陷陣今夏議
裁霆營臣以中原兵事必須廣求驍將函商曾國藩檄調
唐仁廉譚勝達來營差遣適譚勝達先已請假回湘唐仁
廉卽帶馬隊八百名馳赴濟甯臣親閱操練隊伍甚屬整
齊唐仁廉忠勇奮發徧體鱗傷而氣敵萬夫求往助戰臣
並爲添募馬隊兩營令與劉銘傳潘鼎新合力兜剿等語
仁廉尋補授貴州安義鎮總兵先是曾文正公於鮑公奏
請開缺之時復李公鴻章書云春霆之病斷無生理幸而
苟延亦須回蜀調養經年其部下各分統公稟頌宋而詆

斐明目張膽若勉強以斐統之必生他變又致李公瀚章書云霆軍奏歸斐統斷無因一公稟而卽改歸宋統之理亦斷無聽鄧唐黃等分統之理鄙意以全行遣散爲是尋又復李公鴻章書云查春霆病勢已鬆當無意外之虞惟堅以該軍暫屬舍弟總統並爲諸分統代辨前稟之誤似不甚滿於斐亦不欲屬於宋者該軍旣無可統之人卽多方敷衍終不中用自以遣散爲是而一時全遣則口糧斷不能一氣湊齊茲與斐峻山等熟商定爲先撤馬隊十二營春五營及親兵一營其餘十四營均不遣撤勉從春霆

所請權交舍弟總統將來或撤或留再行察看辦理又云閣下愛其譚唐二將儘可調唐仁廉至尊處另募成軍譚勝達自以流年不利堅請回籍似不必強其從事俟年將順利再行調出此兩層擬於遣撤會檄之中詳細說出後又覆書云劉硯帥咨商減協霆軍之餉閣下如與硯莊通信請懇切求之唐仁廉曹志忠將至尊處請閣下卽令招馬隊若干與馬鎮同住一處認真募練又復李公瀚章書云霆軍遣留事宜告示及遣撤之檄已發後又念譚唐楊曾四分統獨譚唐於示檄中提出重加錄用以慰其心而

楊曾未經提出未免向隅若檄中能令楊於撤勇後速赴金陵差遣曾於撤勇後送鮑公回籍再來金陵差遣則四人皆有著落較爲周到事後悔之已無及矣閣下能設法斡旋否霆軍馬隊若非撤後重招斷不能與淮軍步隊聯爲一氣此鄙人之苦心也後又覆書云曾楊二將先後令赴金陵曹志忠亦令赴少荃處有此斡旋周到各統將當無缺望不知日來果能安靜遣散否春霆已起程否厘念曷已霆軍撤定之後除蘇餉二萬五千已供婁雲慶外其江西之餉擬以五萬供宋長慶一軍其致劉公坤一書云

霆軍戴宋拒婁軍中主帥大柄下移有唐宋自擇留後之風現在撤者雖多而新招者之人數餉數則有增無減步隊撤去三千四百人而婁部則增至五千人敝處舊協霆軍銀二萬五千兩今則盡解婁部月添五千金矣馬隊撤去三千人擬譚唐等仍令招滿三千人特以改隸淮軍不能不撤散另招耳尊處月協霆軍銀七萬兩應請如常籌給以五萬兩解湖北給宋軍十四營之用以二萬兩支江西督銷局轉解金陵爲譚唐等新招馬隊之用其湖北向協霆軍月餉二萬亦當移作譚唐馬隊之用昨接大咨以

司詳霆軍裁撤江西協餉應減弟爲此無厭之求不便以
公贖覆商特此專函奉懇務求俯允所請不勝感禱等語
至是諭旨催調婁雲慶赴山東勦捻文正覆李公鴻章
書云婁鄧兩軍在令兄欲久留於鄂而廷旨切催東征
此軍或鄂或東應由閣下主持內而具奏應調之緩急外
而商留鄂出境之損益皆須閣下定奪僕但助江西協餉
不管調度也

十一月霆軍在尹隆河等處出力將士蒙

獎擢有差

李公鴻章上月在濟甯州行營奏言臣查髮捻各股自去冬入鄂盤擾黃州德安安陸等府淮鄂各軍往來追剿疲憊方甚幸鮑超率部回援蓄銳而出血戰數晝夜賊眾大潰誠爲近來勦捻僅見之功該軍馬步三十餘營將士眾多臣與鮑超相隔日久相距又遠所有單開出力員弁據鮑超函稱均經該提督悉心酌核減而又減實無冒濫等因查核咨單考語皆係陷陣衝鋒戰功昭著卽稍次者亦皆親冒矢石出死入生該提督親歷行間見聞必確自應照繕清單恭呈

御覽仰懇

天恩俯准照該提督所請分別給獎以資激勸除千總以下各弁及六品藍翎等項循案造冊咨部核辦外謹摺由驛具奏等語至是奉

上諭本年正月間前任浙江提督鮑超統帶靈營將士在湖北尹隆河楊家澤一帶進剿全股髮逆擒匪疊獲大勝轉戰五晝夜擒斬逆匪二萬有奇大小賊目三百餘名實屬異常奮勇現據李鴻章將出力各員開單請獎自應量予鼓勵以昭激勸提督宋國永唐仁廉譚勝達曾成武均

著交軍機處記名遇有水陸提督總兵缺出先行題奏請
旨簡放宋國永並著賞給達春巴圖魯名號唐仁廉並著
賞給巴達朗阿巴圖魯名號譚勝達並著賞給達桑阿巴
圖魯名號曾成武並著賞給愛升阿巴圖魯名號宋國永
唐仁廉戰功尤著唐仁廉著遇有總兵缺出先行借補宋
國永著遇有總兵缺出卽續行借補以示優獎提督曹志
忠著交軍機處記名遇有水陸提督總兵缺出先行請旨
簡放並賞給芬臣巴圖魯名號提督羅運昌著遇有水陸
提督總兵缺出先行題奏請旨簡放並賞給一品封典蕭

連貴著賞給一品封典並賞給法什尙阿巴圖魯名號鄧
訓誥著交部從優議敘並賞給一品封典總兵陳由立等
四員均著交軍機處記名以提督簡放內向世琛並賞給
訥恩登額巴圖魯名號易有勝等六員均著交軍機處記
名遇有總兵缺出請旨先行簡放易有勝並賞給壯勇巴
圖魯名號劉新富周有勝並賞給一品封典周茂盛譚有
勝並賞加提督銜鄭樹琛著仍以總兵交軍機處記名簡
放史宗興等五員均著交軍機處記名遇有水陸總兵缺
出請旨先行簡放史宗興鮑繼學並賞給一品封典周得

勝並賞給呼敦巴圖魯名號鄒連陞並賞給奇車博巴圖魯名號江自康徐連陞均著交軍機處記名遇有總兵缺出先行題奏請旨簡放並賞加提督銜江自康賞給薩陵阿巴圖魯名號徐連陞賞給富隆額巴圖魯名號劉正同著遇有總兵缺出先行補授並賞給烈勇巴圖魯名號黃海清等二十員均著賞加提督銜黃海清並賞給依勒達蒙額巴圖魯名號楊德珍等二員並賞給一品封典李世泰著賞給振勇巴圖魯名號李雲峯著賞給信勇巴圖魯名號蕭忠雲著賞給直勇巴圖魯名號總兵黃得勝等二

員均著賞給正二品封典黃得勝並賞給利勇巴圖魯名
號馮友元並賞給志勇巴圖魯名號凌興一等二員均著
賞給一品封典唐金華等二員均著賞給二品封典李恩
孝著賞給從一品封典並賞加提督銜金昌言著留於兩
江遇有總兵缺出先行補授並賞加提督銜副將汪迎順
等三員均著留於原省俟補缺後以總兵升用汪迎順並
賞給克勇巴圖魯名號龍藻琦並賞給桓勇巴圖魯名號
楊友勝並賞給資勇巴圖魯名號羅運泰著無論推題缺
出先行補授俟補缺後以總兵升用陳超宗著遇有兩江

副將缺出無論推題先行補授俟補缺後以總兵升用並
賞給二品封典張鵬飛著無論何省推題缺出儘先補用
俟補缺後以總兵升用謝榮勝著以水陸副將用並交軍
機處記名遇有水陸總兵缺出請旨簡放並賞加提督銜
賞給一品封典劉盛國著交軍機處記名遇有水陸總兵
缺出請旨先行簡放並賞給畢倫巴圖魯名號賞加提督
銜張魁元等十八員均著以總兵交軍機處記名簡放張
魁元並賞給鋒勇巴圖魯名號楊福勝並賞給固勇巴圖
魯名號王福彬並賞給銳勇巴圖魯名號孫得友並賞給

果勇巴圖魯名號何雲鳳並賞給綽勇巴圖魯名號曾騰
芳並賞給協勇巴圖魯名號賀昌佐並賞給揚勇巴圖魯
名號管官文並賞給尙勇巴圖魯名號周新元並賞給雄
勇巴圖魯名號劉天勝並賞給勉勇巴圖魯名號戴維新
並賞給武勇巴圖魯名號胡錫佑並賞給奮勇巴圖魯名
號徐越宏並賞給剛勇巴圖魯名號王仕春並賞給力勇
巴圖魯名號張茂林並賞給豪勇巴圖魯名號羅有亮並
賞給捷勇巴圖魯名號喻志興並賞給精勇巴圖魯名號
杜嵩齡並賞給傑勇巴圖魯名號龍太勝等十四員均著

以總兵升用交軍機處記名簡放龍太勝並賞給霍欽巴圖魯名號甯世忠等三員均著以總兵交軍機處記名簡放並賞給二品封典彭勝發著賞給誠勇巴圖魯名號鍾孝貴著賞給確勇巴圖魯名號滿朝貴著賞給禦勇巴圖魯名號彭長勝著賞給勁勇巴圖魯名號姜世友著賞給魯名號巴圖魯名號韓義興著賞給強勇巴圖魯名號副將敢勇巴圖魯名號馬得勝著賞加總兵銜賞戴花翎張世興等十一員均著賞加總兵銜張世興並賞給效勇巴圖魯名號朱連陞並賞給堅勇巴圖魯名號唐桂森並賞給勝勇巴圖魯名號

陳勝維並賞給健勇巴圖魯名號黎成高並賞給盛勇巴圖魯名號彭德發並賞給策勇巴圖魯名號戴美思並賞給靖勇巴圖魯名號尹茂才並賞給佐勇巴圖魯名號曾又得並賞給鼓勇巴圖魯名號羅春芳並賞給撥勇巴圖魯名號王良俊並賞給猛勇巴圖魯名號劉湘麟等十二員均著賞加總兵銜內李文盛並賞給哈希巴巴圖魯名號羅起儀等五員均著賞加總兵銜並賞給二品封典徐宏貴著仍以副將留於江西遇缺儘先補用並賞加總兵銜劉仕南著仍以副將留於江蘇遇缺儘先補用並賞加

總兵銜陳世永著仍以副將留於湖北遇缺儘先補用李
能壽著仍以副將留於湖北督標儘先補用並賞給額騰
依巴圖魯名號蕭光友著遇有湖北副將缺出先行補授
並賞加總兵銜賞給希吉爾渾巴圖魯名號高連陞等五
員均著仍以副將留於四川無論推題缺出先行補授高
連陞並賞加總兵銜羅天貴並賞給碩勇巴圖魯名號鮑
昌壽並賞給彥勇巴圖魯名號程扶鼎並賞給勤勇巴圖
魯名號以上三員並賞加總兵銜蔡文友並賞給長勇巴
圖魯名號何先得著仍以副將遇缺儘先補用並賞加總

兵銜劉車龍著仍以副將無論何省推題缺出先行補授
並賞加總兵銜李大貴著遇有湖南副將缺出無論推題
先行補授並賞加總兵銜胡玉泉著仍以副將留於廣東
無論推題缺出儘先補授楊玉賢著仍以副將留於湖南
無論推題缺出先行補授參將尹昌錦等十七員均著免
補參將以副將遇缺儘先補用尹昌錦並賞給偉勇巴圖
魯名號陳國珍並賞給達勇巴圖魯名號万昌喜並賞給
勗勇巴圖魯名號申道發並賞給赫勇巴圖魯名號支廷
傑並賞給冠勇巴圖魯名號胡玉祿並賞給制勇巴圖魯

名號袁冀祥並賞給僦勇巴圖魯名號鍾鎮南並賞給侃
勇巴圖魯名號蔡孔昭並賞給鼐勇巴圖魯名號韓景廷
並賞給嚴勇巴圖魯名號易定魁並賞給勃勇巴圖魯名
號莫占春並賞給捍勇巴圖魯名號楊世春並賞給著勇
巴圖魯名號謝國恩並賞給才勇巴圖魯名號彭蘭書並
賞給譽勇巴圖魯名號程正洪並賞給擢勇巴圖魯名號
楊文先並賞給密勇巴圖魯名號彭蘭書程正洪並賞加
總兵銜王太和等二員均著免補參將以副將留於湖北
遇缺儘先補用內傳永貴並賞給莊勇巴圖魯名號賞給

二品封典袁得勝著免補參將以副將留於四川遇缺儘先補用並賞給超勇巴圖魯名號雷賢達著免補參將以副將留於福建遇缺儘先卽補並賞給倭什洪額巴圖魯名號張壽廷等二十一員均著免補參將以副將各留原省遇缺卽補張壽廷並賞給安勇巴圖魯名號羅宏榮並賞給彰勇巴圖魯名號陳洪恩並賞給衝勇巴圖魯名號周仁舫並賞給勳勇巴圖魯名號王明和並賞給俊勇巴圖魯名號葉勝友等四員並賞加總兵銜李榮華並賞加總兵銜賞給勵勇巴圖魯名號丁鳴岐著免補參將仍留

四川以副將無論推題缺出先行補授並賞給績勇巴圖魯名號羅鵬飛等三員均著免補參將以副將留於四川無論推題缺出先行補授並賞加總兵銜內羅天元並賞給二品封典曾成章著仍以參將留於四川遇缺卽補並賞給二品封典劉明勝著賞給二品封典陳錦濤等四員均著免補參將以副將留於廣東遇缺卽補陳錦濤並賞換花翎馮建龍並賞戴藍翎劉有富等八員均著免補參將以副將遇缺卽補劉有富等六員並賞戴花翎唐宗堯等二員並賞換花翎任柯富等十二員均著免補參將以

副將遇缺卽補並賞加總兵銜內劉明高並賞戴花翎易
經緯著以副將留於湖北無論推題缺出儘先補用並賞
加總兵銜楊朝宗等二員均著免補參將以副將留於湖
南遇缺卽補楊朝宗並賞加總兵銜黃忠貴著免補參將
以副將留於江西遇缺儘先補用韋志濱等二員均著免
補參將以副將留於湖南遇缺卽補武萬才著免補參將
以副將仍留貴州遇缺卽補參將徐鎮國等二十六員均
著免補參將以副將遇缺卽補臧德等二員均著免補參
將以副將仍留四川儘先補用臧德並賞加總兵銜高日

現著免補一將以副將仍留廣東不論班次遇缺前先補用朱廷柏著仍以參將留於湖廣遇缺儘先補用並賞加總兵銜遊擊武天秩著改留湖北遇缺卽補並賞加參將銜馬策勳著免補參將遊擊以副將仍留河南撫標儘先補用盧榮忠著免補參將遊擊以副將仍留湖北遇缺儘先卽補周得勝等三員均著免補遊擊以參將留於湖南遇缺儘先卽補內鄧世泰並賞給輯勇巴圖魯名號周得勝等二員並賞加副將銜張兆連等十三員均著免補遊擊以參將留於湖廣遇缺儘先補用並賞加副將銜張兆

連並賞換花翎姚華璋並賞給懋勇巴圖魯名號邱顯銘
等六十一員均著免補遊擊以參將遇缺儘先補用邱顯
銘並賞給超勇巴圖魯名號賞加副將銜蔣昌品並賞給
義勇巴圖魯名號賞加副將銜閻有貴並賞給驃勇巴圖
魯名號易福元並賞給數勇巴圖魯名號黃復興並賞給
卓勇巴圖魯名號高得勝並賞給綏勇巴圖魯名號徐玉
龍等二員均著無論何省遊擊缺出先行補授徐玉龍並
賞給懋勇巴圖魯名號尹端有並賞加副將銜蔡廷超著
以遊擊留於四川遇有缺出先行補授並賞給戢勇巴圖

魯名號周時坡等二員均著賞換花翎周時坡並賞給三品封典黃國安等三十二員均著免補遊擊以參將遇缺儘先補用並賞換花翎蔣揖讓等五員並賞加副將銜鄧勳著賞戴花翎陳清雲等四員均著賞加參將銜內賀希華等二員並賞戴花翎焦克勝著免補遊擊以參將留於湖北遇缺儘先卽補並賞加副將銜遊擊孟青雲著免補遊擊以參將留於安徽儘先補用並賞加副將銜凌萬準著免補遊擊以參將仍留湖北原標遇缺儘先補用並賞加副將銜馮文質等六十一員均著免補遊擊以參將遇

缺儘先補用並賞加副將銜劉國成著免補遊擊以參將
改留兩江儘先補用謝日昇等十五員均著免補遊擊以
參將各歸原省遇缺儘先補用並賞加副將銜都司吳榮
貴等八員均著免補都司遊擊以參將儘先補用吳榮貴
並賞給濟勇巴圖魯名號賞加副將銜陳連陞等三員並
賞換花翎都司徐定國等二員均著以參將仍留四川遇
缺儘先補用內唐占魁並賞給匡勇巴圖魯名號譚清遠
著免補都司以遊擊仍留四川儘先補用並賞給育勇巴
圖魯名號江德泰著免補都司以遊擊留於湖廣儘先補

用並賞給勲勇巴圖魯名號賞加參將銜高明遠著免補都司以遊擊仍留安徽撫標遇缺儘先卽補並賞換花翎賞給三品封典江蘇都司俞錦鴻等二十員均著免補都司以遊擊各歸原省遇缺儘先補用俞錦鴻等十員並賞加參將銜蕭召光等五員並賞戴花翎鐵珍並賞給勲勇巴圖魯名號賞加參將銜蕭開泰著俟補缺後免補遊擊以參將留於湖廣無論水陸缺出遇缺儘先卽補先換頂帶並賞換花翎譚占魁等十二員均著免補都司以遊擊留於湖廣儘先補用並賞加參將銜內陶光明等五員並

賞換花翎鮑文俊等八員均著免補都司以遊擊留於湖北儘先補用鮑文俊等四員並賞加參將銜湛先德等三員並賞換花翎陳鎰泰等七員均著免補都司以遊擊留於江西儘先補用並賞換花翎張寶田著免補都司以遊擊留於安徽遇缺儘先補用並賞換花翎蘭雲芳等四員均著免補都司以遊擊留於四川儘先補用內楊陞等二員並賞換花翎常承烈並賞戴藍翎令逢春等一百二十員均著免補都司以遊擊儘先補用並賞換花翎李壽台等三員均著免補都司以遊擊留於兩江遇缺儘先補

用並賞加參將銜凌興旺胡邦選並賞換花翎都司廖保忠等九十三員均著免補都司以遊擊儘先補用並賞加參將銜內伍世耀等六員並賞戴花翎張賢龍等三員並賞換花翎艾遠英等二員均著免補都司以遊擊留於湖南儘先補用艾遠英並賞換花翎張光順並賞加參將銜丁鴻斌著免補都司以四川遊擊歸部無論推題缺出遇缺先行補用並賞加副將銜馬玉泰等五員均著免補都司以遊擊留於四川遇缺儘先補用馬玉泰三員並賞加參將銜張肇祺等二員均著免補都司以遊擊歸江西九

江鎮標儘先補用江西撫標都司余致和著免補都司以
遊擊仍歸原標補用都司賴安邦著免補都司以遊擊歸
閩浙督標遇缺儘先卽補治萬全等七十九員均著免補
都司以遊擊儘先補用內羅運杓並賞加參將銜守備鍾
祥照等二員均著以遊擊儘先補用並賞換花翎千總彭
永齡著免補都司以遊擊遇缺前補用都司劉河清著免
補都司遊擊以參將留於湖廣遇缺儘先補用楊朝漢著
免補都司遊擊以參將仍留廣東無論推題缺出儘先補
用朱慶銘著免補都司遊擊以參將仍留湖廣遇缺儘先

卽補羅天德著免補都司遊擊以參將留於四川補用羊
瀛著免補都司遊擊以參將仍留湖南儘先補用並賞加
副將銜李恆清著俟補缺後以遊擊仍留四川遇缺儘先
升用並賞加參將銜鍾祥光等三員均著以都司儘先補
用鍾祥光並賞換花翎楊樹勳劉汝梅並賞戴花翎陳先
春著以都司仍留四川儘先前補用並賞換花翎江應超
著以都司留於四川儘先補用並賞戴花翎都司銜鄧欽
等五員均著以都司歸廣東督標遇缺儘先前補用並賞
戴花翎都司孫長勝著賞換花翎凌光發等五員均著賞

換花翎並賞加遊擊銜曾定邦著以都司仍留四川無論
推題缺出歸部儘先卽選並賞加參將銜詹伯勝著以都
司留於湖北提標遇有都司缺出先行補授並賞加遊擊
銜李安邦等五員均著賞加遊擊銜都司區德元等六員
均著賞戴花翎阮茂發著賞戴藍翎守備鄧友松等六員
均著免補守備以都司仍留四川儘先補用內宋開文等
二員並賞加遊擊銜鄧友松並賞給摯勇巴圖魯名號賞
加遊擊銜周瑞庭著免補守備以都司留於安徽鎮標遇
缺儘先補用並賞給四品封典高佳華等十一員均著免

補守備以都司各歸原省遇有缺出儘先補用高佳華等
四員並賞加遊擊銜宋春霖等二員並賞換花翎高聯陞
等三員並賞戴花翎守備張連升等十五員均著免補守
備以都司留於湖廣儘先補用張連升等七員並賞加遊
擊銜許泰益等六員並賞換花翎譚德魁等二員並賞加
遊擊銜賞換花翎高廷瑞著免補守備以都司仍留湖廣
儘先補用並賞換花翎劉子鎮等十三員均著免補守備
以都司各歸原省原標儘先補用內范惠意等六員並賞
戴花翎賀文富等五員並賞換花翎劉子鎮等二員並賞

加遊擊銜賞換花翎張鴻發等九員均著免補守備以都
司留於四川儘先補用並賞換花翎張鴻發等四員並賞
加遊擊銜汪鳳林著免補守備以都司留於浙江遇缺補
用並賞加遊擊銜賞戴花翎周金湯等三員均著免補守
備以都司歸廣東督標儘先補用周金湯並賞換花翎周
得勝等三員均著免補守備以都司留於湖南遇缺卽補
並賞換花翎龍玉書著免補守備以都司仍留四川儘先
補用並賞加遊擊銜賞換花翎明遠達著免補守備以都
司仍留四川督中儘先補用並賞換花翎李清著免補守

備以都司留於廣東遇缺卽補並賞戴花翎鄧永盛等二十員均著免補守備以都司儘先補用並賞加遊擊銜賞換花翎賴福盛等四員均著免補守備以都司儘先補用並賞戴花翎陶化三等二百十四員均著免補守備以都司儘先補用並賞換花翎李正泰等九十二員均著免補守備以都司儘先補用內胡慶長等二員並賞戴藍翎衛守備李省吾著以衛守備歸部選用並賞戴藍翎守備銜梁鎮南著以守備遇缺儘先卽補並賞戴藍翎守備段邦彥等十三員均著賞加都司銜並賞換花翎許世祺著免

補都司守備以遊擊留於四川無論推題遇有缺出先行
補用並賞加參將銜陳玉春著免補都司守備以遊擊仍
留湖北儘先補用車致道著免補守備以都司留於四川
督標儘先補用楊德華著免補守備以都司留於江南遇
缺儘先卽補並賞戴藍翎戴天喜等一百八員均著免補
守備以都司儘先補用並賞加遊擊銜千總鄧紹庸著免
補千總守備歸兩江督標無論水陸都司缺出遇缺儘先
卽補並賞戴花翎羅鴻慶著免補千總守備以都司歸四
川督標儘先補用並賞加遊擊銜賞換花翎馬忠岐著俟

補守備後以都司儘先補用並賞換花翎劉起雲等九員
均著免補千總以守備各歸原標儘先補用劉起雲等二
員並賞換花翎丁文安並賞加都司銜陳夢熊並賞加都
司銜賞換花翎朱興棠並賞加都司銜賞戴花翎趙得勝
並賞加都司銜賞戴藍翎楊兆璋並賞戴藍翎劉長勝等
二員均著免補千總以守備留於河南遇缺儘先拔補劉
長勝並賞換花翎崔繼英並賞戴藍翎吳錦堂等六員名
均著以守備留於廣東儘先補用吳錦堂並賞加都司銜
賞戴花翎劉澤聰並賞戴藍翎黃鳳儀等四員並賞換花

翎江世文等二員均著免補千總以守備留於湖北儘先
補用江世文並賞加都司銜賞換花翎盧正中並賞戴藍
翎鄭占彪著以守備留於湖北提標儘先補用並賞換花
翎徐國芳著以守備留於湖北督標儘先補用並賞換花
翎陸榮昌著免補千總守備以都司留於湖北遇缺卽補
並賞戴藍翎楊光明等五員均著免補千總以守備留於
湖北儘先拔補楊光明等三員並賞加都司銜賞換花翎
江如茂並賞換花翎黃得勝並賞戴藍翎趙令謙等十員
均著免補千總把總以守備留於湖廣督標遇缺儘先卽

補趙令謙並賞加都司銜賞換花翎黃明友等六員並賞換花翎劉藻棻並賞戴藍翎舒正貴等四員均著免補千總以守備留於湖廣遇缺儘先拔補並賞換花翎千總劉景章等二員均著以守備留於湖南遇缺儘先補用並賞換花翎曾慶廷等三員均著以守備留於四川儘先補用並賞加都司銜賞換花翎胡遇春著免補千總以衛守備留於江蘇遇缺儘先補用並賞換花翎羅國柱等十員均著免補千總把總以守備留於四川儘先補用並賞加都司銜賞換花翎楊清泉等九員均著免補千總把總以守

備留於四川儘先補用並賞換花翎詹玉春等六員均著
免補千總把總以守備留於四川儘先補用詹玉春並賞
加都司銜吳紹杞任志忠並賞戴藍翎陳增榮著以守備
仍留安徽歸撫標遇缺儘先補用並賞換花翎王佩義等
六員均著免補千總把總以守備各歸原省原標遇缺儘
先補用王佩義丁文彪並賞加都司銜陳同慶並賞加都
司銜賞戴藍翎楊天苞並賞戴藍翎陳大光等三員均著
免補千總以衛守備留於漕標儘先補用並賞換花翎顧
亨發等十員均著以守備儘先補用並賞加都司銜賞換

花翎徐有勝等二員均著免補千總以守備留於湖廣儘先補用並賞戴藍翎宋忠保等二員均著免補千總以守備留於江西儘先補用並賞換花翎羅宏言等一百三十四員均著免補千總把總以守備儘先補用並賞換花翎吳雲龍等一百六十八員均著免補千總把總以守備儘先補用並賞加都司銜內李大貴等九員並賞換花翎林鎮國並賞戴藍翎鄒仁彥著以都司儘先補用並賞戴藍翎吳履勝等十一員均著以衛千總歸於兩江漕標儘先補用吳履勝等五員並賞加守備銜楊文廣並賞戴藍翎

千總陳錫恩等八十三員均著免補千總把總以守備儘先補用並賞戴藍翎劉萬國等四員均著免補千總把總以衛守備留於江西遇缺儘先補用劉萬國等三員並賞換花翎魏成元著以守備歸四川督標儘先補用並賞戴藍翎王雲龍著以守備遇缺儘先卽選並賞戴藍翎陳濟章等二員均著以衛守備不論雙單月遇缺儘先選用陳濟章並賞加都司銜王明俊並賞戴藍翎守禦千總魯維森著以本班儘先卽選並賞戴藍翎千總龍之健等五十員均著以守備儘先補用並賞換花翎徐壽松等九十

四員均著免補千總把總以守備儘先補用徐壽松並賞加都司銜賞戴花翎章昊陵並賞加都司銜賞戴花翎衛守備于燮蘭著仍以衛守備留於兩江歸候補班前遇缺儘先卽補並賞給四品封典武舉陳嘉福等二名均著以守備歸廣東水師儘先補用並賞加都司銜陳嘉福並賞戴藍翎千總李祖价著以守備留於湖廣補用並賞加都司銜李祚久等二員均著以守備留於江西儘先補用李祚久並賞加都司銜武舉袁顯揚著以守備仍留四川遇缺儘先前補用並賞加都司銜千總周得貴著以守備留

於貴州儘先補用並賞加都司銜黃耀采著免補本班以
 衛守備留於湖北遇缺前先補用程有志著以守備留於
 安徽遇缺儘先補用王江旺著免補千總以守備留於江
 蘇遇缺卽補陳正吉著以衛守備留於湖北遇缺儘先補
 用並賞加都司銜張應保著免補千總以守備留於廣東
 水師儘先拔補姜定善等一百七十八員均著以守備儘
 先補用千總程奇著以衛守備儘先補用並賞加都司銜
 把總劉鰲著以守備留於四川遇缺儘先補用並賞加都
 司銜賞戴花翎袁正興著免補千總把總以守備仍留湖

廣原標儘先補用並賞戴花翎徐松芳等二員名均著以
守備留於福建儘先補用內陳壽並賞加都司銜賞戴花
翎把總劉奎著以千總仍留四川督標儘先補用並賞加
守備銜賞換花翎丁清雲等二百七十三員名均著免補
把總以千總儘先拔補並賞加守備銜內李景星等十員
並賞換花翎賀玉山等四員並賞戴藍翎余承恩著免補
千總把總以守備留於江西儘先補用並賞戴藍翎楊大
吉等十一員均著以衛千總不論雙單月遇缺儘先選用
楊大吉等七員並賞戴藍翎廖興隆等八員名均著以千

總留於四川儘先拔補廖興隆等六員並賞加守備銜吳國龍並賞加守備銜賞戴藍翎周溶並賞戴藍翎軍功長壽著以千總留於湖北督標遇缺儘先卽補並賞加守備銜賞換花翎程定勝等二員均著以守禦所千總儘先補用並賞戴藍翎把總盧慶豐著免補千總把總以守備仍留廣東原標遇缺卽補並賞戴藍翎胡應信著以守備遇缺拔補並賞加都司銜外委王有盛著以千總留於湖北儘先拔補並賞加守備銜李興第著以衛千總留於湖北遇缺儘先拔補杜斌國著以衛千總留於江西遇缺卽補

把總劉定湘等二員均著免補把總以千總留於湖廣儘
先拔補並賞加守備銜軍功李淩漢著以衛千總留於湖
廣遇缺前先補用把總李湘臣著以衛千總留於江南儘
先補用並賞加守備銜陶義本等二員均著免補把總以
千總留於安徽遇缺儘先補用並賞加守備銜盧明喜著
免補把總以千總留於兩江遇缺儘先拔補並賞加守備
銜潘國柱著免補把總以千總歸四川重慶鎮標儘先補
用並賞加守備銜把總吳少雲著以千總歸湖南協標補
用並賞加守備銜防禦楊朝賡著免補佐領以協領不論

八旗水師協領缺出儘先補用並賞換花翎驍騎校都龍
武著俟補缺後以佐領遇缺補用先換頂帶並賞戴花翎
楊勲著免補本班以防禦儘先拔補並賞加五品銜賞換
花翎軍功楊朝燦等四名均著俟拔補馬甲後以驍騎校
儘先拔補並賞戴藍翎道員許世福著分發省分交軍機
處存記遇有本省道員缺出請旨簡放並賞加布政使銜
賞給博奇巴圖魯名號同知直隸州知州何應鍾著免補
本班以知府仍歸湖北遇缺卽補並賞加鹽運使銜賞給
業普鏗額巴圖魯名號周浩著以本班遇缺無論煩簡儘

先卽補俟補缺後以知府補用先換頂帶並賞給額特赫
恩巴圖魯名號道員鮑繼高著交軍機處存記遇有湖北
道員缺出先行請旨簡放並賞給二品封典盛世豐著不
論雙單月遇缺前先用並賞加按察使銜姚良璧等三
員均著賞加布政使銜鍾啟祥著賞加按察使銜知府鮑
祖耀著免補本班以道員仍留江蘇歸候補班儘先補用
並賞加按察使銜繆德芬著免補知府以道員仍留江西
歸候補班前遇缺先補並賞加鹽運使銜周成民著免補
本班以道員留於湖北儘先補用並賞戴藍翎王邦玉著

以本班不論雙單月遇缺前選並賞加鹽運使銜賞帶花翎董登榜等二員均著賞給四品封典徐暢達著歸候補班前不論煩簡遇缺卽補馬榮申著歸候補班先前補用並賞加道銜王福咸著以本班不論雙單月遇缺儘先選用並賞帶花翎運同銜盧國安著賞帶藍翎同知直隸州知州羅章等三員均著免補本班以知府仍各留原省歸候補班前不論煩簡遇缺補用並賞加鹽運使銜羅章等二員並賞給三品封典楊茂林著免補本班以知府仍留安徽歸候補班前遇缺卽補並賞加道銜直隸州知州王

明弼等七員均著免補本班以知府各留原省遇缺卽補內劉嘉淑並賞帶花翎陳鏞並賞換花翎李秉苑等二員並賞加鹽運使銜同知直隸州知州魯欲仁著免選本班以知府留於湖北歸候補班前遇缺卽補並賞給四品封典同知陳長卿等二員均著免選本班以知府留於湖北遇缺補用內曾永賴並賞帶藍翎同知直隸州知州張裕康等三員均著免選本班以知府不論單雙月遇缺先選並賞帶花翎直隸州知州孫汝霖著仍留江蘇歸候補班前卽補俟補缺後以知府補用先換頂帶同知許其莊著

俟選缺後以知府遇缺卽補並賞帶花翎直隸州知州黃定超等二員均著俟補缺後以知府補用並賞給四品封典同知傅文耀著仍留四川歸候補班前卽補並賞換花翎張達才等二員均著以本班不論雙單月遇缺前選並賞加知府銜補用同知直隸州知州羅璋等二員均著賞加知府銜並賞換花翎郎中許衍樹著賞加四品銜並賞帶花翎同知楊正暉並賞加運同銜蕭廷書等三員均著賞加運同銜並賞帶花翎同知銜馬永鐸等二員均著賞帶藍翎通判許恆身等五員均著賞換花翎王兆禧著免

補本班以直隸州知州留於河南歸候補班前補用並賞帶藍翎丁世鈞著以本班分發廣東儘先補用並賞帶花翎州同傅成美著以知州仍留廣東補用通判李成樸著免選本班以直隸州知州分發省分歸候補班前補用中書科中書曹南英等二員均著免選本班以直隸州知州留於湖北補用並賞加知府銜廕生江應葵著以同知直隸州不論雙單月遇缺卽選主事謝邦瑋等六員均著免選本班以直隸州知州不論雙單月遇缺先選謝邦瑋王楨並賞加知府銜黃天錫徐賡臣並賞換花翎吳毓蓮

並賞帶花翎補用同知直隸州知州何杰年著俟補同知
直隸州後以知府用並賞換花翎同知馮邦楨著以本班
不論雙單月遇缺卽選知縣車屏翰著免補本班以同知
仍留浙江遇缺卽補通判張文照著免補本班以同知直
隸州知州仍留江蘇歸候補班前先用並賞帶花翎周炳
著免選本班以同知分發省分遇缺卽補並賞換花翎戴
占熊著免選本班以同知不論雙單月儘先選用陳元章
著開缺以直隸州知州仍留湖北歸候補班前卽補並賞
加知府銜知府恩聯著賞加鹽運使銜並賞帶花翎知縣

王庭楨等二員均著俟補缺後以知府用內張之淵並著先換頂帶賞帶花翎府經歷黎埈著開缺以知縣仍留湖北歸候補班前補用知州萬遠培著以本班歸候補班前補用補缺後以直隸州知州升用並賞加運同銜知州燕永烈著以本班仍留湖北歸候補班前補用並賞加運同銜廣東卽補知縣鄧紹勳等四員均著俟補缺後以直隸州知州各歸原省補用鄧紹勳蕭炳莖並賞換花翎張振新並賞加知府銜賞加四品封典江西候補知縣宋森衡等四員均著俟補缺後以直隸州知州各歸原省補用宋

森衡蒯正昌舒雲彩並賞加知府銜謝紹安並著先換頂
帶賞帶花翎知縣劉灼然著俟補缺後以同知直隸州知
州用先換頂帶並賞帶花翎知州鍾穀等七員均著以本
班留於湖北儘先補用鍾穀並賞帶花翎王溥吳應霖並
賞帶藍翎彭書麟車鑾鄧嘉績李光進並賞加同知銜知
縣陳邦衡著歸候補班前補用並賞帶藍翎孫文俊著歸
候補班遇缺前先補用鄧裕燕著俟簽掣省分免其試用
歸候補班遇缺補用並賞帶花翎邱廷楨著賞加同知銜
朱衣客等二員均著賞加運同銜李加瑞等三員均著賞

加同知銜並賞帶花翎李駿昌著免補本班以知州不論
雙單月遇缺儘先選用並賞帶花翎郎中鄧傳釐著俟分
部後免其學習以郎中遇缺儘先補用王福報等三員均
著賞帶花翎光祿寺署正崔沅著賞加員外郎銜並賞帶
花翎中書科中書張之清以知州留於湖北遇缺卽補並
賞帶花翎府經歷張福謙著免選本班以通判不論雙單
月儘先選用黃允中等四員均著免補本班以通判仍留
原省歸候補班前補用內邱鍾靈等二員並賞帶五品藍
翎候選教職劉葵照著俟選教職後以知縣不論雙單月

在任候選並賞帶花翎教習梁元吉等三員均著以知縣
不論雙單月遇缺先選教諭劉子幽著免補本班以知州
不論雙單月遇缺先選並賞帶花翎縣丞萬世毓著免補
本班以知縣仍留江西歸候補班遇缺先補並賞帶花翎
州判段榮棣等十四員均著免補本班以知縣各留原省
歸候補班前遇缺先補段榮棣等六員並賞帶藍翎張必
祥並賞加鹽提舉銜賞換花翎楊達震等二員並賞加同
知銜嚴霖並賞帶花翎袁運昇並賞加鹽提舉銜縣丞陳
敬春著免選本班以州同留於湖北歸候補班補用並賞

帶藍翎府經歷縣丞李良璧等六員均著免補本班以知縣各留原省歸候補班遇缺卽補並賞加同知銜李良璧李慶萱並賞帶花翎教諭羅湘等十五員均著免選本班以知縣留於湖北歸候補班儘先補用羅湘等五員並賞加同知銜賞換花翎韓亮采等三員並賞加五品藍翎柳玉麟並賞帶花翎周楨並賞帶藍翎縣丞王夢齡等十二員均著免選本班以知縣不論雙單月遇缺卽選內王宏儲等七員並賞帶藍翎王夢齡等四員並賞加同知銜羅會元並賞換花翎張星耀並賞帶花翎姚嶽度等三員均

著免選本班以知縣分發省分遇缺前先補用姚嶽度並
賞帶藍翎王國賓著免選本班以知縣留於湖北儘先補
用府經歷王晉著免選本班以知縣留於河南遇缺卽補
布政司理問袁輔廷著免補本班以知州仍留江西遇缺
前先補用並賞加運同銜州同銜揭傳仍著以州同不論
雙單月遇缺先選並賞加鹽提舉銜道庫大使王果玉著
俟補缺後以布庫大使補用並賞加五品銜縣丞弓世炳
等三員均著俟補缺後以知縣用印燮元等五員均著賞
加鹽提舉銜並賞帶藍翎府經歷謝廷珩著賞加同知銜

縣丞雷振遠等五員均著俟補缺後以知縣升用內盧明
楷並賞帶藍翎教諭徐作霖著賞帶五品藍翎縣丞朱葆
元等二員均著仍留原省歸候補班前補用並賞帶五品
藍翎鹽大使許衍枚等二員均著以本班儘先補用許衍
枚並賞加鹽提舉銜楊淩漢並賞帶藍翎縣丞張文燦著
賞加鹽提舉銜並賞帶藍翎府經歷吳賢佑等二員均著
以本班留於湖北補用並賞加鹽提舉銜訓導周興邦著
免選訓導以州判留於湖北歸候補班補用並賞帶藍翎
張祿著免選訓導以州判不論雙單月儘先選用並賞加

鹽提舉銜張仲伊著免選訓導以縣丞留於河南遇缺卽補並賞帶藍翎揭運開著免選訓導以縣丞留於湖北儘先補用李梅等五員均著免選訓導以教諭不論雙單月儘先選用印召常著賞加五品銜孫興濂著賞帶藍翎並賞加國子監助教銜廕生駱天保著賞帶花翎並賞加四品銜訓導許其颺著賞換花翎並賞加同知銜生員趙崇普等三名均著以復設訓導不論雙單月遇缺先選並賞帶藍翎賞加鹽提舉銜張保和等十八名均著以訓導不論雙單月儘先選用張保和等四名並賞加鹽提舉銜譚

珮並賞加國子監學正銜賞帶藍翎劉正矩著以教諭不論雙單月遇缺卽選貢生潘念祖等八名均著以訓導不論雙單月儘先選用並賞帶藍翎江西下河寨巡檢李榮錫著開缺以縣丞仍留原省補用從九品陳鳳岡著免補從九品以縣丞仍留廣東補用得缺後以知縣用並賞換花翎賞加鹽提舉銜邢燮堂等七員均著免補本班以縣丞各歸原省補用邢燮堂等四員並賞加鹽提舉銜彭啟成並賞給五品藍翎王忠誠等十六員均著免選從九品以府經歷縣丞留於湖北補用內秦恩本等二員並賞給

五品藍翎郭英超等五員並賞加鹽提舉銜胡豫輝並賞帶藍翎舒雲章並賞帶藍翎賞加鹽提舉銜監生楊煥文著以縣丞留於湖北儘先補用從九品楊鈺勳等十一員均著免選從九品以縣丞不論雙單月遇缺先選內黃廷瑞等三員並賞帶藍翎唐鈺勳等四員並賞加鹽提舉銜任煜珍等二員均著免補本班以府經歷各歸原省補用並賞加鹽提舉銜張金源著免選本班以縣丞分發省分補用並賞加鹽提舉銜典史吳茂著以縣丞留於原省歸候補班前補用俟得缺後以知縣卽補並賞帶藍翎從九

品許之環等二員均著免選本班以鹽大使簽掣省分補用並賞加鹽提舉銜藩照磨許仲著以藩庫大使仍留廣東儘先補用並賞加知州銜鹽大使銜何澍著以鹽大使不論雙單月遇缺卽選從九品曹秉綱等六員均著以巡檢留於湖北遇缺卽補並賞帶藍翎賞加鹽提舉銜王國恩著免補本班以州判仍留河南儘先補用並賞給五品藍翎巡檢康士銓等四員均著留於湖北遇缺卽補並賞帶藍翎文童黃楫等三員均著以典史留於湖北補用典史諸可震著仍留江西俟補缺後以縣丞補用並賞帶藍

翎童生熊應崧等四名均著以縣主簿不論雙單月遇缺卽選內張文秀韓朝傑並賞加鹽提舉銜熊應崧松岳並賞帶藍翎監生陳岐等二十九名均著以從九品留於湖北補用並賞帶藍翎聶鑫等三十五名均著以從九品不論雙單月遇缺選用並賞帶藍翎內謝濟蘭並賞加五品銜貢生周培心等五名均著賞給五品藍翎縣丞張恩爵著賞帶藍翎貢給五品封典張則浚等七名均著賞給五品藍翎生員趙堅著以訓導選用童生伊泰定著以從九品不論雙單月儘先選用知縣吳衡著簽掣省分歸候補

班卽補並賞帶花翎已革副將卜先兆著開復原官並免
繳捐復銀兩熊廷芳著開復原官免繳台費銀兩已革參
將閔玉林著開復原官仍以參將儘先補用並免繳捐復
銀兩已革都司許德泰著開復原官蔡玉林著開復原官
並免繳捐復銀兩鄭元超著開復原官並賞還花翎告休
守備吳定發著開復原官仍留湖南以遊擊儘先補用並
賞還花翎前河南南陽府知府顧嘉衡著開復降調處分
以知府仍留河南歸候補班補用並免繳捐復銀兩已革
同知穆植禮等二員均著開復原官免繳捐復銀兩內胥

春霖並改留湖北以知縣歸候補班補用前江西萬安縣知縣蔡迪康等三員並改留湖北以知縣歸候補班補用已革同知銜湖北信陽縣知縣長壽著賞還原銜已革浙江江山縣知縣余以增著開復原官仍留原省歸候補班補用並免繳捐復銀兩已革縣丞補缺後以知縣用陳宗親著開復原官以知縣不論雙單月儘先選用並免繳捐復銀兩已革縣丞李錫恩著開復原官簽發省分遇缺補用並免繳捐復銀兩前江西巡檢鄒汝銓著開復原官仍留原省遇缺補用並免繳捐復倍半銀兩已革典史趙從

陶著開復原官免繳捐復銀兩

十二月唐仁廉會平東股捻匪靈軍移駐鄂城青山撤靈峻營

時李公鴻章用曾文正公就地圈賊原議加以變通督飭淮軍及各路會防助剿之師將任賴等股捻匪聚殲於山東之境唐仁廉自入淮軍用靈軍家法常孤軍深入以少勝眾以無步隊難建大功山東殲捻之役最稱得力語在淮軍平捻記東捻旣平文正因將婁雲慶所統之靈峻營裁撤以鄂省爲九達之區可靠之營太少因留鄧訓誥所

統九營紮鄂城青山以資鎮守

魏書卷十三終

霆軍紀略卷十四

銅梁陳昌世五編輯

門人吳樹棠全校字

戊辰同治七年全撤霆營鮑公在籍養病有

詔問狀舊將楊鼎勳卒於軍

駱文忠公劉公岷同奉十二月二十四日

寄諭前任陝甘總督楊岳斌前任浙江提督鮑超從前辦理軍務素著功績均因患病開缺調理國家需才孔亟如該二臣者若令投閒置散殊爲可惜著駱秉章劉岷察看

曾否調治就痊如果病體已愈卽著迅速奏聞先是西股捻匪竄入直東六月內經李公鴻章左公宗棠等用扼河圈圍之策全股蕩平於是曾文正公爲靈軍部將婁雲慶奏請開缺養親附片保譚勝達王衍慶二員蓋是時文正調督畿輔將挾二將北行藉以整頓直隸營伍故勝達遂補授正定鎮總兵文正以捻逆全定於四月九月內將鄧訓誥所統鎮守鄂省之靈字九營先後遣撤楊鼎勳者鮑公同鄉人也咸豐間以卒伍隨鮑公轉戰皖鄂積功保至游擊後李公創募淮軍來靈營求驍勇知兵之士鮑公命

鼎勳往李公命與程公學啟劉公銘傳潘公鼎新等統領
淮軍卽以勳字名其營同治元二年恢復蘇常功最多四
年自漳州回軍隨同曾文正公勦捻及李公督師殄滅東
股捻匪勳軍最稱得力是年圍圍西股捻匪鼎勳時官浙
江提督統所部馬步十八營他軍歸節度者又數營扼守
天津減河六月以積勞牽動舊傷卒於防所事聞 卹典
最優 予謚忠勤西捻之平在鼎勳卒後半月耳十二月
曾文正公入覲召對時

皇太后問汝此次來帶將官否對帶了一箇 問叫甚麼

名字對叫王衍慶

問他是甚麼官

對他是記名提督是

鮑超的部將

問汝這些年見得好將官否

對好的倒也

不少多隆阿就是極好的有勇有謀此人可惜鮑超也狠
好搭齊布甚好死得太早羅澤南是好的楊岳斌也好目
下的將官就要算劉銘傳劉松山

太后問水師的將

對

水師現無良將黃翼升尙好可用但

是第二等人材

問楊岳斌他是水師的將陸路何如

對

楊岳斌長於水師陸路調度差些

問鮑超病好了否他

現在那裏

對

聽說病好些他在四川夔州府住

問鮑超

舊部撤了否對全撤了本存八九千人今年四月撤了五千人九月間臣調直隸時恐怕生事又將四千人全行撤了

皇上如要用鮑超尙可再招得的語載曾文正公大事記咸同間稱東南將才者仿宋人稱張韓劉岳之例始稱搭羅李鮑後稱彭楊曾鮑謂忠武公搭齊布羅忠節公澤南李忠武公續賓兄弟彭公玉麟楊公岳斌曾公國荃鮑公超也前後四將之目鮑公俱與焉當搭羅李諸公爲統帥時鮑公僅官都守參游咸豐十年以前稱多鮑多謂忠勇

公多隆阿當時曾文正公書札有云鮑之戰功比多更偉又云功勞以多鮑爲大可稱雙絕十年以後又合一水一陸而稱楊鮑南人作曾文正公哀詞所謂楊鮑勲名震九垓者也鮑公自爲陸軍統領胡文忠公稱爲戰將之雄顧其治軍之法制勝之略於古人及同時數名將外卓然自成一家咸豐十年曾文正公訓新領一軍之宋侍講云霆軍之精悍老湘營之嚴整其參倣行之略變徼防習氣同治四年又訓淮軍統將云如鮑之兩層大一字陣打進步連環李之不肯輕進待賊先撲王之將戰令諸將各獻計

謀皆宜深思而善學之等語王謂王壯武鑫李卽忠武兄弟也文正又嘗訓楚軍將領有云湘軍平時多小操鎗矛鮑軍則多大操隊伍又嘗訓禮字營河溪營將官云紮營打仗須學霆軍規矩肅穆須學湘軍能學得幾分否及霆軍分別撤留文正復劉公坤一書云鄙人不肯遽撤霆軍者一則恐其全散生變一則該軍臨陣隊伍整齊逢山過山遇水鳧水實爲羣賊所憚有非楚勇湘勇淮勇所能及者故欲存此一家法門以備緩急之用等語鮑公不讀兵書自咸豐六年初募霆軍五營卽精心獨運創一陣法曰

三才陣本五行生剋制化之理以爲運用曾文正謂鮑軍以兩層大一字陣打進步連環又云多軍慣用一字陣鮑軍慣用二字陣蓋舉似之詞其式一營勇丁六哨每哨百人臨陣時酌留二三成隊守營餘隊分三路進兵路各一哨是爲前敵之兵所謂三才也以兩哨分列於後或張兩翼旁出包抄或因前敵得勢併力乘賊或恐前敵不支出生力突起疊戰是爲策應之兵合前敵三路言之實象五行若遇四面受敵則以四哨結爲方陣四面應之以一哨居中策應亦五行式也此就一營出隊而言若五營同出

則以三營分三路進兵路各一營以兩營分備接應若各營各哨分追敗匪則每營以數百人分五路截殺每哨亦自以百人分路截殺或分或合變化無方總不外三路進攻兩路策應之法分之則數百人百人不嫌其少可收以少勝衆之功合之則萬人數萬人不嫌其多且有多多益辦之妙故霆軍自咸豐十年以後馬步勇丁逐漸增至三十餘營臨敵則以一分統所部數營爲一路五路併進馬步萬數千人靜如陰闔動如陽開無堅不摧其陣法實變而不變所謂進步連環者如十人爲一棚出七成隊則什

什長後之第一人執鎗進至什長之側向賊施放不中不發發則隨即裝鎗不退一步當第一人放鎗甫畢第二人已乘勢出乎其前依式放鎗其餘三人遞進如之至第六人放鎗甫畢第一人又已乘勢出乎其前爲第二輪卽接放數輪皆用此環進之法有進無退以漸逼敵勇者不得獨先怯者不得獨後並使怯者化而爲勇勇者不至誤用其勇勞佚有節步伐有度勢極緊湊要自好整以暇無急遽凌亂之虞又矛隊與鎗隊相間分行齊出鎗隊左右顧

皆有矛矛隊左右顧皆有鎗敵逼近鎗不及施則矛隊奮力格鬪敵稍退矛不中用則鎗隊乘勢轟擊當矛手鏖鬪時鎗手亦乘間施放矛隊之前數人與賊搏戰後數人又又乘勢拋擲火彈燒賊短長互用奇正相生無形格勢禁應接不暇之慮他軍當賊逼近時每將劈山大礮運回陣後以防遺失霆軍則大礮不退隨鎗矛隊逐漸前移相機點放仍不外進步連環之法馬隊或抄或衝或追或截亦仍用連環疊進所謂兩層大一字陣者各隊分行而進合數十百隊齊進橫視之則有似一字也前敵三路統爲一

層策應兩路統爲一層大致分之則有似兩層也合兩層言之則有似二字陣也曾文正有言楚軍最講紮營凡善紮營者卽稱勁旅霆軍善陣善戰亦善紮營鮑公嘗曰用兵之道必先深溝高壘自立於不敗之地然後能百戰百勝論者見戡定東南霆軍爲數省游擊之師遂謂鮑公好野戰而不知其能紮寨乃能打仗也惟擊剽疾之捻匪嘗裹糧窮追數日半月不收隊不暇紮營其勦辦髮賊軍麾所至去賊雖百里而遙營壘未成不敢止宿去賊雖十里而近營壘未立亦不出隊趨利或我軍正修築營壘而賊

卽來乘分隊禦敵仍趕完營壘凡紮營先審地勢必使糧路無虞聲援聯絡我便於控制而敵不利於圍攻牆外護以濠濠外加以鹿角柵或梅花坑以掘濠之土爲牆牆加高一尺濠卽加深一尺所部有牆不高堅濠不寬深者必重懲其營官責令加工如式此寔軍紮營之法也平常移營拔隊去敵雖遠必以三成隊伍押護輜重以七成隊伍魚麗前行按營次爲前後將卒各依部伍行止一視旗幟如遇應歇息時前隊大旗向東倒則各隊之旗齊向東倒軍士卽各向東坐止則齊止行則齊行數十里長之隊伍

絕無參差不齊者如中途遇伏則各營立即依式布陣拒戰無倉皇失措首尾不相救應軍火不便運用之虞此霆軍拔營行隊之法也由營盤出隊擊賊則令哨官各督隊伍或分三路或分五路齊進而主帥親率分統營官各帶姓旗號令先隊伍而行主帥審定地勢指揮分統營官各據應據之汛地蓋隊伍未至而陣式已成矣分統營官既據定汛地則展旗舉號各營所隸之隊伍視旗號各赴汛地立刻漫山遍野營陣分明布陣用五路而隊伍有時分三路而行者因主帥與分統營官在前覘審形勢或稍延

時刻若隊伍到時而各營汎地尙未據定則隊伍不得不稍停以待是使敵疑我怯適啟戎心也始而三路繼分五路則由合而分之際急脈微有緩勢旣不須停隊以待又適與前面分汎之時刻相準兵與將湊拍天然自敵人視之惟見我兵有行無止有進無退彼不戀戰固當見兵卽走彼卽驟起抗拒我兵斷不至爲所乘或隊伍已到而賊不動則急揮各營分頭攻撲絕不遲疑此霆軍臨敵接戰之法也霆軍什長一稱隊長臨陣時隊長在一隊之前兵勇有退縮者立斬之哨官在百人之後手執大刀巡督某

隊退縮立斬其隊長營官率親兵在於所部各哨之後勒馬橫刀左右巡督某哨退縮立斬其哨官分統巡督所部數營某營退縮立斬其營官主帥率親兵營居中相機調度某軍退縮立斬其分統此霆軍督陣之法也初鮑公由水師哨官陞營官卽拔其哨下勇丁之傑出者以爲哨官及改陸軍統將卽拔所部哨官之傑出者以爲陸軍營官厥後規模日擴卽拔營官之傑出者以爲分統其營務處則必擇識略出眾而廉平能輯士心者任之將官自別軍新來者則先使之隨侍左右歷試其能然後任以營哨之

職此鮑公選將之法也營中奮勇邁倫者雖未弁必假以
優禮否則雖顯秩必黜之部將有恃功驕蹇迹涉挾持者
立奪其權將其所部歸併主帥或改歸他將之能者接統
及其人悔過輸誠仍還其兵不復念其前過故雖資深望
著之嘍哨宿將爲全軍所必不可少者皆奉約束惟謹卽
屢受懲責皆感泣效命不萌二心遇戰事將士有請以前
敵自任者名曰告奮勇寔軍將士遇戰無不告奮勇者以
獨當前敵衝鋒陷陣爲樂事以怯大敵落人後爲恥辱鮑
公雖聽諸將各告奮勇而某當前敵某備接應某擣中堅

某布遠勢某率小隊由險隘處猛衝某督大隊由寬平處
穩進究由主帥各視其才之所宜而分派之不盡如其所
請其不得請者或愧憤涕泣苦求易令或以忿詞危語掉
罄得請之人如怨如伎透爪握拳以快於一洩鮑公或領
之而持初令如故或斥使守營壘護輜重而不令其出隊
以遏抑之諸將愈激愈奮苟得當則益精心果力誓不以
疏失貽羞同治五年秋鮑公督軍追截捻匪於陝洛之境
議間道出奇部將某某因爭任前驅幾於奮拳經營務處
調和而後已蹇軍將士克迪果毅其情事大率如此當勦

髮賊時戰事甚多時有保獎之案鮑公乘間休息聽大小將士各用新銜翎頂互相稱賀椎牛肆宴豪飲歌呼一遇戰事志氣彌新工力百倍蓋使其知朝廷名器之貴而愈以勵其盡忠報國之忱其氣得所節宣而後其勇可以常賈鮑公嘗曰將士勇氣視乎主帥之操縱不外善於蓄善於激兩法蓋其運用者微矣此鮑公馭將之法也凡勇丁皆選樸實耐苦之壯士稍涉猾黠者立革之毋使沾染習氣此霆軍簡卒之法也平日訓以義命謂旣受國家養之恩義當效死命當生雖親冒矢石仍生命當死雖退

縮不前仍死且敵之鎗銃利於及遠我兵近而逼之者反
得生退而避之者反得死又我勇則敵必怯進而蹙賊賊
必奔潰不畏死者萬不死我怯則敵轉勇退而避賊賊必
追撲欲倖生者萬難生况軍令嚴肅退者立斬必無生路
隊伍整肅勝者其常焉有死機以上各情申儆在平時使
軍士咸喻之證驗在臨敵使軍士咸信之故往往別軍甫
敗流血成渠積尸若阜而霆軍繼至踐尸進擊抗方張之
兇燄毫無畏心此霆軍練膽之法也凡訓一人教之臨陣
各自奮勇毋計同隊之若何訓一隊教之各自奮勇毋計

同哨之如何以至爲哨爲營爲軍皆自挾其可恃而毋恃人則無所牽待而心一矣且人退而我獨務其進人敗而我獨期其勝則有所比爭而心一矣平日所偵各路軍情賊勢除與營務處一二人密商外絕不使將士聞知戰前審定地勢如某營應進至某處止某營於敵近時應退至某處以誘敵某營不支須以某營相助等情絕不預露痕迹臨陣時一聽主帥相機調度曰進卽進曰止卽止曰退卽退獲勝後人人自以爲功而制勝之所以然將官猶不盡知也鮑公嘗謂臨陣之機宜若使將士預知之則心中

各有所顧忌或有所推待而氣先餒矣况臨機應變无體
无方卽主帥亦有不能預計者乎故使眾人皆愚而主帥
獨智然後萬眾一心有所向無前之概云云此霆軍練心
之法也他軍於臨陣之時帕首屨足將官裝束與士卒無
殊霆軍出戰自主帥以至哨隊小校俱用本品服色取其
功過易分且使將官無所混假以倖脫而後能致死於敵
轉戰旣久部曲多保列鎮將崇階每一臨陣珊瑚之頂孔
雀之翎點綴輝映於山谷原野之間自成一種風致永隆
河之戰部將宋國永唐仁廉譚勝達曾成武等所穿黃馬

褂各被賊矛攪掬斜裂成空者數處遠近播爲美談初鮑公爲水師營官領戰船二十餘隻自帶一哨用鮑字旗外皆用圓式黑色爲旗心形如市肆所製膏藥後改陸旗式循舊指揮隊伍俱用鼓與銅號進退有一定之聲此霆軍練耳目之法也初立營時長矛雜技外用舊式劈山礮擡鎗營鎗同治初年改用前門來福洋鎗小操以中靶爲度大操以齊節爲度步隊五成鎗礮五成刀矛馬隊六成洋鎗四成長矛每騎短刀一把此霆軍練技擊之法也鮑公嘗曰凡乞降之真僞以先時之戰事決之賊之心不可知

我之真能制賊與否則自知之賊果經我痛勦震我軍威
冀貸一死則其降乃真降也雖交戰而並未大挫其鋒多
斬其梟悍頭目則其降必詐降也我先不以戰自欺彼焉
能以降欺我云云霆軍收降最多如同治元年僞保王洪
容海來降三年僞聽王陳炳文來降皆挾眾數萬或十數
萬呈繳僞印以千數鮑公接降牒後命一部將率親兵百
人前往點名遣散一塵不驚收復皖南各城時城中餘賊
動亦數萬鮑公輒單騎入撫羣首羅拜俯伏泣謝貸死之
恩鮑公止宿賊館中滿飲鼾睡凶渠僞帥侍左右供使令

如家僕舍兒逾晨始令其各繳軍械出城聽遣旣乃徐召本部大隊入城故曾文正公嘗奏稱鮑某屢次收降巨股賊中服其威信至僞康王汪海洋之乞降鮑公則又先覺其詐因其計而大破之蓋受降如受敵鮑公惟先求己之無敵而後不懼賊之詐降此霆軍收降之法也當日名王魁帥如張遇春洪容海陳炳文黎立新張勝祿翟本邦楊柳谷輩先後來降鮑公皆請奏給虛銜或遣散其眾而留其大頭目效力或併揀其精銳入伍其編降眾爲營也統領營哨隊長卽署降酋爲之而別以心腹舊部監佐之謂

之幫辦外託教習營規之名陰爲鈐制反側之計其帶隊之降人又以漸更換變化於無形待降將以恩并令本部將士推誠相與以杜猜嫌顧於體制則稍靳之不令降將與霆軍本部將官齒雖已奏給三四品崇銜統領數千之眾而謁見本部敵體以下將官猶令用堂屬禮沿營例自稱沐恩謂沐不殺之恩也必俟屢立奇功保至提鎮大員乃稍隆其禮數初呈降牒時必批令取某城縛某酋以自贖然後許薙髮來降及編入伍臨陣必使當前敵不勝則以本部將官繼進轉敗爲功降將益懾本部之威而彌堅

其愧厲自新之志此鮑公馭降將之法也當東南糜爛時各路扼守城隘之師每苦勢分力單一遇大敵不能戰并不能守鮑公嘗謂賊勢浩大欲保名城計惟有并力破賊以戰爲守若但以零星小營坐守賊所必爭之地而責令與城存亡是以兵將予敵於大局無益有損也故鮑公軍麾所向輒檄令附近守將帶隊出城隨同轉戰破賊後仍回原防屯駐雖屬單小劣營而所守城池因此得免失陷且藉立戰功邀保獎當日各路屯守之師聞霆軍至莫不望風歡慶樂奉鮑公節度不徒作壁上觀此鮑公調併別

軍通融戰守之法也霆軍戰無不勝惟不因勝而稍涉驕情是以常勝戰勝而收隊主帥率同得力將官督精勁之營殿後而令中平之營先行雖昏黑之際雨雪之中飢疲之時常守定律毋或疏忽賊或來乘則殿後之營當前敵先行之營作接應且主帥親殿得力將官又近在咫尺指揮決勝不待遠調接應而自可獨禦大敵卽或另股賊匪抄截先歸之營而精勁之殿卒可以乘機接應首尾相顧無瑕可乘此霆軍收隊之法也每一分統節制數營如係五營分統自帶中營兼轄左右前後四營每營分親兵及

中左右前後爲六哨每哨設哨官一員每月辦公薪水銀
分統三百兩營官二百兩哨官二十兩每營什長六十名
正勇五百四十名棚夫一百八十名劈山礮夫八名子藥
夫三十名公長夫六十名每名月給口糧銀什長五兩正
勇四兩夫三兩馬隊每營二百五十騎以五十騎爲一哨
每哨設正副哨官各一員每騎正勇一名馬夫一名每十
騎棚夫三名每營子藥夫三十名辦公薪水口糧與步隊
同副哨官視正哨官稍減每騎月給馬乾銀三兩全軍文
武營務處文案處俱有總辦有幫辦或二三員或三四員

月給辦公薪水夫價銀數十百兩不等總統字識每名月給薪水銀十餘兩營官字識月給銀七兩總統辦公薪水月支銀數百兩用公長夫八十名親兵數百名營務處親兵一二百名口糧視各營勇夫此霆軍營制餉章之大略也鮑公告病後楚督奏稱前任浙江提督一等子鮑超頻年轉戰未遑赴任所至輒建奇勳非尋常有功之臣可比其應領任內廉俸及以後爵俸懇由原籍四川藩庫給發他人不得援以爲例得

旨允行

己巳同治八年鮑公續請病假

詔獎之

時四川總督吳公棠節制援黔川軍師久無功欲鮑公出任黔中軍事專員迎至省垣並邀嚴公樹森薛公煥等再三勸駕而鮑公堅以續假請吳公見其體氣猶羸不忍終強據實以聞吳公與將軍文勤公崇實同奉六月十一日寄諭吳棠奏鮑超病已就痊惟精力尙未復元籲懇稍假休息等語鮑超病體痊愈可爲國家宣力深慰厯念伊現由省城回籍休息諒一兩月後必可調理復元著崇實吳

棠傳知該提督卽行來京陛見同時甯夏將軍穆圖善公以甘省南路軍務現乏大員統屬奏請鮑公赴甘專辦一路奉

寄諭南路河狄回匪負隅已久穆圖善以秦州喫緊擬暫撤軍回顧左宗棠接篆後著卽酌量情形權衡緩急次第勦辦穆圖善所請調鮑超帶兵赴甘專顧南路之處著毋庸議已而李公鴻章奉命征黔與曾文正公商起鮑公文正覆李公書有春霆英風壯氣自是一時名將等語並議李公由湘入黔鮑公由蜀入黔銀米子藥由李公給發

已而李公改征秦議遂中止

壬申同治十一年鮑公在籍養病

是年二月初四日曾文正公薨於金陵節署鮑公聞之爲位而哭自胡文忠公卒後鮑公遇歲時伏臘及生辰必設文忠位焚冥楮若干以誌追感文正旣沒鮑公亦循是禮矢以畢生

甲戌同治十三年鮑公在籍養病

詔徵不起金陵設霆慶霆匯等營部將孫開華督辦廈門海防設擢勝營

臺灣爲南洋門戶海禁旣開以來外國舢舨環伺至是日
本人以尋仇生番爲名來犯沿海及長江各口俱爲戒嚴
四川總督吳公棠奉六月初八日

寄諭前浙江提督鮑超著卽行來京陛見吳公遵卽傳知
鮑公並致書敦促起程鮑公覆書云超謬以駑駘之材渥
荷

殊遇未報涓埃前雖因疾引退家居七載而犬馬戀

闕之情固無時不縈懷抱也今者欽奉

諭旨亟應剋日束裝入覲

天顏敬聆

訓誨曷敢稍事逗遛無如久病之體迄未復元實緣往年身受各傷多中要害昔在壯年尙可支持近則血氣漸衰變症百出雖多方調治時愈時發每遇天陰傷痕掣動今夏時覺神志顛倒心無把握而記性太差善忘尤甚據醫者云良由腦頂一傷當年流髓過多以至於此傷病未痊萬難就道現在延醫趕緊調攝恐非倉卒所能就愈焦灼莫名伏望先將下情善爲覆奏一俟病體痊愈卽行請旨陛見斷不敢藉詞耽延自外生成不勝屏營懇禱之至

等語尋經吳公據情入告并稱鮑超秉性忠誠勇略素著
惟傷病未痊係屬實情等語奏入報

聞是時

詔起舊臣八人武臣只鮑公一人與焉當臺灣和議未成
南洋大臣兩江總督李公宗義籌備江防奏調霆軍舊將
提督宋國永曹志忠高占彪總兵羅天貴黃正清募練霆
慶霆滙等營駐守金陵國永字長慶占彪字滙川故以名
營李公蓋欲假鮑公餘威以資鎮懾併以待鮑公之出故
所募新營仍用霆字以提督曾成武知府羅章辦理營務

扼紮於鍾山之陽廈門者福建門戶也與臺澎對峙向駐
有水師提督是年五月閩浙總督李公鶴年以漳州鎮總
兵孫開華係鮑公得力舊將奏令督辦廈門海防事務開
華尋招募勇丁五營曰擢勝營以總兵孫得友蔡立成龔
占鰲副將孫開榮張兆連爲營官以知縣何隆簡總理營
務皆霆軍舊部也開華用霆營家法訓練成軍扼紮南菩
陀連營十餘里已而日本退師開華署理福建陸路提督
乙亥光緒元年宋國永率霆慶營渡江

沈文肅公起任兩江總督將霆匯營裁併霆慶營令宋國

永率之渡江屯紮揚州五台山

丙子光緒二年鮑公在籍拜

賜書宋國永率軍南渡

八月鮑公奉到

御賜欽定勦平粵匪方略勦平捻匪方略各一部具摺謝
恩奏言伏念前者粵西小醜盜弄潢池潁北餘氛游魂河
朔芒銷玉斧詠瓜苦於三年竊踞金陵致蔓延乎數省仰
賴

廟謨廣運

聖武維揚重臣秉鉞以專征壯士同袍而敵愾

兩階舞羽軍聲丕震乎風雲一戰橐弓兵氣盡銷爲日月
爰綜始末

宣付史宬事覈文詳仰

鴻謨於八表

功成治定炳

麟筆於千秋臣束髮從戎起家部曲孱軀負疾息影家山
豈期病廢之餘生尙荷

恩榮之下逮憶廿載隨征之事如在目前慶

萬年有道之休但深頂祝叨陪執轂荷

心簡而未報涓埃志切傾葵捧牙籤而莫名鼓舞奏入報
聞是年鮑公援案請將未封子爵以前所得雲騎尉世職
一一等輕車都尉世職一旣封子爵以後所得雲騎尉世
職一歸併一等子爵計封吏部據例駁之鮑公得以一等
子爵兼一雲騎尉世職時宋國永率霆慶營渡江駐紮鎮
江府寶蓋山沈文肅公密保實在堪任提鎮人員奏稱記
名提督前雲南鶴麗鎮總兵宋國永爲前浙江提督鮑超
部將從前霆營名聞天下其戰事鮑超主之一切營務則

宋國永實左右之秉性廉平爲諸將所信服調紮鎮江以和得民等語

丁丑光緒三年孫開華勦撫台灣番匪平之宋國永移師鎮閩

署閩浙總督文煜公福建巡撫丁公日昌於上年冬奏稱台灣地廣兵單亟宜遴選威望素著之專閩大員統領營勇前赴雞籠淡水等處駐紮以顧北路等語於是孫開華交卸陸路提督篆務率擢勝營東渡赴台北雞籠海口駐紮至是後山中路阿棉納納等社生番變叛迭次戕害官

軍總督何公璟奏令開華親統所部前往會剿九日三捷迭挫兇鋒遂將阿棉納納兩社攻克首惡馬腰兵等亦悉就擒獲訊實駢誅事聞開華蒙 賞穿黃馬褂何公因籌備海防欲多得霆營舊將以壯聲威兩次調宋國永赴閩鎮守俱爲江督奏留至是又經奏調國永於七月內率霆慶營航海到閩駐紮省垣南較場

戊寅光緒四年宋國永卒於軍孫開華接統霆慶營督軍攻剿台灣後山番社平之唐仁廉移駐北塘海口

宋國永自立霆慶營一守霆軍家法抵閩後訓士練兵甚

著聲績何公璟丁公日昌等俱倚重之是年五月以積勞卒於軍江督沈文肅公奏言記名提督前雲南鶴麗鎮總兵宋國永統帶霆慶二營由江南調防福建於本年五月十六日在營病故經閩浙總督臣何璟等會奏請卹奉旨宋國永著交部照軍營立功後病故例從優議卹欽此仰見

朝廷追念前勞優卹宿將之至意凡在戎行同深欽感茲准何璟函稱該提督平生戰績甚多前次請卹時因閩中文卷無從稽查未能詳細聲敘囑臣再爲查案入告以昭

核實查宋國永久隸霆軍迭次赴援江西臣知之較深現又詳加訪問謹將戰功始末爲

聖主陳之咸豐三年鮑超在湖南衡州管帶水師宋國永應募隸其部下攻克田家鎮一役賊礮掀翻戰船能於洪濤巨浪中躍立船背死戰前湖北撫臣胡林翼歎爲壯士是爲該提督立功之始六年調充陸師營官七年進攻小池口破黃梅等處悍賊八年收復麻城黃安等城進規太湖踏平雷公埠石牌賊壘循集賢關直抵安慶是時賊勢方熾一遇霆營無不披靡鮑超一軍名聞天下得宋國永

之助爲多十年收復潛山太湖縣城破賊營百餘座遂由
漁亭進攻休甯大戰於羊棧嶺是時前兩江督臣曾國藩
駐營祁門岌岌可危霆軍縱橫盪決力保祁門惟宋國永
實左右之十一年援剿江西景德鎮破洋塘等處之賊順
師收復建德攻克赤岡嶺四大壘復援江西破賊於豐城
樟樹鎮等處解撫州之圍仍馳回安慶助克省城從此湘
楚各營聲威大振官軍直抵雨花台力擣堅城逆賊分黨
竄擾以撓我軍南岸如甯國青陽銅陵涇縣等城北岸如
無爲州巢縣含山和州等處賊蹤彌漫霆軍奮勇馳擊使

賊首尾不能相顧大小百餘戰宋國永無不身先士卒沖
突重圍三年六月克復江甯省城論者謂非霆營掃除四
出之賊老巢未易克也金陵之將復也賊知不可守冀竄
伏江西延一息之命先以汪海洋李世賢擾撫建鮑超知
之卽移師江西拔許灣克金谿南豐新城瑞金等處追賊
至福建江西全省肅清逆嗣就擒四年馳援廣東克復嘉
應州城五年移師勦捻由鄂入豫追逐襄宛之間六年大
破賊於湖北之安陸等處蓋自咸豐三年至同治六年此
十五年中鮑超營中驍將著名者不可勝計而廉正和易

輯睦軍心無能出宋國永之右者當軍事顛危主將受創
士心惶駭該提督獨能不難不悚全師而臨此其將略過
人尤爲各營稱道勿替同治十三年前督臣李宗義籌辦
海防檄調該提督添練霆慶二營駐防鎮江臣蒞任後因
福建需兵奏明調防冀其永鎮海疆爲

國家備干城之用不意將星遽隕賁志無窮追數前勲不
愧一時名將合無仰懇

天恩俯准將該提督宋國永戰功

宣付史館立傳並准入祀四川湖北霆軍昭忠祠以彰忠

蓋出自

聖恩奏入九月十五日奉

上諭已故記名提督前雲南鶴麗鎮總兵宋國永於咸豐同治年間隨同霆軍轉戰江南安徽江西湖北廣東等省所向有功嗣移師勦捻由湖北馳入河南大破任賴各逆洵屬功績卓著著照所請將該提督戰功宣付史館立傳並准入祀四川湖北霆軍昭忠祠以彰勞勩國永卒後何公等奏令孫開華接統霆慶營七月台灣後山加禮宛巾老耶等社番情蠢動鵠子埔官軍失利何公丁公以軍情

緊急令孫開華兼統潮勇鎮海營前往查辦許便宜行事
開華督各軍用輪船由花黎海口進兵攻入後山之後於
四日內將巾老耶加禮宛等社一概勦平殲番二百數十
名奪械無數番眾悔罪投誠並將姑乳斗玩一名縛獻正
法於是台北三次肅清何公等奏稱孫開華一聞檄調冒
險赴援四日之間連戰皆捷出奇制勝迭破堅巢洵屬謀
勇兼資膽識出眾等語開華蒙 賞荷包搬指等物已而
復署陸路提督率師內渡初唐仁廉丁憂後李公鴻章令
在天津隨辦海防及服闋李公奏稱唐仁廉勇略邁眾訓

練優長隨辦海防督城工均能異常出力又奏稱唐仁廉
統帶仁字三營馬隊駐防津郡新城馬廠等處訓練精勤
驍果善戰等語仁廉尋補授直隸通永鎮總兵李公以籌
築新城礮台試墾海河屯田難易生手未令赴任至是各
工蒞事始令其就近赴任將所部裁併一營帶赴北塘海
口與鎮標練軍合紮南岸新營北塘海口與大沽相爲犄
角爲京畿緊要門戶李公嘗奏稱必須智勇精強望實具
優之員方克勝任及得仁廉駐守倚如長城

己卯光緒五年鮑公在籍奉

恩旨寬免處分

上年鮑公原籍住宅不戒於火奏言臣草茅下士樗櫟庸材仰蒙

聖主特達之知疊拜

天家珍瓏之賜

誥封褒及祖禰

勅諭廣垂訓謨

異數頻頒

恩榮浩蕩臣謝病歸里後卽於宅之東院建造書樓一座

凡屬

恩賞之珍以及

御書福字

誥勅等件皆供奉樓之上層敬謹封誌以防褻瀆而昭慎重乃本年四月十八日因修屋工匠偶遺火於篷上先不知覺迨篋席燒燃延及樓桷煙燄突起眾始得知時工匠先已散去變起倉卒風力又緊寓中人手無多賴地方文武各官齊集力救立即撲滅幸未延燒鄰舍只將宅內書樓燒毀無存其樓上所供

御賞各件搶出過半惟厯奉

勅諭三道

誥命十一軸及疊次所奉

恩旨謝摺

硃批全行焚化伏念臣昔年從事疆場並無片長足錄然
每有微勞必厚膺

懋賞凡

兩朝不世之

特恩皆千載難逢之

曠典方冀傳爲世守用彰

寵眷今以不戒燬於祝融皆由臣分淺德薄不堪承受致此意外之虞辜負

天恩悚惶無地疏忽之咎實爲難辭應請

旨將臣交部議處以爲臣子玩忽者戒奏入奉

旨鮑超著交部議處至是經兵部議奏奉二月十七日

上諭前浙江提督鮑超住宅不戒於火延燒前奉御賞各件著照部議罰俸六箇月准其抵銷該提督所奉硃批未經恭繳該部查照稽遲不繳革職公罪例請旨遵行本屬

咎有應得惟念該提督本屬不諳體制且從前帶兵勦賊著有戰功著加恩寬免八月鮑公接準部文函致丁公寶楨代奏謝

恩並請

飭下內閣將被焚

勅書誥命各件查照原案補給祇領奏入得

旨如所請行

夏軍紀略卷十四終

霆軍紀略卷十五

銅梁陳昌世五編輯

門人吳樹棠全校字

庚辰光緒六年

正月鮑公在籍養病

特詔起之

鮑公自告養傷病以來氣體迄未復元去年十二月兼患
目疾日漸沈重多方調治至是始有轉機二十一日軍機
大臣奉

上諭前浙江提督鮑超著丁寶楨傳旨飭令來京陛見該前提督曾經辦理軍務屢著戰功現在時事艱難需才孔亟務當懍遵諭旨迅速來京不准推諉遲延

二月鮑公在籍籌備入衛

鮑公尙未奉到上月

諭旨卽借用夔州府印具奏云臣昨接閱邸抄並中外來函皆以俄人和約未成恐勢須用兵而各路邊防尤爲方今急務臣受

恩深重感激逾恆雖在籍養疴嘗思效命疆場力圖報稱

今國家多事之秋正臣子致身之日何敢以傷病未愈自
耽安逸更不敢以春水方漲驛路艱難稍有延宕臣擇於
三月初十日由水路起程等語旋又奏言臣於二月二十
四日亥刻已將起程日期由驛具奏在案茲於二月二十
七日准督臣丁寶楨二月初八日由驛五百里咨奉

上諭前浙江提督鮑超著丁寶楨傳旨飭令來京陛見等
因欽此臣跪讀之下感悚難名伏思用兵之道貴能先發
制人臣之舊部自遣撤後已回各省原籍而四川兩湖爲
多兩湖又以湖南爲多從新招集成軍動需時日若必待

臣入都

陛見面聆

聖訓後始行調募則往來道途已逾三月之久深慮緩不濟急致誤事機臣除將川中舊部將弁先行調集隨帶赴楚一面飛飭湖南湖北兩省舊部將弁齊集湖北適中之地已派員前往布置一切一面舍舟登陸由宜昌樊城赴都如途中接奉

諭旨允准臣卽轉飭諸將廣爲招募認真訓練俟臣

陛辭赴楚約計已逾數旬所練諸軍當有成效惟臣當日

統率步隊三十餘營現在擬招步隊三十營除營務處親兵百名外再加招親兵一營共三十一營又當日霆軍馬隊十二營帶吉林馬隊二營共十四營今擬招馬隊十五營總共馬步隊四十六營查向章楚軍湘勇每營五百人原日霆軍虎勇每營六百人口糧則照楚軍章程人數仍照霆軍章程方足以敷分布核算每月共需軍餉一十六萬有奇其餉項銀兩應請

飭下各直省督撫臣委派大員辦理糧臺隨營支發俾臣無經理餉項之責得以專意戎行軍中以火器爲先除守

營大礮外行隊每營劈山礮二桿步隊槍矛各半合算共
需矛頭來福洋鎗九千三百桿後門洋鎗六百桿每桿丁
字火五百馬鎗三千桿六响丁字火短洋鎗五百七十桿
每桿丁字火五百所有洋藥洋火均應廣爲儲備源源接
濟可否請

旨飭下兩江廣東督臣委員迅速採辦解往湖北應用並
請飭下湖南湖北督撫臣俟臣派定統領營哨咨定章程
後尙須發給劈山礮六十桿至於鑼鍋帳棚欵鑱斧鋤旗
幟刀矛等件俱營中必需之物務須先期趕辦以免臨時

缺乏等語又附奏言記名提督直隸通永鎮總兵唐仁廉
勇敢善戰原係霆軍第一驍將可否請

旨飭下直隸督臣李鴻章轉飭該鎮仍舊歸併霆軍之處
伏候

聖裁至福建駐省霆慶二營亦臣舊部素稱勁旅並請
飭閩浙督臣何璟飭令來營聽候調遣如閩省以防守需
人則現署福建陸路提督孫開華亦係霆軍健將久爲台
灣生番所畏服足資捍禦且部下勇將尙多在閩省不盡
恃此兩營而歸併臣部爲一軍則可收指臂之效等語又

附奏言臣請先事調募在未奉

諭旨統兵之前議者或以爲操之過蹙且迹近專擅不知倉卒臨戎兵家所忌有備無患自古爲然此次尙蒙

福蔭不用一兵不折一矢而中夏乂安外洋恭順固薄海臣民所深慶臣所調諸將皆係舊部已飭令自備資斧不難立時遣散萬一邊疆蠢動則防範在先布置周密彼必不能得志等語於二十九日由驛五百里馳奏

四月鮑公補授湖南提督

鮑公自報起程後力疾北上是月二十八日行抵通州奉

旨湖南提督著鮑超補授

五月鮑公入都蒙

召見二次

鮑公抵都寓東安門外法華寺初一日昧爽趨朝見軍機

王大臣於朝房卯正

召入

養心殿之東間

皇上向西坐

孝貞顯皇后在後黃幔之內有內監揭起門簾鮑公入門

三步跪奏稱奴才鮑超恭請

聖安旋免冠碰頭奏稱奴才叩謝

天恩畢戴冠起向上行五步許半對

皇上半對

孝貞顯皇后跪

孝貞顯皇后問你何日動身奏奴才於三月十三日由原

籍四川夔州府起行奴才奏報原係三月十一日起行因

服藥三劑耽延故至十三日始得起行問川省百姓安

否奏督臣丁寶楨操守甚屬廉潔百姓安堵如常問沿

途百姓安否奏仰沾

天恩百姓俱安 問現在年成好否奏沿途年成俱好小

春俱已得收 問你在途走了多少日期奏坐輪船十餘

日沿途服藥耽延水陸計一月有餘 問沿途服藥你有

那些不爽快奏奴才接各路來函傳聞異詞云古北口俱

在開仗俄船已到天津都城告警奴才憾不得一翅飛來

因此夜下繕稿恭報起程日期以慰

朝廷廑念一面函致各省舊部諸將前赴湖北適中之地

等候奴才具摺請

旨招募勇丁是否可行迎摺北上恭候

批示祇遵以免展轉耽延奴才晝夜籌畫眷口等見其過勞勸令稍息奴才以國事如此緊急臣子何忍安閑因此肺脇受寒致成咳嗽掣動舊傷 問你沿途在那幾處服

藥奏在宜昌服藥五劑至天津李鴻章見奴才形容憔悴

留住服藥十餘劑 問你是要緊的人服藥總要審慎是

四川醫士好還是宜昌醫士好還是天津醫士好奏服藥

都覺平常 問到底那箇醫士之藥靠得住些奏李鴻章

所薦醫士之藥似覺平和 問你有幾弟兄奏四弟兄

問現當甚麼差使奏三兄與季弟俱病故了只餘二兄一

人 問現當甚麼差使奏在家未當差使 問是何官階

碰頭奏 曾蒙

天恩獎以記名總兵 問他叫甚麼名字奏叫鮑繼美

問你幾箇孩子奏三箇兒子 問現當甚麼差使奏俱尙

年幼未當差使 問大的箇好多歲數奏現年十九歲

問十九歲可以當差使碰頭奏業已仰邀

天恩賞給二品廕生奴才之意使他多讀讀書再當差使

問你是隨同曾國藩打仗奏原隨同向榮出師廣西追

賊至湖南經曾國藩札調管帶水師隨同楊岳斌將江面

肅清胡林翼札調統帶陸路創募霆軍各營 問你後來

又同曾國藩奏後來又同曾國藩 問你打了好多仗奏

水陸數百戰 問你好聲望奏奴才毫無能爲

天恩褒獎 問你很苦得有奏應效犬馬之勞 問你身

上傷痕現掣動否奏傷痕尙在掣動 問現在咳嗽否奏

尙在咳嗽 問你在京城現服那箇醫士之藥奏服帶來

書辦之藥 問服藥非等兒戲書辦恐靠不住人是大事

你要格外留神奏奴才稍知藥性

太后儘可放心 問李鴻章之醫士尙好你還是要用李

鴻章之醫士奏是 問李鴻章你們至好奏多年舊好

問李鴻章體子好否奏李鴻章雖憂國憂民然善自保養

體子尙好 問李鴻章飲食好否奏曾邀奴才喫過飯李

鴻章喫得雨中碗飯

太后亦可放心 問你的體子醫士總要好生斟酌奏是

少停

孝貞顯皇后說你歇歇遂起自揭門簾退出鮑公尋移寓

宣武門外四川公所觀善堂二十七日請

訓卯刻

召見

孝貞顯皇后問你這到湖南好多路

奏輪船不過十餘日

至湖北由湖北不過十餘日即到任所 問你咳嗽好了

麼有

奏

咳嗽已好

問身上傷痕還掣動否

奏

傷痕已好

諭我靠你們在外頭你須任勞任怨破除情面認真公

事

奏仰體

天恩破除情面認真公事不敢有負委任 問湖南有洋

人否

奏

洋人曾到湖南因湖南百姓聚眾一趕後遂未到

湖南 問你初到京城不知常年今年雨水過多如何是好奏

天恩垂念民間恐雨水過甚禾苗有傷但隔地不同天外省每逢五六月間卻是正當要雨

太后不須過慮 問你到任所奏是少停

孝貞顯皇后說你起因起身退數步復跪奏稱奴才鮑超跪請

聖安退出

六月鮑公航海赴任

初四日鮑公出都仍由天津航海赴湖南新任
七月鮑公在長沙省城籌募勇丁北上

鮑公因起程北上先具疏奏請募勇備戰奉

嚴旨飭停嗣經湖廣總督李公瀚章奏言三月二十六日
鮑超由宜昌搭坐輪船抵鄂與臣晤會據云該提督伏處
山中因伊犁一事傳聞異詞維時奉

召入都一片血誠以爲禦侮非勁旅不可是以先行籌畫
拜疏之後當卽起程迎摺北上原擬俟奉

旨允准後再行開招今蒙

聖訓周詳不勝惶悚所有前次函招舊部鎮將九員現在到楚者僅止三人已令各回原籍此外亦經專函阻止等語李公鴻章亦奏言鮑超奉

旨來京陛見昨已附搭輪船到津臣晤談之頃據稱在籍起程時傳聞邊疆告警一時義憤所迫誠恐措置不及奏請調募舊部及早整備旋奉

寄諭飭令停止立即欽遵飛飭川楚舊部各將安靜回籍並未開募勇丁亦未稍張聲勢仰蒙

聖恩不加咎責轉悔前議之冒昧曷勝愧悚於寸衷臣與

該提督前在軍營共事多年深知其血性忠勇不避艱險
戰功實冠諸將之上此次涉江航海遠道而來晝夜焦思
觸冒風熱肝疾內動舊傷復發加以眩暈咳嗽諸症形神
頗覺狼狽臣勸其暫駐津郡延醫服藥調理俟體氣稍復
卽催該提督赴京泥首

闕廷祇候

訓諭遵行等語此五月以前事也至是鮑公於十二日抵
長沙省城與巡撫李公明墀晤商一切再赴常州本任十
七日載羞楮走數十里謁曾文正公墓忽傳驛騎至鮑公

與直隸兩江山西湖廣湖北湖南各督撫同奉初六日
寄諭前因俄國議約不易轉圜聞有派兵來華藉端挾制
並調撥兵船約八九月間將封遼海之信當經諭令李鴻
章等妥慎防範並令曾國荃督辦山海關一帶海防事宜
以期周密因思沿海地方遼闊防不勝防非有大枝勁旅
居中扼紮相機策應不足壯瀕海之聲援爲京圻之翊衛
湖南提督鮑超久歷戎行聲望素著卽著於湖北湖南等
處選募得力勇丁萬人剋日成軍由該提督統帶乘輪船
北上限八月以前駛到此軍到後應於天津山海關兩處

適中之地擇要駐紮著李鴻章曾國荃鮑超會商妥籌奏
明辦理鮑超新募之軍應需軍火槍械等件著李明墀於
湖南機器局所存洋槍洋礮儘數撥給其餘軍火並著酌
量調撥以資應用所有該軍起行應需餉項卽著李瀚章
彭祖賢李明墀在部撥邊防經費項下如數支給俾利進
行到防後月需餉銀著戶部籌給應用將此由六百里各
諭令知之是時 朝廷恐備禦不及以軍機王大臣辦事
遲延不早振作交各該衙門議處鮑公於二十四日奏言
臣欽奉

寄諭仰見

皇太后

皇上慎重邊防澄清海甸憾未能卽日取道朝發夕至遵卽與撫臣李明墀商議招募務期兵餉歸於實用以節糜費一面飛飭川鄂諸將剋期前往武漢齊集查臣舊部員弁前經遣散者遠近不一川省惟成都較遠已咨商四川督臣丁寶楨酌量發給川資飭令飛速到鄂等候派用凡行師之道練兵必先練將而精選擇用內不避親外不避仇自宜正己化人破除情面認真公事將中選將以期無

負

陛辭時

皇太后

皇上明切告誡之至意臣現在湘省招募十五營其餘八營赴鄂招募俟統帶營哨各官派定齊全飭其一面選募勇丁臣於十日之外迅往湖北精爲揀擇總期速而又速剋日赴津上慰

宸厯臣自密調諸將慎選其才數日以來夜不成寐所慮者俄人陰謀詭計蓄志已久倘或蠢動必挾全力而來十

萬八萬意中事也臣再四思維兵力稍單恐未能一時蒞事則曠日持久糜費更鉅擬請再添十營除親兵三營外共三十營以符當日霆軍步隊之數每路十營陣列三才臣帶親兵三營督隊退者立斬賊勢將敗馬隊由夾縫中突出衝亂賊隊得以五路截殺大挫其鋒庶足張聲威而資調遣惟臣舊部記名提督通永鎮總兵唐仁廉記名提督正定鎮總兵婁雲慶該二員勇略素著實爲霆軍不可多得之員可否請

旨飭下直隸督臣李鴻章轉飭該二員按照霆軍章程數

日就近各招五營俟臣到津歸併調遣該二員印務卽由直隸督臣另委妥員署理又臣所部霆軍向有馬隊三千名可否仍照舊章如數添設庶馬步相輔而行更爲完善現值口馬八月十五日出槽請

旨飭下直隸督臣派員採購馬匹鞍韉由臣揀派統帶營哨各官是否有當伏候

聖裁至遵

旨選募萬人正與湘淮兩軍每營五百人合計二十營之數相符今臣按照霆軍章程仍招募二十營外親兵三營

每營六百人以便分佈爲數稍鉅合併陳明等語奏入後
奉八月初八日

寄諭前有旨令鮑超於湖南湖北兩省招募萬人剋期成
軍北上該提督現在湖南招募十五營俟赴湖北再招募
八營共計二十三營是於二十營之外已添親軍三營且
建軍舊制又係六百人爲一營計一萬三千八百人已逾
萬人之數兵力不爲不厚該提督尙擬再添十營令李鴻
章轉飭唐仁廉婁雲慶就近各招五營歸併調遣爲數過
鉅現在餉需竭蹶支應較難所請著毋庸議該提督當將

現在所募二十三營揀擇成軍統帶北上以期得力李明
墀已將在湘起行餉需籌給鮑超此時計早抵鄂招募完
竣應需軍餉著李瀚章彭祖賢妥速應付並飭招商局整
備輪船駛送催令該提督剋期督率前進毋稍耽誤該軍
需用軍械據李明墀奏洋槍洋礮俱向鄂中採辦添補火
藥一項先向津局取用隨後解還著李鴻章酌量撥給至
鮑超所稱霆軍向有馬隊三千名可否仍照舊章如數添
設著在原募二十三營內酌量改設毋庸添募其需用馬
匹鞍韉著李鴻章派員採購以備乘騎鮑公又附奏請刊

用木質關防以昭信守並以奏報事件奉

旨如所請行時霆軍舊將曾成武客泰州鮑公檄催赴楚
統帶新營成武正嚴裝忽以暴疾卒鮑公痛惜之恤其身
後甚至

八月鮑公至武昌省城治軍

鮑公於初八日在長沙登舟初十日開行是日奏言臣於
七月二十四日已將遵

旨招募大概情形奏明在案當卽密調各路舊部諸將陸
續來湘精選齊備於七月二十六七等日分別札派統帶

營哨各官於八月初三日領齊小口糧分途招募一十五營外添募一營共十六營諭令揀選精壯勇丁勤加訓練恪遵紀律所過秋毫無犯臨敵奮勇爭先以成勁旅上慰宸厯所有鑼鍋帳房鍬鏟斧鋤旗幟刀矛等件已由撫臣李明墀分令趕辦至於步隊所需洋鎗中外所造之後門丁字自來火開放雖屬快利不能耐久且子難合膛請多不便卽洋人用以臨敵數次亦必更換價尤昂貴不如用前門上藥銅冒引火之來福洋鎗價值較廉臣前過天津所見操防淮軍均用英德兩國矛頭洋鎗因其輕靈穩妥

以便打響操演現由湖南機器局儘數撥給前門上藥洋鎗六百四十桿外尙需六千二百六十桿及營哨各官之馬鎗三百桿前已飛商湖廣督臣李瀚章湖北撫臣彭祖賢迅速密飭德國商人將前門上藥矛頭洋鎗如數趕辦以應急需其霆軍糧餉舊章係臣與前湖北撫臣胡林翼酌定原與湘淮各軍有別已將詳細數目另行備文咨覆湘鄂兩省督撫臣轉覆戶部備案至湘省新募各營之小口糧臣與撫臣李明墀及藩司崇福面商每名每日給錢八十文以二十日爲度作爲招募之資俟臣由湘赴鄂點

名成軍後再發給大糧月餉以節中途糜費所需各營大
餉仍與撫臣李明墀藩司崇福籌商因此次新募之師須
於湖北齊軍操練先後乘坐輪船稍需時日必多支給且
天氣漸寒征途甚遠兵勇須添置寒衣寬備行糧如能籌
辦三月之餉則到防或不至於掣肘現在實因湘省庫款
支絀儘力竭奏允給兩月臣責成統帶官記名提督熊鐵
生鄧訓誥向世珍等三員出具各該員本質關防印結承
領後迅將各營率往湖北臣隨帶總理營務處頭品頂戴
記名提督申道發等於八月初十日先行馳赴鄂省與督

撫臣商辦精選招募事宜等語奏入後於二十一日奉到
十二日

寄諭前據鮑超奏遵募勇丁情形當經諭令李瀚章等將
應需軍餉妥速應付整備輪船催令該提督剋期督率前
進現在事機緊迫亟宜厚集兵力以固藩籬鮑超已在湖
南招募十五營其餘八營赴鄂選募此時計早行抵湖北
添募成軍著李瀚章彭祖賢速將該軍應用餉項籌畫給
發一面飭令招商局整備輪船駛送如船隻不敷裝運卽
著該提督統帶十數營先行起程限於八月內到防其餘

各營卽由該提督責成派出將領統帶約束陸續北來不
准稍有遲誤並著劉坤一酌調福建官局輪船及招商局
輪船趕緊馳赴漢口運載此軍以期迅捷二十五日復奉
到十八日

寄諭前因事機緊迫諭令鮑超統帶十數營先行起程限
於八月內到防並令劉坤一酌調福建官局輪船及招商
局輪船馳赴漢口運載鮑超接奉前旨卽趕緊起行第
恐輪船不多往返裝載未免稽遲著該提督會商李瀚章
彭祖賢速卽調集船隻先行統帶十餘營剋日北來其餘

各營如何設法陸續起程並著妥籌辦理總期迅速到防毋稍延緩及九月初一日又奉到八月二十三日

寄諭鮑超奏由湘起程日期一摺該提督於八月初十日
起程前赴湖北卽著會商該督撫將選募五營及一切事
宜妥爲辦理懍遵前旨先行統帶十餘營剋日北來其餘
各營設法陸續起行現在事機緊迫該提督務當迅速到
防以期有備無患不得稍涉遲延八月二十六日鮑公奏
言臣於八月初十日由湘赴鄂長湖風色欠利二十日始
抵鄂省當日接奉

諭旨命將所請馬隊卽在原募二十三營之內酌量改設
毋庸添募仰見

聖訓周詳節虛糜而求實用之至意竊北方地勢遼闊宜
於馬隊敵若潰敗遠颺必須馬隊方能攔截追剿庶馬步
相輔而行可期一戰以挫其鋒上慰

宸厯當與湖廣督臣李瀚章湖北撫臣彭祖賢籌商妥協
裁減左右親兵二營改設馬隊照前摺所請裁半招募一
千五百名其步隊則僅有二十營及親兵一營減無可減
復於八月二十二二十五兩日疊奉

諭旨催令臣先率十餘營限八月內到防不准稍有遲誤並多撥輪船裝載惟是招募勇丁易於齊全造辦軍械稍需時日自臣到鄂省晝夜不遑者三日卽將在鄂所募馬步隊之將領營哨各官精選齊備委令記名提督何紹彩統帶霆軍長勝五營記名提督徐連陞統帶霆軍馬隊正三營記名提督江自康統帶霆軍馬隊副三營飭令迅速開招現在勇丁業已募齊所需餉項臣未到之先督臣李瀚章撫臣彭祖賢早已預辦三月並籌款補足湖南十六營一月之餉惟鍋帳旗幟等件前經飭局晝夜製造臣亦

派各營幫同督催限九月初一日趕齊一半卽日紮營成
軍惟官局輪船經李瀚章彭祖賢連日飭催現趕到海定
輪船一隻臣卽飭徐連陞江自康先統領將營哨各官帶
領兵勇於八月二十八日卽坐此船馳赴天津鍋帳隨後
解到徐連陞等到津後卽令其面謁督臣李鴻章領訖馬
匹鞍韉至銅帽洋藥爲軍中要需輪船向不運載可否就
近飭天津機器局源源接濟運解來營抑或籌撥他處相
應請

旨定奪湖南之十六營已於八月十七十八等日起行臣

令其採辦數月行糧因洞庭阻風迄今未到如值順風已
早抵鄂矣臣急於星火連日飛催如三四日內可到並俟
輪船到鄂卽率數營先至防所如再阻滯卽令總理營務
處記名提督申道發統帶官提督何紹彩鄧訓誥熊鐵生
向世珍等各統率所部陸續星夜北上臣卽搭招商局買
易輪船先行馳赴天津與督臣李鴻章籌商駐防一切情
形可否就近入都面請

聖訓俾資恪守伏候

批示祇遵等語奏入後奉到九月初七日

寄諭鮑超奏酌改隊伍情形請飭接濟軍火一摺著李鴻章遵照疊次諭旨酌量辦理鮑超募勇成軍卽著迅赴防所毋庸來京請訓時李公鴻章察哈爾都統祥亨公等奉八月十四日

寄諭李鴻章奏塞外馬匹必須夏令采購現已八月中旬賣者次第收場勢難零星搜索擬請於察哈爾牧羣孳生官馬內趕緊選撥並擬派記名提督楊安典馳往口外會同揀擇等語鮑超招練馬隊剋日到防需用馬匹甚亟著祥亨分飭商都太僕寺各總管卽於該處牧羣內孳生官

馬項下不必分定成數迅速挑選能戰驕馬三千匹會同楊安典采擇不得以口老疲瘦充數卽由楊安典分起派弁押送進口撥給霆軍應用毋稍延緩

九月鮑公督軍航海北上

時李公瀚章彭公祖賢奏言提臣鮑超忠勇素著此次奉命統軍赴直亟思剋日北上祇因舊部將領散處各省招集需時且兩省所募營勇人數眾多而在湘先募之十六營又以重湖風色不定舟行阻滯未免稍稍稽時日迭奉諭催深爲焦急等語鮑公於初五日奏言臣昨於八月二

十八日將湖南隊伍阻風輪船稍需時日等情奏明在案
拜摺後卽加緊飛催各將領不避險阻於大湖中夜不停
舟九月初四日隊伍已到七營其餘各營日內定可齊集
湖北所募五營亦已成軍所需帳房晝夜趕辦卽日定可
齊全惟各處輪船未到不勝焦灼當卽面商湖廣督臣李
瀚章湖北撫臣彭祖賢飛催輪船運載雖經督撫臣連日
委員催飭但恐一時未能到齊且限期已逾更深惶悚臣
定於本月初六日附招商局輪船先行馳赴天津與大學
士直隸督臣李鴻章籌商駐防一切情形至兩省隊伍卽

交總理營務處及統帶官俟輪船先後到時陸續率領北上決不敢稍涉遲延致誤事機臣到津後可否

飭赴都城面請

聖訓俾資恪守伏候

批示祇遵等語又附奏言臣行營一切事件需才辦理查有請假回籍禮部主事陳昌四川銅梁縣人品學兼優留心時務又丁憂回籍前湖北監利縣知縣黎埏老成練達操守廉潔可否請

旨飭下四川督臣丁寶楨行飭該二員迅速來營以資臂

助等語奏入奉

旨知道了著俟抵津後催令所部各營由輪船速赴洋河口卸載該提督卽行前往督率擇要布置仍遵前旨毋庸來京請訓丁公寶楨奉十三日

寄諭候補主事陳昌前湖北監利縣知縣黎埏均在四川原籍著丁寶楨飭令該員等迅速前赴鮑超軍營鮑公方具奏時奉到八月二十四日

寄諭李鴻章奏查明天津山海關等處地方情形請旨辦理等語天津爲畿疆門戶山海關係東北要隘現在李鴻

章曾國荃妥籌扼紮自可無虞惟永平府屬之昌黎灤州樂亭沿海一帶尙覺空虛該處布置稍疎則天津山海關兩處均難聯絡一氣亟須大枝勁旅馳往屯駐鮑超乘輪船北來卽著統帶各營徑往撫甯境內之洋河口停輪卸載擇要分紮與李鴻章曾國荃隨時會商調度以固畿輔屏藩該提督驍勇善戰朝廷素所深知昨據奏稱已飭各營恪遵紀律所過秋毫無犯等語所奏甚是行軍之要紀律爲先况直隸各屬迭被偏災地方元氣未復尤宜嚴明約束俾兵民得以相安所有該營餉需軍火等項銀兩由

戶部撥給卽著該提督自行派員赴部領用覈實報銷

十月鮑公到直隸防次

鮑公自上月乘坐江表輪船至上海換坐保大輪船航海北行至是月初一日行抵防所初三日奏言臣於九月初六日由鄂起行沿途舟次擱淺二十三日始抵天津當與大學士直隸督臣李鴻章面商駐紮及戰守一切情形二十六日由津赴防一路繞道查看灤州昌黎樂亭形勢惟樂亭縣境地勢較高尤爲各處扼要且泥色堅固便於紮營該處西北距京師四百八十里西南距天津三百六十

里東距山海關二百四十里又東距洋河口一百二十里
南距清河海口五十里東南距老米溝海口四十里又東
南距甜水溝海口六十餘里誠爲適中之地海運糧草亦
屬便易當與樂亭縣知縣王崧翰面商傳集紳士設立發
賣柴草局以資購買據云北方風勁透骨所有帳棚一遇
風雪必然朽爛須牆內另修土牆蓋搭營房方足以禦寒
冷但時近隆冬土膏已凍如以乾土修築營壘已屬暫計
至蓋搭營房則需帶潮之泥延至春暖勢必坍塌必來歲
清明以後土脈稍融方能動土修理現在只可用高粱梗

遮蔽帳棚暫避霜雪再四思維均係實在情形不得不從權辦理臣一面督率將領營哨各官加意操演訓練以成勁旅且臣前於九月初五日在湖北武昌途次接奉

諭旨直隸各屬迭被偏災地方元氣未復尤宜嚴明約束俾兵民得以相安等因欽此臣嚴加誥誡務令恪守紀律秋毫無犯以仰副我

皇太后

皇上軫念民瘼申儆戎行之至意至防守一切機宜隨時偵探與大學士直隸督臣李鴻章山西撫臣曾國荃會商

妥籌總期布置妥協有備無患和衷共濟以上紓

宵旰之憂勤等語奏入奉

旨知道了著仍遵前旨約束兵丁並將防務隨時整頓與
李鴻章會同蒞妥籌辦理先是李公明墀奏綜計實發過
霆軍十六營大小口糧及製造旗幟號衣帳房鑼鍋等項
折價各營赴鄂船價共銀壹拾六萬五千七百四兩八分
至是李公瀚章彭公祖賢奏言湖南提臣鮑超招募勇丁
共計步隊二十一營馬隊六營航海北上前經臣等籌給
餉項及製備軍裝鍋帳一切經費鮑超先行起程並就已

到招商局輪船載勇開行當將辦理大略情形恭摺具奏
聲明其餘營勇俟續有船到亦卽繼進在案查所調招商
局向走北洋之海定海宴富有懷遠漢廣永清利運輪船
七號並准兩江督臣劉坤一飭派威靖兵輪船一號福建
船政大臣黎兆棠調派威遠濟安琛航輪船三號先後來
鄂幫同載運臣等飭該軍分統各員督帶勇丁乘坐北上
各船往返數次於十月二十四日全隊開竣齊抵洋河口
登岸堪以上慰

宸厪至鮑超所募霆軍馬步各營大餉湖北實共發給銀

十八萬八千五百四十七兩又發在鄂招募各營小口糧計共銀四千五百三十兩二錢一分六厘又發製造棚帳軍械器具等項價值合銀一萬七千七百零七兩二錢六分二厘總共銀二十一萬零七百八十四兩四錢七分八厘又發洋槍六千三百一十桿內二千二百桿係向金陵借撥又劈山礮一百零四尊大刀鐵叉各一百把洋藥四千磅大銅帽六十八萬顆並土藥火繩皮紙油燭等件均由該營務處記名提督申道發出具印領赴善後局領解回營散放此外尙有輪船煤炭薪工飯食等項經費現經

飭局先行籌給五萬兩應找之數爲款尙鉅俟與商局結算再行附報伏念湖北餉源本屬萬分枯竭該軍餉項前雖欽奉

諭旨在於部撥邊防經費項下開支而鄂省原奉撥銀二十萬兩除已解京外僅存銀十萬以之發給此項餉需所短甚鉅惟事關捍衛畿疆限期緊迫不得不移緩就急將備陝甘督臣左宗棠西征月餉及各省協餉並挪借商號銀兩湊撥供支以速師行趕於北洋未凍前全隊抵防再鄂省所發霆軍大餉及小口糧等銀應由提督臣鮑超自

行造冊報銷以昭核實而免輾轉等語鮑公尋奏言臣於十月十四日承准兵部火票遞到軍機大臣密寄十月十二日

諭旨俄國議約前以九月爲期該國現請展限兩月等因欽此跪誦再三仰見

聖明洞燭敵情慎重邊防之至意臣所部馬隊各軍自九十兩月陸續取齊駐紮樂亭一帶控制畿疆東南現在梭巡海岸稽查奸宄嚴禁騷擾民情尙稱安謐曉夜督飭將校訓練士卒激發忠義講求山川地勢險要及戰守破敵

諸法無事之日不敢玩寇疏防有事之秋不致怯敵退縮
總期隨時隨地可戰可守今若俄人帖然效順事有轉機
固不必輕啟兵端萬一西漢伯等處任意邀求事多難從
釁自彼開臣百戰餘生受

恩深重當督率將士齊力一心或攔頭迎擊或出奇制勝
必不使敵人輕進一步京師爲根本重地設或有警當卽
督率大隊飛速入衛如力能兼顧天津山海關一帶海口
亦必相機策應斷不敢畫地自守一切防剿事宜仍當虛
衷咨訪會商直隸督臣李鴻章山西撫臣曾國荃和衷共

濟顧全大局以報

三朝參養之恩而副不次

寄託之重至於軍中礮械子藥業經略有儲備柴草則分設五局採買收屯米糧則前由南方攜帶不過可支來年正月誠恐俄人展限計在緩兵萬一出我不意自海參崴毛口歲琿春等處由陸路乘虛東來南北海口必泊兵船梗塞水道士馬萬餘糧運路斷何以爲防勦應捷之資再四思維因咨商直隸督臣李鴻章挪借淮餉十萬兩指領庫款分作今冬明春兩次歸還趁此時南方米價尙賤委

派廉幹人員卽赴兩湖三江產米之區先行採辦足可支應一年一准事機之緩急臨時酌度或由海道或由內地漕河挽運北上俾士飽馬騰臣得以專力制敵似於軍心防務大有裨益又臣所募勇丁皆南方人置之雪海冰天尙未習慣漸值隆冬嚴寒尤堪軫念若不加意撫恤於前使之感激羣思效命他日臨敵何能驅血肉之軀親冒鋒鏑擬請仿照淮軍柴草章程每營於正餉薪糧之外每月另給銀一百六十兩報部核銷以免兵勇自赴鄉村辦採或至擾累民間並擬請預發餉銀俾兵勇置備棉衣及日

用必需之物以期固結軍心惟按照原定章程每月請領庫撥餉銀十萬一千八百四十一兩卽須歸還准餉銀五萬兩所餘五萬兩旣不敷支放一月又何從騰出餉項銀預給勇丁以爲先備衣食之用而臘正兩月封庫開庫又恐稽延軍士懸釜待炊何能稍緩須臾惟有仰懇

鴻慈逾格飭下戶部預撥臘正二三箇月餉銀三十萬五千五百二十三兩臣另備文咨明戶部存案由臣委員領解來營以濟急需至於每營每月另給柴草銀一百六十兩出自我

皇太后

皇上軫念戍卒苦寒之

恩施非臣所敢率請如蒙

俞允卽求

飭下戶部一併發領存案以廣

聖主之仁而收士卒之心惟當此庫款支絀臣具有天良
務當涓滴均歸實用萬不敢浮冒支消虛糜帑項上負委
任等語奏入奉

旨著照所請戶部知道嗣經鮑公派員備文赴部請領尋

據部咨給發本年十二月及次年正二共三箇月餉銀三十萬五千五百二十三兩並加給各營柴草計四箇月零十日銀一萬八千七百二十兩此後月餉按月委員赴部關支

十一月鮑公駐軍永平府之樂亭縣分扼倂城灤州等處

霆軍步隊十六營自上月已陸續到防其最後開招之長勝五營是月初一日亦到鮑公令步隊各營環樂亭而壁徐連陞等在天津領訖軍火旋經李公鴻章所派委員解到察哈爾孳生官馬二千匹曾公國荃又咨送各營戰馬

六百餘匹鮑公相度形勢將馬隊六營分駐去樂亭四十里之倂城九十里之灤州計全軍馬步勇丁一萬四千餘人分爲二十七營以提督申道發總理營務處提督劉順隆總兵陳由立副將黎鴻鈞副之以湖北候補道許世福總理文營務處知府何葆恩何隆簡知縣黎埈副之步隊分爲四軍曰霆軍正五營其統領爲提督熊鐵生營官則提督楊友益蕭連貴總兵羅進春副將臧德曰霆軍副五營其統領爲提督鄧訓誥營官則總兵唐得勝李定明副將羅天德李清彪曰霆軍新五營其統領爲提督向世珍

營官則總兵袁國祥孫玉林李金聲參將吳榮貴曰霆軍
長勝五營其統領爲提督何紹彩營官則總兵謝榮勝洪
容海副將劉車龍蔡文友馬隊分爲二軍曰霆軍馬隊正
三營其統領爲提督徐連陞營官則總兵初發祥皮大霖
曰霆軍馬隊副三營其統領爲提督江自康營官則副將
姜河清韓景廷又親兵步隊一營管帶官爲提督張玉田
其分帶馬步各哨則有提督蔡得勝總兵羅有升何定坤
羅玉成金昌言鄒貴友李維義華占魁王步超劉萬勝劉
大有龍起鳳唐有勝朱開勝喻名揚劉天勝周廷英鄧學

瀛副將聶榮華滿朝貴張正清張壽廷彭勝發殷昌黃綸
祥劉湘麟歐陽凱戴維高傳永貴戴學義耶顯銘石清武
戴恆山潘順隆胡升仕李紀有傳佐廷劉子成戴慶有劉
有恆吳炳辰楊大有鄧起安黎有勝牆明德蕭回元吳起
雲唐發陳金貴許松林秦成亮劉來興劉宏順耶發藻朱
福興劉宏祿陳希忠張貴文唐忠發鮮椿山參將張文貴
胡延慶沈正福閻有貴鄧得勝易定元杜淦何春華鍾明
勝胡泰林廖洪元徐連升王仁壽鍾三元劉河清鄒甫田
瞿通禮楊松山余得江吳西元楊德華樊春林陳金元張

思喜張寶田吳德龍游擊馮文庵鄭國賓侯萬選徐鴻慶
楊定魁譚貴和王有盛王有貴鄔盛鑾熊如松葛明亮鄭
占魁李宏銀向大福鄭得勝蕭承禮歐陽慶陳榮貴張振
榮伍占魁曠安芳王朝武陳顯名楊得勝廖德明譚開益
康有貴湯尙啟范友高胡玉麟楊占清湯登元羅有元譙
宏德陳廷發李保李大本劉咸泰馬占彪陳國勳葛宗貴
朱華曉李迎春都司馬仲良張福亮楊耀盛馬長清彭應
發鄧萬年瞿運寶宋開文楊文煜申光印劉鼐羅會虎史
定國楊光海溫德炳王永壽丁國順劉明信劉鴻裕徐洪

陞劉錦章韋大順王俊作姜維賓蕭宏發吳家愷湯晏清
李寶麟吳萬林華興祥唐明升陳正清唐占魁劉俊高傅
廷樑鄒豐玠臧國安劉長發守備彭德高周源進陳夢熊
王尊海馮德華李福春孫長元鄭柳亭周泰來華壽春余
萬年唐玉明羅思忠楊爲忠千總疏國才等百數十人外
隨營差委提鎮陳超宗等又數十員皆鮑公轉戰東南時
舊部也其各營什長亦多用舊部因材位置內有保列鎮
將者勇丁萬數千人皆係少年精銳各營逐日操練技藝
間日演習隊伍聲勢甚壯自湘鄂開招卽隨時申儆將卒

約束嚴明漢口上海皆外國通商總匯霆軍開拔北上耕
市不驚商民若不知有大兵過境者各國洋人同聲歎服
英國商人某至願獨助餉銀數百萬兩鮑公稱大義卻之
船至洋河口勇丁有違船例附帶火藥致與船主口角者
鮑公命立懲之並革其營哨官樂亭等縣數百年未見兵
革霆軍始至鮑公恐兵士因柴草細故致擾民間乃分設
各營柴草局按市價公買以本地紳耆戶部郎中崔炳文
同知李潤霖等董其事有勇丁擅取民間柴草一束鮑公
命斬之村民以情輕爭代乞免鮑公卒梟犯丁於是士民

益曉然於霆軍紀律之嚴兵民相習耦俱無猜凡飲食日用諸物四方爭販來營交易樂城市塵較未屯兵之時繁盛數倍鮑公乃商之紳耆罷柴草局不設聽兵民自相市易兵得柴草之用民間獲利數倍於平時自 朝命徵兵備俄四方文士投筆而起者爭赴霆軍鮑公設儲才館禮之以道員羅應旒董其事旣而來者日眾又命各營分贍之於是一營官所養文士多者至十數人又商之李公鴻章曾公國荃委紳民舉辦團防以清內匪助聲勢用道員楊嘉善永平府知府陳慶滋董其事於是永平屬境以次

舉行自聞俄警濱海各屬恐敵兵驟至不免馮陵人情洶
洶謀遷避及聞鮑公航海來乃安堵如故是月鮑公又奏
調前雲南廣南府知府靳登瀛來營差委

十二月鮑公巡邊至山海關尋回營次

先是鮑公以敵情叵測來路不可勝防亟宜預備戰守以
顧根本於上月奏言自古備邊之策能守而後能戰能戰
而後能和不可恃其不來當恃我之有備俄人水師鐵甲
已集遼海東洋陸軍已逼琿春海船商賈往來其間者實
見軍容之盛不僅虛聲恫喝也幸而能以理喻或可不卽

興戎儻竟乘虛而來舍戰更無良策臣詳考地勢琿春陸路至威遠門不及千里是爲奉天吉林之關鍵儻或由此內犯則進邊門而拊盛京之背西則由馬千總台出廣甯錦州之後而趨熱河若由錦州循邊牆梨水溝鴨水門而進喜峰口尤深入內地之捷徑也水路由混同江越黑龍江口以入松花江可直抵三姓伯都訥等處儻或以水師來攻則黑龍江非復我有而吉林腹背受敵矣若由奉天南循遼海則金州廳所屬之大凌灣小平島旅順口錦州府屬之天橋廠甯遠州屬之釣魚臺等處皆可泊舟登

岸儻或由此進兵則吉林奉天腹背均受敵矣且天橋廠釣魚台距山海關皆不甚遠儻舍舟就陸超越奉吉防軍之前進喜峰口以達遵化州勢必震動

神京不可不先爲戒備奉天門戶緊要早在

九重洞鑒之中此日委任親賢通籌全局凡有雄關要隘鎖鑰重重竊料

聖慮周詳必已算無遺策自山海關以至北塘海口五百餘里雖防不勝防而李鴻章曾國荃所部各軍分布如常山蛇不難首尾相應臣則秣馬勵兵以夜繼日所挑將領

非隨臣身經數百戰者概不入選臣復親加訓練教以忠義以作其敢死之氣萬一有警無論遠近臣卽親督馬步各軍裹帶乾糧星馳援剿先以保衛京畿爲第一要著儻敵兵由山海關西北各口入永平府屬之撫甯盧龍界內則霆軍實當其衝臣誓當四面截擊斷其歸路必使片甲不返以伸

天討而快人心惟中外情形不同用兵各有長短洋人所恃者鎗礮耳製造之精今日愈出愈奇鎗礮而外別無長技臣向來教戰五成戈矛以鎗礮排列於前卽以戈矛相

間而進兩軍相薄戈矛突出鎗礮之前直撲敵人而敵人
火器雖精無所施其伎倆此霆軍之所長也以我之所長
攻彼之所短不難百戰百勝然而火器不及外洋之利又
必求工力悉敵之鎗礮使其無懈可擊而後吾無所短嘗
聞普法交戰普國火器精良鎗子迭出甚速而法國之鎗
機鈍子遲普遂以弱小之國而倖法之國王一器也而成
敗繫之敢不先事講求以期有備無患臣昨過上海以萬
餘金購有各種洋鎗取其價廉上藥者先令各營操習期
於發無不中考洋鎗中之迅利輕便者莫如馬地利並云

嗜士得兩種電掣雷轟爲行軍第一利器臣擬卽如式購備七千餘枝每枝配帶子藥五百顆價值約二十五六兩合計非實銀十八萬兩不能採辦齊全營中無款可籌惟有仰懇

天恩賞准發撥鎗價俾取精而用宏庶同仇而敵愾明知庫款支絀苟非實在要需敢不力求撙節舉凡貴重礮位自數千兩以至數萬兩者雖利於攻擊臣概弗敢請獨此洋鎗士卒恃以開行陣之先方可用戈矛以攻敵人之短而能制其死命如蒙

俯允可否卽請飭下兩江督臣或於揚州鹽務內借撥實銀十八萬兩由臣委員馳往請領就近在上海香港定購剋期裝運來營以備戰守而免貽誤自古無必勝之兵而有必勝之將往時粵逆捻匪縱橫屠掠海內幾無完土而疆臣及各路統兵大員仰承

廟謨同心滅賊卽臣從事於諸臣之後雖悍驚如四眼狗等臣皆以偏師常破數十萬之衆而能使海宇廓清者氣足以勝之也況今

宮廷自治凡有可以振作者無不立見施行而內外臣工

所以籌自強之策者又皆不遺餘力人心固結士氣弗衰
機會之來時不可失果能得此利器儻俄人輕敵而來則
沿海旌旗一指麾間不難立繫夷酋之頸待其窮蹙乞命
震懾

天威然後許其請和兵可百年不用也事可操券間不容
髮臣非敢以匹夫之勇妄陳於

君父之前誠以敵寇憑陵戎機已露迫切上陳自忘愚昧
等語奏入奉

旨戶部議奏至是戶部於初七日奏言查該提督用軍向

係鎗礮五成刀矛五成所帶馬步勇丁一萬三千餘人約計湖廣督臣前所籌給洋鎗尙足供五成之用茲復奏稱擬採辦馬的利呔啫士得兩種洋鎗七千枝自係爲多籌利器有備無患起見惟洋鎗之種類不一儻採辦不得其人或經手任意浮開或洋人有心欺騙此等弊端近年以來業已層見疊出當此餉源匱竭之時辦理軍需不得不力求核實臣等公同商酌所有該提督請借撥銀兩採辦洋鎗之處擬請

飭下兩江督臣兩廣督臣各派賢員先在上海香港等處

長治縣志 卷之三
認真考校究竟洋鎗以何項名目爲最利價以何等爲公平切實訪查明確據實聲覆再由臣部酌核辦理等語奏入奉

旨依議鮑公於初五日在樂亭營次接奉軍機大臣咨開十一月二十八日由內交出年終恩賞福字一方大荷包一對小荷包二對銀錢二枚銀鏤四錠藕粉三斤白蓮子三斤半百合粉一斤半南棗三斤半荔枝一斤半奶餅五斤掛麪十把祇領訖卽具摺謝恩附奏言臣所部各營因無雨雪所有營壘業經完竣營房改築土牆早已

告成軍士悉免嚴寒露宿臣仰蒙

鴻慈覆庇舊傷並未舉發猶能善飯耐勞諸將士亦皆精壯仰叨

福蔭均無病患自到防數月以來操演訓練已成勁旅如遇強寇皆能身臨前敵共奏膚公臣拜摺後出巡沿海一帶地方便道由山海關與山西撫臣曾國荃會商防守一切事宜等語奏入報

聞鮑公在山海關駐二日卽回樂亭營次是年鮑公部將孫開華仍署福建陸路提督因海防喫緊帶印渡台將所

部擢勝營分紮台北府及雞籠海口曹志忠等統帶靈慶營並增募勇營以備閩海之防唐仁廉統馬步五營駐防直隸北塘海口兼節制煙頭沽練軍春間經吉林將軍銘安公奏調赴吉爲李公鴻章所留至是銘安公以伯力地方俄人極力經營已成重鎮三姓一路江防緊要又奏言直隸通永鎮總兵唐仁廉忠勇性成饒有識略曾爲鮑超先鋒戰無不勝所向有功籲懇

密飭李鴻章仍派唐仁廉來吉親駐姓城總統戴宗騫等馬步各營獨當一面以資鎮懾等語李公尋奏言唐仁廉

素稱驍勇熟習北塘沿海情形憲軍馬步各營分紮樂亭灤州一帶均係通永鎮汎地唐仁廉爲鮑超舊部主客之交賴其照料聯絡且辦理北塘防務數年兵將相習若遽易生手誠恐呼應不靈致滋貽誤等語於是仁廉仍留原防照料憲軍轉運米糧等事極爲周妥

卷十五終

四

建軍紀略卷十五終

選軍紀略卷十六

銅梁陳昌世五編輯

門人吳樹棠全校字

辛巳光緒七年

二月鮑公請假在營養病

自上年俄羅斯以伊犁事起釁中國使臣刑部尙書崇厚
公以違訓越權逮問朝廷復命大理寺少卿龔侯
曾公紀澤使俄人知中國有備仍願修好請罷西安漢
中伯都訥等處通商前議其餘商務曾公與俄國外

部大臣全權大臣等將咸豐元年八年十年同治三年歷次條約及崇厚公所議各節互相校閱議定共得中俄改訂條約二十條議定專條一條陸路通商章程十七條

朝廷降旨允準至是曾公國荃奏將所部山海關防營酌量遣撤鮑公奏言

臣

前因轉戰東南帶傷三十餘處最重

者腦頂左手左肋兩足雖經醫治每值陰雨時常舉發光緒五年十二月忽患目疾於六年正月漸愈惟晴光尙未透明髮髯若有霧氣方期安心調養得以復元旋以時艱孔亟奉

諭旨飭令來京遵卽飛速起行及入覲

天顏渥蒙

垂問傷病臣以時事艱難方思致身圖報畧舉傷痕一處

未敢盡言嗣赴湖南省提督新任

陛辭時又蒙

聖眷垂詢傷痕咳嗽已否就痊當卽面奏已就痊可蓋權詞以慰

宸厪也及抵湖南省垣七月十七日欽奉

諭旨令臣選募勇丁北上限八月以前駛到天津山海關

適中之地擇要駐紮臣遵卽就近調集各路舊部招募訓練剋日成軍疊奉

諭旨飭令迅速北上臣飛催諸將赴鄂會齊該將士等不

辭長湖之險逆風而行夜不停舟臣星夜趕到防所修築

營壘訓練士卒從前目疾本未靜養咳嗽傷痕亦未痊愈到防後感受風寒舊病增劇其時俄事尙未定局恐

朝廷顧念海防時深

厯繫因附陳舊傷並未舉發頗能善飯耐勞以上慰

宸厯昨接大學士督臣李鴻章左宗棠函稱俄事業有成

議等語則防務似較從前有緩急之分臣舊病未痊合無
仰懇

天恩賞假一月在營調理一俟就痊卽當銷假萬不敢久

曠職守現在

臣

所部將領記名提督熊鐵生鄧訓誥向世

珍何紹彩徐連陞江自康均屬謀勇兼優此外營官記名
提督張玉田等二十一員亦屢立奇功百戰驍將其總理
營務又有記名提督申道發布政使銜湖北候補道許世
福皆久歷戎行老成持重該員等隨同臣苦戰十餘年雖
俱未曾任實缺然歷練頗深堪資倚任訓練操防向無疏

虞足以仰副

朝廷慎重邊防之至意等語奏入奉

旨鮑超著賞假一月鮑公因前刊木質關防損壞附片奏
陳另刊文曰湖南提督行營關防得

旨如所請行鮑公於上月二十九日奏言

臣

部各營現今

臘正兩月餉銀并柴草銀兩均已發給齊全惟所領二月
之餉內中已提完借款五萬兩散放二月全餉尙短銀五
萬兩緣上年防務方緊不得不先事籌備因借准餉銀十
萬兩採買軍米期免時憂糧盡是以預先挪用一月之餉

以儲本年之糧今糧則已儲而下欠借款五萬原議今春
歸完何能顧此失彼致誤准餉要需惟部定章程按月請
領若三月分祇能領餉銀十萬一千餘兩旣須清完借款
五萬兩又須補足二月勇餉五萬兩則所領三月之餉除
歸完借項彌補虧短外固已用過無存而應放三月正餉
急切實無着落雖有已買軍米可作抵款又不能全行預
給勇丁卽作一次扣抵餉銀應俟三月運載到營按月發
米逐漸攤扣銀兩方能抵清十萬之款旣須按月攤扣則
應放三月之餉實屬無從挹注且下月又遞形短絀勢不

得不求爲變通惟有仰懇

聖恩飭下戶部仍照上年成案將三四五三箇月餉銀并柴草銀兩歸併一次發給以後請照三箇月一次備文赴部請領庶足以資周轉並免時常請餉驗發道路往返稽延月餘及沿途應付運解車輛接遞之煩等語奏入奉

旨戶部議奏嗣經部議准將三四兩箇月餉銀歸併一次發給以後仍照章按月請領鮑公自到防後以所部勇丁均係南人不慣麪食因派道員唐仁東知府馮會都司余元龍等赴江安一帶採買軍米於鎮江蕪湖等處分設後

路糧台又慮海氛或熾運道梗阻因多籌款項預備全軍
一年食米趲運到營至是仁東等將軍米數萬石分起由
輪船陸續運解到營樂亭灤州倂城三處紮營及操演遊
牧之地多係農田鮑公以時值播種令各將領會同地方
官按屯營地段逐一丈量照常年歲入加重分給租錢每
營計畝合給制錢三四十千文內外由各營官捐備交業
戶分領屯營給地租亦東南用兵時所未有也

三月鮑公續假在營養病旋請赴京叩謁

詔止之

鮑公於初十日奏言臣前請假一月在營調理仰蒙

恩準旋即延醫用藥滿望速痊卽當銷假惟從前所帶頭
足手肋諸重傷損及骨髓流血過多自上年因受風寒帶
發以後時常掣動數月以來力疾治軍失於醫治近雖上
緊服藥而積感已久加以入春肝木正旺火剋肺金咳嗽
迄難遽止目疾亦仍未透明彷彿猶有霧氣非得安心靜
養漸次調治難期速效臣萬分焦灼深懼久曠職守然欲
力疾從公又恐病轉增劇惟有再籲

天恩賞假一月俾得安心調理一俟目疾就痊卽當銷假

一切操防訓練事宜仍當隨時督飭將領等悉心整頓不敢稍形鬆懈以仰副

朝廷慎重邊防之至意等語奏入奉

旨著再賞假一月又附奏言臣從前轉戰東南所部將士

從無吸食洋煙者上年在兩湖招募舊部恐該將士等與

臣相別十年之久或不免沾染習氣當經申警若有吸食

洋煙者據實聲明準與告假不得留營倘或隱瞞一經查出定以軍法從事所募勇丁必認真挑選嗣後如查有吸食洋煙者除將勇丁嚴辦外必將該管將弁治以應得之

咎茲查隨員內有留於湖南儘先補用副將劉有才自咸豐年間隨臣勦辦髮捻同治五年克復廣東嘉應州案內歷保今職此次隨臣到防委派差事尙無貽誤惟吸食洋煙難期振作若不予以懲警竊恐一倡百和惟念該員從前著有微勞未便遽從重典相應請旨將留於湖南補用副將劉有才革職以肅營規而免效尤等語奏入奉

旨著照所請兵部知道鮑公自十五日驚聞

孝貞顯皇后升遐旋即成服率同將校設位於樂亭縣明

倫堂朝夕舉哀行禮二十一日奏言臣恭讀邸抄

哀詔

遺誥驚悉

慈安端裕康慶昭和莊敬皇太后仙馭升遐搶地呼天神
魂飛越痛念

大行皇太后前後臨御寰宇近二十年無日不在憂勤惕
厲之中值時局之多艱每潛移而默運

昕宵勤政佑啟

中興

聖德

神功隆古無比何圖一旦委棄臣民薄海含悲攀號莫及
臣久荷

知遇之隆

倚畀之重上年屢蒙

召對備荷

聖慈垂問傷痕無任感激

高厚生成涓埃莫報遽聞凶耗瞻望

闕廷五中摧裂罔知所措前因傷病未痊奏請續假調理

今銜

恩感泣不能自己應請銷假就近叩謁一展悲慕哀戀之忱恭慰

皇上大孝伏冀

節哀順變隨時珍衛並籲請

慈禧端佑康頤昭豫莊誠皇太后勉抑哀思藉資靜攝速

臻康復以慰中外億兆人民之望至

臣

職任邊防所部將

領皆久歷戎行老成持重尙可分任其責防所去京僅四

百餘里合無籲懇

天恩俯準

臣

匍匐赴京叩謁

梓宮虔申哀悃並瞻覲

天顏跪請

聖訓不勝哀痛迫切待

命之至等語奏入奉

旨著毋庸來京叩謁

五月議撤霆軍馬步十三營餘留防

鮑公於十六日奉到十四日

寄諭鮑超所部步隊二十一營馬隊六營駐紮樂亭一帶

現在防務稍鬆自應量爲裁減以節餉需著該提督於所部各營內卽行裁撤步隊十一營馬隊二營派員分起管帶回籍妥爲遣散該勇丁籍隸湖廣程途較遠自當仍由輪船行走較爲便捷著李鴻章劉坤一卽爲豫備知照鮑超飭令各營陸續起程應需輪船經費卽著李鴻章籌款應付此項遣撤勇丁著鮑超責成統帶各官嚴加約束毋任沿途逗遛俟到籍後並著李瀚章彭祖賢李明墀督飭地方官一體彈壓照料毋令滋生事端所撤各營月餉應如何覈給之處著戶部妥籌辦理其軍火器械著李鴻章

派員點收存儲備用至現留之馬步各營仍著鮑超督飭認真操防毋稍懈弛將此由五百里各諭令知之尋經戶部奏稱臣等查該軍全營餉需已領至五月分計日應扣至六月初六日爲止此次遣撤馬步各營勇丁遵由輪船行走以歸便捷沿途自無阻滯之虞臣等公同商酌此項遣勇路費應照所領月餉數目按日核給凡遣回湖北者每名酌給十日路費湖南程途較遠每名給二十日路費至各該勇丁歸籍以後猶恐一時不能驟圖生業難免游手好閒合無仰懇

天恩按名寬給一月月餉俾挈有餘資得以從容各謀生理不致別滋事端臣等欽承

恩命妥籌辦理允宜推廣

皇仁格外優加調劑該提臣尤當上體

聖慈卽將領到撥款核實散放並先行出示曉諭闔營宜布

朝廷德意務使各勇丁咸與聞知俾得均沾實惠如蒙

俞允應由臣部飛咨提臣鮑超遵於奉到此次

諭旨之日起趕緊分起陸續遣撤責成各該統帶官沿途嚴

加管束不准任意逗遛生事其應發路費暨加給月餉等

項卽由臣部在於邊防經費項下提銀八萬兩發給該提

臣承領查照部議除應領月餉發至上船之日截止外鄂

勇每名加給四十日餉需湘勇每名加給五十日餉需均

於臨遣起程之日按名給領仍令卽將第一起所遣官兵

各若干名先期行文知照直隸兩江湖廣各督臣湖廣湖

北各撫臣俾資預備並令該提臣將某起遣歸鄂勇若干

名湘勇若干名應給路費若干日計銀若干兩並一月餉

銀若干兩分晰總散數目開單咨報臣部備核至現由部

庫提撥銀八萬兩將來或用有贏餘或尙有不敷應令該提臣統俟將所撤各營遣散完竣後彙總造冊報部以憑銷結若有餘賸卽令留抵月餉或稍未敷用再由臣部撥帑找補以清款目嗣後每遣一起卽應先期知照一次務令分起分款隨時先行分咨各路不得於事後籠統開報俾昭詳慎再所給各勇丁路費月餉應令按日扣算查該軍全營月餉係領至六月初六日爲止此次所遣馬步各營兵勇凡在六月六日以前離營者應將其浮支餉銀按日扣抵路費並加給月餉如離營在六月六日以後亦應

按日核計將其在營之日應領月餉分別補放統由該提
臣轉飭管理糧餉委員悉心核算清楚按人發給開列清
單送部查考此後該提臣所部尙存步隊十營馬隊四營
所需餉項應令照核減實數按月具文請領等語得

旨依議鮑公於十七日奏言臣自防務稍鬆卽擬奏請撤
防以節帑項適傷病舉發未卽陳請旋值

孝貞顯皇后大喪不敢冒昧竄陳茲欽奉

諭旨遵卽於馬步二十七營之中酌核裁撤統領官記名
提督何紹彩暨營官劉車龍蔡文友謝榮勝洪容海所管

帶之步隊長勝五營又統領官記名提督向世珍暨營官吳榮貴孫玉林袁國祥李金聲所管帶之新五營並副後營營官李清標所帶步隊一營共步隊十一營又馬隊營官初發祥姜河清所帶馬隊二營統計馬步十三營責成該將領等各將管帶勇丁嚴加約束由輪船裝遞回南安爲遣散無任逗留滋事以期仰慰

宸厯所有馬匹軍火器械飭令各營點交大學士直隸督臣李鴻章委員驗收存儲惟遣撤馬步員弁勇夫至十三營之眾自應遵

旨派員分起管帶陸續起程該營員等清釐經手未完事件及點交馬匹軍火器械候輪船次第裝運行走均不免有需時日約在七月方得將奉裁各營一律遣撤起程其六七兩月餉項仍請照常給領至勇弁回籍雖蒙

恩施諭令南北洋大臣豫備輪船而行至湖北漢鎮尙須

自雇民船乘坐前往

臣

去年秋季在湘鄂成軍招募員弁

勇丁各省人民皆有其中籍隸四川湖南者尤多現值江水泛漲船隻上駛節有阻滯耽延若由陸行途費更鉅合無仰懇

天恩俯念士卒艱苦可否賞給閏七月八月全餉以作川資俾無在途匱乏各得回籍歸農出自

逾格鴻慈至奉留步隊十營馬隊四營

臣

仍當督飭認真

訓練操防萬不敢稍有懈怠除俟所撤各營陸續起程完竣再行具奏等語是時尙未接到部咨也奏入奉

旨覽奏均悉昨據戶部議覆遣撤霆軍事宜所撤各營月餉發至上船之日截止鄂勇每名加給四十日餉需湘勇每名加給五十日餉需已足以示體卹該提督當遵照部議妥爲辦理覈實散放

七月霆軍已撤各營分起回南

鮑公奏言

臣

委員赴部請領月餉川資銀兩於六月初三

日解到防營悉心核算遵照部議除十三營應領月餉發
至上船之日截止外鄂勇每名加給四十日餉需湘勇每
名加給五十日餉需有籍隸四川者亦照湘勇發給均於
臨遣起程之日按名覈實散放俾一體實惠均霑自六月
十五日起准大學士直隸督臣李鴻章飭招商局先後派
到海定日新海晏永清興盛鎮東各輪船駛至撫甯縣屬
之洋河口分起裝運逕至湖北漢口停輪再由民船遞送

回籍茲各輪往還兩次所裁馬步十三營陸續乘坐開行
已於七月十五日一律遣撤完竣共放月餉路費銀十萬
九千八百七十八兩零勇丁等挈有餘貲可謀生業莫不
歡欣鼓舞感戴

天恩離營之後據各員途次來稟均稱咸遵約束實屬安
靜足以上慰

宸厪至所遺馬匹軍火器械等項已由督臣李鴻章派員
點收存儲等語又奏言臣前摺擬裁步隊長勝五營新五
營副後營馬隊二營因期精益求精復合所部二十七營

詳加挑選除長勝後營一營步隊全撤外餘步隊二十營
每營各挑撤一半馬隊六營挑裁二營仍符遵裁馬步十
三營之數至所留馬步十四營既於各營勇丁均有選留
應仍責成原統領營官等分帶庶情志相孚操練一切堪
資熟手除有原省咨調回標及因事故請假者餘皆飭令
管帶撤勇分赴湘鄂妥爲遣散後仍回防營督同訓練操
防更爲得力每月餉需仍照馬步十四營請領以節帑項
惟與前奏裁撤稍有變通之處理合附片陳明等語奏入

報

聞又奏言

臣

上年成軍時咨調布政使銜湖北候補道許

世福分省補用知府何葆恩運同銜前湖北監利縣知縣
黎埤湖北分缺先補用府經歷周文亨到營檄委管理軍
餉事務當在湖南湖北善後局承領餉銀三十萬兩除放
各營兩月行糧外餘由海運到防放訖嗣每月軍餉該員
等赴部請領解營散放迄無貽誤今已一年合計海運陸
解共餉銀一百餘萬兩伏查海運例每屆督運漕糧准予
循案保獎又解餉至十萬兩亦准予獎勵茲該員等既涉
重洋之險又按月赴部請領積有一歲之勞共解餉至一

百餘萬兩實屬尤爲出力合無仰懇

天恩俯准照海運解餉例可否將布政使銜湖北候補道
許世福給予二品

封典運同銜湖北監利縣知縣黎埏仍留湖北補用湖北
分缺先補用府經歷周文亨俟補缺後以知縣用分省補
用知府何葆恩

賞加鹽運使銜以示鼓勵等語

奏入奉

旨吏部議奏嗣經吏部將許何周三員議准黎埏一員議

駁鮑公復專摺敘其勞績奉

旨黎埏著照所請獎勵該部知道

閏七月全撤霆軍

鮑公與李公鴻章等同奉

寄諭鮑超所部各營業經裁撤馬步十三營分遣回籍其
現在留防各營自應全行遣撤著該提督卽行派員分起
管帶回籍妥爲遣散仍由輪船行走以期便捷著李鴻章
劉坤一彭玉麟卽爲預備知照鮑超飭令各營陸續起程
應需輪船經費仍著李鴻章籌款應付鮑超務當責成統

帶各官嚴加約束毋任沿途逗遛到籍後並著李瀚章彭祖賢李明墀督飭地方官一體彈壓照料毋許滋生事端各營月餉仍照戶部原議章程妥爲辦理覈實散放以示體恤其軍火器械並由李鴻章派員點收存儲備用鮑超侯遣撤諸事一律完竣卽行來京陛見鮑公尋奏言臣於光緒七年閏七月十六日承准兵部火票遞到軍機大臣字寄閏七月十四日奉

上諭鮑超所部現在留防各營自應全行遣撤等因欽此臣卽恭錄轉行各營一體欽遵並傳統領營官面飭集齊

軍械等項俟大學士直隸督臣李鴻章派員前來點交存儲勇丁等各理行裝聽候遣撤惟去歲到防佈置營座濬濠築壘皆租民間地畝按段給以重貲足倍耕穫之息今全軍旣撤自應飭令勇丁填平二十七營溝壘歸還原地以便耕種免妨農業臣一面飭各營督率工作一面委員赴部請領月餉川資銀兩一俟溝壘填平餉需解到卽按名覈實散放責成統領官熊鐵生鄧訓誥徐連陞江自康營官張玉田羅進春蕭連貴楊友益唐得勝李定明吳榮貴臧德皮大霖初發祥韓景廷羅天德蔡文友黎鴻鈞陳

超宗王有明汪占魁等分起管帶陸續拔營乘坐輪船逕至漢口分別湖北湖南四川各勇原籍妥爲遣散沿途嚴加約束務期一律安靜以慰

宸厯伏念

臣受

恩深重雖捐糜頂踵莫報涓埃自去歲成軍以來虛糜多餉毫無微勞撫衷循思實深惶悚乃蒙

鴻慈參養

恩推士卒

體恤周至此次遣撤仍照戶部原議章程寬給路費月餉

俾各勇回籍挈有餘資得以從容自謀生理前既
實惠均沾茲復

隆恩再沛閭閻歡忭銜結同深

臣

尤感激無地惟有益加

策勵督同將領訓勉士卒出則同仇敵愾歸則守分安農
各懷忠義之忱毋蹈惰游之習以期仰副

高厚生成之至意謹俟全軍遣撤完竣

臣

卽遵

旨赴京泥首

宮門跪請

聖訓奏入報

聞

八月鮑公撤防事竣遵

旨赴京

鮑公奏言八月初十日據請餉委員由戶部領解月餉川

資銀兩回營

臣

卽遵照戶部原議章程覈實散放除正餉

外鄂勇每名加給四十日餉需湘勇每名加給五十日餉

需其籍隸四川者亦照湘勇發給各營軍士莫不感戴

皇仁惟此次川湘勇丁太多

臣

飭令管餉委員核對名冊

籍貫分別明晰以杜浮冒自八月十六日起拔營次第開

行准大學士直隸督臣李鴻章飭招商局分派海定海晏
永清懷遠鎮東興盛日新各輪船駛至撫甯縣屬之洋河
口陸續裝運仍逕至湖北漢口停輪再由民船接遞勇丁
各回原籍至八月二十八日馬步十四營已於樂亭縣防
所一律開拔完竣第查輪船尙未到齊已開之副中副左
及親兵等營尙駐洋河口靜候裝運該弁勇等均屬安謐
臣復派營務處前往彈壓照料並飭統帶各員嚴加約束
務期妥遣歸農仰慰

宸厪至馬匹軍火器械及臣自辦洋鎗等項均點交督臣

李鴻章委員收儲各營溝壘悉經填平歸還業戶茲定期
於本月二十九日自樂亭縣起程欽遵

前旨入覲

天顏跪聆

聖訓伏念

臣

傷病餘生叨蒙

累朝恩遇之厚不禁感激涕零現恭值

孝貞顯皇后梓宮永遠奉安

臣

應請隨同叩送稍伸犬馬

哀慕之忱等語

又奏言

臣

部下管理營務處陝甘題補提督申道發於同

治元年克復安徽青陽縣城二年復西河左膀左胯各受礮子傷三年援江西踏平許灣賊壘右膀受矛傷又記名提督張玉田於同治元年克復安徽青陽縣城左臂斷筋傷骨統帶馬隊正三營記名提督徐連陞於咸豐九年攻剿安徽之祁門大楓嶺髮逆右膀受礮子傷穿透膀背咸豐十一年進攻江西豐城縣西北岸髮逆右腰受矛傷馬隊正中營左哨官湖北補用參將樊春林於咸豐九年克復安徽婺源縣左腰受礮子傷入骨未出同治四年攻剿嘉應州平城鋪髮逆右手腕被洋鎗子穿過馬隊正中營

中哨官湖北補用參將陳金元於同治元年克復安徽青陽縣左手食指被礮子打落同治二年在安徽甯國府麒麟山打仗右膀受傷又遊擊銜留川補用都司巫山營把總龍玉書於同治三年攻克許灣左手被礮子打傷骨斷筋縮該員等各受傷處均於當時報驗在案上年臣調赴防營因前傷筋骨折損流血過多難以挽強命中據該員等先後稟懇奏請邀免騎射等情前來臣復逐一查驗傷痕屬實伏查隨營打仗受傷人員例得奏免騎射合無仰懇

天恩俯准提督申道發張玉田徐連陞參將樊春林陳金元都司龍玉書六員免其騎射以示體恤之處出自

鴻慈等語又奏言

臣

上年成軍咨調舊部四川候補副將

黎鴻鈞等十二員當以川省程途較遠咨商督

臣

丁寶楨

酌發川資銀兩曾於在楚馳陳遵

旨選募勇丁摺內聲敘在案又調四川夔屬各營弁兵武

茂林等六十一名及湖南提撫各標并長沙協兵丁包長

春等八十三名均經各該省督撫分別發給行裝銀兩先

後到防嗣准四川督

臣

丁葆楨湖南撫

臣

李明墀各咨稱

該員弁兵等領支川資行裝銀兩未經奏明礙難報銷應於師旋後按發該營兵餉內分年扣還各等因准此茲值撤防各回原省伏念該將弁兵丁等歷數千里跋涉之勞爲

國家效邊防之力其勤事亦屬可嘉合無仰懇

天恩飭下四川湖南督撫_臣免扣各員弁兵丁川資行裝銀兩由該督撫照數報銷以示體恤出自逾格

鴻慈等語又奏言_臣上年督師北上行經上海見各種洋鎗精利借款購買曾於到防後請豫備戰守摺內奏明在

案查承辦各委員均無違誤惟記名總兵李國珠去後延玩逾限屢經檄催除解到洋鎗丁字火等項實付價值運費外該員侵虧銀三千七百餘兩經臣委提到營訊供虧用屬實就近發交樂亭縣看管勒限追繳該員一味狡展伏查軍火爲營中重件該員領款採辦違逾限期並侵虧銀數至三千七百餘兩之多實屬有干軍法惟該員昔隨臣轉戰東南屢著戰功姑援已往之勞績猶冀將來之自新請

旨將記名總兵李國珠暫行革職查該員係湖南長沙縣

人除由臣咨行直隸督臣轉飭樂亭縣將該員遞解原籍
應請

飭下湖南撫臣行司轉飭收押嚴追等語奏入俱得

旨如所請行又奏言再臣正束裝將行間據營務處申道

發查獲私刊印信關防匪犯田根樹一名搜出偽造部照

一張並前大學士兩江督臣曾國藩前西安將軍多隆阿

大學士前閩浙督臣左宗棠前江西撫臣劉坤一及臣札

文功牌等件一併稟繳前來臣當卽提訊據該犯供稱係

湖北蒲圻縣人所有各件文札委係偽造蓋用關防信印

亦係摹倣私刊意圖騙賣獲利是實臣隨查僞造文札中有同治四年克復廣東嘉應州霆軍保札一件內註藍翎知縣田根澍加知州銜遇缺儘先前卽選並換花翎字樣臣檢查克復嘉應州原案底冊並無田根澍之名且嘉應州出力文員係臣自行保奏札中開係咨送閩浙督臣左宗棠彙保年月亦不相符其爲僞造毫無疑義究詰私刊各關防印信該犯供稱被同夥之李維錦攜逃不知去向伏查假冒職官私刊關防印信僞造部照文札圖騙人財大干法紀該犯膽敢妄爲難保無夥犯在外四處騙賣招

搖當傳署樂亭縣知縣靈沛飭差緝拿又獲該犯供出之
李易一名亦起獲僞造會國藩左宗棠及臣文札除將田
根樹李易兩犯並僞造部照文札各件發交樂亭縣再提
該犯等研訊並咨直隸督臣李鴻章轉飭所屬各府州縣
一體嚴緝該犯李維錦等歸案澈究照律擬辦以示懲儆
外理合附片陳明奏入報

聞鮑公以南勇屯戍海濱易染疾病恐南北異宜失於調
治到防時卽於營次設立官藥局選派南人之精通醫理
者分董之并籌款數千金自遠購備各種藥材專供各營

軍士取用其局至是始撤自去歲在湘鄂招軍念昔年從
征東南舊部陣亡者其家屬多貧苦不能自存無以勸後
因商同各營將官公捐一款名曰義奏銀專以攸助陣亡
員弁家屬按官階大小爲差分給其家月致數金十數金
不等及遣撤防營始停給鮑公於本月初奏言竊惟

曠典褒忠各殷致敬於桑梓匹夫徇義皆得附祀於春秋
所以慰忠魂勵士氣

恩至渥而意至深也臣於同治五年以將士情殷報効願

捐銷厯年欠餉二百餘萬兩請

旨飭下四川湖北湖南三省督撫臣於各該省城並夔州府城均建立建軍昭忠專祠及加廣四川文武鄉試中額夔州府奉節縣學額以昭激勸等情具奏奉

旨允准飭由臣咨明各該省督撫遵照辦理旋戶禮兵三部會議請建專祠一節查軍興歷年各處奏請建祠均係本家本籍自行捐建原以干城之選卽閭里之光惟該軍業已竭忱報効自未便再令捐貲請

旨飭下四川湖北湖南各督撫並轉飭夔州府縣官迅卽倡率本處紳富勸諭量力捐建建軍昭忠祠以光志乘祠

成並由各地方官春秋祭祀以隆脾蠶等因會奏奉

旨依議欽此咨行到

臣

復轉咨川楚各督撫

臣

一體欽遵

在案今閱十餘年之久惟四川湖北省城先後建有靈軍
昭忠祠而湖南及夔州府尙未庀材鳩工伏念該故員弁
士卒昔隨臣轉戰東南十有餘年或衝鋒陷陣以突重圍
或逐北追奔而忘深入或攻克堅城要隘前者尸積在地
後者踐尸而登縱力疾忍饑饉傷徧體而一片血誠猶復
於礮石如雨之中爭先奮勇卽文案各員均能視死如歸
舍生取義其捐軀報

國之心至今凜然如見統計厯次陣亡六千餘人現四川湖北落成之祠雖普列銜名姓氏同歆饗祀而考其本籍尙有闕如細繹部議干城之選卽閭里之光則夔州湖南兩處專祠未便聽其久懸且臣督率戎行每以生榮歿顯鼓勵將士用能作其忠勇之氣合無仰懇

天恩飭下四川督臣湖南撫臣欽遵

前旨辦理或勸捐爲難卽另籌款項迅於夔城湘省擇地建修務期規模宏敞庶可按名列位祠成仍飭地方官春秋祭祀以妥忠魂則死者增銜結之私氣作河山而効悃

生者昭激勸之意心傾葵藿以抒忱等語奏入奉

旨著各該督撫查照奏案卽行籌款辦理該部知道

九月鮑公入都蒙

召見二次尋赴任湖南

鮑公於九月初四日到京初五日詣

宮門請

安

慈禧皇太后召見

垂問從前戰蹟及此次招勇撤軍語最周詳出詣

觀德殿叩謁

孝貞顯皇后梓宮初九日

梓宮奉移

山陵同京中各文武大臣在東直門外恭送十二日請

訓蒙

皇上垂問周詳又

諭以到任務須任勞任怨十六日出都取道天津赴任及抵天津兩次請假調理俱得

俞旨明年二月行抵湖北奏請開缺回籍調理

詔慰留之

霍將軍紀略卷十六終